



46056/2/2



E. BARCLAY-SMITH, M.D.

*Dupl*

L/O







JO: DOMINICI SANTORINI  
*ANATOMICI SUMMI*  
SEPTEMDECIM TABULAE

QUAS

NUNC PRIMUM EDIT ATQUE EXPLICAT

IISQUE ALIAS. ADDIT

DE STRUCTURA MAMMARUM

*ET*

DE TUNICA TESTIS VAGINALI

*MICHAEL GIRARDI*

*IN REGIA PARMENSI UNIVERSITATE ANATOMES*

*PROFESSOR PRIMARIUS*

*ET CAESAR. LEOPOLD. CAROL. ACAD.*

*NATUR. CURIOS. SOCIUS.*



PARMAE

EX REGIA TYPOGRAPHIA

CID. MDCC. LXXV.



*FERDINANDO I.*

*HISPANIARUM INFANTI*

*PARMAE, PLACENTIAE, ET VASTALLAE*

*D U C I*

*Ec. Ec. Ec.*

*MICHAEL GIRARDI.*

*P*erelegantes hasce, atque accuratas, Augustissime FERDINANDE, Santorini Anatomici Summi Tabulas laboribus meis explicatas, et auctas in lucem hominum emissurum, duo me prae

caeteris jucundissime oblectant; tum quia mihi concessum fuerit Tuo illas praeclarissimo Nomine cohonestare, ac munire; tum quia licuerit meam in te gratissimam voluntatem hoc qualicumque testimonio publice comprobare. Id sane utrumque maxime in votis habui, quo me primum tempore ex celeberrima Patavina Academia tantillum hominem in hanc Tuam Musarum sedem honorificentissimis conditionibus evocasti, in qua et caetera quidem omnia summo splendore, ac dignitate efflorescunt, et Ars Medica, atque Chirurgica usque adeo eminent, ut Parma jam nil propemodum habeat, quod sive Hippocrates illos Graecis, sive Latinis Celsos invideat. Quod si saluberrimae hujus regionis amoenitati, quae vivida, atque solertia ingenia progignit, et optimae tradendarum disciplinarum viae, ac rationi magna ex parte referri debet acceptum; tamen id, quod maximum est, a Tua Sapientia, atque Munificentia profectum esse, nemo unus, qui non sit omnium rerum omnino rudis, atque imperitus, in dubium vocare audeat. Et sane praeter amplissima praemia quotannis constituta eximiis ingeniis, quae sive in Pictura, Sculptura, Architectura, sive in re Tragica, et Comi-



ca caeteris palmam praeripiunt, lectissima, et copiosissima Bibliotheca, instructissima omni formarum genere ad miraculum usque Typographia, bonarum Artium incremento excitata splendidissima Academia, Archigymnasium instauratum, ac tribus Theatris Anatomico, Physico, Chymico magnificenter locupletatum, quantum Tibi Artes, quantum Litterae debeant, luculentissime palam faciunt. Accedit excellens illa animi Tui beneficentia, qua juvenes bona indole praeditos, eosdemque pietati, studioque addictos complecteris, exquisitaeque eorum institutioni sive in patria, sive apud exteras gentes Tuis sumtibus consulis, ratus pro singulari quo polles ingenii acumine et Imperii gloriam, et Reipublicae utilitatem, hac re potissimum contineri. Magna quidem haec sunt ad Nominis Tui decus, atque celebritatem; illa vero multo majora, quae nisi mihi a Tuae Modestiae severitate cavendum esset, fusiore stylo persequerer, integerrimus Religionis sanctissimae cultus, ac studium, animi magnitudo in adversis, in prosperis moderatio, mansuetudo, clementia, caeterarumque virtutum nobilissimus comitatus. Quarum quidem praestantiam satis abunde produnt

*et quae Tu ipse per Te moliris, et quae per Viros lectissimos, sapientissimosque, quibus a Te providentissime summa rerum commissa est, administras. His itaque praetermissis, id unum etiam atque etiam oro, obtestorque, ut Opusculum hoc, non illud profecto tale, quale ipse velim, sed quale per vires, ac temporum vicissitudines licuit, aequi, bonique facias. Quod si Tu quidem pro ea Sapientia, quae in Te summa est, Auspiciis Tuis haud omnino indignum existimaveris, caelum mihi videbor digito tetigisse. Faxit Deus Optimus Maximus, ut Te, Praestantissime Princeps, acceptissimam, munificentissimamque Conjugem Tuam MARIAM AMALIAM, dilectissimam Prolem Vestram, quorum me totum fidei, praesidioque committo, diutissime incolumes tueatur.*

# AUDITORIBUS SUIS

M. GIRARDI.


*E*n, Auditores optimi, Santorini Tabulas multo illas quidem vulgatas serius, quam putassem. Quaenam hujusce cunctationis praecipuae causae fuerint, neminem vestrum latere arbitror, quem non lateat, quam saepe fuerim per hosce annos adversa valetudine conflictatus. Etsi enim solemnibus, publicisque muneribus, quae non parum temporis, ac laboris sibi vindicant, defuerim nunquam, ea tamen me haud semel nondum viribus reparatis obiisse, testes humanissimi adfuiistis. Quod igitur citius praestare non potui, nunc tandem eas vobis exhibeo, atque usui vestro ex animo addico. Ad neminem certe, quam ad vos, hae Tabulae magis spectare videntur, quorum potissimum gratia labores mei suscepti sunt, praesertim cum quantum operae impenderim, ac quot hominum corpora privatim, & publice secuerim, ut singula diligenter recognoscerem, non solum persaepe ipsimet vestris oculis videritis, sed interdum etiam, ubi occasio ferret, vestram in cadaveribus explorandis, non absque summa Tabularum Santorini admiratione, humanissime operam praestiteritis. Quapropter hasce editurus, neque vigiliis, neque laboribus peperci, ut quantum fieri potuit, dilucide, ac rationibus vestris accommodatae prodirent. Quae per varias dissectiones explorata habuimus, quaeque sentimus, nullo nisi veritatis ornatu co-



*honestata ingenue proferemus, ita sane ut nos & ea sine pertinacia defendere, & sine iracundia refelli parati simus. Quantumcumque ego pro virili praestiterim, tamen magnopere vereor, ut omnia omnibus satisfaciant. Si vobis accepta fuerint, si studiis vestris ineundis, ac prosequendis aliquid afferant adjumenti, id mihi erit apprime jucundum, atque animum addet, ut quaedam alia, quae jam in manibus habeo, ad Naturalem historiam spectantia publici juris faciam. Civibus, Patriae, Vobis ipsis diu feliciterque vivite, ac valete.*








## PRAEFATIO.



Venetiis praeclarissima Urbe, ac liberalibus disciplinis, doctisque Viris perpetuo florentissima Joannes Dominicus Santorini anno AErae Christianae 1681. VIII. id. Junii natus est. Patrem habuit Petrum Santorini Pharmacopolam, Matrem Paulam Mazengo, quorum alter ortu, ac domicilio Venetus erat, altera etiam origine. Sunt qui exordia Santorinae familiae e Spilimbergo Istriae Oppido reputant; at multo probabilior illorum opinio est, qui eam ex insula AEgaei maris, Santorini nomine nuncupata, profectam esse contendunt. Petrus quidem Dominici Pater primus fortasse, & unus e gente sua, negotiorum suorum causa, Venetiis Spilimbergum migravit. Dominici Avus Joannes armorum studio inflammatus, Venetae Reipublicae castra secutus est, in quibus fortiter, constanterque decertans, tanta cum laude e vita decessit, ut Venetorum Senatus in ejus gratiam honorificentissimum Petro Filio Decretum concefferit (a).

Joannes Dominicus jam a puero non levia prodidit eximiae cujusdam indolis argumenta. Mire enim inter aequa-

A



(a) Haec ex Epistola Petri Santorini, Jo: Dominici, filii elucescunt, quae Tom. V. p. 365. Medicinae Ephemeridum, quae Venetiis excuduntur, habetur.

les ingenio, ac studio eminebat, eosque brevi progressus fecit, unde qualis, & quanta futura esset hominis virtus, haud obscure conjiceretur. Is primum ceperat cogitare de amplexando Jesuitarum Instituto, apud quos humaniorum litterarum tyrocinium posuerat. Verum ab hoc consilio adolescentulum revocavit cel. ea aetate Patronus Nave; eo animo, ut Dominicum, quem unice diligebat, in Juris, Legumque studiis sibi socium adscisceret. Qua tamen in re Dominicus naturae propensione magis, quam amici voluntati serviendum esse prudentissime ratus, Medicinam selegit, in qua omnes ingenii sui vires, atque conatus experiretur (a). Eam artem aggressus est Praeceptore, & Auspice Francisco Delphino, qui tunc Venetiis operam aegrotis curandis Nosocomii, quod vocant *Spedaletto*, utiliter impendebat, tantumque in illa paucis annis profecit, ut jam fere cum ejus artis magistris tum doctrina, tum experientia compararetur. Nec id mehercule injuria. Quamvis enim, ut erat comis, ac facilis, hominum honestorum consuetudinem minime averfaretur; bellum tamen omnino indixerat otio, & oblectamentis non modo licentioribus, verum quotquot impedimento hominibus esse possunt, *ne intendant animum studiis, & rebus honestis*. Hic anno 1700. XV. kal. Novemb. Promotore Petro Musitelli Medicinae Doctore, Venetiis in sacro Philosophorum, Medicorumque Collegio

---

(a) Haec, pleraque alia ex iis, quae ad vitam Joannis Dominici Santorini pertinent, quaeque hic recensentur, summae diligentiae praecl. Viri Nicolai Pollaroli Medicinae Doctores debemus, qui undecumque, quae potuit omnia, pro sua sedulitate, ac judicio collegit, eaque in unum collecta Venetiis in iisdem Medicinae Ephemeridibus Tom. I. p. 108. erudite evulgavit.



lauream Coronam, meritissimum suae virtutis honestamentum adeptus est.

Nondum elapso anno, nempe III. id. Octob. anno 1701. in Medicorum, Chirurgorumque Collegium non modo, sed subinde in amplissimum alterum Physico-medicorum, niten- te in primis laudato Delphino, non sine peculiari his prae- fertim temporibus honoris, dignitatisque accessione receptus est. Quantum porro hominum opinio de Santorini prae- stantia magis in dies augeretur, ex eo liquet, quod paullo post, anno scilicet 1703. idib. Febr. communi Patrum Col- legii Physico-medici concessione publicus Anatomes Profe- ctor fuerit renunciatus: cui muneri auspicaturus, orationem IV. kal. Mart. publice habuit adeo eruditam, atque elegan- tem, ut audientium omnium, ac praesertim amplissimorum Rei Venetae Litterariae Moderatorum expectationem lon- ge, multumque superaverit. Nominis famam antea compa- ratam non modo confirmarunt, verum etiam amplificaverunt & Santorini Commentariolum, quo in disceptatione qua- dam, quam sit utilis venae sectio, ad examen vocatur, & ejusdem *Opuscula Medica* anno 1705. evulgata *De structura, & motu fibrae, de nutritione animali, de haemor- rhoidibus, de catameniis*. Quae opuscula quanta hominum voluntate fuerint excepta, repetitae illorum editiones osten- dunt. Prodierunt enim an. 1710. una cum operibus Geor- gii Baglivii Lugduni sumptibus Anisson, & Jo: Posuel, dein- de Roterodami apud Danielelem Beman an. 1719., tandem Venetiis iterum 1752. typis Rémondini. Magna haec sunt ad laudem Santorini; multo adhuc majora alia consequun- tur. Cum enim Joseph Grandi Anatomes Professor, dum


an. 1706. eam explicaret, gravi morbo correptus esset, in locum ejus successit Santorinus, qui non modo professoris, sed & statim peculiari cum laude Professoris officium aggressus est; quod postea per sexennium, ab anno nempe 1722. ad annum 1728. praeclarissimis audientibus Viris, inter quos Abbas Conti vir omni Scientiarum genere ornatissimus, magno cum plausu explevit.

Santorinus interea licet in excolenda Anatome totus esset, rem tamen medicam nequaquam neglexit, immo adeo in ipsam incubuit, ut Joseph Ton medicinae Archiater ad suas vices obeundas Santorini opera uteretur quammaxime; qui postquam in iis summam sedulitatem ei praestitisset, in ejus locum substitutus est. Neque ipsi tantummodo, verum etiam Delphino, qui, ut superius relatum est, Nosocomii antea commemorati physicus erat, successit. In quibus muneribus exercendis amplissimus campus ipsi patuit, ut selectas, atque peculiare anatomicas observationes compararet. Ex cadaveribus enim, quorum apud eum ingens copia erat, aptiora seligebat, & qua peculiari peritia ipse pollebat, dissectabat, diligenter omnia observabat, adnotabatque; quibus fortasse factum est, ut ipse pluribus in locis peculiaria viderit, vulgaveritque, quae postea ex Anatomicis plures, cum in cadaveribus minus fortasse aptis, ut frequenter asolet, observationes instituerint, aut se non invenisse scripserunt, aut inveniri posse prorsus negarunt. Vix dictu credibile est, qua erga anatomen voluntate afficeretur: non enim eas tantummodo dissectiones, quae Anatome publicae infervirent, aliasque in Nosocomio, quae sibi usui, medicinaeque tironibus essent, instituebat; verum etiam dies in-



terdum, noctesque dissecando, nullo parcens labori, frigus, calorem, & Anatomen ipsam quandoque prae graveolentia toleratu difficiliorem forti animo perferens, sedulus, diligens, curiosus in minutissimis quoque rebus observandis, notandisque domi versabatur (a).

Nec vero minor foris, quam domi ejus erat sollicitudo. Magnis cum viris, qui tunc Venetiis degebant, inita amicitia, & potissimum cum Morgagno (heu! dulce nomen amandum mihi, colendumque, usque dum spiritus hos reget artus), Bernardo Zandrini, Alexandro Bonis, aliisque, si quando vacabat, cum iis eruditissima colloquia jungebat, & quae antea observaverat, cogitaveratque ad trunam revocans, matureque perpendens inaeestimabilem sibi ipsi notionum thesaurum comparabat. Hac itaque ratione, tantaque usus sedulitate, atque industria *Observationes Anatomicas* collegit, concinnavit, vulgavitque Venetiis typis Joannis Baptistae Recurti anno 1724. Petro I. Magno Russiae Autocratori nuncupatas. Quo plausu a doctissimis Viris illae exceptae fuerint, nemo Anatomicorum praesertim ignorat, cum eas quammaxime commendaverint Boerhaavius, Morgagnus, Albinus, atque inter alios Hallerus, qui ita praefatus est (b): *in his Observationibus Anatomicum indefessum, in difficillimis partibus extricandis artificiosissimum,*



(a) Haec, aliaque praesentibus bene multis audiui a praecl. Viro Stellio Mastri-  
ca jam in Patavina Universitate Juris Civilis Professore praestantissimo, qui cum sae-  
piissime, ac familiariter Santorino usus esset, mecum de ipso colloquens plura tanti  
Viri merita justa, jucundaque recordatione, commemoravit.


(b) Hermanni Boerhaavii Methodus Studii Medici emaculata, & accessioni-  
bus locupletata ab Alberto ab Haller, *Amstelodami an. 1751. p. 541.*

& pene nimis perspicacem se gessit, si omnino hic aliquid nimii locum habet, cum multos musculos ejus Viri nemo recentiorum perinde distinctos viderit. His itaque observationibus celebrius factum est Santorini nomen, eoque enixius ejus Opera expetebantur: quod in causa fuit, cur etiam Lugduni Batavorum an. 1739. ejus *Observationes Anatomicae* per typos publici juris fierent. Observationes has editio Opusculi consecuta est, quod Santorinus *De Partu solido feliciter ex ano extracto* italico simul, atque latino sermone conscripsit, atque in lucem hominum protulit, Venetiis typis Jacobi Tomasini an. 1727. eruditissimis animadversionibus illustratum. Licet hisce concinnandis, edendisque potissimum distineretur Santorinus, tamen ejus observationes eo spectabant, ut inde per Anatomicum cognitionem majorem, & majora adjumenta ad artem medicam exercendam hauriret. Ad origines enim morborum occultas indagandas, & per causas intelligendas, rationibusque intrinsecis, firmisque explicandas, neminem latet, quantum Anatome conferat. Hinc Santorinus medicinam magna cum laude, & quidem feliciter, nec minus pro liberalis hominis dignitate fecit. Vir erat ut eleganti figura, & ingenio perspicaci praeditus, ita ingenuo ornatus candore, ab omni verborum jactatione abhorrens. Suo fungebatur munere vocatus: nullo utebatur artificio, ut vocaretur, neque unquam aliorum jacturam ad suam retulit utilitatem. Ut erat urbanus erga omnes, ita erat bonis omnibus acceptissimus. Quapropter cum in medicina facienda non minus, quam in Anatome merito laudibus extolleretur, a solertissimo Supremo Sanitatis Magistratu ipsi mandatum fuit, ut



ad classis usum medicamentorum catalogum concinnaret, cui ipse opus sapientissimis animadversionibus elaboratum adjicere optimum censuit, vulgavitque Venetiis typis iisdem an. 1734. titulo *Istruzione intorno alle Febbri*; quod postea in epitomen redactum, atque ex Italica in Graecam linguam conversum ad suae Nationis usum, opera cl. Antonii Stratico, iterum Venetiis an. 1745. recusum prodiit; ac denique an. 1751. juxta primam editionem posthumis Santorini scriptis locupletatum, Recurtianis typis mandatum est.

Tot itaque publicis, privatisque licet distentis curis, atque his quidem gravioribus factis per initas nuptias cum Anna Polignol honestissimis Parentibus orta puella, numquam tamen ab Anatomicis studiis, observationibusque quotiescumque occasio ferret, animum, operamque removit (a). Cogitaverat enim alterum magnum Anatomes opus edere, quo vetera plura ab ipso evulgata, a quorum nonnullis declinare aliqui videbantur, confirmarentur, castigarentur alia, quaedam nova, novis observationibus, comparata in publicum producerentur. Hinc juxta veteres, novasque observationes plures Anatomicas Tabulas ad cadavera faciendas curaverat; atque in hisce delineandis, ne quidquam desideraretur, cel. Jo: Baptistae Piazzetta summi, ut Pictoribus notum, eo in genere Viri, opera usus est (b), easque industri Caelatrici



(a) Luculentissimum hujusce rei testimonium praebent inedita Santorini adversaria ex habitis tantummodo dissectionibus ab anno 1718. usque ad annum 1737. confecta, quae apud cl. Virum Jo: Calvi Medicinae Doctorem anno nuperrime elapso Venetiis mihi observare datum fuit.

(b) Eusebius Squarius in Praefationis calce ad Opera Varia Jo: Mariae Lancii, Venetiis an. 1739.

Florentiae Marcellae commisit, ut qua peculiari peritia ipsa pollebat, Santorino caeteroquin dirigente, non sine permagno taedio, atque labore diligentissime, tenuissimoque stylo sculperentur. Ex iis septemdecim fere ad unguem perfectae evasere, una vix obscuris delineationibus adumbrata, Santorini autem imago numeris omnibus absoluta. Praeter hasce, quae omnes ad manus nostras pervenere, alias fortasse etiam excudendas curasse, aut certe excudi voluisse, ex ejusdem scriptis colligo, cum in Tabulae XIII. explicatione ita adnotatum inveniam: *Pars est Pancreatis angustior, cervix a me nuncupata; subter quam pars plurima arteriarum, venarum, nervorum, ac lymphae ductuum pars ad mesenterium pertinentium fertur, quam Tabula N.º &c. ostendit*: quid interim de hac Tabula factum sit, licet pluries inquisierim, ignoramus adhuc. Dum in hisce peragendis versaretur Santorinus, quamquam postremis annis Philosophiae, & Medicinae Collegii sedulus Antistes pluribus occupationibus implicaretur, manum etiam Operi ulterius admoverat, & quidem, ut ex ejusdem pluribus colligitur schedis, non pauca fortasse conscripserat, ornaveraturque, quibus ad totum perficiendum opus viam sibi proniorem sterneret. Verum haud ipsi datum fuit, ut quae ingentibus laboribus paraverat, evulgaret. Leni primum, deinde gravi, putridaque correptus febre, quam ex tot habitis antea dissectionibus sensim contrahere potuisse admodum verisimile est, frustra tentatis omnibus a praecl. Viris Michelotti, Stefani, Grandi, Santorino benevolentia conjunctissimis, postquam peculiaria pietatis, atque religionis, quam perpetuo coluerat, argumenta praebuisset, bonis omnibus



deplorantibus, anno 1737. nonis Maii supremum clausit diem. Tanti Viri memoriam, jam humato perhonorifice in ejus Parochiali Ecclesia S. Silvestri corpore, disertus, atque eruditissimus Dominicus Benedetti tunc Anatomes Professor in magno Medico-physicorum Collegii vestibulo eleganti oratione celebravit.

Sublato e vivis Santorino, memoratae Tabulae una cum plerisque ejus scriptis diu penes haeredes in tenebris jacuere, donec ejus rei certior factus Jo: Baptista Co: Cubolus, magnae spei juvenis, jam tunc Anatomicorum Principi in celeberrimo Lyceo Patavino ejus Artis Professori Jo: Baptistae Morgagno ad obeundas pro tempore ejusdem vices additus, eas tabulas una cum scriptis sibi addicendas curavit, eo animo, ut haec omnia perlustraret, iisque in edendis, ubi sibi ab officio suo esset otium, publicae utilitati consuleret. At ille, cum ad Medoacum rusticaretur, & in cymbula per flumen veheretur, in undas decidens, heu! acerba recordatio, aquis submersus, antequam diem an. 1768. v. kal. Jul. nobis ereptus est, cum neque hoc, quod statuerat, aggredi potuerit, neque ea, quae ipse summo cum labore, ac diligentia de mammis observaverat, jam absoluta posteritati tradere.

Erepto Cubolo, Praeceptor meus immortalis Morgagnus, litteris de me honorificentioribus, quam in meam tenuitatem convenirent, ad Triumviros Litterarios datis, institit, ut in Defuncti locum sufficerer, sicque vices suas, quoties ille jam aetate confectus, incommodo aliquo, aut impedimento prohiberetur, egomet obirem. Quod cum ex voto accidisset, inde factum, ut Santorini Tabulae, ejus-


que scripta, quae in Decessoris mei manibus fuerant, una cum ejusdem libris, scriptisque ad meas pervenirent, quibus edendis animum statim adjeci. Verum erat mihi primum de gravissimo onere ferendo cogitandum, quod quemadmodum honorificentissimum, ita & gravissimum esse probe noveram, cum ex eo ipso loco Anatomen traditurus essem, unde ill. Praeceptor aurea illa sua elegantia, ac multiplici, immo omnigena doctrinarum ubertate hanc facultatem docebat. Totus in eo eram, ut ne meo officio deessem, opportunius tempus exspectans, quo sepositis aliis omnibus ad illas Tabulas accederem. Sed en mihi inter Anatomicas Patavinae Academiae occupationes litterae, quibus ad hanc Theoreticae Medicinae primariam Parmensem Cathedram honestissimis conditionibus invitabar. Numquam me toto vitae meae cursu haesitantioris animi fuisse memini, diuque anceps fui, utrum apud Praeceptorem, quem summa merito dilectione prosequer, commorarer, an ab hoc Regio Principe, cujus virtutes ipsum non modo suis amabilem, sed etiam exteris Nationibus admirabilem reddunt, oblatam fortunam sequer. Quid factum sit, & quomodo evenerit, ut ad hoc R. Lyceum me verterem non est, quod pluribus commemorem: hoc unum dicam, re deliberata, non sine consensu Excellentissimi Veneti ad rem litterariam Magistratus, Santorini Tabulas seponendas mihi fuisse, ut medicis scriptis exarandis studium, operamque navarem. Verum vix hac in Regione pedem posui, cum sapientissimi hujusce R. Parmensis Academiae Moderatores secum reputantes, me jam Morgagni obiisse vices, mihi praeter expectationem meam, mutato consilio, Ana-



tomicam Provinciam commiserunt . In hanc itaque ingressus animum semper , quotiescumque occasio tulit , ad Santorini Tabulas converti , de quarum explicatione jam antea ex communi sententia ab ill. Nicolao Pollaroli (a) dictum fuerat *non d'altri essere che da lui stesso lo spiegare le Tavole , alle quali così fu comune la sciagura toccata a quelle dell'altro grande Italiano Anatomico Eustachio* .

Et revera quam arduum , & difficile sit aliorum Tabulas explicare , & Lancisii primum , & eruditiss. Albinus in Eustachianas Tabulas commentaria satis aperte ostendunt . Haud equidem prae me feram hasce Santorini Tabulas tantum laboris , atque solertiae ab interprete postulare , quantum Eustachianae postulabant ; at certe nemo , ut ego arbitror , inficias iverit & in iis , tametsi multa obvia sunt , ac vel in limine Anatomen salutanti intellectu facilia , non pauca tamen occurrere difficillima , quaedam ambigua , alia vero ita incerta , ut vix aliquam interpretationem admittant . Quibus addendum , quemadmodum quivis vel mediocriter in ejus scriptis versatus intelliget , fuisse Santorinum in minutissimis rebus adeo sollicitum alia ab aliis sejungendo , dividendoque , ut pleraque eorum adnotaverit , castigaveritque postea , quemadmodum suo loco ostendam , quae aut nullo se modo reperturum quivis speret , aut vix , & aegerrime quidem ullo ; & tamen de Tabulis loquor , quas ipse Auctor & explicaverat , & ediderat ; quid putandum de iis , quas ipse absque ulla explicatione reliquit ? Quot , quantasque difficultates suboriturus censendum est ? Utut ta-

men casura res esset, satius duxi tanti Viri icones, qua per me liceret ratione vulgari, quam pulvere obductas diutius in tenebris delitescences relinqui. Porro hasce Tabulas editurus non modo in iis nihil certe protuli, quin prius pluribus cadaverum sectionibus naturam ipsam consuluerim, comparando scilicet cum partibus humanis corporis partes, de quibus in Tabulis sermo est, easque etiam referendo ad scripta, & icones praestantiss. Auctorum Eustachii, Vesalii, Cowperi, Morgagni, Albini, Halleri, aliorumque, & praecipue ad Anatomicas Santorini Observationes, Tabulasque ab ipso evulgatas; verum etiam plura a praestantissimis Viris saepe sedulo inquirendo, quae ad Santorini Tabulas, & scripta pertinere quodammodo possent. Ab ill. itaque, atque immortalis Praeceptore, ut alios brevitatis gratia praeteream (a), Viro scilicet, qui Santorinum familiarem, & conjunctissimum habuit, efflagitavi pluries, ut quae vel nosset, vel posset, de praestantissimo Viro ad me scriberet. Morem gessit pro summa sua humanitate Morgagnus, nihilque aptius me facturum censeo, quam si ejus epistolam pro responsione datam subjiciam.




(a) In iis tamen omittendus non est Vir summae eruditionis, atque humanitatis Jo: Baptista Paionus Supremi Magistratus Salutis Venetiarum Archiater, qui postquam plura mecum de Santorino collocutus est, ex peculiari, & magna sua Anatomicorum praesertim, Medicorumque Bibliotheca mihi Opusculum illud rarissimum Caecilii Folii inscriptum Nova auris internae delineatio, Venetiis editum an. 1645. ostendit: quod cum diu a praestantissimis Viris inutiliter conquistum fuerit, ac fere deperditum, aut imaginarium conclamaretur, ipse denuo Venetiis an. 1745. sex tantummodo exemplaribus excudendum curavit; quorum unum cum ill. Hallero dono misisset, ab illo subinde Disputationum Anatomicarum Vol. IV. publici juris factum est.



ORNATISSIMO, AMICISSIMOQUE VIRO  
 MICHAELI GIRARDO  
 IN REGIA PARMENSI UNIVERSITATE ANATOMES  
 PROFESSORI PRIMARIO  
 JOANNES BAPTISTA MORGAGNUS  
 S. P. D.

*Si* uti perfecti Medici institutionem proponere, ita & perscribere potuissem; non ignoras, Vir clarissime, in extrema Operis parte a me praeceptum illud omittendum non fuisse, ut tandem sibi tempus cessandi praeфинiret (a); imo scis me tanto magis mihi tempus illud perpaucis abhinc annis praeфинivisse. Cur igitur ex me ea de Santorini edenda requiris, quae me invitum, & extra propositum perfacile sint ductura? Nec dicas nondum me cessavisse, tametsi non procul absum a fine anni undenonagesimi ab Anatome publice Auditoribus tradenda, quod longe gravius est, quam ab re aliqua Anatomica scribenda. Quae enim Auditores doceo, eorum oculis subjiicio, & explico; si quod vero scriptum in lucem profero, vides nos incidisse in ea tempora, quibus oporteret Adversaria & posse, & velle scribere. Certe nec variae, nec paucae deessent causae scribendi, augerenturque fortasse, si quaedam typis committerentur, quae inter Anatomen habendam nunc aliquando addere solitus sum, ut puta, cum ostendo nervos in vagina tendinum non subsistere, sed ad axem usque produci, sic arguo, igitur inter causas, propter quas tendinibus sensum negant, ponendam non fuisse interiorum hanc nervorum



(a) *Vid. novam Medic. Institut. ideam. Patavii 1712.*


absentiam. Et quoniam de nervis loqui caepimus, cum an-  
sas indico, per quas trajiciuntur vasa quaedam sanguifera,  
hortor ad conjiciendum, si haec nolimus ab nervis constri-  
ngi, an saltem ab adauctis copia, & impetu sanguinis am-  
plexantes nervi possint tantum affici, quantum satis sit ad  
ea, quae in certis animis affectibus contingunt explicanda.  
Sic papillas in gallinarum pedibus, sic imam posteriorem  
humanae vesicae partem, sic recentem puerperae mulieris ute-  
rum demonstrans, Auditores ad conjiciendum excito, an pa-  
pillarum earum usus spectet fortasse ad seligendos lapillos,  
quos augendi causa vires ventriculi in solida ingesta vorant?  
An quia famosam illam uvulam ibi secundum naturam num-  
quam invenio, inserviat saltem crassitudo illa parietis ad fa-  
ciliorem lotii emissionem, simulque ad eam corroborandam  
vesicae partem, quae per se magis solet extrorsum, deor-  
sumque extendi? Denique sicuti proclive est, qua ratione  
una cum inhaerente corio membrana uteri interna excidat in-  
telligere, ita quod non paulo difficilius est, dare operam con-  
veniat, ut causae luculenter explicentur eandem illam, quae  
prius fuerat, membranam reficientes, idest non levem solum,  
& nitidam, sed & iisdem osculis pertusam ad menstruum  
sanguinem emittendum, & ad seminis auram excipiendam.  
Haec igitur & alia, quae hic omitto, ejusdem generis, si  
typis mandarentur, facile vides, quanto aliter atque ego in-  
telligo, possent ab nonnullis accipi, qui uti se ad scriben-  
dum excitatos fuisse dissimulant ab iis libris, quos de se-  
dibus, & causis morborum per Anatomen indagatis non  
sine benigna Doctorem Hominum laude vulgaveram, ita con-  
niti videntur, ut eos libros, meque deprimant, non aliis usi



rationibus, quam iis, quas ipsa mea in eos libros praefatio attente perlecta facile refutat: quin ne meo quidem stylo parcitur, cum me non paeniteat ita scripsisse, ut quantum mediocritas haec mea finit, eo accederem, ut quid mihi vulerim, sine ulla haesitatione posset intelligi non hac solum aetate, sed & quousque Largitori bonorum omnium Deo fortasse placuerit; juvat enim sperare, si non quantum pro sua nimia erga me indulgentia sapientissimo Archiatro Senaco videbatur (a), at ex parte aliqua saltem pro me vel nihil quibusdam accusatoribus respondente aequos posteros futuros.

His igitur, eorumque similibus jure, meritoque sepositis ad ea, quae ex me quaeris de praecel. Anatomico Santorino, veniamus.

Anno 1707. cum Bononia editis ibi primis adversariis, Venetias transissem, quo ille anno capere initium debebat exercendi impositi sibi muneris Professoris publici, in ejus notitiam veni cupientis perspicere, qua ego ratione pleraque in eo libro proposita per dissectionem demonstrarem. Humaniter petenti annui, indeque inter nos orta amicitia est, & consuetudo quoque una consecandi non modo animantia quaedam, & in his pisces potissimum, sed & humana cadavera, quorum ingens ei copia erat, quippe Protomedici Magistri sui vices in tanta Civitate gerenti. Tribus igitur annis, quibus tunc ibi fui, persaepe occasionem habui cognoscendi, quanta ille dexteritate, sagacitate, & diligentia in dissecando uteretur. Quapropter non mirum est, quod anno 1724. laudatum eum librum, summoque Anatomico dignum emisserit, in quo au-



(a) *Traité de la Struct. du Cœur, à Paris an. 1749. tom. I. chap. IV. p. 77.*



gendo tu es, *Vir cl., versaturus, per ea videlicet, quae sua ipse manu adnotata, & in novis tabulis scripta, tot addito insequentium annorum labore, haeredibus sui reliquit.*

*Si exspectas a me, quippe in posthumis Praeceptoris mei scriptis, & tabulis interpretandis exercitato, monita quaedam fortasse, quae ego secutus sim, primum illud spectavi, ut quid ille in animo verisimilius habere debuisset, attenderem, sicque ut in Eustachii figuris nonnullis praestiti, scilicet explicando, cur inter humanarum partium iconismos, quosdam ex quadrupedibus descriptos interponeret, nempe cum sibi adversantium errata in illis ipsis delineationibus vellet ostendere. Alterum quod prae oculis semper habui, fuit easdem, quas Magister meus descripserat, aut delineaverat partes, innumeris propemodum vicibus persequere, & cum explicandis conferre.*

*Quaedam sunt, quae ego vicissim a te exspecto, illud primum an pro suis, quos vocavit Labyrinthis praesertim superioribus respondeat iis, qui non bene, ut mihi quidem videtur, in dubium revocarunt: deinde quia ne premantur olfactorii nervi, cum ille quasi sulcum quemdam in imposita cerebri superficie proposuisset, nos ibidem nihil nisi angustam lineam deprehendimus, gratum erit scire, an & quomodo satisfaciat, praetereaue an ea occasione lineam quamdam rectam in iisdem nervis occurrentem forte commemoret, eaque cui bono creata sit, quaerat: porro & hoc tertium, an ubi postremi anguli callosi corporis in subrotundum Hippocamporum initium mutari incipiunt, intra corticalem initii illius substantiam plura, ut ego videre solitus sum, & in diversum tendentia medullaria strata perspexerit. Denique an Stenonis canaliculos ab naso ad palatum describens, non*

hiare in hoc dicat, sed finire potius intra eam carunculam, quae pone medios incisores dentes prominet, idque ad juvandum linguae apicem, qui cum saepe adeo inter loquendum, aut mandendum ad eam carunculam impellatur, non modo illaesus ab dentium duritie per carunculae mollitudinem servetur, sed & humoris ad eam mollitudinem efficiendam illabentis partem aliquam per carunculae poros extrudat, qua madidus semper conservetur.

Quoniam autem suos quisque patimur manes, paulo ipse nimius fuit in uno musculo persaepe in plures dividendo, eamque ob causam cadavera selegit, in quibus musculi crassiores forent; nosse etiam aveo, num in ligamentis perscrutandis simili selectu usus, ligamentum illud posuerit, quod ab ipso apice dentis vertebrae secundae in oram anteriorem magni foraminis occipitis tam conspicue feratur, quantum Eustachius (a) indicat.

Sed finem scribendi faciam, arbitrio, ut par est, Vir clarissime, permittens tuo, utrum epistola haec vulganda sit, an potius, ut mihi quidem videtur, supprimenda. Vale, & Anatomen, ut facis, meque redamantem amare perge.

Dabam Patavii postrid. id. Decemb. 1770.

Quae ut huic Epistolae satisfacerem, Magistro meo praeclarissimo per litteras significavi, ea cum in Tabularum explicatione occasio ferret, opportunius enucleabo. Haec porro Epistola in memoriam revocat tempus illud, cum per vacationes salutaturus amicos, erga quos mea benevolentia,

c

---

(a) De Motu Capitis, Venetiis an. 1563. p. 229.




gratusque animus in me nulla umquam aetate infirmabitur, Patavium me contuli, ac praecipue dulcissimum Praeceptorum amplexurus, inscius heu! non amplius ea me jucunditate esse in posterum fruiturum, quippe duobus nondum elapsis mensibus, postquam ab illo discessi, Homo siquis alius immortalitate dignus VIII. idus Decemb. an. 1771. vitam cum morte commutavit. Cum igitur Patavii essem apud Hominem me quodammodo cariorem, quale is mihi, boni Dii! pignus amoris praebuit. Is quasi tradens se totum mihi, ineditum scriptorum suorum thesaurum quatuordecim voluminibus in fol. comprehensum, suaque manu exaratum, sua manu mihi credidit verbis pro suo amore dulcissimis, quae ita in animo meo infixae haerent, ut nullo umquam tempore dilapsura sint. Credidit, inquam, mihi scripta, quae tunc temporis in promptu habebat: Vir enim ferme nonagenarius, me inde brevi discessuro, non poterat praepropere suas omnes arculas scrutari, & in unum scripta colligere; quare pridie kal. Decemb. an. 1771. mihi scripsit in haec verba: *Giorni sono essendo nello studio trovai tante carte di maggiore importanza delle già dattele, che formano quattro grossi involti. Tanto più volentieri dunque attenderò a suo tempo chi venga con quelle Casse ec.,* at mors prope repentina consilium intercepit. Caelum prope dixerim, ac mare miscui, ut ea scripta per litteras a me repetita obtinerem; verum me e longinquo exspectantem omnia frustrata sunt. Ex iis interim, quae jam, ut dixi, ab Auctore mihi commissae in potestate mea sunt, duo volumina excerpta plura praecl. Hominum continent, in quorum fronte inscriptum est *ad Anatomen*: tria observatio-



nes Anatomicas ab ipso institutas diligentissime in acta relatas comprehendunt: volumen sextum ex pluribus Medicis conflatum consultationibus inscriptum est *Consulti pochissimi per qualche ragione ritenuti ancora*. Quinque autem volumina animadversiones Anatomico-criticas continent, quorum inscriptio est *Fasciculi ad Anatomicos Scriptores*: duo autem volumina ex miscellaneis pluribus componuntur, ac in iis quaedam peculiaria occurrunt ad historiam Anatomes, atque ad Patavinum Lyceum pertinentia. Postremum denique *ad Eustachii Tabulas* inscriptum animadversiones in Lancisii, Petrioli, atque Albini scripta ad Eustachii Tabulas spectantia comprehendit. Hoc opus absolutum esse ex hisce Auctoris verbis in libri calce positis deprehenditur. *Hisce omnibus diligenter perlectis, cum figurisque collatis, emendanda quoque, adjecta in fine inspexi, & cum meis hisce chartis contuli, & suis quoque locis adnotavi.*

Hanc excursionem grato meo in magnum Virum animo benignus Lector condonaverit, si me humanissimo Praeceptor, Fautorique ingentium beneficiorum vinculis obstrictum fuisse perpenderit. Verum ut ad Santorini Tabulas, quod ago, redeam, haud diffitear hisce in explicandis non minimo mihi adjumento fuisse Exemplar illud *Observationum Anatomicarum* (a), quo ipse Auctor Santorinus aliis de novo cudendis, aliis castigandis usus est. Extant enim

C 2




(a) Exemplaris hujusce conservatio Viro editis scriptis celeberrimo Jo: Petro Pellegrini Venetiis publico Anatomes Profectori, & Medicinae Professori praestantissimo debetur, qui, cum illud in via venale proflaret, emit, & pro sua liberalitate cl. Cubolo dono dedit, ex quo deinde ad manus nostras pervenit.

ibi passim ab ipso Santorino ad marginem non pauca adnotata, partim ut emendaret, quae jam lucem subierant, partim ut magis magisque confirmaret, partim denique ut nova proferret. Quae omnia cum ad novum edendum Opus parasset, haec in hujus Exemplaris fronte apposuit, quibus (*Observationibus nempe Anatomicis*) *inventorum plurima, Tabularum non modica accessio adjuncta est*, a tergo vero *Posteriores cogitationes, ut ajunt, Sapientiores solent esse. Philipp. XII.* Praeterea Tabulis explicandis, illustrandisque alia, quae apud Cubolum erant, Santorini scripta, quibus quaedam Tabulae omnino, utinam omnes, quaedam ex parte explicantur, haud parum lucis, atque auxilii attulere: & in hisce haud omittenda alia, nullo ordine digesta, quae licet Tabulas ipsas non explicent, cum tamen ea, quae Tabulis continentur, quomodocumque illustrent, suis quoque locis peculiariter apponenda esse existimavimus. Cum autem in hisce omnibus Santorini scriptis multa pluribus adeo maculata lituris occurrant, ut nihil eorum investigari potuerit, alia vero ita captu difficilia, ut vix pauca, & quidem dubia excerpere licuerit, idcirco ea missa fecimus, satis iis contenti, quae quid voluerit Auctor, aperte, luculenterque declarant. In hisce vero edendis, litteris, quas *corsive* Itali dicunt, usi sumus, ut ab iis distinguerentur, quae ab ipso Santorino evulgata fuere, quaeque non litteris, sed hisce lineis » in margine signabimus: quibus addendum nos esse paginarum numero indicatu- ros, quae in margine commemorati Exemplaris Auctor addidit; nullo autem paginarum numero, aut loco, quae ipse in schedis soluta, nulloque ordine digesta reliquit. Tabularum ordi-



nem *Observationum Anatomicarum* Santorini Capitibus quodammodo accommodavimus; in quarum explicatione ne verbum quidem Auctoris, ubi nobis licuit, immutavimus. Hae, quas nunc evulgamus, numero septemdecim sunt. Superest alia, sed vix, ut diximus, adumbrata, ut Auctoris mens inde conjici nullo modo possit. Cum autem in harum nonnullis haud plane absolutis, aliquid sive addendum, sive immutandum opera Caelatoris fuisset, diligentissime cavimus, ne mens Auctoris eluderetur, aut Tabulae elegantia usquam imminueretur. Jam vero ut ratio cujusque omnibus constet, Tabularum seriem recensamus.

Harum I. musculos faciei exhibet, & primae ab ipso Auctore antea editae, & Cap. I. *Observ. Anat.* respondet. Inter utramque discrimen magis patet, quam ut exponi oporteat. Prima quidem a Santorino evulgata, ubi una cum *Observationibus* hominum oculos, & judicium subiit, admirandum quid visa est, ut propterea Boerhaavius (a) *Santorinum ipsius Eustachii industriam superare affirmaverit*; & Augustinus Frid. Walter (b) *jam faciem humanam, & quidem musculis modo conspicuis olim rectam cum icone duxerit comparandam, quam Santorinus in Observationum libro inter elegantiora plura quae habet, publici juris fecit, quamque ipse iterum ex archetypo recusam suo opere evulgavit: tamen quantum manca esset, & Auctoris stylum postularet, eadem pluries, ut ex ejusdem variis delineationibus colligitur,*



(a) Praelectiones Academicae, *Venetis an. 1743. §. 62.*


(b) *Teneriorum musculorum humani corporis Anatome repetita. Lipsiae an.*



instaurata Tabula ostendit, in qua alia ad perfectionem redacta, alia sublata, quaedam etiam addita apparent.

Tabula II. repraesentat basim cerebri circumsecta calvaria contenti, ac minime e suis sedibus dimoti. Hanc, sive totius cerebri basim juxta naturam accuratissime delineatam, sive medullae oblongatae, ejusque nervorum origines, quibus persequendis Santorinus *subtilissimus Perscrutator* (a) appellatus fuit, sive caelaturae elegantiam spectes, adeo absolutam esse invenies, ut vix quidquam tale Historia Anatomica offerre possit.

Tabula III. tres figuras continet, quarum I. ea est, in qua ex cerebri basi primae, & potissimum secundae nervorum conjugationis principia, ac nonnullarum partium clarior conspectus exhibetur. Figura II. in qua partes praecipuae, quae in cerebri, & cerebelli ventriculis sitae sunt, in aperto ponuntur; itemque pars cerebelli, & caudex medullaris cum initiis spinalis medullae. Figura III. repraesentat dimidiam capitis priorem partem, eamque ad perpendicularum secundum latitudinem a vertice proxime post aures sectam, ut praecipuae interiorum cerebri partium hujusmodi Anatomie suis in sedibus adhuc haerentis habitus luculenter appareat. Haec Tabula, ex qua inutiles lineolas nitoris gratia Caelator expunxit, tametsi figura tertia non prorsus exacta alicui videri possit, pro diligentia, qua elaborata est, inter maxime laudabiles locum habet. Hae duae posteriores Tabulae Caput III. *Observ. Anat. Santorini*, ubi de partibus cerebri interioribus, & de nervorum origine praecipue agit, respiciunt.



(a) Laurentii Heisteri Compendium Anat. Venetiis an. 1749. Nota 70.

Tabula IV. capite a fronte occiput versus secto, interiora potissimum nasi, & pharyngis fornicem exhibet. Haec una ex iis Tabula est, cui postremam manum Artifex non imposuit, quam si perficere potuisset Auctor, mihi persuadeo eum ad unguem magis quasdam partes fuisse demonstraturum. Levi igitur Caelatoris opera opus fuit, nihil tamen actis aut detrahendo, aut addendo, quippe exiguum quid deerat operi perficiendo. Inter ea, quae haec Tabula repraesentat, quaedam animadvertenda occurrunt, quae potissimum Capiti VII. *Observ. Anat.* respondent.

Tabula V. Haec quoque figuras exprimit tres: I. Os temporis sinistrum ex interiori parte, in quo transversim petrosus processus ad regionem canalis semicircularis minoris verticaliter excisus est, atque ita plura ad tympanum, atque ad labyrinthum pertinentia ostendit. Figura II. os temporis dexterum una cum processu petroso verticaliter secundum longitudinem ferra excisum exhibet, in quo plura naturalem magnitudinem excedentia, quae ad auditus organum pertinent, alio conspectu, observantur. Figura III. os pariter temporis dexterum, & processum petrosum statim supra meatum auditorium juxta finitorem dissectum exprimit, in quo pariter nonnulla naturalibus majora ad tympanum, atque labyrinthum spectantia conspiciuntur. Per hanc triplicem sectionem Santorinum voluisse partes praesertim omnes elegantissimi auditus organi processu petroso inditas ostendere, ut luculentius, rectiusque de illarum sede, nexu, & proportionem constaret, certo certius deprehenditur. Du Verneyus, Valsalva, Cassebohmius, alique elegantes hujusce organi figuras, at extra naturalem sedem magno



cum labore, atque patientia praeparatas protulerunt; at eae nullo habito artificio sola ferrae sectione, ferre omnia varia ratione inspecta, quae ad auditus organum pertinent, mirabili, simplici quodam modo intuentium oculis exhibent. Hic tamen adnotatum volo, harum primam magna quidem, non tamen omni ex parte fuisse completam, cum tantummodo in processu petroso rerum vestigia exstarent, quas nunc accuratius exhibemus: hanc itaque ego absolvendam curavi juxta delineationem a Santorino relictam, iisque vestigiis respondentem, quam inter schedas ejus custodio. Malui enim a Santorino facta fideliter in lucem prodere, quam quidquam mutando difficultates quasdam, ut explicabo loco suo, quae hic occurrunt, defugere.

Tabula VI. duas figuras capit. Harum I. totam potissimum pharyngis posticam partem exhibet. Figura II. dissecta a summo ad imum pharynge, posteriorem praesertim palati mollis, linguae, ac laryngis partem ob oculos ponit. Sub hac altera figura aperiebant se alterius figurae vestigia, quae laryngis posteriorem partem indicabant: verum quia nullo inde modo detegi Auctoris mens poterat, neque inter ejus schedas, hujusce delineatio ulla inveniri potuit, ideo eam figuram expunxi, ne informem adumbrationem, nulli futuram ufui, producerem.

Tabula VII. repraesentat linguam e sua sede depositam cum velo palatino, ex anteriori ejus parte, omnique reliquo palato, ac dentibus, cum maxilla paulo citra ipsius angulum ex utroque latere ferra dissecta. Summam ill. Halleri (a)



(a) *Ibid. Cap. III. de Lingua p. 479.*



eruditionem haec Tabula haud effugit, cum eam recensuerit ex Eusebio Squario (a), qui ut doctus, honestusque Santorini Auditor, non modo hanc, verum & caeteras haec Tabulas grata infimul, atque perhonorifica recordatione collaudavit. Per hanc, & superiorem Tabulam accuratissimis figuris habetur integra musculorum pharyngis historia, de qua Cap. VII. *Observ. Anat.* presse aequae, ac diligenter Santorinus. Hac simplici, rectaque sectionis methodo, cum pluries alias, ita etiam hoc anno 1775., dum publice Anatonem haberem, hos omnes pharyngis musculos sua naturali in sede constitutos, detractis tantummodo diligentissime membranis illos operientibus dilucide, admodum distincte, atque ne hilum quidem ab hisce figuris declinantes, ostendimus. Hanc tamen pharyngis musculorum elegantiam haud in omnibus, sed in aptioribus tantummodo videre datum fuit; quod adnotamus, ne si quis in minus apta cadavera incidat, hasce statim Santorini Tabulas ut minus rectas, falsasve contra rationem, & veritatem increpet.

Tabula VIII. binas exhibet figuras: I. mamma communibus integumentis denudata, cujus areola, papillaque sursum evecta, & excretorii lactiferi ductus, & conglomerata ejusdem glandula in conspectum veniunt. Figura II. areolam, papillamque peculiariter prodit. Hujusce Tabulae explicationi, cum nihil apud Santorinum, quod ad mammas attineret, invenerim, me rem non ingratam, neque inutilem facturum esse putavi, si quae de hisce diligentissimus Cubolus observavit, descripsitque, quaeque ipsemet publice

D

---

(a) *Ibidem.*

laudavit Morgagnus, mihiq̃ue commendavit, adjicerem; mea deinde observata substituturus. Neque omittendum, praeter ea, quae, paucis immutatis, ex ipso Cubolo nunc evulgamus, quaedam etiam alia de *Virginum, & Vetularum Mammis, atque de comparatione, & differentia inter ipsas, & lactantes* pluribus in schedis conscripisse, quae tamen haud retulimus, cum fatum ipsi extremum praecloserit diem, antequam ea dilucide, atque absolute litteris mandare potuerit.

Tabula IX. duas quoque figuras continet: I. exhibet sinistrum cordis ventriculum, ac arteriae magnae truncum in longitudinem dissectum. Figura II. adiposam laciniam refert, quae pericardio utrinque extrinsecus innectitur. Hisce figuris praeter nonnulla, quae ipse novissimis observationibus animadverterat, quaedam etiam exhibere voluisse Santorinum ex iis, quae *Observ. Anat.* Capite VIII. de corde commemoravit, figuras cum scriptis conferenti, ut nos suo loco habebimus, compertum fiet.

Tabula X. quatuor figuras perhibet: I. exhibet diaphragmatis faciem inferiorem. Haec figura iis, quae Auctor *Observ. Anat.* Cap. VIII. retulit, quammaxime convenit. In hujusce figurae cum cadaveris diaphragmate comparatione contigit, ut pluribus ex meis Auditoribus ostenderem, adeo hanc figuram ad veritatem fuisse delineatam, ut ne fibrilla quidem in cadavere occurreret, quae eadem figura, atque incessu in Tabula non ostenderetur. Quae res si peculiaris non promit, summam tamen Auctoris diligentiam, atque sedulitatem in tam varia fibrarum diaphragmatis directione quammaxime commendat. Quid vero figura II. & III. exhibere voluerit, non facile assequi



nos potuisse fatemur. Num renes succenturiatos? Fig. IV. quae non prorsus absoluta videtur, una cum diaphragmatis appendicibus, & foramine arteriam magnam excipiente, vasa lactea, quae chyli cisterna appellantur, perhibet.

Tabula XI. inverso, elevatoque hepate, ut sima ejus facies appareat, vesiculam fellis, naturalem ventriculi, & pancreatis sedem repraesentat. Quantum laboris, & diligentiae in hanc Tabulam elegantissime absolutam insumpserit Santorinus, patet, quod ipsemet dixerit *pluries hanc Tabulam instauratam fuisse*, antequam ad hunc modum perficeretur. Quaedam exhibet inter caetera plura, quae ipse addit, & nos suo loco conscripsimus, quae *Observ. Anat. Capiti IX.* respondere quodammodo videntur.

Tabula XII. intestini duodeni: in qua praecipue significantur jecinoris, cystis felleae, ac pancreatis ductuum exitus, locus, forma, & numerus, ac rugarum principium, & dispositio. Hac Tabula, quae inter politiores recensenda est, non solum quaedam, quae Capite modo indicato occurrunt, sed & posthuma Auctoris scripta inter hujusce Tabulae explicationem addita illustrantur, confirmanturque.

Tabula XIII. tres figuras comprehendit: I. exhibet pancreatis naturalem magnitudinem, formam, habitum, & obliquum positum, quemadmodum fere suis in sedibus constituitur, atque in longitudinem ita secti, ac deducti, ut omnis ductus ejus, exitusque in conspectum veniat; itemque portiunculam intestini duodeni pancreati adnexam, ac in longitudinem dissectam, & revolutam. Figura II. an una est ex adiposis laciniis, sive appendiculis, quae cum ad tenuia intestina, tum maxime ad crassa pertinent? Fi-



gura III. imi fortasse duodeni, summique jejuni partes, hisque adnexum mesaraeum, ut potissimum vasa chylifera illac reptantia in conspectum prodeant. Licet haec tertia figura extremitatibus suis haud plane absoluta videatur; nihilo tamen minus cum id vix alicujus momenti sit, malui eam ita offerre, quam periculo me committere, ut quid exiguum, idemque non necessarium addendo, summa hujusce figurae elegantia depravaretur. Et ea, quae eodem capite Auctor tradidit, & posthuma ejusdem scripta, quae suo loco exhibentur, haec figura potissimum respicit.

Tabula XIV. totidem, ut superior, figuras continet. I. repraesentat ultimam partem intestini ilei, caecum cum appendicula, & primam coli partem. Figura II. ostendit eorundem supra explicatas intestinorum partes contrario situ locatas, ilei, caeci, & coli aëre inflatas, exsiccatasque, & contra ilei exitum in longitudinem deductas, ut facies interior ipsarum, atque adeo id, quod valvula Bavhini dicitur, in apertum proferatur. Figura III. an adiposa intestinorum productio? Nihil huic Tabulae deest, quin inter absolutas, elegantesque recenseamus. Si quae ad appendiculam vermiformem pertinent demamus, de qua *Observ. Anat.* Cap. IX. sermo est, caetera hujusce Tabulae ad postrema Santorini observata, & inter ea potissimum ad ligamentum novum, ad ilei globositatem, ad valvulam Bavhini spectare videntur.

Tabula XV. quatuor figuras exponit. I. vesicam aëre distentam, & nonnihil in latus conversam exhibet, ut praeter variam ejusdem fibrarum directionem, vesicula seminalis, vas semen deferens, ureter alterius lateris, &

praesertim prostata, ejusque ligamentum clarius in conspectum veniant. Figura II. varietatem incessus fibrarum vesicae mirum in modum demonstrat. Figura III. ferra a summae pubis lateribus ad ischii usque tubera demissa, adversam pubis faciem, & quae pone eam sunt, labyrinthum, prostatam, imam vesicam repraesentat. Hic peculiaria quaedam occurrunt, quae Tab. II. fig. II. *Observ. Anat. Santorini* respondent. Figura IV. Quid hac figura una cum vesicae parte, & glandula prostata exhibere voluerit Santorinus, probabili conjectura assequi haud facile est. Si quaedam parva demamus, quae fig. I. adhuc deesse videntur, quaeque haud attigimus, cum de hisce haud nobis plane constet, ut hanc Tabulam inter absolutas recenseamus, omnia hic plane suadent.

Tabula XVI. duas capit figuras: I. exhibet circa penis cervicem novos ductus, ac musculos, praesertim omnes penis, urethrae, prostatae, & ani. Haec, figurae V. Tabulae III. ab ipso Santorino evulgatae respondet. Caeterum quantum haec nova a veteri distet, intuentibus judicium relinquimus. Si singulas enim appellationes retinere, quas Auctor prodidit, veterem figuram explicans, & ad novam hanc transferre vellemus, multa sane in hac nova figura cum Santorini ejusdem descriptionibus pugnancia offendere-mus. Fig. II. testem a suis involucris eductum refert. Haec expolita, atque absoluta Tabula, cui praeter numeros, ut in caeteris, nihil omnino addidimus, nihil etiam detraximus, una cum praecedenti plura habet, quae ad Caput X. *Observ. Anat. Santorini* potissimum attinent.

Tabula XVII. „ostendit virginis naturalia suis in sedi-  
„bus haerentia, ipsorum musculos, eos quoque qui ano



» dati sunt, sphincterem scilicet, & levatores». Et haec cum figura I. Tabulae II. Cap. XI. ejusdem Santorini Operis quammaxime convenit. Verum quantum haec figura elegantia, diligentia, partium naturali delineatione veterem antecellat, peritiores Viri judicabunt. Num ab hujus figurae sede, quae satis alte posita occurrit, alias in hac Tabula figuras infra addere voluisse Auctorem satis eruitur? Ita certe conjicere pronum est. Caeterum ne vel minima aliqujus rei adumbratio ibidem erat, nulliusque opera opus fuit, ut quemadmodum se habet, publice produceretur. Hisce Tabulis Auctoris imaginem praeposuimus, cujus in basi, cum quaedam occurrerent, quae in praeposito vitae Santorini commentariolo habentur, tamquam inutilia delevi, ut aliis ad majorem Tabulae elegantiam facientibus locum cederent. Num vero id votis responderit, viderint alii.

Tabulis Santorini illust. Cuboli Tabulas de mammis adjeci. Hae, quas Auctor pariter inexplicatas reliquit, ad illius scripta, quae, ut diximus, explicationi Tabulae VIII. Santorini addidimus, pertinent. Hic eas collocandas censuimus, ne Santorini Tabularum ordinem perturbaremus. Figurae, quas duabus Tabulis nunc exhibeo, tribus in Tabulis exculptae erant. Verum cum in una ex iis, quaedam etiam tantummodo adumbrata, captuve difficillima occurrerent, me Lectoribus gratum facturum existimavi, si quae perfecte tribus Tabulis exculpta erant, duabus fideliter, dilucide, & satis commode exhiberem. Ex hisce praeterea Cuboli Tabulis aliam etiam omisimus, ne nos Tabularum numerum inutiliter augere voluisse quispiam censeat, cum partem eorum solummodo exhibeat, quae in Santorini Ta-



bula VIII. solertissime, diligentissimeque exculpta perhibentur. Ex iis itaque

Tabula I. mulieris primiparae quatuor & viginti annos natae irregularem mammae dexteræ basim ostendit, in qua plures vasorum lacteorum radices ex acinibus prodeuntes, atque ex minoribus in majores sensim convenientes, mammaeque substantiam subeuntes conspiciuntur.

Tabula II. quinque figuras continet. Harum I. provinciam a caeteris mammae secretam, atque ex interiori facie exhibitam demonstrat, ut vasorum origines, eorumque directio dilucide in conspectum veniant. Figura II. vasa lactea in sinum conicum corrivantia ostendit, ex quo tenuis exilisque excretorius ductus emergit. Figura III. inversam areolae, papillaeque partem repraesentat, ut vasa lactea excretoria secundum finitorem discissa, papillam subeuntia conspiciantur. Fig. IV. duae vasorum lacteorum radices ex acinibus, a reliqua glandulari substantia secretis, radiato principio, emergentes exhibet, ut luculentius earum initium, atque directio occurrat. Fig. V. eandem provinciam figurae primae, sed inversa, exteriorique facie inspiciendam ostendit, ut ejusdem laciniae, foveae, irregularitates in propatulo sint.

Hisce Cuboli, atque Santorini Tabulis, licet mammae structura satis apte exprimatur, tamen aliquid adhuc optandum videbatur, ut uno intuitu intra mammam lacteorum vasorum perreptantium sedes, forma, atque naturalis directio, eorumque insimul in sinus corrivatio ostenderentur. Quare hisce Tabulis novam addere consultum duximus, quo haec omnia, quoad fieri posset, in lucem producerentur. In mammas itaque lactantis cujusdam per

quaedam vasorum lacteorum papillae oscula ceram versicolore iniecimus; injectiones enim in omnia hujusmodi vasa in sua sede fieri simul, ac semel nequeunt, eo quia vasorum sinus jam cera repleti, atque distenti proxima premunt, urgentque, sicque eorum injectioni maxima ex parte obstant. Tribus propterea in eadem mamma lacteis vasis perfecte repletis secundum eorum directionem, mammam statim infra areolam, majori qua potuimus diligentia, atque sedulitate secuimus, qua ratione intus se haberent, inspecturi. Quid nobis sectio obtulit, ostendit

Tabula nostra I. in qua secta circa medium mamma, ejusdem secretae provinciae vasorum lacteorum sinus, forma, directio, atque sedes conspiciuntur.

Tabulae autem nostrae secundae, atque omnium postremae originem praebuit quaestio illa, unde tunica testis vaginalis nata sit, contendentibus aliis eam revera a peritoneo deduci, aliis a cellulari tunica ipsi peritoneo adhaerente pendere. Ea de re pluribus foetuum sectionibus institutis, quae nobis observare contigerit, Tabulae XVI. figurae secundae Santorini addidimus, eaque exhibuimus

Tabula II. figura I. in qua dissecto sex circiter mensium foetu, praeter inversi jecinoris magnitudinem, & sedem, ventriculi naturalem constitutionem, renum succenturiatorum amplitudinem, pleraque alia, potissimum testium sedes, eorumque vasa, & tunica vaginalis peritoneo continua perbelle conspiciuntur. Figura II. foetus quatuor circiter mensium testes peritoneo, ut caetera, obductos adhuc in abdominis cavo haerentes exhibet, quorum bases apice suo in os pubis sese demittere apertissime observantur.



Verum ut ad Tabulas Santorini revertar, hisce explicandis cum primum operam dedi, nudas Tabularum explanationes edere decreveram; hisce postea in libri calce animadversiones addere, quibus Tabulae illustrarentur. At jam labore progressus, me in hisce, quam par est, longiorem esse adverti, vidique me fortasse facilius, utiliusque propositum mihi finem affecuturum fuisse, si Tabularum explanationibus animadversiones adnecterentur. Hanc in rem scripta ipsius etiam Santorini me impulerunt, quae cum absque ullo ordine, pluribus, ut superius dictum, maculata lituris, in schedis relicta essent, necesse fuit, quae ex iis, summo cum labore, excerpere potui, nullo conjuncta nexu, ne deperderentur, Tabulis quodammodo accommodare. Hac itaque ductus ratione non modo Santorini observationes, nostrasque, ubi occasio tulit, Tabularum explanationibus interseruimus, sed & ipsa Cuboli scripta iis interjecimus: quae licet post omnes Santorini Tabulas apte addere potuissem, utpote prorsus ab iis secreta, malui tamen Amici observationibus Santorini Tabulas illustrare, quas ipse, si fata tulissent, editurus erat, quam seorsum producere, duorum insimul *σχοπῶν* ratione habita, nempe ut ejus scripta de mammis evulgarem, eademque opera Santorinum per Cubolum illustrarem.

Supereſt, ut referam, quid in Tabulis explicandis secutus ſim, ne quiſpiam forte miretur, quod alias paucioribus, alias pluribus complexus ſum. Id ego conſulto feci, ratus me inutilem operam ſuſcepturum eſſe, ſi in rebus primo intuitu ſeſe aperientibus, quibus Santorinus ipſe parum, aut nihil addendum putavit, longa ego deſcriptione, neque ſine Lectorum moleſtia inmorarer. Contra vero plu-



ribus persecutus sum ea, quae aut per se non ita facile patent, aut utrinque agitata, aut obscuriora explicatiorem orationem postulerent, praesertim ubi ex ipsius Santorini editis, aut non editis multa suppetebant, quibus difficiliora captu planiora legenti fierent. Jam vero occurrerunt alia, in quibus interpretandis conjectura opus fuit, alia quibus ne conjectura quidem sufficeret, quae in medio relinquimus solertioribus pro ipsorum ingenio interpretanda.

Quum vero Santorinus ad Eustachianas Tabulas suas retulerit, nempe ut graduum numeris, quae expressa sunt, designaret; ut ego difficultates quasdam, quae in Tabulis hac ratione explicandis quandoque intercidunt, declinarem, optimum factu duxi, ut quemadmodum Eustachianis Tabulis lineares Tabulas notis necessariis instructas Albinus apposuerat, ita Santorinianis totidem lineares & ego apponerem, quibus facilius etiam a Santorino exhibita Auditoribus meis explicarem.

At licet laboris plurimum, quantumque conniti potui, publicis, privatisque observationibus ad hasce Tabulas explicandas contulerim, me nihilominus iis longe inferiora protulisse video, quae a Santorino exspectari jure optimo potuissent. Alii etiam felicius *σάρταν ταύτην κοσμήσειαν*. At ideo si meliora non potuimus, nostra haec improbanda? Id ab aequis, humanisque rerum aestimatoribus minime exspecto, speroque nisi laborem, saltem voluntatem esse laudaturos. Nihil nobis acceptius contingere poterit, quam si quis, ut honestum hominem decet, nos aut aliqua omisisse, aut alicubi e recto tramite aberrasse admonuerit, prae-bueritque lumen iis, quae intellectu obscuriora sunt, &

quibus illustrandis impares fuimus. Is certe cum apud alios, tum apud me ipsum peculiarem gratiam inibit. Quoad nobis licuit, morbo potissimum vexatis, occupatisque temporibus, haec congeffimus, suisque aptavimus locis, curantes pro viribus, ne quid temere, inconsiderateque affirmaremus. Ubi sese obtulit occasio, data opera, cl. Auctorum inventa aequis laudibus celebravimus, cavimusque simul, ne si quid nobis haud penitus satisfaceret, Auctores ipsos in contemptionem adduceremus. Utinam iis, qui ista legerint, conatus nostri haud omnino inutiles accidant: hic scilicet unus omnium uberrimus, ac suavissimus erit laborum meorum fructus.









# EXPLICATIO

## SEPTEMDECIM


### TABULARUM ANATOMICARUM

### JO: DOMINICI SANTORINI.



## TABULA I.


» Exhibet musculos faciei ».



A A Musculi frontales.

- a Aliqui postici ipsius frontalis lacerti, qui ab ejus latere in orbicularis musculi latus continuantur.
- b Nonnullae rariores ejusdem frontalis fibrae, quae ab aliis deflectentes in orbicularem oculi musculum inferi videntur.
- c Pars alia frontalis ima, sed plenior, quae coactis fere in angulum fibris in interiorem oculi canthum inseritur.
- d Mediae ejusdem fibrae, quae per jugum, dorsumque nasi ad orbiculum fere tenuatae descendunt. Hasce fibras Santorinus (a) pro » novo musculo Procerio » descripsit, atque delineavit, cum ipsi » frontalis terminus non ultra nasi jugum juxta frequentes ejus observationes haberi videretur » (b). Verum ubi haec habet, ita in

a




(a) *Observationes Anatomicae, Cap. I. §. x. Tab. I. lit. bb.*

(b) *Ibidem §. v. p. 7.*

marginē Exemplaris illius, quod in Praefatione indicavimus (a), suam sententiam exposuit. *Tametsi frequentissime frontalis terminus non multo infra nasi jugum sit, aliquando tamen, perraro licet, id ipsum observavimus, quod ab ipso Eustachio (b) exhibetur, demissas nempe fere ad nasi dorsum frontaliū fibras; quod potissimum animadvertimus in iis contingere, in quibus vel nullum, vel exiguum sane est Procerum nostrum musculorum par naso datum, idque in bene nasuto notavimus.* Quas fibras musculi frontalis per nasi dorsum descendentes, ut alias pluries, ita & hoc anno 1775. dum publicam Anatomen traderemus, in theatro observavimus, aliisque observandas praebuimus.

B Musculi occipitalis pars, cujus superiores fibrae tendineae rariores per capitis latus sursum feruntur.

C Musculus auriculae superior, quem aliter hic delineatum esse, quam in Tab. III. fig. IV. *Observ. Anat.* ejusdem Santorini, quisque facile intelliget. Huic novae delineationi descriptio etiam, quam hujusce musculi ipsemet Auctor reliquit, quammaxime respondet (c). *Diligenter autem in idoneis disquisitum cadaveribus comperi, mox supra orbitam, non modo in orbicularis, aut frontalis vicinia ortum, sed sub ipso frontali tenues ejus fibras exoriri, quae ad auriculam properantes paulo coguntur, atque pleniores fiunt. Hae autem pene in orbem, seu in arcus speciem desuper circumfunduntur, atque in posteriora devexae in auriculae superiorem partem terminantur. Priorum pars ima, quae plenior caeteris est, atque longior, sed interjecto tendine distincta, atque intercisa, in priorem conchae, atque interiorem partem inseritur; quae has consequuntur una cum rectis, seu verticalibus, in superiorem; posticarum autem imae iterum in concham illabuntur, ut non modo auriculam attollere, sed ejus sinus, seu capacitates dilatare manifestum sit.* Haec tamen musculi delineatio, & descriptio, etsi magna ex parte cum iis conveniat, quae & alii, & nos observavimus, tamen ne eorum injuria dictum videatur, qui aliter scripserunt, atque deli-



(a) Pag. xix.

(b) Tab. xxviii. lit. β, & xli. fig. i. lit. γ &c.

(c) Ibidem Cap. II. §. II. pag. 39.



nearunt, haud reticendum, quod ex propriis observationibus immortalis Praeceptor meus Morgagnus (a), perpetua, ac gratissima recordatione colendus, retulit, nempe *aliter in aliis cadaveribus sese rem habere, quod ejus tum veteres, tum recentes observationes ipsimet confirmarunt*; quemadmodum & ante Morgagnum celeb. Heisterus (b), qui *in quovis fere cadavere aliquam varietatem, saepissime tamen etiam tantum superiorem & posteriorem, varie in variis constitutum deprehendere solitus erat.*

D D Magna zona fibrarum palpebris, atque adeo orbitae circumjecta, quae musculus orbicularis oculi dicitur, cujus utrumque extremum ad canthum oculi interiorem est, alterius scilicet superne, inferne alterius.

\* » Pars musculi orbicularis, quae frontali subjicitur, & in corrugatorem abit ».

e e Fibræ inferiores, ac crassiores musculi frontalis, quibus fibræ superiores musculi orbicularis subsunt, quasque eo loci, musculum superciliarum corrugatorem esse dicunt.

Perpetuum autem fibrarum lacertulum ex inferioribus fibris musculi orbicularis, quas alias Santorinus (c) descripserat, atque delineaverat, in hac Tabula plane omittit, & nobis eum dilucide videre hætenus datum est numquam

E E Palpebrae; superior scilicet, & inferior.

e \* Ligamentum palpebrarum, seu verius tendo, in quem palpebrarum, & orbicularis oculi lacerti terminantur.

f Locus ad canthum exteriorem, quo fibræ utriusque palpebrae non continuantur, sed concurrunt in interiorem orbitae faciem terminantes.

F Musculus temporalis, qui fibras initio quasi semi-circulari non modo ab osse frontis, sphenoidis, temporum, bregmatis, verum etiam nonnullis fibris ab interiore angulo ossis malae in angustum colligit, & in processum coronoidem maxillae inferioris, parte dexteriore, & interiore, sese dimittit.

---


(a) Epistolae Anatomicae duodeviginti. *Venetis an. 1740. epist. IV. n. 2.*

(b) *Compend. Anat. n. 317.*

(c) *Ibidem Cap. I. §. VII. & Tab. I. lit. o.*



- G » Processus in posteriora productus primi ossis malae Zygomaticus ».
- H Musculus Zygomaticus major, qui non ita raro dividitur, ac
- g Partem unam interius depresso labiorum communi adjungit, quemadmodum & nos bis observavimus,
- h Alteram iterum discretam ad oris angulum mittit, quem fere complectitur. Alterius hujusce partis fibrae, quae posteriores sunt, fibris depresso communis adjiciuntur, quibus cum descendunt.
- I Musculus Zygomaticus minor fere bifariam diremptus:
- i Altera sui parte elevatori labii superioris proprio imponitur;
- l Altera eidem subjicitur. Initium hujus musculi, quod Santorinus (a) » a priori ossis jugalis facie » ex observatione Praeceptoris (b) deduxerat, nunc licet multo altius, nempe a laterali, & superiori parte musculi orbicularis, & ex ipso fere orbiculari repetere videatur, tamen ubi Zygomatici hujusce musculi descriptionem habet (c), haec addit: *quamquam hic musculus tamquam pars orbicularis oculi proponatur, & eidem quidem saepe subjectus sit, tamen ab eodem luculenter distinctus, atque divisus conspicitur*, quem licet nos cum Santorino distinctum ab orbiculari, eidemque proximum observaverimus; tamen non ultra jugale os, sed in parte ejus anteriore, & inferiore hujusce musculi initium, ut plurimum animadvertimus, & publice etiam ostendimus.
- K K Musculus Masseter, qui partim ab
- \* \* Osse quadrato malae, partim a
- \* Processu priore ossis temporum exoritur. *Hinc Masseteris juxta Santorini adnotata (d) quasi duae partes sunt, altera longior, brevior altera. Longior, atque exterior, omnis fere tendinosa oritur a crepidine ossis malae, cujus fibrae & pleniores multo caeteris, & latiores oblique retrorsum incedendo, in angulum, & aciem maxillae inferuntur. Breviores vero, quarum pars dividi ab caeteris facile potest, carnosae plurimum sunt, atque quasi acuto angulo in superiorem maxillae partem protinus infra processum obtusum, ac in*



(a) Tab. 1. lit. Q.

(b) Adversaria Anatomica altera, Patavii an. 1719. animadv. 12.

(c) Ibid. §. xxiii. p. 25.

(d) Ibid. §. xxxvii. p. 36.

## T A B U L A E I.

5

*eundem acutum*, *Coronoidem appellatum*, *tendineo-carnosae infiguntur*. Harum ortus cum a crepidine jugi, tum ab omni interna facie, atque paucarum a Crotaphitis externo involucro talis est, ut praeter adductionem maxillae inferioris ad superiorem, eandem inferiorem maxillam in priora, & in latus etiam quadante-nus trahere videantur.

- L Caninus, seu musculus Elevator labiorum communis, qui continuari videtur in triangularem, seu
- M Depressorem labiorum communem.
- N Musculus Incisorius, seu Elevator proprius labii superioris.
- O Musculus Pyramidalis, cujus pars in pinnarum angulum, reliqua in labium superius infigitur. Hunc musculum, quem alias Santorinus (a) adversus Casserium, qui (b) *unicum* descripserat, geminum sive saltem disjunctum mordicus esse defendit, talemque delineavit; nunc mutata sententia, posterioribus certe, pluribusque observationibus edoctus, simplicem cum ipso Casserio, & penitus parte, quam Tab. I. litt. T delineaverat, destitutum perhibet. Et revera cum pluries diligenter in hunc musculum disquiserimus, licet fibras elato nonnihil spatio interdum per nasi alas demitteret, simplicem esse, & descendendo pinnarum angulo tantummodo adhaerere, aut certe in eundem perpaucas fibras immittere, ac in labium superius abire observavimus.
- P Musculus nasi transversus, sive Compressor naris, qui angusto, teretique, interdum etiam lato, crassoque initio subpyramidali, cui persaepe inferitur, ab osse maxillari, nonnihil infra latera nasi interdum exortus, primum oblique, deinde arcus ad instar sese expandens, ac oblique per nasi latus dorsum versus incens, idemque scandens, frontaliū extremo conjungitur.
- m Pinnarum musculus, cujus fibrae arcus in modum curvatae infra pinnarum angulum inferuntur.
- n Nasi orbiculus in
- o o Pinnas, seu alas divisus.
- p Imum septum narium.



(a) *Ibid.* §. IX.

(b) De Quinque Sensibus *lib. III. Sect. 1. Cap. VII. Tab. 1. lit. D &c.*



- Q Portio fibrarum, quae ad nares deprimendas, arctandasque inferviunt.
- R Ordo fibrarum, quibus orbicularis labiorum musculus componitur.
- q q Labium superius, & inferius, cujus fibrae Sphincterem oris conficere dicuntur, orbis, seu annuli in modum, quae reapse ad oris angulum ad decussim ductae, ultra os procedunt, & in diversa abeunt.
- S Musculus Quadratus Menti, seu Depressor proprius labii inferioris, in quo musculo triplex fibrarum ordo conspicitur.
- r Mediae tenuatae, complexae, quae in tegumenta terminari videntur;
- s Confertiores, & tenuiores, quae ut superiores ad decussim ductae, ab lateribus, & imis menti partibus sursum oblique procedunt;
- t Rariores, intimioresque, quae ab oris angulo disiectae, arcus instar, circumferuntur mento, quasque labii corrugationi potissimum datas esse merito existimavit Santorinus.
- T Quadratus colli musculus, seu *Platysma myodes*.
- V Portio quadrati colli, qui fibras in menti latera diffundit. Licet hujusce musculi fibrae haud in transversum, sed ex inferioribus oblique ad superiora, ut egregie Eustachius, & Albinus habent, ascendant: tamen cum una, eademque res cum musculo Risorio, quem » quadrati colli quasi sobolem, & propaginem » dixit Santorinus, esse videantur, idcirco partem hanc, quae latus maxillae, & vas, quod mox sumus infra descripturi, operit, pro quadrati musculi parte proponere haud dubitamus. Fibris hujusce musculi subjicitur
- u Substantia glandularis, quae appendix parotidis glandulae esse videtur. Ibi tamen frequenter glandulam maxillarem parotidi adjacentem esse observavimus.
- w Latus fibrarum fasciculus, qui etsi portiuncula ejusdem quadrati sit, interdum tamen ab ipso discreta musculum per se constitutuere videtur, qui a Santorino Risorius dictus fuit.
- x Venae jugularis internae ramus, qui juxta maxillae latera in faciem surrectus buccarum musculo applicatur, quoquo versus multas, tenuesque propagines ad canthum usque oculi majorem, & mediam frontem producturus.



y y Musculus Buccinator totis buccis circumpositus, cujus in vicinia oris anguli

z Decussis fibrarum est, quarum aliae in superum, aliae in inferum labium diducuntur: ad posteriora vero hujusce musculi initium est ab utriusque maxillae, ubi postremorum maxillarium dentium alveoli sunt, cum latere, tum postica parte, a corniculo, & leviter etiam ab adjunctis partibus processus pterygoidei; quod initium spectans Santorinus, hunc musculum adversus Cowperum, Duglassium, Heisterum, aliosque a processu Coronoides oriri penitus negavit (a) » quando scilicet Coronoides processus eo tantummodo loci esset nominandus, quo supra communem utriusque » processus basim ab altero condyloide processu diduci incipit ». Quam sententiam ut iterum confirmaret, ita novis observationibus locupletavit (b). *At rem hanc iterum requirendo, ac confirmando cognovi, unde haec irrepserat opinio. Coronoidis scilicet viciniae per quamdam quasi tendinis speciem musculus is necti deprehenditur. At si porro res disquiratur, dissecta valida nectente membrana, cernuntur facile eae fibrae sic pergere, ut ad superiora converfae aliae in malas, aliae in pterygoidem terminari certius deprehendantur; qua adhibita sedulitate, multa buccinatoris exterior pars disjunctis glandulis conspersa animadvertitur, quae in oris cavum oscula immittunt. Quae licet adjectio sententiam ejus quadantenus confirmet, tamen nobis maxime ea, quae Praeceptor attulit (c), ut litem inter celeberrimos viros dirimeret, arrident, nempe Cowperum, aliosque praestantes Viros nomen processus coronoidis ad ejus etiam basim extendisse, cum ejus processus basis sic satis distincta ab interiori, & inferiori facie appareat, ut non ipsa tantum, sed & is in quem abit processus, multo ab ea facie inferius incipere videatur; ideoque unum, eundemque locum & veteres, & nuperos Anatomicos intellexisse, licet alii, aliis verbis rem ipsam designaverint.*

a Caput Condyloide maxillae, quod in sinum ossis temporum infinuatum, commixtumque vertitur.

---

(a) Ibid. §. xxxv.

(b) Ibid. p. 34.

(c) Epist. Anat. xi. n. 41.

W W Glandula Parotis, cujus pars posterior infra angulum maxillae inferioris descendit; prior versus oris angulum tenuata profertur, masseteri musculo applicata, cujus

β Ductus oblique circa latus masseteris inclinatus, musculum buccinatorem pervadit. Si hujusce glandulae delineationem, quam certe ut plurimum ita se habere comperimus, Santorinus, quemadmodum paraverat, evulgare potuisset, praeclarissimi certe Viri reprehensionem effugisset, cum ipsum in Tabula ejus I. *parotidem paulum distinctam pinxisse* adnotaverit.

X Musculus Sterno-Mastoideus.

Y Musculus Splenius.

Z Cucullaris, sive Trapezius.

Δ Auricula tegumentis spoliata, in qua

γ Helix est in arcus modum flexus, qui

δ Priore extrema parte in posteriora reflexus majorem auriculae capacitatem, quae

ε ε Concha dicitur, fere bifariam dividit:

ζ Ima tenuata in processum terminatur.

η Anthelix, qui imo extremo in

θ Antitragum desinit; summo autem

ι ι Bifariam dirempto minorem auriculae capacitatem, quam

κ Scapham vocant, comprehendit.

λ Tenuis musculus Helicis, sive » fibrae novae musculares imae » Helicis parti inferiori applicatae ».

Musculo autem Helicis, quem Santorinus (a) descripserat, atque delineaverat, interdum juxta ejusdem posteriores observationes *carneas fibras adjectas, quibus corpulentior is fieret, non in helicis processum, sed in summam cartilaginosi tubi partem prope incisuras terminatas vidit, quarum ope vel cartilaginosus meatus attolli, vel laxari, seu quod fortasse facilius est, helix ipse deprimi queat, suo alterutro non deficiente ad pleniorum auditionem commodo.*

μ Portio musculi Anthelicis,



(a) Ibid. Cap. II. §. v. p. 41. Tab. III. fig. IIII. lit. b.

υ Tragus, ejusque musculus.

*Praeter hasce fibras, de hoc Santorinus musculo addit (a), quae perpetuo conspicuae sunt, in aptioribus cadaveribus comperi, membranae instar, tenuem, sed verum musculum, qui ab interiore interruptione cartilaginea prolatus in multam latitudinem, super videlicet meatus flexum productus, ultra eum ad Antitragum proferebatur, ut opiner, ab hoc meatus ostium contrahi, cum ipsius flexus, atque interior cartilaginis interruptio maxime abducatur; atque hoc modo nulla auriculae pars peculiari musculo vacat, quippe suus conchae, suus Trago, & Antitrigo, suus Helici, & Anthelici, suus Interruptioni, suus Scaphae, totique demum musculus est, tametsi iidem aut minus ab caeteris cogniti, aut eorum usus percepti.*


ξ An interruptio principii meatus auditorii?

φ μ Ea auriculae pars, a qua propendens lobulus resectus est.

π Musculus posterior auriculae, quem licet ut plurimum simplicem carneo-tendineum esse, & a processu mastoide ortum observaverimus, tamen triplicem fuisse publice etiam ostendimus. Cum triplex, horum superior, caeteris brevior, & tenuior in superiorem, intimioremque conchae partem adibat; medius non ab occipite, sed a mamillari prorsus processu, nec quicquam ad occipitium pertinens, ut animadvertit etiam Santorinus (b), tereti pene tendine in posticam concham; imus longior oblique deorsum in imam quasi illius partem terminabatur. Ii musculi concham potius diducere, quam auriculam retrahere videntur. Siquidem in intimam, posticamque conchae partem inseruntur, ut eam multo facilius explicare, quam retrorsum ducere putandum sit.



b



(a) Ibid. §. VII. p. 42.

(b) Ibid. §. X. p. 45.


















## TABULA II.


*Repraesentat basim Cerebri circumsecta Calvaria contenti,  
ac minime e suis sedibus dimoti.*



- A *P*rior Calvae pars, seu ima Frontis.
- B Posterior Calvae pars, seu Occipitium.
- CC Cranii crassitudo, ac praesertim Meditullium, seu Diploes, in quo
- a a Lamina exterior, crassiorque, &
- b b Lamina interior, tenuiorque conspiciuntur.
- D Summa pars sinus dexteri frontalis.
- E Summa pars sinus frontalis sinistri, in duas pene caveas discreti.
- F Acies interior Calvae in Ethmoidem continuata, cui sinus falci-  
formis adnexus suspenditur.
- G Latus Cranii tenuius, in quo vix quidquam Diploidis conspicitur.
- HH &c. Ultimi fines basis Cerebri, in quo flexuosi, inordinatique, in-  
testinorum instar, ejusdem naturae tractus facile advertuntur.
- I Cerebri a summo ad imum circa priorem partem pene in duo  
hemisphaeria partitio, quorum utrumque in binos lobos distinguitur.
- KK Lobi priores, qui eorum sinibus eminenti oculorum orbitae ac-  
commodantur.
- LL Lobi posteriores.
- MM Cerebellum, quod non modo ima,
- c c Posticaque divisione dirimitur, sed
- dd Alia levior, quasi in lobulos secernitur.
- N Processus Vermiformis, rudi quadam similitudine nuncupatus.
- OO Par nervorum primum Olfactorium dictum, in quo linea secun-  
dum longitudinem ducta animadvertitur.

Hujusmodi lineam non Santorinus modo, tum in hac, tum in  
sequenti Tab. fig. I. lit. a a, sed inter alios Willisius (a) Tab. I.

b 2




(a) Opera omnia Venetiis an. 1720. Cerebri Anatome Cap. I. pag. 110. &c. & IV. pag. 122. &c.



lit. D delineavit, licet neuter descriptionem attulerit, neque de utilitate addiderit quidquam: immo Willisus Tabula V. litt. C C cum in superiore horum nervorum parte lineae prominentis crassiusculae inferiori longitudine, ac sede respondentis, figuram exhibuerit, ne verbum quidem de hac ipsa fecit. Quae linea illa fortassis est, quam Praeceptor in Epist. Prooemio adnexa (a) commemorat, quamque nos observavimus semper, atque ad hunc modum se habere intuiti sumus. Nervi Olfactorii » non per in- » sculptum secundum longitudinem rectum sulcum ad os Ethmoidis » contendunt », quemadmodum olim Santorinus (b), & alii post ipsum tradidere, sed per angustam rimam, quae nervo olfactorio latitudine angustior est, quaeque in cortice basis cerebri perpetuo reperitur, quemadmodum Praeceptor indicat (c), & Santorinus Tabula insequenti lit. e e habet, excurrunt. Cum itaque a dictae rimae lateribus hujusce nervi latera premantur, sursum extolli nequeunt: mediae autem nervorum parti, cum rima respondeat, per quam iidem ad ossis cribrosi foramina contendunt, quin crassescat nervus, nihil impedit. Hinc ea in nervi parte, quae cerebrum respicit, & rimae aptatur, linea ex loci constitutione prominet; in opposita autem parte lineae signum tantummodo, non prominentia conspicitur. Quapropter ejus utilitas, si qua sit, consistere dicenda fortassis est, ut nervus ipse quadante-nus debitae molis, ac consistentiae evadat. Verum haud reticendum me pluries ex inferiore hujusce nervi parte, qua cranii basim respicit, non lineae signum, sed rimulam quamdam lineae loco vidisse, & lineam ipsam ab albicantibus duarum ejusmodi nervi radicum lineis compingi. De origine autem hujusce nervi fatis Tab. III. fig. I. litt. b b b b.

ee *Pars extrema nervi Olfactorii praeter caeteros omnes tumentior, & alterius pene naturae, seu certe coloris, cinerei scilicet, qualis reliqua cerebri exterior facies est.*



(a) Pag. xvi.

(b) Ibid. Cap. III. §. XIII.

(c) Ibid.

*Ab hac autem papilla (ita Santorinus (a) adnotavit), si in consistenti cerebro periculum fiat, sensim scilicet a cribriformi osse distraherentur fibrae, plurimae inde maximae tenuitatis emergentes fibrillae deprehendentur, quae non ossis sane foraminibus, quae quidem multo ampliora sunt, sua mole respondent, sed tenuissimae ex iis singula plurimae disiectae fibrae pervadunt, unde ulterius diductae, ac distributae Olfactus Organo vim potissimum sensationis tribuunt.*

Quam observationem, ut confirmarem, cum non in homine solum, sed & in brutis animantibus periculum inirem, contigit mihi, ut in homine, Apoplexia defuncto, dum nervi papillam (ut Santorini verbis utar) sensim, ac diligenter elevarem, ne fibrae, quae ab ea profisciscuntur, abrumperentur, plures hujusce fibrillas unum simul ex majoribus ossis cribrosi foramen subire viderim, aut certe vidisse mihi visus fuerim.

PP *Par nervorum alterum, Opticum scilicet; cujus origo, Tab. III. fig. I. lit. d d, describitur.*

f *Copulatio eorundem nervorum, seu comparium inter se adhaesio.*

Q *Infundibulum pone nervos Opticos locatum, in cujus extrema parte tenue osculum est, de quo Tab. III. fig. I. lit f.*

RR *Arteriae Carotides intra Cranium illatae, quae antequam inter cerebri lobos priorem, posterioremque subeant binas propagines emittunt:*


gg *Alteram priorem, quae inter Olfactorios, & Opticos conjuncta, & cum socia copulata, surculos effundit, qui inter cerebri hemisphaeria distribuuntur:*

hh *Alteram Carotidis propaginem posteriorem, quae productae, basilari, sive cervicali arteriae occurrit, eidemque continuatur.*

ii *Rami a propagine praesertim arteriae basilaris profecti, qui*

SS *Tertiae conjugationis nervis, sive Oculorum Motoribus imponuntur.*

» De hujusce paris exortu, nulla mihi adjicienda iis sunt, quae  
» diligentissimus adnotavit Morgagnus (b), quum revera illud ex  
» eo ipso designato loco emergat, ex internis scilicet, postremis,  
» & fere imis lateribus crurum medullae». Ita Santorinus (c), qui



(a) *Ibid. pag. 62.*

(b) *Adver. Anat. VI. animad. XXVII.*

(c) *Ibid. §. xv. pag. 64.*

haec postea subdit. *Cum mihi alias visum fuerit ex internis postremis, & fere imis lateribus crurum medullae oblongatae tertium nervorum par emergere, forte per quam idoneo oblato cadavere aliter aliquando horum exortum animadverti. Ut is autem intelligatur, accipiendum prius est, non id omne cruribus medullae oblongatae interjectum iisdem esse cruribus tribuendum; siquidem eam dumtaxat partem licet crurum nomine appellare, quae conspicuis, distinctisque in longitudinem tractibus medullaribus ab adjunctis partibus discernitur, adeoque interjecta ea pars pone corpora albicantia, quae basis tertii ventriculi est, nullo pacto memoratis cruribus est adjicienda, cum & specie, & natura ab iis diversa sit. Ab hoc igitur loco, qui maxime cruribus adjunctus est, perspicue tertium par procedit, nempe a basi cerebri. Licet plures, ac repetitae observationes hanc alteram tertii paris originem, nempe a basi cerebri confirmaverint, tamen ii nervi ita arcte internis, postremis, ac fere imis lateribus crurum adhaerent, ut ex ipsis etiam emergere, saltem aliqua ex parte negare minime ausim. Horum enim initium ita se habere videtur. Prope intima crurum latera, ab ea substantia, quae cruribus interjecta est, quaeque circa horum initium, ut plurimum non modo cinerea, sed fusca, ac interdum livida observatur, explicatis perspicue albicantibus fibrillis, ac deinde in teretem fasciculum collectis exoriuntur. Vix emerfis non modo medullae oblongatae cruribus arcte adhaerent, sed ipsis innectuntur, implicanturque. Fibrae enim e basi cerebri erumpentes cum crurum fibrillis, e quibus aliquando ii nervi tantummodo componuntur, confociantur adeo, ut nulla ratione, licet summa adhibita diligentia, sejungi absque laceratione possint. Hinc quemadmodum ex medullae oblongatae cruribus hosce nervos, saltem ex parte originem ducere minime inficiari possumus, ita & ex cerebri basi quammaxime constare, nemo diligens Anatomes perscrutator in dubium revocare posse videtur.*

TT *Globuli a Casserio testes, a Vieussenio corpora albicantia dicti.*

VV *Duo crura medullae oblongatae.*

W *Osculum trunci arteriae basilaris, cujus*

ll *Rami unam crurum medullae oblongatae partem complectuntur, unde tenues surculi in interiora cerebri, priores nempe ventriculos immittuntur.*



- XX *Protuberantia anularis, in cujus medio*  
 m *Sinus est, quem arteria basilaris impressit, qui ut conspici facile*  
*posset, majorem arteriae partem Santorinus abscidit.*
- ZZ *Quarta; ac tenuissima nervorum conjugatio, seu Pathetici nervi*  
*inter cerebrum, & anularem protuberantiam procedentes. » Infra te-*  
*» stiformes protuberantias, triplici utrinque furculo, prodit ab trans-*  
*» verso eo medullari tractu, qui super editae magnae valvulae par-*  
*» te locatur, sic, ut idem medullaris tractus productus, atque ab*  
*» eo loco disjunctus in Patheticum utrinque nervum abeat »; prae-*  
*» terea addit Santorinus (a), alterum tamen ex iis furculis paulum*  
*reflexum, atque assurgentem, ab adjuncta testiformi protuberantia*  
*pronatum constanter cernimus; atque commodum saepe animadvertere*  
*fuit, non tenuissimos duos medullares tractus ab earum protuberantia-*  
*rum media rima demitti, atque ad decussim reliquorum in magnam*  
*valvulam ferri, ibique desinere, quorum exortus potius superioribus,*  
*nativiformibus scilicet, tribuendus videtur. Hosce nervos caeteris exi-*  
*liores ut plurimum duplici origine, nonnihil infra testiformes pro-*  
*tuberantias, lato spatioso, inter se distitos, ad principii magnae*  
*valvulae cerebri latera, nullis hactenus in decussim ductis fibris,*  
*pronatos observavimus: simplici etiam, licet raro, cum origine*  
*animadvertimus; tum vero ab eo prorsus loco, quem Tab. III.*  
*fig. II. lit. I indicat, emersos adnotavimus. Quod dictum volu-*  
*mus, non ut quidquam diligentissimi Viri observationibus detraha-*  
*tur, sed ut ea, quae nobis occurrere, fideliter, ut Historici offi-*  
*cium est, referamus, cum ipsemet Santorinus » nec ubique fortas-*  
*» se, nec cuique idipsum saepe variam naturam demonstrare » ani-*  
*madverterit (b).*
- YY *Par nervorum quintum, Gustatorium scilicet, a lateribus anularis*  
*protuberantiae emersum, qua videlicet extimae diductae anularis pro-*  
*tuberantiae fibrae nonnullae, partim in transversum protensae, par-*  
*tim in superiora provectae, quemdam quasi hiatum faciunt pro illius*  
*emergione.*

(a) Ibid.

(b) Ibid. Cap. IX. §. VI.

Hujusce nervi originem, scilicet unde diversae ejus fibrae primo exoriuntur, quam difficile sit investigare, & litteris olim mandavit Santorinus, & ea quae nervi descriptioni addit, luculenter confirmant. Ita enim habet (a): » quinti nervorum Paris originis » difficilior multo inquisitio, atque investigatio fuit, quam praeter- » reutes Anatomi intactam fere hanc partem reliquere. Non eam » originem voco, qua ex anulari protuberantia, seu Varolii Ponte » nervus is in fasciculum collectus prodit; verum eam unde ejusdem » plurimae, ac diversae fibrae primo exoriuntur. Saepius ubi fir- » miora cerebra offendi, non ex uno prodire hiato certo depre- » hendi, sed tenuiorem fibram seorsum paulo supra emergere, ac » mox caeteris copulari, reliquas autem omnes, uno *quasi Ostio*, » evadere; quae tamen non ab uno universae principio proficisci » videntur; ex his namque fasciculus sub extimo anularis protube- » rantiae fibrarum strato, ex ima ejusdem parte exoriri videtur, » quum nondum tamen constet, utrum a productis crurum medullae » oblongatae fibris sursum versus reflexis, an ab ejusdem anularis » protuberantiae interiore substantia exoriatur. Tertius autem ea- » rumdem fasciculus, qui multo cortice anularis dictae protuberan- » tiae mollior est, non ex eodem progigni loco; verum inferius, » diversam longe nancisci originem apparet. Hunc igitur, quoniam » firmiorem nonnumquam inveni, diligenter prosequutus in intimio- » ra primum anularis protuberantiae sese conjicere vidisse visus sum, » tum ab caeteris sive transversim, sive secundum longitudinem pro- » ductis fibris discretum infra eam sese demittere observavi, atque » eo usque sum prosequutus, unde in interiorem medullae oblonga- » tae caudicem conjectus fere inter olivaria, & pyramidalia cor- » pora locatus, quo demum pergeret, cum tenuium fibrarum im- » plexus, tum earumdem mollitudo, ne consequerer, omnino pro- » hibere ». Quae postea ad trutinam revocans addit (b): *De quin- ti origine, ac processu duo mihi non levis sane momenti monenda sunt, alterum ad originem spectans, alterum ad iter. Etsi a dili- gentioribus adversae fibrae hujusce sic saepe discretae sunt, ut in bi-*

---

(a) *Ibid.* Cap. III. §. XVI.

(b) *Ibid.* pag. 64.



*nos fasciculos separari facile possint; harum tamen fasciculum minorem non ab eodem cum caeteris exoriri loco certum est. Nam major e deductis transversis protuberantiae anularis fibris emergit, minor autem ab ulteriori loco procedens majori quidem copulatur; quamquam harum principium in ejusdem cerebelli pedunculi longitudinem ab lateribus penetralium cerebelli emergat; qui ubi ad majorem accessit, copulari quidem videtur, sed revera sic adjungitur, ut cum eodem procedens, distinctus tamen, mox eidem subjiciatur, atque duram matrem ingressus ex interiori latere adjicitur, ut diversum iter instituat, & diversam naturam praeseferat. Nam fasciculus major, mox post penetratam duram matrem in plexum conformatur, non equidem ganglioformem, sed retiformem potius, cui quaedam quasi carnosae naturae late, laxaeque superinductae videntur, nostro interea, minori quoque fasciculo, neque huic majori immixto, neque hoc plexu donato procedente. Ubi autem sic discretus, sic immutatus ex ovali calvariae foramine evasurus est, in plexum vere ganglioformem mutatur; ac postmodum in fasciculos discretus in maxillae musculos masseterem, ac pterygoideos praecipue inseritur.*

Haec Santorini adnotata licet haecenus sedula cadaverum dissectio haud prorsus omnia nobis confirmaverit, tamen maxima ex parte sunt, quae cum aliorum, tum observationibus nostris plane conveniunt. Et quidem si in idoneis cadaveribus res attente investigetur, nisi me mei sensus fallant, discrimen inter protuberantiae anularis fibras, & fibras nervi quinti paris reperire non admodum difficile videtur. Anularis enim interior substantia, licet ejus externus color albus sit, ac penitus medullaris, ex stratis quadantenus in transversum excurrentibus, & exterioribus transversis lineis ejusdem protuberantiae respondentibus constat, quae sic invicem distinguuntur, ut alterum stratum e corticali substantia sit, e medullari alterum. Hinc cum nervi quinti paris fibrae anularis protuberantiae substantia tenuiores sint, ut ipsa protuberantia, ac nervus, si secundum finitorem per medium scindantur, demonstrare videntur, & ipsemet Santorinus habet, tum albae omnes, & medullares, ac in fasciculum constitutae, non e transversis protuberantiae anularis fibris earum pars pronasci videtur, nisi quis forte e medullaribus solummodo eas potius divinando,



quam observando, repetere velit; sed prorsus omnes principium habentes secundum cerebelli lateralium pedunculorum longitudinem, e lateribus penitralium cerebelli emergunt. De origine hujusce nervi non modo idem sentiunt clarissimus Vieussenius (a), ac praestantissimus Anatomicus, atque Physiologus Hallerus (b), sed ill. Mekelius (c), qui caeteris accuratius spartam hanc exornavit. Hisce praeterea ipsius etiam Santorini (d) adnotata accedunt, quibus tum ea, quae antea evulgavit, tum quae superius addidit, hisce verbis castigavit. *Nonnulla alias a nobis producta, quae nostrae inquisitioni oblata sunt, in praesens tametsi non revoco, confirmare tamen non audeo, cum crebro repetitae observationes non suppeditaverint, praeterquamquod primo fere obtutu inveniri potest; fibrae siquidem tum summae, tum interiores anularis protuberantiae firmae omnes conspiciuntur: contra autem, quae nervi quinti sunt, mox corticem protuberantiae ingressae molliissimae fiunt, & hac molitudine semper omnino profundiora subeunt, ut certo ex transversis protuberantiae fibris eas oriri minime rationi conveniat, praecipue ob diversitatem naturae:*

De his autem, quae ad minorem fasciculum pertinent, qui ubi duram matrem ingreditur, ex interiori latere majori adjicitur, ut & diversum iter instituat, & diversam naturam praeseferat, haec habuimus animadvertenda. Quinti paris nervus e lateribus protuberantiae anularis, ut plurimum simplex, interdum duplex, raro pluribus constans a se invicem distinctis fasciculis sensim in unum truncum ovalem, ac nonnihil compressum convenientibus emerfus, fessuram, aut foramen ovale subit ex durae matris duplicatione factum, ac in propriam sui caveam, e sinu cavernoso per septum, recte potissimum a Mekelio (e) descriptum, sejunctam abit. Mox post hanc durae matris caveam penetratam: saepius



(a) Neurographia universalis. Lugduni an. 1685. pag. 169.

(b) Primae Lineae Physiologiae. Gottingae an. 1751. §. 371. ac in Notis ad Boerhaav. Tom. II. n. 269. Not. 7. & alibi.

(c) Tractatus Anatomico-Physiologicus de quinto pare nervorum cerebri. Gottingae an. 1748. Sect. II. §. XXXI.

(d) Ibid. pag. 65.

(e) Ibid. §. XXXIV.

ex simplici, uniformi fibrarum nervearum trunco in plexum illum, non equidem ganglioformem, sed retiformem conformatur, quem accurate Santorinus indicavit. Fibrae enim, quas recta in plexum retiformem, sive in planam taeniam versus ophthalmicum ramum ferri observavimus, prope plexus divisionem, aliquae se in minores alias dividunt, atque diversimode insertae, aliae in ophthalmicum ramum, aliae in maxillarem superiorem contendunt: quae vero maxillari superiori recta respondent, partim hunc subeunt, partim vero sese dividentes, in ophthalmicum, & maxillarem inferiorem abeunt: quemadmodum & maxillaris inferioris fibrae ad eundem modum, de quo supra dictum est, aliae in maxillarem inferiorem descendunt, in superiorem aliae incedunt, ut ex hisce magis magisque horum trium ramorum inter se consensus ratio pateat. Jam vero huic retiformi plexui aliquando ex interiori parte fibrae ex eodem trunco procedentes, propemodum albae, non in plexum conformatae, ac quodammodo diversam naturam praeseferentes adjiciuntur, quarum majores aliae in fasciculum collectae, & plexui arcte haerentes una cum ejusdem fibris in maxillarem inferiorem contendunt; aliae, sed minores eodem modo distinctae, & constitutae, secundum maxillaris superioris directionem incedunt; omnium denique minimae, quaeque vix apparent, ophthalmicum ramum subeunt. Hae fibrae, ut a plexu manifeste distinguuntur, ita a rubellis illis fibris, quae retiformem plexum obducunt, nequaquam operiuntur. Fibras haec non modo a Santorino, sed a Vieussenio (a), ac diligenter a Mekelio (b) descriptas, etiam post longam in aqua macerationem, ut luculentius fibras plexus retiformis observaremus, intuiti sumus: quemadmodum & plexum vere ganglioformem, nisi frequenter, & manifeste, aliquando tamen observare nobis datum est: nam licet ut plurimum absit, tamen cum reperitur, etsi exilis sit, interdum ubi nervus ex ovali calvariae foramine evasurus est, adeo crassescit, ut luculentissime cum nostrum, tum aliorum & digitis, & visui occurrerit.


(a) Ibid. lib. III. Cap. III.

(b) Ibid. §. XXXIII.



nn *Sextum nervorum par*, abducens scilicet, quod alias Santorinus (a) ab ima anularis protuberantiae crepidine profectum sic deprehendit, » ut vel ab summo pyramidalium corporum tenui ali-  
» qua fibrilla oriri videretur, cui tamen ipse minimum fidit » : nunc ex hac Tabula incurvato, transversoque initio e fulco inter imam anularis protuberantiae partem, & corpora olivaria, ac pyramidalia deducere videtur.

Siquis in hujusce nervi originem sedulo inquirit, certe Praeceptor meus Morgagnus, qui ingenio, & diligentia nemini cessit, ut inveniret, omnem operam impendit (b); & nihilominus eam & a summis pyramidalibus corporibus, & ab ima anularis protuberantiae parte, & denique e communibus ejusdem, & illorum corporum finibus erumpere vidit, ut nondum pro certo adhuc constet, ex quam praecipue ii nervi parte deducendi sint. Hallerus, qui eruditissime omnia recenset, perpenditque, ex fulco inter corpora pyramidalia, pontemque Varollii profunde horum originem derivavit (c). Eustachius vero (d) ex parte, & Winslowus (e) omnino inter protuberantiam anularem, & corpora olivaria eos oriri ostendunt; quibus haec Santorini Tabula respondere praesertim videtur. Dexter enim etsi lateri externo corporis pyramidalis incumbat, tamen magna ex parte supra corpus olivare ejus inflexum initium apparet. Sinister vero non modo totus e fulco supra corpus olivare, verum etiam nonnihil supra, & prope septimum par emergere videtur, ut ex hac etiam delineatione nonnihil earum diversitatum appareat, quas & plures adnotarunt, & nos etiam observavimus. Huic tamen delineationi Santorini adnotata haud penitus respondent, imo ex iis in hujusce paris initio determinando adeo res dubia evadit, ut nihil certi definiri possit. Ita enim habet (f). *At quod & caeteris prosectoribus in hujusce paris*



(a) *Ibid.* §. xvii.

(b) *Adv. Anat.* vi. *Animad.* xxi. & potissimum *Epist. Anat.* xvi. *Art.* 46. 47. &c.

(c) *Elementa Physiologiae. Lausannae an. 1762. lib. x. Sect. vi. §. xxv., & alibi.*

(d) *Tab. xviii. fig. i. ii. iii. iv. v.*

(e) *Exposition Anatomique de la structure du Corps humain. Amsterdam an. 1752. Traité des Nerfs n. 73.*

(f) *Ibid. pag. 66.*



principio determinando non leve negotium faceffit, & nobis nonnullam creavit difficultatem; quippe quod tametsi ab ima anularis protuberantiae crepidine deduceretur, non inde tamen primum penitiorem originem scrutati cum sedulitate oriri, ac proficisci, tum quadam solertia adjuti, animadvertimus.

In mulieris fatuae praesertim solidiori cerebro in iisdemmet corporibus pyramidalibus medius, zonae instar, directo protendebatur medullaris tractus omnino a reliquo pyramidali discretus, eadem plane latitudine, ac posita sic sexto pari respondens, ut id levi manu, intentaque summopere acie prosequutus, ab hac plane zonulari, seu medio pyramidalium corporum medullari tractu deduxerim.

In Portitoris cerebro 9. Septembris 1725. ex Apostemate in sinistra cerebri parte, post lateris dexteri hemiplegiam defuncti, nervus sextae conjugationis dexter, citra omnem dubitationem, ac evidentissime ab ima interiore crepidine anularis protuberantiae prodibat, diverso sane principio: nam alias a media corporum pyramidalium rima, nunc exterius deducebatur.

In grandaevo praesertim senis firmiore cerebro sub ima protuberantiae anularis parte transversum exstantem, atque conspicuum medullarem tractum spectavimus, qui cum e media inter pyramidalia corpora producta rotunda rimula evaderet, ad alterum eorumdem corporum latus migrabat, ac prope olivarium proximum latus contingens terminari videbatur. Idipsum vel saepius, vel in bajuli cerebro, atque in Monachi Benedictini continenter confirmavimus, ut de ea re minime sit inposterum dubitandum. Ab eo enim ipso loco, cum primum utrinque sexti paris nervum emergere compererimus, non difficillimum fuit intenta curiosius acie, atque optico vitro adjuta certo dignoscere, & sexti paris fibrarum cum eo tractu continuationem, & quod maxime evincit, eas ipsas, quae recta eo usque processerant, eo loci sic flecti, ut evidentissime in sexti paris principium mutarentur. Atque adeo neque a cerebello, neque ab illius propagini-bus, & pedunculis, sed potius a cerebro, seu ab oblongatae medullae cruribus horum nervorum deducenda origo est. Quod fortasse minus mirum videbitur, cum ea perpendantur, quae de octavi, ac noni paris, atque adeo de pyramidalium, ac olivarium corporum cortice sumus infra dicturi.

*Non est tamen mirandum de hujusce paris origine non consentire inter se Proseñtores, quoniam nonnullis ab anulari protuberantia, nonnullis autem a summis pyramidalibus oriri videantur; nobis quidem tum alias, tum postea, aliquando ab ima anularis protuberantiae crepidine proficisci visum est; at rem attentius intuentibus ex his alterum a pyramidalibus, alterum vero sic ab ima protuberantiae ora emergere apparuit, ut facile primam illius originem tum ab illorum positu, tum ob transversos protuberantiae tractus, ab adjuncto pyramidali manifesto deducendam esse existimaverim.*

*Sexti autem tres, aliquando quatuor fibrae discretae esse solent, quarum aliquando omnium ab uno loco prodire originem comperimus, aliquando alteram fibram ab interjecta pyramidalibus rima, interdum aliquas ab externo eorum latere profectas vidimus.*

*Ex hisce igitur observationibus a me potissimum allatis, eo quia non modo ad hujusce nervi originem, sed & quidem ad alia spectant, quid dicendum sit, haud plane constat. Ex prima enim a medullari tractu omnino a reliquo pyramidali discreto, ex altera ab ima interiore anularis crepidine protuberantiae, ex tertia denique a transverso medullari tractu, sub ima protuberantiae anularis parte, cui fortasse horum nervorum delineatio respondet, eos erumpere deprehendit. Nos vero, si tamen hic nostros licet excitare labores, tametsi transversum hunc tractum bis observaverimus; tamen cum alias, tum etiam dum haec scribimus, ex tribus cerebris, quae nunc videmus, tum horum nervorum dexter, qui uno in cadavere duplex est, tum sinister e communibus anularis protuberantiae, & corporum pyramidalium finibus, quemadmodum potissimum diligentissimus Praeceptor Morgagnus describit, prope corpora olivaria, originem ducere observavimus.*

o o *Nervi Acustici, septimum videlicet par ex binis nervorum fasciculis constans, quorum prior, atque interior*

pp *Portio dura; posterior, exteriorque*

qq *Mollis dicitur.*

*De hoc septimo pari ita habet Santorinus (a) » Septimi, seu » auditorii paris dura, minor, superiorque portio a postremo me-*

---

(a) *Ibid.* §. XIX. pag. 67.



» dullari tractu anularis protuberantiae prodire visa est; aliquando  
 » tamen non inde eam emergere compertum est; verum inter utrum-  
 » que cerebelli pedunculum, inter eos scilicet, quorum alter me-  
 » dullae oblongatae adjungitur, alter subtus eam comprehendens  
 » anularem praestat protuberantiam, prodiisse apparuit. Quum id  
 » autem saepius, atque accuratius disquisierim, ab neutro prodire  
 » loco tandem aliquando luculentissime sum assecutus; verum *certif-*  
 » *sime* ab interiore inferiore anularis protuberantiae parte, qua sci-  
 » licet demissis cerebelli pedunculis copulatur ». Cujus tamen ditio-  
 nis, ita addit, *cerebri videlicet, an cerebelli ea sit, neque inter*  
*Anatomicos constat, neque nobis nisi postremis disquisitionibus conji-*  
*cere licuit. Dum enim accuratiori indagine in protuberantiae anu-*  
*laris corporis disquisitionem incumberemus, sic nonnullos medullares*  
*tractus sub transversis plurimis memoratae protuberantiae fibris, a*  
*priori ejusdem parte oblique incedere, ac ad eum prorsus locum,*  
*unde acustici nervi emergunt, contendere observavimus, ut cum in-*  
*cessu, prae mole, ab caeteris enim discretos comperi, illud esse*  
*auditorii nervi durioris portionis principium, atque originem propo-*  
*nere non multum dubitaverim. Non alios medullares tractus, qui*  
*sub transversis anularis protuberantiae fibris, a priori parte obli-*  
*que incedunt, hucusque agnoscere nobis datum fuit, praeter eos*  
*qui, obliquo tantum incessu, e crurum priori parte medullae ob-*  
*longatae, inter transversas protuberantiae anularis fibras in cor-*  
*pora pyramidalia, fere in fasciculum conjuncti, sive ut habet*  
*Hallerus (a), in duo fibrarum plana descendunt: verum ex his*  
*duram septimi paris portionem originem ducere, Santorinum vo-*  
*luisse haudquaquam existimamus. Primum quia haec duo plana,*  
*non ad eum prorsus locum, unde acustici nervi emergunt, contem-*  
*dunt, sed sic satis dissita, in corpora pyramidalia abeunt, e qui-*  
*bus neque furculum in paris septimi portionem unquam adire ob-*  
*servavimus; ac praeterea si ab iisdem dura portio repetenda es-*  
*set, haud sub transversis, si cerebrum sua in sede inspectetur,*  
*sed supra transversas memoratae protuberantiae fibras ea plana*

(a) Ibid. Sect. I. §. XXV.



excurrere dicenda essent, eo quia ipsis substantia cerebelli fibris cum corticalibus, tum medullaribus in transversum ductis majori ex parte subest. Quod autem nobis circa hujusce durae portionis originem pluries observare contigit, plane his respondet, quae Winslowus (a), & potissimum Santorinus retulere, nempe eam supra processum arciformem, ac nonnihil supra corpora olivaria » ab interiore, & inferiore anularis protuberantiae parte, qua scilicet demissis cerebelli pedunculis copulatur », emergere, ut haec dura portio cruribus cerebelli prorsus respondeat. » Mollis autem » portio (ita Santorinus) quae focia major, ac inferior est, conspicuis quibusdam albicantibus dumtaxat fibrillis, perpetuo ab reliquis colore distinctis, ex media caudicis medullaris scrobe, seu » quarto ventriculo, evidenter prodireprehenditur ». Caeci autem observationi, quam in articuli fine descripserat » in quo fibras portiois mollis conspicuas, atque exstantes a scrobe medullae oblongatae universas prodiisse comperit », haec addit (b). *Nec licet cuiquam mirari, si reliquos tractus probe disquisitos eo ipso loco, unde ipsi duximus, nunquam apparuisse compererit, cum nec nobis id alias reperisse contigerit; non idcirco tamen vel ulla est in nostram hanc observationem continuo instituenda animadversio, perinde ac vel nullam, vel oppido raram observationem, & quasi naturae lusum recensentem, cum potius miranda sit naturae solertia, quae caeco homini sic caeteros praestiterit sensus, atque hunc prae caeteris, ut iis quodammodo oculorum detrimenta compensarentur. Revera ubi tam firmas, tam exstantes, valentesque eae fibrae erant, rationi consonum est suspicari, acerrimum sensum fuisse, cum praeterea & auriculas mirum in modum conicas, & eminentes donaverit; quod ut confirmetur, id potius in caecis ab ortu foret in cerebro inquirendum, qui reliquis sensibus tanto caeteros homines antecellunt, quanto in hoc ab iis superantur. Quamquam & in valde senis cerebro idem omnino reperi, quod in memorato caeco observaveram, in altero dumtaxat latere, in quo ex tribus conspicuis, atque grandibus medullaribus tractibus a media scrobe emerfis,*

---

(a) Ibid. n. 78., & Traité de la tête n. 144.

(b) Ibid p. 68.

mutuo inter se communicantibus, duo ad septimam portionem mollem conficiendam, alter ad cerebelli proximum properabat pedunculum; in altero autem continenter dissecto senis cerebro idipsum, luculentius tamen, ac in utroque latere observaveram; eo tamen discrimine, quod tractus ii medullares, qui extra scrobem albi erant, intra eam cinerei conspiciebantur, cum eorum ductu, continuatione, atque eminentia, quales omnino essent, plane significaretur. Commodum praeterea observare usuvenit molliori ejusdem portioni mollem iidem album tractum, ab adjuncto cerebelli superiore pedunculo adjici, qua una cum duriore portione ab anulari protuberantia abscedere incipit; nihilo tamen minus quamquam alias asserui molliorem partem septimi iis fibris continuari, quae saepe saepius exstant, & luculenter conspiciuntur in scrobe ventriculi quarti; aliquando tamen ex iis fibris, quae quidem valentissimae erant, altero in latere nullum, altero vix tenuem molli portioni tractum immisceri, cum eae omnes in proximum cerebelli pedunculum elatae inferantur. Harum fibrarum numerum, quae e scrobe ventriculi quarti ad mollem nervi acustici partem, sive ad proximum cerebelli pedunculum abeunt, aliter in aliis se habere, ut plurimum, observavimus. Simplicem enim rarissime, tuncque etiam an duplex foret haesimus, duplicem aliquando, triplicem, & quadruplicem ut plurimum, interdum etiam quintuplicem esse adnotavimus.

rr *Extremi fines protuberantiae anularis, cujus*


ss *Latere, seu medii pedunculi, cerebelli medullae continuantur.*

tt *Bina corpora pyramidalia, quorum interior substantia medullaris est, quaeque proxime infra anularem protuberantiam conspicua, per*

uu *Processum arciformem fere in medullam spinalem producantur.*

Haec corpora triplici fibrarum ordine constare ex ipsis Santorini adnotatis (a) habemus: rectis nempe in hac Tabula minime conspicuis, quae in spinalem medullam demittuntur; transversis longe tenuissimis, quae perraro, nec ita facile, ac nisi in optimis cadaveribus cerni possunt, quaeque hac in tabula indicantur; obliquis denique, & circularibus, ex quibus arciformis processus fit, qui

d



(a) Ibid. §. XII. p. 62.



quidem difficilis visu, ad imum medullae oblongatae prolatus, circum corpora olivaria provehitur.

v v Bina corpora olivaria, quae ab lateribus corporum pyramidalium, atque arciformibus processibus comprehenduntur, quaeque iisdem transversis tenuissimis fibris, ac pyramidalia corpora obducta sunt. Haec si in transversum scindantur, ostendunt persaepe corticalem substantiam inter medullarem ita peculiari dispositione constitutam, ut utrinque aut vitis folioli, aut potius quasi cristatae coronae faciem praeseferat; non secus Santorinus (a) in his » ciream interius substantiam tenui, eleganti, tortuosoque incessu » iter medullarem sese mediam conjicere facile deprehendit ».

w w Conjugatio nervorum octava, seu par vagum, quae ex serie potius, quam ex fasce nervorum constat, quibus adjunguntur fibrae paulo infra locatae, quae in

x x Nervum spinalem accessorium Willisii inseruntur.

De hac octava conjugatione, ita Santorinus (b). » Mox infra » eum locum, unde observatum est e quarto ventriculo mollis auditorii nervi portionis fibras plurimas evadere, & nonnullas aliquid quando praeclare conspicuas octavi paris prodiisse conspeximus, » caeteris de hujusce origine silentibus Anatomicis, etsi reliquae plurimae disiectae diverso progignantur principio; an ullae autem ab reflexo eo medullari tractu ab summis pyramidalibus corporibus demisso, & illuc viciniae, unde hae prodeunt, delato, proficiscantur, suspicari quidem, asserere autem proclive non est ».

Ut potissima octavi, his addit Santorinus, & noni nervorum paris origo determinari ab Anatomicis quaeat, apta sunt deligenda cadavera, ex iisque, exempto cerebro, quam attentissime ex alterutra parte tum pyramidalia, tum olivaria corpora tenuissimis sunt membranis spolianda; sic tamen ne ulla inde avellatur eorum corporum portio, quo facile, atque omnino in conspectum veniant ii fibrarum tractus, qui utrumque corpus tenui velut cortice ambiunt: quo diligenter effecto, externis transversis tractibus a media pyramida-

---

(a) Ibid. §. xxi.

(b) Ibid. §. xx. pag. 68.



lium rimula emergentibus, utrumque corpus obductum apparebit, quorum tamen diversus incessus est; nonnulli namque, superiores videlicet, ab summa pyramidalium parte ad olivare corpus protensi, superiores dant octavae conjugationi fibras. Infra has autem nonnullae citra olivaria corpora consistere videntur, nonnullae vero praetervectae, medias eidem conjugationi fibras largiuntur. Ex his autem fere imae, infra olivaria corpora locatae, ex eorum corporum rima secedunt, & ad latera diducuntur; & protensae, sursumque reflexae, caeteras ab hoc loco deductas fibras eidem tribuunt conjugationi. Nonnullae praeterea, & potissimum duo tractus medullares ex quarto ventriculo in octavum abeunt; & denique ab eo prorsus loco, unde reflexa decedit durior acustici portio, nerveus medullaris tractus emergit, caeteris octavi paris fibris adjungitur, ac cum eodem incedit. Praeter has memoratas origines luculentissime etiam vidimus a caudice medullari in spinalem abeunti tractus plures medullares in superiora oblique rapi, & ad octavi paris infimam partem conficiendam accedere, quod ei fere artificio simile est, quod in spinali deprehenditur, cujus principium a cervicalibus in octavum infertur. Hinc minus fortasse mirandum videtur non plurimas modo, easque disjunctissimas illum adire partes, verum plurima, atque diversissima ab eo munia esse obeunda, cum a diversis, adversisque partibus disjecto, varioque principio profisciscatur.

Quod pluries inter caetera, & absque ulla haesitatione de hujusce nervi origine observare potuimus, eae revera fibrae sunt, quae a quarto ventriculo in par octavum abeunt; persaepe enim unicam, interdum duas, bis tantummodo tres fuisse animadvertimus; nec modo eae ab inferioribus, quae e scrobe ventriculi quarti emergunt ad par octavum adibant, verum alteram e superioribus supra inferiores oblique descendendo, in hanc ipsam conjugationem abire observavimus. Reliqua vero, si tamen plurimas eas demamus fibras, quae e latere exteriori, atque fere a summitate processus arciformis manifestissime erumpunt, admodum rara, & quidem incerta esse adnotavimus.

z z z z Par nonum, linguale scilicet, quod plurimis fibris alias in duo veluti discretum, ut in hac Tabula, alias continuum, ut saepissime solet, ab ea rima, quae inter corpora pyramidalia & olivaria est,

egreditur. Ita Santorinus (a): » nonum nervorum par disjunctis  
 » progerminat fibris, nulla quidem ex ipsa corporis olivaris sum-  
 » mitate prodeunte juxta Ridleyum, sed saepe ab eo lineae loco,  
 » nonnunquam juxta eum, qua olivaria corpora a pyramidalibus  
 » discernuntur; tantumque earum fibrarum origo spatium tenet,  
 » quantum ipsamet olivaria corpora ». *Non omnes tamen ex eo lo-  
 co deductas se vidiſſe, ſed aliquando unam, aut alteram ab octavi  
 origine discretam ad nonum adjici animadvertiſſe* adjunxit; quas  
 fibras etſi aliquando ab octavo deductas obſervare viſi ſumus,  
 nonnunquam tamen, licet raro, harum partem non modo ab  
 ipſa rima, ſed revera etiam a fibris tranſverſalibus, e quibus ipſa  
 corpora olivaria, atque pyramidalia conſtant, emerſam vidimus.

yy *Ea nervorum conjugatio, quae ab aliis decima medullae oblonga-  
 tae, ab aliis, meritoque prima ſpinalis nuncupatur, quippe quae a  
 principio ſpinalis medullae abſcedit, quemadmodum fuſius Tab. III.  
 fig. II. lit. uu.*

\* Rima ſecundum longitudinem ducta, & fibrae, quae inter cor-  
 pora pyramidalia, & in hoc ſpinalis medullae principio decuſſa-  
 ri dicuntur.

De hiſce fibris non me fugiunt, quae accuratiſſimus Praece-  
 ptor meus Morgagnus (b), & poſt ipſum ill. Hallerus (c) obſerva-  
 runt; nempe cum ſaepe inſiſſent, nunquam ſe eas decuſſari,  
 aut ad obliquos ſe ſecare angulos videre potuiſſe. Hiſ tamen in  
 arte principibus Viris contrariae ſunt obſervationes, quas prae-  
 clariffimi, & omni laude digniſſimi Viri retulere, Miſſichellius (d)  
 ſcilicet, Petitus (e), Winſlowus (f), Lieutaudius (g), ac potif-  
 ſimum Santorinus (h), qui non modo ita habet: » qua in longi-



(a) *Ibid.* §. XXI. p. 69.

(b) *Epist. Anat.* XIII. n. 20.

(c) *Ibid.* Sect. III. §. I.

(d) *Trattato dell'Apopleſſia. Roma an. 1709. lib. I. Cap. VI. IX. fig. I.*

(e) *Apud Palſinium Anatomie Chirurgicale, à Paris an. 1753. Tom. II. Par. VII. Cap. v. pag. 371. & 372.*

(f) *Ibid.* Tom. IV. *Traité de la tête* n. 110.

(g) *Eſſais Anatomiques, à Paris an. 1742. Sect. v. Art. I. p. 399. & 400.*

(h) *Ibid.* §. XII. p. 61.



» tudinem, (ut caetera ejusdem fibrarum nervearum decussationis  
 » loca omittamus) » producta linea, seu rimula pyramidalia corpo-  
 » ra discernuntur, si leniter deducantur, probe prius eo potissimum  
 » loco arctissime haerente tenui meninge nudata, non tenues decus-  
 » sari fibrillas, sed validos earumdem fasciculos in adversa conten-  
 » dere, quam apertissime demonstrabunt»; sed his etiam addit:

*Praeter ea loca, quae supra memoravimus, in quibus nempe con-  
 spicua fibrarum decussatio apparet, alterum praeterea adjiciemus mul-  
 to luculentissimum, cujus haec erit anatomica investigatio. Qua igitur  
 in quarto ventriculo calami dicti Scriptorii apex est, ibi & fo-  
 raminulum est, quod si dirigente stylo diducatur, atque aperiatur,  
 iidem tractus medullares averfi conspiciuntur, quos pyramidalia cor-  
 pora efficere diximus: hi paulo infra calami Scriptorii apicem, sic  
 ad decussum feruntur, ut id negare pervicaciae, aut non cernere cae-  
 citatis esse arbitrer.*

Hae igitur inter se summorum Virorum adversantes sententiae  
 effecerunt, ut magno studio in hasce fibras inquirerem, neque  
 aut Morgagni, ob multa ejus, atque eximia merita perpetuo  
 colendi, & Halleri summi Viri gravissimae auctoritati, aut  
 Santorini, aliorumque praeconcepthae opinioni, quidquam tribue-  
 rem. Ut fibras itaque anularis protuberantiae, quas in parte ejus  
 priore, & postica in decussas se interfecare Santorinus observa-  
 vit, quaeque non ita manifeste apparent, omittam, duo potissi-  
 mum loca sunt, in quibus majori, qua potui, sedulitate obser-  
 vando insiti, inter corpora scilicet pyramidalia, & in ea rimae  
 quarti ventriculi parte, quae calami mucronem efficit. Pia igitur  
 matre, quae arctissime corporibus pyramidalibus haeret, se-  
 cundum rimae, quae inter ea corpora est, longitudinem abscissa,  
 pyramidalia corpora diduxi. Fibrae, de quibus sermo est, diduc-  
 tionis initio observabantur nullae; at paulo infra apparebant sen-  
 sim; ac quo magis deducebantur, etsi eo luculentius in conspe-  
 ctum venirent, tamen quomodo in rimae centrum incederent,  
 seque haberent, dijudicare admodum difficile videbatur. Licet  
 enim ex quatuor & triginta cerebris in uno cum viginti (in  
 reliquis enim nisi subobscore conspiciebantur) fibrae, quae e  
 dextra corporum pyramidalium parte proficiscebantur, oblique



## EXPLICATIO TABULAE II.

fenfim descendendo in finiftram, finiftrae vero in dexteram, *mediis potiffimum interjectis, dirimentibusque porulis* feſe immittere viderentur, idque ipſum ſingulis annis Auditoribus meis publice oftenderim; nihilo tamen minus harum fibrarum in oppoſitum latus per medullae truncum inceſſum, non modo inter corpora pyramidalia, ſed, & in oppoſita, quam memoravimus, medullae parte, ubi luculentius apparent, licet etiam per macerationem in-quiſierim, videre tamen datum eſt nunquam. Quamobrem hanc fibrarum decuſſationem licet haud negem, tamen eam proponere haudquaquam audeo; non ut meas praeſtantiffimorum hominum obſervationibus anteponam, quorum auctoritas cum apud omnes, tum maxime apud me magno in pretio eſt, ſed quoniam probe video, quam facile hac in re ſenſuum etiam teſtimonio decipi poſſim. Huiusce rei Tab. IV. lit. V V luculentiffimum exemplum praebet. Si muſculi geniogloſſi, & geniohyodei fibrae, reſecta ſecundum longitudinem per medium maxilla, ſenſim diducantur, non recta incedere, ſed ſe ad angulos ſecare, & finiftrae in dexteram, & dexterae in finiftram partem apertiſſime abire videntur, quamquam eas, nequaquam decuſſas, ſed recta procedere, nemo in dubium revocabit.
















# TABULA III.

## FIGURA I.

*In qua ex Cerebri basi primae, & potissimum secundae nervorum conjugationis principia, ac nonnullarum partium clarior conspectus exhibetur.*



A A *Nervi Olfactorii, eorumque pars extrema plenior, ac bulbo affimillis, paulo obscurior, ac molior, nec non eorum*

a a *Linea secundum longitudinem ducta.*

b b b b *Utriusque nervi radices a diversis partibus procedentes. De his ita Santorinus (a): » Olfactorii nervi triplici quasi principio » prodire videntur, quorum longior medullaris tractus ab finibus » posterioris cerebri lobi emergit, reliqui duo, quodam velut di- » remptu, prope originem bifidi, alter ab exteriore, alter ab in- » teriore medullaris cerebri substantiae latere proficiscuntur ». Quae autem nobis de hisce radicibus pluries observare contigit, sunt: harum interior, & brevior ex fine inferiori lobi cerebri anterioris emergit; exterior vero & longior ex lobi anterioris, & posterioris intervallo, ex pluribus disiectis conflata fibris, prope quas interius plura foraminula conspiciuntur, per quae vasa cerebrum subeunt. Radicem hanc alteram, in duobus continenter disiectis cerebris, ex duabus lineis constare manifeste sum affectus; quarum altera, etsi brevior, tamen ex interiori parte, usque ad lorum intervallum, nullis ad extremum disiectis fibris, pergebat.*

B B *Nervi secundae conjugationis Optici.*


c *Locus, quo hi coeunt, seu conjunguntur, ultra quem iterum di- rempti, & crura medullae oblongatae amplexati, in*



(a) *Ibid. Cap. III. §. XIII.*



dd Duo discreta veluti corpora geniculata dispeſcuntur, quae media ſunt inter crura medullae oblongatae, & thalamos nervorum optico-  
 rum. Horum originem hiſce verbis Santorinus (a) expreſſit. » Opti-  
 » cos nervos ab iis corporibus, quae ob hanc rem Opticorum  
 » Thalami dicuntur, quadantenus progigni non eſt dubitandum:  
 » *utrum* autem ab eorundem medullari, fibroſaque membrana, ut  
 » Vieuſſenio arridere videtur; an potius ab eorundem penetralibus,  
 » res ſic certe non eſt, ut pro comperta, atque explorata traduci  
 » queat. Quod autem per repetitas, diligenterque inſtitutas diſqui-  
 » ſitiones ab eadem potius membrana eos non proficiſci ſaepius vi-  
 » diſſe viſus ſum, verum tum ab eorum Thalamorum interiori par-  
 » te *diſſectis*, *curvatiſque fibris Williſianae corde principio occurrenti-*  
 » *bus*; tum a quodam velut geniculato corpore, circa eorundem  
 » Thalamorum poſteriora locato, adjunctoque, cujus corticalis,  
 » ſeu cinerea interior ſubſtantia eſt, medullaris, & candida exterior  
 » facies, luculentius prodire ſum aſſecutus. Ad horum tamen exor-  
 » tus locum ab latere prominentiarum, quae natiformes nuncupan-  
 » tur, conſpicuus medullaris tractus tranſverſim ſic thalamis adjungi-  
 » tur, ut vel in eorum ſubſtantiam diſjiciatur, vel inflexus, cae-  
 » teriſque fibrillis involutus, ad nervorum Opticorum exortum ac-  
 » cedat, conjicere quidem, decernere autem minime valui». Hunc  
 medullarem tractum, quem primum Santorinus indicavit, & cer-  
 tius deinde Morgagnus (b), & Winslowus (c) propoſuere,  
 quemadmodum & nervorum Opticorum originem, quam potius  
 ab Thalamorum Opticorum penetralibus, quam ab eorundem me-  
 dullari, fibroſaque membrana, ut Vieuſſenio placuit (d), repe-  
 tendam eſſe exiſtimavit, poſterioribus obſervationibus ita luculenter  
 confirmavit (e). Quod autem jamdudum fueram ſuſpicatus, eorum-  
 dem exortum, & a natiformibus prominentiis eſſe derivandum, ſic  
 dilucide ſum aliquando intuitus, ut inter praeclara Opticorum prin-



(a) *Ibid.* §. XIV.

(b) *Epist. Anat.* XVI. n. 12.

(c) *Ibid.* *Traité de la tête* n. 136.

(d) *Ibid.* pag. 67. & 165.

(e) *Ibid.* p. 63.

*cipia id sit referendum. Cortex namque fere omnium dictarum protuberantiarum circa earundem imum, sic cogi videtur, ut candidiorem nactus colorem, ac solidiorem naturam, bifariam dividatur, cujus altera pars primum disiecta, mox iterum copulata, evidentissime Opticorum principium subit; altera autem in priorem producta, posteriorem thalamorum partem attingens, cum caeteris ejusdem fibris disjicitur, atque confunditur. Potior tamen pars earum fibrarum est, quae a protuberantiis testiformibus procedit: hae siquidem primo, quasi in latam habenulam fusae, tum disiectae oblique id tuber scandunt, quod interjectum est inter evidens Opticorum principium, & natiformes protuberantias, atque ab hujus summa facie ad imum, ut ita dicam, Opticorum crus sese conferunt; duplici enim crure hos nervos oriri conspicuum est. Num autem in horum origine, & praecipue ab iis protuberantiis consilium aliquod lateat, non est nostri instituti divinare; id dumtaxat animadvertam, non temere fortasse ab eo loco opticos nervos emergere, a cujus maxime vicinia ii nervi prodeunt, quos patheticos, quasi affectuum indices, nominare placuit Willisio, ut summa scilicet proximitate interiora exterioribus responderent. Quod autem summa membrana medullaris, quae thalamos nervorum opticorum velat, eorundem nervorum non omnis origo sit, tum ex dictis patet, tum ei maxime innotescet, qui diligenter vel scalpelli acie, vel alia quapiam ratione horum nervorum principium prosequetur, siquidem non modo ab exteriori parte, sed multo maxime ex interiori procedere intelligetur.*

*Tractum praeterea alterum aliquando conspicuum ab interiore paulo sede proficiscentem observavimus, a supera videlicet crurum medullae oblongatae parte, ab exteriori prodeuntem latere, qua iidem optici ad decussim cum cruribus ferri incipiunt; quem cum persequeremur, sic pariter cum crurum tractibus, sic deorsum versus inclinatum animadverti, ut nec unde oriretur, nec quorsum tenderet, plane percipere potuerim: nisi inde lubeat conjicere, illuc esse fortasse nonnullos ex iis tractibus conjectos, ut ob majorem iis nervis proximitatem, qui motui dati sunt, commodior foret eosdem monendi via, ut subito terribilibus oblatis rebus, ad eas cum maxima celeritate vitandas praesto essent. Cum in hujusce medullaris tractus, qui e crurum medulla, ad globulorum posteriora, haud longe a nervi*




tertijs paris initio proficiscitur, quemadmodum haec figura exhibet, quemque interdum ex pluribus fibrarum medullarium fasciculis constare animadvertimus, summa cum diligentia originem saepe inquisivimus, nunquam crurum penetralia, multoque minus globulos, seu eminentias mammillares subire, observare potuimus. Quotiescumque autem horum nervorum initium profecuti sumus, non modo eum medullarem tractum, qui a natiformibus protuberantiis pendet, observavimus, verum etiam potiore alterum medullarem tractum a testiformibus protuberantiis procedentem, & ad longius opticorum crus, levi interjecto sulco, abeuntem, ita manifesto vidimus, & publice demonstravimus, ut de ea re nullus amplius dubitandi locus superfit.

C C Pars loborum cerebri anteriorum, in quibus

e e Lineae, seu Rimae, per quas nervi Olfactorii magna ex parte excurrunt.

f Infundibuli ima pars, quae in glandulam pituitariam abit.

De infundibulo ita Auctor noster (a). » Etsi recta infundibulum » demitti videtur, ut in subjectam, prioremque glandulam insertum » appareat, non sic evenire tamen certum est; illud siquidem, ubi » priorem glandulam contingit, in posteriora incurvum fertur, at- » que in Appendicem hiare manifesto comperimus . . . . in cujus » cavum, quamquam commode, & luculenter, qua priorem glandulam contingit, eique adjungitur, scrutari potuissim; nihilo tamen minus neque tenuis specilli, neque aëris ope quidquam detegere datum est, quod sive per infundibulum, sive per appendicis caveam ad priorem glandulam duceretur ». Quae fortasse experimenta cum postea iterum innovasset, ac intenta curiosius acie infundibuli penetralia, ubi ad glandulam pituitariam accedit, scrutatus esset, *obstructo penitus ejusdem cavo glandulae naturam induere observavit*: quam in rem cum data opera saepius inquisivimus, infundibulum in superiori parte, qua ventriculo tertio respondet, nonnihil cavum esse & observavimus, & ejus etiam tenue osculum satis dilucide observandum praebuimus; ubi autem



(a) Ibid. §. xxiii.



ad subeundam glandulam accedit, quod *non in centrum glandulae, sed paululum in posteriora, qua coit utraque glandula inferitur*, naturam appendicis induere, illudque pluribus institutis observationibus quammaxime ad soliditatem accedere deprehendisse visi sumus (a).

e 2

---

(a) Non me fugit per hosce annos a praeclarissimo Viro Adolpho Murray infundibulum pervium demonstratum fuisse: cujus opere licet caream, tamen cum ipse ex suscepto itinere hic paululum substiterit, atque ego cum eodem, maxima cum voluptate, inter caetera etiam de infundibulo collocutus, quid de illo observaveram, ipsi aperuerim; ipse mihi, quid saeviente hieme, cerebrum frigore adstringente, pro certo compertum habuerat, significavit; expectavitque inde, ut hac methodo iterum de infundibulo observationes innovarem. Morem gessi, & eo quidem libentius, quia tunc, cum hiems effer, in Anatome facienda totus eram: quapropter, paucis interjectis diebus, cum de cerebri partibus ostendendis exercitatio occurreret, ut duo congelarentur cerebra sua in naturali sede constituta, dempta tantummodo calvaria, operam dedi: indeque VI. idus Januar. an. 1775. publice ea diffecui, quid prae caeteris de infundibulo esset, perscrutaturus. Resecta itaque ad superiora, atque levi manu majori ex parte hemisphaeriorum cerebri substantia sublata jam penitus frigore adstricta, ventriculos laterales glacie repletos offendimus; quae tamen glacies haud in unum solidumque corpus concreta erat, sed in parvula discreta frustilla, quae adeo sibi ipsis proxima, atque contigua erant, ut vitrei humoris oculi glacie concreti figuram, quodammodo praeferebant. Ex lateralibus sensim in tertium ventriculum penetravimus, qui, non secus ac laterales, eadem glacie replebatur: diligentissime inde, ac quantum fieri potuit, num & infundibulum eadem glacie teneretur, aut saltem frustillum aliquod esset, quod e ventriculi cavitate per infundibulum in pituitariae glandulam descenderet, perlustravimus: verum nihil hujusmodi neque nobis, neque Auditoribus nostris curiose inspectantibus, neque inter alios cel. Dominico Cravosio hac in Academia Phys. Professori praestantissimo, videre datum fuit; imo infundibulum perinde ac in caeteris observationibus inferiore sui parte solidum esse se praebuit. Eadem ratione paucis interjectis diebus, intenta curiosius acie, majorique habita diligentia, experimentum iteravimus. Ventriculi laterales iisdem glaciei frustillis penitus replebantur; ac dum ex hisce in tertium cerebri ventriculum descendebamus, dissecto septo lucido, inter ejus caveam, glaciei laminam, crassiore in medio, & in acie undequaque extenuatam observavimus. Discisso autem fornice, ventriculum tertium ad eundem modum, ac laterales, eadem glacie penitus repletum offendimus, atque id unum peculiare adnotandum occurrit, nempe inter glaciei frustilla columnula angularis, calami scriptorii crassitie, quae fere recta contra infundibulum descendebat. Hanc diligentissime a summo ad imum persecuti, vix infundibuli orificium ingressam, in obtusum penitus apicem deficere manifeste intuiti sumus. Hinc infundibulum, ipsamque glandulam diligentissime perlustravimus, at incassum omnia, cum nihil praeter ea, quae antea animadvertimus, nobis videre datum fuerit. Quibus, aliisque superius commemoratis observationibus, licet infundibulum prope glandulam solidum esse certo certius appareat, nollem tamen quis succenseat, quod ego haece experimentis praeclar. Murray praevertendas putem, cum ignoret nemo, quibus, & quot iteratis observationibus insistendum sit, antequam ea, quae a praestantissimis Viris prolata sunt, infrmentur, evertanturque. Haec attuli, ne praeclarissimo Viro datae fidei deessem, allaturus fortasse nunquam, nisi repetitis observationibus, experimenta iterum, iterumque innovassem. Prae-

Dum autem in ipsam glandulam inquirerem, & potissimum an lacteus ejusdem humor circa latera per poros exiliret, attenderem, dum lente, ac vix digitis ea comprimeretur, humorem non per tunicam glandulae extimam, per quam nunquam nisi lacertam evasit, ut recte jam observavit ill. Praeceptor (a), sed pluries per canaliculum teretem, oblongum ad infundibuli superficiem, sub pia matre, perreptantem, ad posteriora constitutum, veluti ab appendice procedentem, ascendere vidimus. Quam postea rem, cum tribus abhinc annis in infundibulo aliquando caeteris crassiore, vixque digitis non compressa, sed apprehensa glandula nobiscum dilucide Antonius Ghidettus Nosocomii Chirurgus emeritus, & Anatomes amantissimus, & Antonius Zalli Chirurgus publici Anatomes Profectores, ac inter caeteros Medicinae, & Chirurgiae cultores solertissimos magnae spei juvenis Petrus Antonius Gasparotti, qui dissectionibus meis persaepe adfuit, suamque operam praestitit, observaverint, ad cogitandum adducti sumus, an per hunc canaliculum (aliquando etiam binos, eosque non recta, sed in spirae modum circa infundibuli latera ascendere vidimus) aliqua humoris pars e cerebri ventriculis per illum ad pituitariam glandulam deduceretur. Verum cum alias infundibulum, canaliculo hoc penitus destitutum observaverimus, licet illo in perscrutando summam semper diligentiam adhibuerim, ingruit quaedam suspicio, illum canaliculum non adductorem, sed tenue quoddam vasculum abruptum fuisse, per quod lacteus deinde glandulae humor irreperet.

Quod autem ad pituitariam glandulam pertinet, non modo forma, ac magnitudine ab sua appendice, sed etiam colore, atque structura differt. Haec posteriorem sellae turcicae partem tenens, eique arcte inhaerens, minor, cinerea, ac mollior est, & subrotunda; illa anteriorem sellae ejusdem partem occupans, major,

---

terea an & hisce aliquid fortasse etiam detrahendum, cum apud nos cerebra arte (aliter enim ex anni tempestate fieri non potuit) congelarentur, quae Septentrionalibus plagis, hiemali frigore, naturaliter indurata praesto habentur? Aliorum judicium esto; tamen videri potest, neminem fore, cui hoc dubium in mentem venire possit, cum cerebrorum intima firmissime gelu adstricta conspecta fuerint.

(a) Adv. Anat. VI. animadv. 25.



ovalis, albidior, in parte superiore nonnihil cava, ac potissimum ubi appendicem excipit, in inferiore convexa observatur. *Majoris structura*, animadvertente Santorino (a), ex minutissimis corpusculis compingi videtur, quae deinde in lamellas non difficulter dirimuntur: minor vero non item, sed quasi discerpitur, & in inaequales globulos, ac fere in intestinula dissolvi facilius potest. Et quamquam res singularis non sit, tamen quamdam situs animadversionem adsciscit, quod nempe circumfusa pituitariae glandulae membrana, quae potissimum imum ejus obtegit, non levis omnino sit, sed inordinatis fibrillis contexta, ac frequentibus areolis distincta, ut vel ad ejus motum, & agitationem, vel ob aliquid transmittendum sic fuerit concreta, cujus inaequalitatis vestigia in subiecta ossea lamina insculpta leguntur. Eam autem agitari posse tum a positu, tum maxime a circumstitis partibus liquet; hanc namque cum carotidibus alligari palam est. Praeterea observandum duco non eadem membrana saepiri minorem eam glandulae partem, quam appendicem appellant, quoniam sedula maceratione vel nulla, vel tenuissima circumdari detegitur, cum hujusce nullus sit motus, vel diversum prorsus munus esse debeat: facile enim inducor inde breviori via aliquid fortasse transmitti. Quae de hujusce glandulae motu, & agitatione commemorantur, jam satis tamquam a cl. Brunnero, & Vieussenio tradita, a cel. Morgagno (b) recensita sunt. Quae vero ad ejusdem membranas pertinent, ut notum est, glandulam a durae matris interiori lamina protegi, ita adhuc de ejusdem appendice apud Auctores haud certo liquet, nam ut diligenter Santorinus animadvertit, quae membrana appendicem obducit, durae matris lamina adeo tenuior est, ut non modo ab illa penitus recedere, sed una, eademque infundibulum cooperiens membrana esse quodammodo videatur.

g g    *Globuli, aut corpora albicantia*, five, ut placuit cl. Hallero, eminentiae mamillares, quarum exterior substantia alba, medullaris; interior quadantenus cinerea, corticalis est.

h h    *Nervi tertiae conjugationis, seu Oculorum motorii.*

(a) *Ibid.* pag. 70.


(b) *Ibid.*



- ii Crura medullae oblongatae, quorum fibrae oblique in longitudinem ad interiora excurrunt, e quibus
- \* Tractus is est, qui ex infera eorum parte, ab exteriori prodiens latere, in opticos nervos abit.
- k Pars thalami sinistri.
- l Processus, qui a testiformibus protuberantiis, angusto, teretique incesu, ad longius opticorum nervorum crus procedit.
- m Processus alter, qui e natiformibus protuberantiis in brevius eorundem nervorum crus se confert.
- DD Protuberantia anularis, ejusque fibrarum ordo, quibus crura medullae oblongatae amplexatur.
- n Ejusdem protuberantiae sinus, per quem arteriae basilaris truncus procedit.
- o Principium nervi quinti paris, seu locus, quo ex anularis protuberantiae penetralibus evadit. Paulo autem infra, protuberantiae anularis principium est, seu cerebelli medius pedunculus, qui explicatus, & socio adversi lateri occurrens, quasi pontis in modum anularem protuberantiam format.
- pp Nervi duo sextae conjugationis.
- q Nervorum acusticorum, seu septimae conjugationis portio dura.
- r Portio mollis ejusdem conjugationis acusticae.
- EE Corpora pyramidalia.
- F Corpus olivare sinistrum.
- G Initium spinalis medullae.

## FIGURA II.

*In qua partes praecipue, quae in cerebri, & cerebelli ventriculis sitae sunt, in aperto ponuntur; itemque pars cerebelli, & caudex medullaris, cum initiis spinalis medullae.*



- a a *Portiuncula corporis callosi, seu substantiae medullaris, seu centri ovalis, ut nuncupare placuit Vieussenio.*

- A A Corpora striata, quorum pars intimae naturae in fig. III. hujus Tabulae lit. F F indicatur.
- B B Thalami nervorum opticorum sic inepte appellati, nisi quantum in eorum vicinia principia opticorum sita sunt.
- b b Duo eminentia oblonga alba corpora observantur, quae circa priores partes eorumdem occurrunt.
- C Crura priora fornicis, illius videlicet, qui in III. hujus Tabulae figura lit. e designatur, cujus scilicet latera dimidiam fere thalamorum partem obtegunt.
- c Chordae Willisii, seu fascis fibrarum medullarium in transversum, & arcus in modum ab intimo medio thalamo nervorum opticorum ad alium productus.
- d d Laxior rima inter thalamos nervorum opticorum, quae ventriculus tertius dicitur, cujus suis in sedibus naturalis amplitudo est, quam fig. III. lit. i monstrat.
- e Lacunar Vieussenii, seu nexus laterum thalamorum opticorum, cujus color medius inter medullarem, & cinereum; ideoque etiam hujusmodi natura est.
- f Glandula pinealis ad anteriora revoluta, quae
- \* Transverso tractui medullari innititur, a quo
- g g Bini alii tractus medullares, per summa latera thalamorum in priora procedunt.

Ut ea Santorinus, quae de glandula pineali alias protulerat (a), confirmaret; eam nempe ex substantia cerebro simili constare, & ex earum numero non esse, quae in plexu choroide sunt, quemadmodum praestantiss. Anatomici Bahuinus, Willisius, Ridleyus, alique existimarunt, praetereundam minime duxit saepius repetitam observationem, quae vel ad illustrandam ejus sententiam, vel ad alteram convellendam facere plurimum potest. In duobus, praeter caeteris cadaveribus, quae ex apoplexia ipse dissecuit, quorum alterum viri, senis alterum erat, cum plurimo humore distentae choroidis plexus glandulae, ingentisque molis apparuissent, ne leviter quidem, neutro in cadavere, pinealem glandulam intumuisse deprehendit.

---

(a) Ibid. §. VIII. pag. 58.

Id nobis etiam, superioribus annis, observare, atque ostendere in hominis cerebro contigit, cujus plexus choroidei glandulae, seu potius vesiculae albicantes, ac nonnihil subrubrae, tumentes, plurimo scilicet humore distentae, hydatidibus similes, majores aliae, aliae minores, & irregulares observabantur, dum glandula pinealis superius cinerea, inferius, qua ejusdem pedunculis adhaeret, medullaris, nullo humore imbuta, multoque minus praeter naturam distenta, ne quidquam a naturali statu recederet, ubi vel maxime recessisset, si natura, & usu plexus choroidei glandulis responderet. Quae autem Santorinus hac in glandula se vidisse addidit, nisi subobscurè, & quidem incerte ea nobis occurrere, nempe *in vetulae cerebro medullares tractus ab ea glandulae priori parte sic deductas observasse, ut non modo ipsi adhaerescerent, verum sic ab ea prodirent ad decussim positi, ut qui a laevo latere proficiebantur, in dexterum, qui iidem a dextero, in laevum tenderent; atque id publice in theatrum conspectum voluisse, ut evinceretur, & ab ea eos tractus non prodire non posse, & ad decussim ferri; nec defuisse vel tum, vel alias, & osculum non alte insculptum intueri, & demonstrare.* Quas observationes humanorum licet cerebriorum prava, ut plurimum, constitutio, & arcta hujusce glandulae cum plexu choroideo connexio confirmatu persaepe difficiles reddant; tamen cum diligenter a glandula plexum choroideum retraxerim, eamque sua in sede reliquerim, eos medullares tractus, quibus glandula innititur, non ad decussim ferri, sed qui lateri dextero adhaerent in dexterum, qui laevo in laevum proficisci mihi observare datum fuit; caeteros autem, qui posteriori parte statim infra hosce occurrunt (si unam tantummodo fibrillam demamus, quam semel vidi e dextero latere in sinistrum contendere) non decussari, sed in transversum tantummodo recta ferri observavimus, & Anatomiae tyronibus observandum praebuimus. Quod autem de hujusce glandulae osculo admonet, neque id felicius unquam videre contigit, licet pluries, & diligenter inquiserim; cum tantummodo circa mediam, ejusdemque posteriorem partem exile admodum foraminulum semel viderim, per quod dum lente glandulam comprimerem, subniger humor profiliebat: quod tamen foraminulum tantum abest,



ut illud tamquam glandulae proprium proponam, ut vel tunc, vel alias saepe in plexus, choroidei e glandula deductione factum fuisse quammaxime dubitaverim.

h h *Protuberantiae natiformes appellatae.*

i i *Protuberantiae minores testiformes dictae, e quibus quodammodo teretes*

k k *Processus versus principia nervorum opticorum feruntur.*

l *Locus, unde exoriuntur nervi quartae conjugationis, ac principium magnae valvulae cerebri.*

D D *Duo cerebelli pedunculi, e quibus praesertim in superiora productis latera quarti ventriculi, & magna cerebri valvula componitur, qua quartus ventriculus protegitur, quaeque ut fortasse clarius una cum cerebelli medulla conspiceretur, tota e latere dextero corticalis praesertim cerebelli portio ablata est.*

m m *Processus vermiformis dictus, Tab. sup. lit. N indicatus, qui bifariam ad perpendicularum sectus exhibet duplicem cerebelli naturam, medullarem scilicet, & corticalem. Haec omnis aut folium, aut arboris cujuspiam ramum exhibet, quo in minores, minoresque ramulos dirempto, singuli demum utrinque complura quasi foliola emittunt, quorum pars media medullarem naturam, extima corticalem refert.*

E *Pars dimidia cerebelli paulum extra suam sedem dimota, atque inclinata.*

F *Lata capacitas, quartus ventriculus dicta, qui singularis cerebelli est.*

n *Ventriculi hujus rima, ex qua calami scriptorii nomen ipsi inditum est.*

o o *Pars valvulae magnae cerebri, seu alii duo cerebelli pedunculi inferiores ad latera revoluti, qui in angulum convenientes imum scrobis claudunt, &*

G *Medullae spinalis caudicem, ex fibrarum fasciculis in teres corpus coeuntibus confectum, magna ex parte constituunt.*

H H *Caeteri cerebelli pedunculi Tab. II. lit. s s designati, majores reliquis, qui in amplexum tendentes anularem compingunt protuberantiam. De cerebelli pedunculis, & de magna cerebri valvula, placet hic addere, quae diligentissime Santorinus adnotavit.*

Quarti, ita igitur habet (a), qui in cerebello est ventriculi magna superincumbens valvula ex tribus videtur constare naturis: pars quae latera tenet bini, validique cerebelli, pedunculi sunt in superio protensi, ac sub iis prominentiis, quae nati & testiformes dicuntur, subeuntes, ac sub fasciculo fibrarum, quae a penitissimis nervorum opticornum thalamis deductae, & eminentes mediam quarti ventriculi rimam efficiunt, inclinato ductu, ac ad sese accedentes, non alio tendere videntur, quam ad intimam anularis protuberantiae partem, quo sane provectae, in adversum latus contendere, & decussari non obscure observavimus. Summa valvulae pars ex transversis & crassioribus ab utroque modo memorato pedunculo prodeuntibus constat tractibus, qui quamquam corticalis videantur esse naturae, sane quidem & medullaris esse putamus. Horum autem ima pars, tenuissimae membranae in modum, composita, ab iisdem deducta pedunculis, imam, acutamque valvulae partem claudit. Sex igitur sunt cerebelli pedunculi, quorum duo latera quarti ventriculi faciunt in superiora producti; duo autem in angulum coeuntes imum scrobis claudunt, & medullae spinalis caudicem magna ex parte constituunt; caeteri autem inferiores majores reliquis in amplexum tendentes anularem compingunt protuberantiam.

p Septimae nervorum conjugationis fibrae.

Hi plures fibrarum fasciculi aliquem fortasse possunt ad inquirendum inducere, sint ne revera eae septimae nervorum conjugationis fibrae? Si hanc ipsemet Santorinus superiori Tab. lit. p q, & hujusce fig. I. lit. q r ex duobus tantummodo fibrarum fasciculis, ex dura scilicet, & molli portione constantem delineavit, cur nunc eamdem ex tribus fibrarum fasciculis conflata exhibet? Fateor & me quidem initio aliquantulum haesisse, num septimo huic pari hasce fibras tribuerem. Verum praeter harum fibrarum positum, qui quam maxime huic pari respondet, cum post vel levissimam contrectationem in plures abire distinctasque fibrillas observaverim, quemadmodum non modo Vidius (b), & Willisius (c),



(a) Ibid. §. XI. pag. 60.

(b) Vidi Vidi de Anatomie Corporis Humani lib. VII. Venetiis an. 1611. lib. III. Cap. II. qui hoc septimum par pro quinto recenset.

(c) Ibid. Tab. V. lit. LL.



sed Morgagnus (a) qui in duas tresve crassiores fibras portionem mollem dividi posse animadvertit, interstitio relicto, in quod altera, quae & saepe in fibras actu ipso, motuve dissolvitur, ad credendum adductus sum, in hujusce partis contrectatione, quam adfuisse, delineationis causa, censere facile quisque potest, hoc septimum par in triplicem abire fibrarum fasciculum, ut figura exhibet, potuisse.

q Octavae nervorum conjugationis fibrae, quarum aliquae naturalem magnitudinem excedunt.

r r Accessorius Willisii.

s s Par nervorum nonum, Linguale scilicet. Quamquam a sinistris hoc nervorum par duplici cum origine emergere primo intuitu videatur, tamen, re attentius inspecta,

t Illam inferiorem fibram nervum accessorium adire quisque facile colliget.

u u Par decimum, aut, si mavis, primum par spinalis medullae.

Ut, quam attulerat Santorinus (b) sententiam de duplici hujusce nervi origine, antica scilicet, posticaque tueretur, qua methodo sint hujusmodi initia inquirenda, hisce verbis ostendit. *Multam fateor sedulitatem requiri, ut priores a posterioribus decimi paris fibrae comperiantur, & id neque in exsecto cerebro, neque in vulgari methodo instituendum, sed capite una cum summis duabus vertebrae detruncato, posticaque cum occipitis, tum vertebrarum deducta parte diligentissime prius aqua purgato, in eadem limpida agitandum, explorandumque est, nervis suis paribus innexis, facile comperietur, exiguo sane inter utrasque propagines, aliquando majore spatio prior, atque postica non difficulter discernetur, quod tamen & accurato studio, praeclaroque lumine efficiendum, ut tametsi utraque ad priora magis accedat, non una, ut in superioribus, fibrarum series, sed gemina, leviter quidem discreta appareat. Et si hac instituta methodo, quae si rite cesserit, nec diligentissimo incisorum male cedit unquam, merito commendanda est, duplicem hujus decimi paris originem, anticam scilicet, posticamque observaverim, aliisque publice ostenderim; tamen cum haud raro cum*


f 2

(a) Epist. Anat. XII. n. 28.

(b) Ibid. §. XXII. pag. 70.



in occipitis, tum in vertebrarum posticae partis deductione contingat, ut tenues, posticae, exilesque x. paris fibrae rudi illa contrectatione facile dilacerentur, hanc alteram non modo tutiorem, sed & brevior, facilioremque methodum ad hujusce paris originem inquirendam propono. Detruncato igitur una cum cervicis vertebrae capite, ejusdemque musculis posterioribus omnibus abscissis, ablatisque, si vertebrae, firmato capite, antrorsum, quoad potest, deprimantur, tunc inter occiput, & atlantem dura mater, quae interius vertebrarum tubum obit, adeo lato satis spatio occurrit, ut ea in transversum discissa, statim, absque ulla ossium deductione, ullove aquae auxilio, duplex hujusce conjugationis origo, antica scilicet, posticaque, sua in sede naturaliter constituta, luculentissime in conspectum veniat. Hac methodo cum pluribus aliis, tum ornatissimo Viro, ac Professore praestantissimo Gasparo Malpighio, qui per decem & octo annos hac in Universitate Anatomen docuit, non modo hujusce nervi duplex initium, verum & exiles tenuissimos furculos in eundem ab accessorio Willisii utrinque abeuntes ostendimus. Binas, ut plurimum, exilesque fibrillas hanc posticam originem compingentes observavimus, easque semper haud ex eodem spinalis medullae loco conjunctim emersas, quemadmodum reliqui spinales, sed interdum satis diffitas, ut altera e medullae spinalis superiori parte descenderet, ab inferiori ascenderet altera, donec insimul convenientes, cum anterioribus fibrillis, e vertebrarum tubo conjunctim emergerent. Hanc posticam originem, ut interdum triplicem, fibris tamen neque numero, neque crassitie, reliquis spinalibus respondentem, ac ut plurimum duplicem, neque raro simplicem fuisse animadvertimus, ita eam, proposita adhibita methodo, nisi rarissime defuisse adnotatum habuimus. Praeter haec gangliolum ad eum locum, quo tum anticae, tum posticae hujusce nervi radices ad angulum conveniunt, duram matrem mox subiturae, non raro animadvertimus. Hinc cum nobis praeceant exemplo inter caeteros cum veteres, tum recentiores, una cum clariss. Aschio, Hubero, aliisque praecl. Santorinus, & Hallerus (a), in tanto



(a) *Ibid. lib. x. Sect. vi. §. xxxiv.*

### TABULAE III.

45


Virorum consensu, hoc decimum Willisii, five potius Plateri cerebrale par spinalibus accensere non dubitamus: cum etiam ipsemet Praeceptor meus Morgagnus magis ex recepta tunc consuetudine, quam alia de causa hoc inter cerebralia connumeraverit (a), metuens, ne si tunc restituere antiquum numerandi morem conaretur, turbam non tolleret, sed augeret.

yy Par alterum spinalis medullae; primum autem juxta Willisium.

zz Dura mater.

### FIGURA III.

*Repraesentat dimidiam capitis priorem partem, eamque ad perpendiculum secundum latitudinem a vertice proxime post aures sectam, ut praecipue interiorum cerebri partium, hujusmodi Anatome, suis in sedibus adhuc haerentis habitus luculenter appareat.*



AAAA *D*esignant cranii crassitudinem, quae ex duplici tabula, & interjecta diploide, superiori Tabula demonstratis, fit.

a Sinus falciformis trigona forma superne curvilinea ex copulatione durae matris formatus, quae concurrens, ac geminata

b Processum falciformem efficit, qui minime

c Corpori calloso adhaeret: ex quo constat processum falciformem nequaquam illi sustentando datum fuisse. Quoad ea autem medullaria strata, quae, ubi postremi anguli callosi corporis in subrotundum hippocamporum initium mutari incipiunt, intra corticalem initii illius substantiam in diversum tendentia videre solitus fuit Praeceptor (b), licet interdum ad ea loca strias cum corticales, tum medullares, ac semel substantiam penitus medullarem, corticalem profunde subeuntem observaverimus, tamen dissectionibus pluribus simplicem tantummodo lineam, raro duplicem animadvertimus,



(a) Epist. Anat. XVI. n. 6.


(b) Epist. Prooem. adnexa pag. xvi.



quae secundum hippocamporum longitudinem imbricatim undata, a superioribus ad inferiora tendebat.

His praeterea, quae de falciformi sinu Santorinus (a) docuerat, addit: *id praeterea animadvertendum censeo, haëtenus a nemine observatum, harum in sinum corrivantium venarum oscula non circularia esse, prout censerì ab Anatomicis cuncta solent, verum elliptica in sinus longitudinem posita. Quod ne vel perperam concipiantur, vel aliqua exhibeantur hallucinatione, sinu suis adhuc in sedibus haerente, sic incisio est producenda, qua cuncta vasorum oscula in conspectum dentur, atque tum quantacumque partis distractione, circularia ea nunquam comperiuntur; quod ad unum maxime facere videtur, ut videlicet per levem quampiam cerebri propulsionem sic possint vascula premi, ut facile vel prorsus, vel plurima occludantur, eo non aequè facilius contingente, si circularia plane vasorum oscula forent. Quod insuper evincere potest non necessario vasorum omnium oscula circularia esse, cum idipsum maxime in glandulis concipi rationabiliter possit; ac praeterea, ubi id genus vasorum est, non aequa sanguinis velocitas esse posse videtur. Ut inter caetera harum venarum oscula meis auditoribus ostendam, secto secundum sagittalis futurae directionem cranio, cerebroque, tunc sinum, sua adhuc in sede constitutum, apertumque exhibeo, in quo non modo harum venarum oscula elliptica, sed propemodum rimae observantur, quae tunc magis ad ellipticam figuram accedunt, quo magis processus falciformis deorsum diducatur.*

Dum autem in hac vasa inquirerem, quae falciformem sinum subeunt, praeter glandulas a Pacchiono, Santorino, atque potissimum Hardero recensitas, lateribus falcis appositas, vasisque appensas; accidit, ut earum nonnullas, circa tenues venarum truncos confitas viderim, ubi eadem praesertim vasa *duram matrem pervadunt falciformem sinum subitura*: neque hasce tantummodo, sed alias tenui meningi, arachnoidique haerentes, ac potissimum supra cerebri fulcos acervatim congestas glandulas luculentissime observavi, atque, eo potissimum in loco, qui frontali offi respon-



(a) Ibid. §. II. pag. 49.



det. *Praeterea*, ita Santorinus (a), in idoneis potissimum cadaveribus complures alias in longitudinem porrectas glandulas observavi durae pariter, ac tenui meningi firmitus inhaerescere, qua praesertim summo in vertice, ad sinus falciformis latera, utraque membrana copulatur. Has itaque exactissima disquisitione perpetuo me animadvertisse pronunciare non dubito, earum duplicem esse, constantemque sedem; alteram circa summum verticem, ubi fons pulsabilis est, acuti anguli in modum, in medio vertice ad frontem converso; alteram in longitudinem fere omnem sinus sagittalis, qua ad cerebri loborum curvilineum angulum in falciforme septum, duplicata dura mater tenui, subjectaeque alligatur. Harum magnitudo fere panico semini aequalis, numerus incertus; discretas, rotundae, albae, tennes, mollesque apparent, ut nemo eas distinctum glandularum genus appellare dubitet, tum maxime, cum eae fere sese cohibeant, ubi multa humoris copia iis in locis continetur. Hae vero glandulae, cui potissimum usui datae sint, tametsi meum proferre non est, tamen facile puto percipi conjectura posse; ut largius nempe, & commodius ab summo eo vertice destillans sensim humor circumjectas, subjectasque partes cerebri, membranarumque obliniat. Hinc si vel exarescant plurimum, aut acrem fundant humorem, quid sanitati, ac vitae detrimenti sint allaturae, gnarus quisque satis intelligit. Nec fortasse & certus capitis dolor, & aliquando epilepsiae, aut tardioris apoplexiae genus aliunde petendum est; cum ab earum vitio ii certo, ac nonnulli praeterea affectus exoriri facile possint.

- d *Durae matris ora cranio interius inhaerens, quae cerebrum omne complectitur. Quae huic membrana subest arachnoides, ut eam adversus Ridleyum Santorinus confirmaret, haec addit. Hujusce laminae disquisitionem instituenti, non oblata casu cadavera disseccare opus est, sed ea potissimum deligere, quae capitis morbo sublata sunt, in quibus saepe occurrit animadvertere humorem supra cerebri lobos; quo aperte fit, ut duplex comperiatur membrana, quarum summa explicata est, & humorem continet, interior in sulcos demittitur, & anfractus cerebri aemulatur, quo constat evidentissime non*



(a) Ibid. pag. 53.

*unam eandem esse naturam.* Contigit mihi, ut pluries alias, ita potissimum die 17. Februarii anno 1773., ut dum in nervorum originem, atque incessum inquirerem, arachnoidem a pia ita sejunctam observarem, ut cerebro e sua sede caute remoto, retractoque ab anteriori parte foraminis magni ossis occipitis veli instar protensa, satis crassa, penitusque a cerebro sejuncta usque ad radices loborum cerebri anteriorum pertingeret adeo, ut non modo nervos, & spinalem medullam, sed neque ipsam elongatam videre potuerim: quae ut inde conspici liceret cum a me, tum ab iis, qui tum aderant, Auditoribus, nec non a Medicinae Doctore, ac Anatomes cultore solert. Josepho Varolio, opus fuit, ut illam inciderem, adimeremque. Idem postea alias occurrit mihi, iisdem adstantibus, alio in cerebro, in quo inter piam, & arachnoidem forte irrumpente aëre, haec per loborum cerebri superficiem a pia penitus sejuncta observabatur. Idem quoque observavimus, & ostendimus alias apertissime, dum inter piam, & arachnoidem aërem inflaremus, ac potissimum ad posteriora capitis ad finem medullae oblongatae, & spinalis initium, atque progressum, ubi semper ea membrana elegantior occurrit. Quibus rite perpenſis, nemo inde fortasse mihi crimini vertat, si cl. viro Lieutaudio haud ita facile assentiri possim, cum (a) inter *errores* illorum observationes reponat, qui arachnoidem a pia matre esse sejunctam membranam affirmant.

BBBB *Cerebri cortex, seu substantia ipsius cinerea, omnisque reliqua huic similis in orbem a cranio conclusa, caeteraeque candidae naturae circumjecta.*

CCCC *Candida intima, seu medullaris cerebri substantia, quam cinerea quasi cortice circumdari modo diximus, cujusque magna amplitudo facile cernitur.*

e *Fornix, substantia item medullaris, forma fere trigona corpori calloso proxime subjecta, qui tenuia latera, quasi alas utrinque diffundens, thalamis nervorum opticoꝝ incumbit. Quod autem inter corpus callosum, & inter fornitem utroque angustius interjectum est*



(a) *Essais Anat. pag. 389.*



\* Septum lucidum nominatur, cujus in hac Tabula nulla species est, propterea quod, utpote molliissimum, concidit, & fornici immissum, nullam ejus tenuitatis formam praesefert. Ad hujus septi latera pars superior ventriculorum est, qui priores, sive laterales dicuntur, quorum non ventriculorum, sed rimarum species est. Cum » hujusce autem septi mediam nullam rimam esse », adnotaverit Santorinus (a), eam posterioribus invenisse observationibus ex hisce manifeste colligitur: rimam adesse comperimus, & quasi circumvallatam undique foveam, cujus nullum emissarium est; at in tertium ventriculum, quemadmodum Vieussenio placuerat, nisi subter diducta, ac discisso fornice, elabi impossibile est. Hujusmodi rima intuenti facile occurret, si acuta forcipe septum lucidum horizontaliter scindatur, ac potissimum si in congelato cerebro observationes instituantur. Nos enim quoties cerebra, quae per se optime constituta essent, dissecandi se occasio obtulit, toties inter duas septi lucidi lamellas cavum observandum, aliisque ostendendum adeo facile se praestitit, ut qua de causa a praeclarissimis Viris non semper illud cavum inveniri traditum sit, assequi non posse fateamur. Ipsemet etiam Praeceptor Morgagnus praeter ea, quae evulgavit, iis in scriptis, quae apud me sunt, ita reliquit: *in tribus simul cerebris, quae die 20. Martii 1764. ipse dissecui, septum lucidum manifeste apparuit, factum e duabus lamellis, cavum intercipientibus.* Hoc tamen cavum interdum defuisse & nos observavimus, sed in iis dumtaxat, in quibus cerebrum haud bene se habere comperimus. Cum enim intra cavum humor s. n. secernatur, ac persaepe aquula reperiatur, si haec deficient, occurrit facile, qua tunc ratione laminae secum invicem coalescere, ac cavum delere possint.

ff Portiuncula plexus Choroidei.

gg Pars tenuis extrema anterior corporum striatorum, quae hujus Tabulae fig. II. lit. AA indicata sunt.

DD Thalami nervorum optidorum.

EE Crurum medullae oblongatae, substantia interior cinerea, corticalis, quae in parte thalamorum inferiore occurrit a medullari substantia undique circumdata.



(a) Ibid. §. VI. pag. 56.



- FF *Intimae corporum striatorum partes, in quibus complures tractus medullares inter substantiam corticalem protensi conspiciuntur.*
- hh *Pars alia plexus choroidei, qui per imam ventriculorum partem ascendit, ac per eosdem procedit.*
- i *Rima infra fornicem, & inter thalamos nervorum opticorum, quae tertius ventriculus dicitur.*
- G *Protuberantiae anularis pars interior ad perpendicularum secta, quam prima hujus Tabulae fig. lit. DD indicat.*
- kk *Arteriae carotides, quae disjecto osseo canali, per quem cranii cavum ad sellam turcicam subeunt, partem flexus, quo torquentur, demonstrant. Ne vero a quopiam perperam haec figura concipiat, firmiter tenendum, canalem Serpentinum, per quem carotides arteriae ad latera sellae equinae cerebrum subeunt, nequaquam per hanc unam cerebri sectionem apparere, sed nova ossium concisione, ut arteriae conspicerentur, disjectum fuisse.*
- HH *Pars auriculae postica.*
- II *Ossa petrosa serra divisa, in quibus proxime condita sunt auditus organa.*






Fig: I




Fig: II





Fig: III



5 10 15 20 25 30 35 40 45 50 55 60 65 70 75

5  
10  
15  
20  
25  
30  
35  
40  
45  
50  
55  
60  
65  
70  
75  
80  
85  
90

5  
10  
15  
20  
25  
30  
35  
40  
45  
50  
55  
60  
65  
70  
75  
80  
85  
90



Fig. I.




Fig. II.







Fig. III.





## TABULA IV.

Capite a fronte occiput versus secto, interiora potissimum  
nasi, oris, & pharyngis fornicem exhibet.



A A **O**s frontis.

B B Frontalis ejusdem sinu. Hujusce editior pars lata, sed compressa, media utrinque latior, inferior in infundibuli modum contracta definit, & per foramen ovale compressius, inter medii ossis turbinati principii latera, & supremi, inter cellulas, ut plurimum, ethmoideas, interdum etiam intra cavum nasi, versus priora magis, materiam exonerat. Haec quae cranio, quod coram video, descriptio respondet, haud craniis omnibus adamussim comparanda est; aliter enim in aliis se habere, ill. Praeceptor (a), alique bene multi observavere: nam licet ii sinus quandoque etiam in adultis desiderentur, tamen haud omittendum, eos saepe geminos esse, interdum etiam triplices, eosque non pari semper amplitudine, nec aequae discretos, cum ex iis alter quandoque maximus, ac in alterius locum productus, alter minimus, & pene in orbitam conjectus sit. Praeterea proxime frontalibus adhaerent in parte inferiore, posteriora versus, supra oculi orbitae laminam, exterius producti, bini alii sinus superius lati, inferius angusti, a frontalibus per tenuem lamellam sejuncti, quorum utrinque exitus, cujus magnitudo majoris milii granum paulo excedit, frontali proximis, intra cavitates ethmoideas sese aperit.

a Processus ossis ethmoidis, qui crista galli dicitur.

b b b b Os sphenoides, ejusque

C C Cavum, quo glandula pituitaria excipitur.

D D Sinus ejusdem ossis, qui per saepe in binos dirimitur, cujus figura, & magnitudo adeo irregularis est, ut fere in singulis craniis aliter se habeat.





c Ellipticum hujusce sinus ostium, quo mucus in cavum narium demittitur.

EEE Septum narium, cujus maxima interior portio ablata est, ut lateralis ossis ethmoidis dextera pars, ejusque potissimum cellulae innotescerent.

d Turbinato supremo osse secundum longitudinem resecto, unam ex ethmoideis cellulam ipsi respondentem exhibet.

e Ellipticum foramen, quod sinui respondet, qui statim supra medium turbinatum os, prope finem ossis unguis, usque supra oculi orbitam scandit.

f Sinus supero turbinato ossi jam ablato respondens. Qui vero de varia horum ethmoidis sinuum sede, divisione, magnitudine, atque incessu differere vellet, inutiliter operam, & tempus tereret. Horum enim incerta ut plurimum forma, inconstans magnitudo, & incertus numerus est: ii tamen in cranio, quod nunc meis oculis objicitur, duplici serie disponuntur, inferiore scilicet, & superiore. Superior majorem ipsorum numerum, minorem inferior continet. Superiores quini, atque majores; inferiores terni, ac minutiones esse observantur.

F Quartum os minimum omnium turbinatum Santorini, quemadmodum praeter ea, quae ipse evulgavit, ex aliquibus ejusdem schedis aperte colligitur. Ita enim habet: *Supremum, si per speciem, & superius positum os turbinatum dici velimus, & aliud super hoc novissime descriptum est, cujus posterior exortus citra supremi terminum evanescit: alibi vero in hoc etiam nostro turbinato evenire &c.* Quae licet omnia officulum hoc a Santorino pro quarto ex turbinatis ossibus descriptum, ac delineatum fuisse manifeste demonstrent; nos tamen, dum triginta, & ultra capita secumimus, illud inter caetera inquirendi animo, non nisi bis animadvertimus hoc officulum esse tamquam minimi, sive supremi potius appendicem, aut quamdam inflexionem, quemadmodum nunc etiam uno in capite, & quidem tantummodo in sinistro latere videmus, quam peculiare officulum a caeteris turbinatis ossibus discretum, distinctumque. Verum si hoc quartum officulum non nisi raro nobis occurrit; saepe tamen sub supero turbinato osse alia minora officula, quibus fortasse respondent quae ipsemet Santorinus

habet (a), modo plura, pauciora modo, in diversum, ac potissimum sursum tendentia, atque sic involuta observavimus, ut ea minoribus turbinatis ossibus accensere minime dubitemus.

G Os turbinatum supremum Morgagni.

H Os turbinatum superius, in cujus tuberosa parte eum pituitarium sinum, interdum rimam tantummodo observavimus, quam primus omnium Santorinus (b) descripsit. Is sinus, qui ex binis hujusce spongiosi ossis parietibus fit, licet interdum, ut plures alii sinus, desideretur; in illis maxime aetatibus, atque in illis capitibus prae caeteris conspicuus est, in quibus hujusmodi partes aequam nactae sunt amplitudinem. Is non modo in aridis, sed in recentibus etiam capitibus facile cernitur, nec quidquam ei deesse advertimus, quin caeteris sinibus esset accensendus; nam praeter majorem, minoremque capacitatem, quae aliquando etiam gemina nobis occurrit, & contentum humorem, & succingentem membranulam, & ostium, quo humor excernitur, habet. Hoc ostium, quod modo majus, modo minus occurrit, elliptica forma donatum, ad posteriora magis constitutum, radici ipsius ossis respondet, humoremque in proximum ipsi respondentem sinum exonerat. Ita a summo Conditore constitutum est, ut hujusmodi in sinibus secretus humor non e vestigio, seu inutilis, effundatur, sed diutissime conclusus nonnisi aut ipse redundans, aut capite quam maxime apte inclinato, ex his receptaculis evadat: immo si singulorum positus, exitusque sedulo consideretur, plerique ex iis ita sunt comparati, atque dispositi, ut humor ex uno delapsus, non protinus in magnam nasi caveam ejiciatur; sed inter minora ossa turbinata ita deducatur, ut aut omnis, aut plurima certe parte in alium sinum continuo commigret; quod in frontalibus praesertim, & in prioribus ethmoideis evenire, atque etiam in hoc ipso turbinato ex accurata, diligentique animadversione apertissime constat. E quibus omnibus erui facile posse videtur pertinacis, atque diuturnae capitis constipationis, gravitationisque causam, ex hac maximopere crassi, viscidique humoris lenta in

---

(a) *Ibid. Cap. v. §. ix.*

(b) *Ibid. §. viii.*



nasi caveam commigratione, per alternas scilicet, renitentesque derivationes, repetendam esse.

I Os turbinatum inferius, cui ex opposita parte

K Idem os resectum respondet. Hic locus is est, in quem canalis lacrimalis intra narium cavum sese aperit.

g g Cartilaginosa Eustachii tubarum latera, earumdemque orificia ad pharyngis fornicis latera intra fauces hiantia.

h h h h Mucosi sinus, five cavitates.

ii Cavi recessus inter tubae latera, & fornicem, qui in laxas caveas deducunt.

LL Apophysis magna ossis occipitis, secundum longitudinem per medium discissa quae, fornicis instar, faucibus imminet. De iis, quae ad haec loca pertinent, ita Santorinus (a): » pharyngis » fornix sub priore, ac retuso occipitis processu situs, cartilaginosa » Eustachii tubarum extrema interjacet, posterius pharynge, prius » vero narium septo, & cavitatibus terminatus. Densa, crassaque » membrana obtegitur, plurimis cumlata glandulis, e quibus spissior mucus destillat. Hanc in leves cavitates, quodam velut ordine compositas, aliquando discretam offendi, aliquando in inordinatos loculos diductam, aliquando sic cavernosam reperi, quae » conspicuis osculis, ac profundioribus sinibus propemodum tonsillas » aemularetur, e quibus proum fuit mucosum humorem elicere ».

*Haec supera omnis pars, quae intra supremi pharyngis fines partim a lateribus processuum pterygoideorum, partim a priore occipitis apophysi, partim a cartilaginosis tubarum lateribus, partimque demum a summo posteriorum foraminum dissepimento fit, ea, inquam, hisce finibus circumscripta supera pars fornix pharyngis appellatur. Locum hunc, qui levis aliquando, quandoque eminentibus membranis ordinate in loculos distinctus, nonnunquam in sulcos discretus conspicitur, membrana velat, quae non modo certe esse glandulosa videtur, sed sic saepe nonnulla adhibita diligentia cavernosa apparet, ut foramina plura exhibeat, eaque tantae capacitatis, ut longe aliquando tonsillarum ostia superent. Horum tamen neque cer-*



(a) Ibid. Cap. VII. §. XVII.



tus numerus, neque certus locus est. Medium enim, quandoque maximum, aliquando utrinque pene paria esse consueſcunt, quae aëre immiſſo diducta facile explicantur, tenuique formata fuiſſe membrana demonſtrant. Inter has porro caveas minores aliae ſitae ſunt, quaſi conſulto ad univerſas concludendas major ſinus conditus fuiſſet. Neque in uno tantum pharyngis fornice cavernoſa fabricatio facile reperitur, ſed ab huiuſce etiam lateribus, & maxime in ſuprema, poſticaque pharyngis membrana, quae oppido glanduloſa eſt; atque ibi non glanduloſa tantummodo membrana eſt, ſed creberrimis pertuſa foraminibus, quae non ſolum pleniorẽ ſetam, ſed modicum etiam ſpecillum non difficulter accipiunt. Ad interiora etiam prae caeteris tubae latera, inter ea nimirum, & fornicem, crebra, lataque foramina ſunt in laxas caveas deducẽtia, unde facile non modica muci viſ exprimi ſolet. Illud praeterea mirabile eſt magnam inter haec oſcula aliquando communionem intercedere, ita ut quocumque coniectum fuerit ſpecillum porro pergere poſſit. Itaque exterior membrana ea eſt oſculorum frequentia, ut retis ſpeciem praeſeferat ex validis, albiſque quaſi funiculis compoſita, quod ſic interiori parti ſuperinducta, & accommodata videtur, ut inter omnem eam regionem facilis communicatio habeatur. Nam in ea interdum ſpiritu immiſſo pars univerſa tumet, atque attollitur. Id autem vel quod multa illius humoris ſecernendi neceſſitas eſt, vel quod multa ſecreti ipſius commoditas; quo ſcilicet aut partes aſſiduo aëris appulſu non inareſcant, aut opportune vi quadam circumſitorum muſculorum expreſſus humor ſenſim delabatur: ſin vero vel jugi deſtillatione nimium ſubjectas partes proluat, aut pertinaci cohaeſione ſubſiſtens eaſdem vehementer diducat, ea morborum genera ſuboriuntur, quorum ſaepe medicis harumce partium fabricationis ignaris abdita natura eſt.

j Naris dexterae orificium, quod ut clarius innotefceret, exilis fortaffis illa, & ſecundum longitudinem ducta cartilago, quae ſeptum naſi complet, tranſverſim reſecta fuiſſe videtur.

k k Pinnae narium, in quarum ima parte, quae a lateribus eſt, cum extrinſecus, tum maxime intrinſecus frequentiffime fabaceae glandulae ſunt, ut vix quidquam, praeter ea corpuscula, eo loci conſpiciatur.

ll Specillum per dexterum narium orificium immissum, ut fortasse septi narium pars, quae sua in sede occurrit, luculentius in conspectum veniat.

M Os maxillare palatum stabile conformans, in quo

mm Canales, sive viae foraminum Stenonii.

Iis quae Santorinus de hisce canaliculis tradiderat (a), nihil additum invenio. Caeterum eos conicos inversos, inflexosque, ac propria membrana cum narium tunica continuata coopertos esse, & alii protulere, & nos etiam non raro conspeximus. Ii tamen haud a basi narium usque in anticam palati regionem pone dentes incisores immediate ut plurimum hiant; sed postquam eo pervenere, ubi iidem dentes radicem alveolis inferunt, intra eam carunculam, quam recte Praeceptor meus in epistola (b) ad me data descripsit, sese demittunt. Ex hac autem caruncula aliquantulum pressa per duo, aut per tria, aliquando etiam per plura ostiola humorem album, viscidumque elicuimus.

nn Musculi pharyngostaphylini, & salpingostaphylini, & forte etiam azygos, de quibus luculentius Tab. VI. fig. II. lit. EE, F, G, & Tab. VII. lit. KK, & LL.

oo Glandulae, quae inter utramque membranam palati mollis, anteriorem scilicet, & posteriorem, & musculos modo indicatos ovali figura, exquisque orificiis praeditae observantur.

pp Pili e labro superiore prodeuntes.

N Uvula, cui

qq Bini utrinque arcus adstant, quibus

rr Glandulae tonsillae comprehenduntur, in quarum anteriori facie earum oscula conspiciuntur.

O Epiglottis.

P Lingua.

s Pars glandulae sublingualis.

Q Membrana oris, quae deorsum, ac latera versus ex maxillae inferioris sectione protracta, fere figuram exhibet, quae capitis retusi maxillae inferioris est.



(a) *Ibid. Cap. v. §. XIII.*

(b) *Pag. xvii.*















- R R    Labrum superius .
- S S    Labrum inferius .
- t t    An membrana oris in plicas disposita , aut ita secreta ut
- u u    Musculus labiorum orbicularis appareat ? Rudis admodum figura est , ideoque captu difficillima .
- T T    Maxilla inferior ferra discissa , atque sejuncta ; cujus sectae
- v    Gingivae vestigium est .
- x x    Dentium radices .
- V V    Fasciculi fibrarum ex superiori parte musculi genioglossi , ex inferiori vero geniohyoidei , e naturali loco per inferioris maxillae laterum distractionem dimoti .
- X    Cutis una cum musculo menti quadrato , seu depresso proprio labri inferioris .
- y    Pinguedo , quae inter
- z    Musculum labri inferioris elevatorem , & quadratum menti intercedit .
- W W W Via , quae e faucibus ad narium capacitatem abit .






# TABULA V.

## FIGURA I.

Os temporis finistrum ex interiori parte, in quo transversim petrosus processus ad regionem canalis semicircularis minoris verticaliter excisus est, atque ita plura ad tympanum, atque ad labyrinthum pertinentia ostendit.



- A Os squamosum intrinsecus levissime cavum, inaequale, cujus  
 a a Ora posterior, & superior cum osse verticis, seu parietali;  
 b b Anterior, & inferior cum processu laterali maximo sphenoidis  
 connectitur.
- B Processus zygomaticus, qui partem jugi dimidiam facit, ossi-  
 que jugali futura brevi, & obliqua jungitur.
- C Pars ossis temporum posterior mammillaris dicta, minor, cava, cujus  
 c c Ora superior ossi verticis,  
 d Posterior, eademque inferior ossi occipitis adhaeret.
- D Processus mammillaris, seu mastoides.
- E Ea mammillaris processus pars, quae auditorii meatus ossei ex-  
 ternam lateralem partem, & posteriorem efficit.
- F Processus styloformis.
- G Processus petrosus ad regionem canalis semicircularis minoris excisus.
- e Meatus auditorii extremitas ex interiori parte inspecta.
- f Malleus naturalem magnitudinem aliquantulum excedens.
- g Incus paulo naturali major, cujus processus minor una cum  
 pariete, cui innititur,
- h Sinuositatis mastoideae articulatur, ut luculentius fig. III. lit. I.
- i An stapedis pars? plura ad haec loca propter ruditatem figu-  
 rae me assequi non posse fateor.
- k Officulum orbiculare.
- l An circuli portio, in quem membrana tympani sese demittit? at si  
 haec cur non curva, magisque versus styloidem processum inclinata?



m m Tympani cavitas a sinu conico semicirculari osseo musculi stapedis usque ad inferiora.

n Foramen aquaeductus Fallopii, per quem acustici nervi portio dura supra

o Sinum fenestrae ovalis scandit, quem si forte figura indicat, non satis perspicue ostendit.

p An fenestra rotunda?

Ne tamen haec omnia, quae passim hac in figura dubia occurrunt, a nobis solummodo delineatoris vitio verti videantur, haud omittendum in quibuscumque ossibus hujusce figurae gratia dissectis semper a nobis repertam fuisse varietatem, vixque unum, quod alteri prorsus respondeat, inventum; quod non mihi modo, sed & pluribus aliis contigit, qui tympani cavitati accurate describendae operam dederunt. Praeterea ad hanc varietatem maxime efficiendam ipsamet difficilis dissectio haud parum confert, quod & de aliis hujusce Tabulae figuris dictum volo. Nam si nonnihil antrorsum, vel retrorsum magis, quam huic sectioni conveniat, ferra dirigatur, vel inter secandum paulisper inflectatur, aliam atque aliam figuram tunc sectione exhiberi omnibus palam est. Hinc cum in ejus simile petrosum os, in illamque sectionem, quam ipsemet Santorinus instituit, incidere, casui potius, quam scientiaetribuendum sit, quid in hisce diligenter describendis difficultatis emergat, quisque facile videt.

q Canalis semicircularis minor per longitudinem sectus, in quem


r Ostium canalis semicircularis majoris sese aperit; sicque efficiunt ambo

s Canalem communem.

t t Canalis semicircularis minimi bina ostia.

u Ostium canalis semicircularis majoris.

In hisce canalibus denominandis ab appellationibus a Valsalva institutis, ac postea a Morgagno (a) confirmatis, nullo modo recedendum censemus, licet alii eos verticalis, obliqui, & horizontalis, alii superioris, posterioris, & exterioris nomine designaverint.



(a) Epist. Anat. XII. n. 8.

FIGURA II.

Os temporis dextrum una cum processu petroso verticaliter secundum longitudinem ferra excisum exhibet, in quo plura naturalem magnitudinem excedentia, quae ad auditus organum pertinent, observantur.



- H Meatus osseus auditorius circa medium secundum longitudinem fere verticaliter dissectus.
- I Processus petrosus verticaliter secundum longitudinem ferra excisus.
- a Pars circuli ossei, in quem meatus auditorius definit, & membrana tympani, cujus fortasse vestigium hic aliquod etiam occurrit, sese demittit.
- K Tympani cavitas, in quam superior pars ossea
- L Tubae Eustachianae sese aperit.
- b Extremitas tubae ossea, cui ejusdem pars cartilaginea, atque membranacea nequitur.
- M Canalis osseus, qui tubae Eustachianae superius, externumque latus quadantenus tenet, in quo musculus processus majoris mallei reconditur.
- c Hujusce canalis extremitas, quae trochlea a quibusdam dicitur, eo quia trochleae officio defungitur. Musculi enim tendo processus majoris eo perventus ad latus anterius, nonnihil supra ovalem fenestram tamquam super trochleam inflectitur, sicque mutato incessu recta inde ad mallei processum majorem defertur.
- d Sinus fenestrae ovalis, qui ad ipsum
- e Fenestrae ovalis orificium ducit, per quod aditus ad labyrinthi vestibulum habetur.
- f Foramen aquaeductus Fallopii.
- g Sinus tympani minor, sive pars superior, & anterior sinus illius, quem primus omnium Schelammerus indicavit; ut autem ratio pateat, cur hanc partem sinus tympani minoris nomine designaverim, hunc finem caeteris partibus paulo luculentius describamus,

oportet. Hic itaque sinus in aliis duplex est, in aliis, & quidem ut plurimum, simplex. Cum duplex, alter minor, & exterior; major alter, & interior observatur. Utrumque sinus conicus osseus musculi stapedis, sive potius ejus extrema pars, dividit. Sinus minor, inter sinum musculi stapedis, meatumque auditorium exteriora tenet, atque ex anteriore aquaeductus Fallopii parte, supra latus externum sinus fenestrae ovalis sese aperit. Major autem inter fenestram rotundam, & sinum musculi stapedis tenet intima, haud sub eo ferme loco, quo canalis minimus, & minor, ut placuit nonnullis, sed quo canalis minimus, & major ad vestibulum vergunt, ut animadvertit etiam imm. Praeceptor (a). Ejus figura irregularis est: nam ex pluribus, quae ad manus sunt, ossibus, in aliis ad rotundam, ad ovalem in aliis, in aliis ad triangularem figuram quadantenus accedit. Ab inferioribus ad superiora vergens, seque sursum conjiciens, aquaeductui Fallopii adhaeret, altiusque est, quam fenestrae rotundae orificium. Infra sinum fenestrae ovalis ex lato in angustum coactum abit sub fibra ossea, quae a posteriori parte foraminuli, per quod tendo musculi stapedis trajicitur, in promontorium migrat. Ejus denique constitutio ita se habet, ut inferiori parti Eustachianae tubae sese objiciat. Haec ad pleniorum sinus hujusce explicationem, cujus hac Tabula vestigia exhibet diligentissimus Santorinus, dicta nobis sufficiant.

h Una ex cellulis mastoideis ferra excisa, sub qua via est (fig. III. f) ad


i Magnam sinuositatem mastoideam, sive Antrum, (ibid. H)

\*\*\* &c. Aliasque processus mammillaris minores sinuositates.

N Foramen canalis serpentine, cujus

k Incessus est, per quem arteria carotis interna ad latera sellae equinae intra cranium ascendit.

O Canalis communis utrique portioni nervi acustici, in quo, rudi quadam figura, rimae, seu semicanalis fortasse superioris vestigium occurrit, quem accuratissimus Cotunnus (b) descripsit, atque delineavit.



(a) Epist. Anat. VII. n. 4.


(b) Dominici Cotunni Phil. & Med. Doct. de Aquaeductibus auris humanae internae Anatomica Dissertatio. Neapoli an. 1761. Cap. XXII. Tab. I. fig. I. n. 2.



- l l Vestibuli cavitas .  
 m Ostium ellipticum canalis semicircularis minoris .  
 n Canalis communis semicircularibus canalibus majori , & minori .  
 o Incessus canalis semicircularis majoris , qui in communem tendit .  
 p Ostium canalis semicircularis minoris .  
 q Pars canalis semicircularis minimi .  
 r Septum cochleae , quod ejusdem canalem dividit in duos semicanales , seu , ut vocant , scalas , quarum altera dicitur  
 f Scala vestibuli , altera  
 t Scala tympani .  
 P Illa ossis squamosi ora , quae cum osse multiformi connectitur .  
 Q Sinus magnus profundus oblongus , cui intercedente peculiari lamella cartilaginea , maxilla inferior articulatur .  
 R Tuberculum juxta priorem hujusce sinus partem eminens , similiter oblongum , in medio depresso , pro maxillae inferioris articulatione .  
 S Tuberculum juxta posteriorem hujusce sinus partem non adeo eminens , parvum , subrotundum , meatui auditorio proximum , eidemque articulationi inserviens .  
 T Processus zygomaticus .


FIGURA III.

Os pariter temporis dexterum , & processum petrosum statim supra meatum auditorium horizontaliter dissectum exprimit , in quo pariter nonnulla naturalibus majora ad tympanum , atque labyrinthum spectantia conspiciuntur .



- A Processus zygomaticus .  
 B Ossis squamosi inferior & interior pars , cujus  
 a a Ora cum processu laterali maximo ossis multiformis nequitur .  
 C Ossis mammillaris interior pars , cujus  
 b b Limbus est , qui cum osse occipitis conjungitur .  
 D Fovea sigmoidea , quae finum laterale durae matris excipit ,  
 cujus

- c Finis in fulcum ossis occipitis, huic respondentem, adhaerentemque abit.
- E Protuberantia processus petrosi, quae a parte ejus posteriore, & inferiore supra fossam sigmoideam emergit.
- dd Foramina, quae a posteriori processuum mammillarium parte, e sinibus lateralibus venas occipitis deducunt. Haec tamen foramina interdum etiam ossi mammillari, & ossi occipitis communia sunt.
- FF Processus petrosus, horizontaliter dissectus
- G Canalis communis utrique portioni nervi septimi paris.
- e Tympani cavitas, quae in laterali, & anteriori parte observatur, quaeque Eustachianae tubae respondet.
- H Magna sinuositas mastoidea, sive *antrum*, a Valsalva sic appellatum, cum
- \*\*\* &c. *Aliis mammillaris processus minoribus sinuositatibus communicans, quod revera tamquam appendix ad complendam tympani cavitatem concurrat (a),* cujus
- f Via est, per quam cum proximo tympano communicat.
- g Mallei caput, cujus
- h Processus major, seu manubrium est.
- i Processus ejusdem minor.
- k Incus, ejusque
- l Brevior processus, qui cum magnae mastoideae sinuositatis pariete articulatur.
- m Longior incudis processus, per quem cum capitulo stapedis, intercedente officulo orbiculari, conjungitur.
- n Incudis cum mallei capite articulatio.
- o Foramen aquaeductus Fallopii.
- \*\* Vestibuli cavitas.
- p Initium septi utramque scalam dividens.
- q Basis stapedis sua in sede, in orificio fenestrae ovalis constituta, intra vestibulum inspecta, suaeque membrana cooperta.
- rr Ostia canalis semicircularis majoris.
- s Canalis semicircularis minimus.



(a) Tractatus de Aure humana. Bononiae an. 1704. Cap. II. n. 3.





Fig. I




Fig. II




Fig. III




Fig. I



Fig. II



Fig. III







t	Incessus scalae vestibuli.
u	Cochleae basis.
v	Cochleae apex.
x	Modiolus cochleae.
y	Superior circumvolutionis pars canalis spiralis, quem
z z	Septum cochleae dividit.
a a	Scala tympani.
o o	Scala vestibuli.





# TABULA VI.

## FIGURA I.

Totam praecipue pharyngis posticam partem ostendit.



- A **P**haryngis pars summa membranea, cujus  
 B Portione dissecta, atque ad latera revoluta apparet  
 a Tuberculum, quod est extremitas cartilaginea tubae dexteræ  
 Eustachianae, in quam  
 b Specillum intromissum est. In conspectum pariter venit  
 c Septum  
 d d Nares internas dividens.  
 C C Musculi pterygopharyngei fibrae, ab interioris alae crepidine  
 pterygoïdis profectae, quae primo descendendo, ac deinde po-  
 sterius transversim productae, atque disiectae, pharyngem am-  
 biunt. Harum fibrarum actio illi respondet, quam Tab. VII. lit.  
 n n describemus.  
 e e Reliquae vero hujusce musculi fibrae a corniculis processum  
 pterygoïdum emerfae, loc. cit. describendae, una cum superio-  
 ribus, ad illam  
 f f Lineam mediam contendunt, quae ad posteriora pharyngis, a  
 summo fere ad imum descendit.

Hanc Santorinus (a) cum » nec talem, nec tantam, aut tam  
 » conspicuam tendinosam lineam posterius in ejusdem medio con-  
 » spici » dixerit, ac porro adjecerit » non talem quidem, nec tan-  
 » tam esse, quum in inferiore potissimum ejusdem parte nil occurrat,  
 » quod linea dici mereatur; nec tam conspicuam in edita Thyro-  
 » pharyngei parte deprehendi; qua siquid est, & breve, & obscu-  
 » rum, & latiusculum apparere »; cum his ipsis, inquam, verbis  
 suam tunc sententiam de hac tendinosa linea ediderit, haud sane

i 2



(a) *Ibid. Cap. VII. §. IX.*



intelligo, cur Heisterus (a) merito dicere potuerit: *Hanc lineam negat Santorinus*, quam neque ex toto inficiatus est, neque in praesentia inficiatur. Qualem vero pinxerit Valsalva (b) tendinosam, perpetuam videlicet, angustam, conspicuam, in frequentissimis dissectionibus, ne mihi quidem huc usque occurrisset fateor; verum aliquando prorsus nullam, aliquando partem ipsius dumtaxat aliquam, modo latam, modo angustam, obscuram saepius, eam tandem, quae cum Santorini verbis congruere planissime videatur.

DD Musculi mylopharyngei Tab. VII. lit. G G describendi.

De hisce Musculis, quos tamquam a se inventos proposuit Santorinus, & Douglassio, Cantio, atque Cowpero, Heisterus (c) tribuit, ita suis in schedis admonuit: *se Douglassii opus aliena lingua, anglica nempe, descriptum, tum cum observationes suas ederet, haud cognovisset, ipsique vitio dari posse haud existimare, quando Heisterus ipse, qui non modo Angliae multis partibus proximior erat, sed ejus etiam sermonis haud ignarus, nec prima, nec altera compendii Anatomici editione cognoverat; praeterea se multo antea, ac Cantii, atque Cowperi opus prodisset, (prodiit enim sub idem tempus, ac Santorini observationes prodire) publice ex cathedra coram frequenti Auditorum corona, non audiente modo, sed inspectante comonstrari suis in sedibus haerentem mylopharyngeum jussisse. Tum autem primum eruditum professorem Johannem Baptistam Grandi ostendisse, curioseque prae caeteris iterum, seorsumque sibi optatum humanissimum Auditorem praecl. Petrum Antonium Michelotti, nec rei Anatomicae, nec Britannicae linguae, ejusdemque Scriptorum praeter caetera ignarum, dispexisse.*

g Processus styloides ossis temporum, a quo nascuntur

EE Musculi stylopharyngei. *Hi quandoque gemini utrinque occurrunt, ex priore, & laterali interna styloidis radicis parte, tereti carneo, tendineo etiam quandoque principio exorti leniter ad interiora inflexi descendunt, ipsique pharyngi post tres circiter latos di-*



(a) Comp. Anat. n. 325. not. (e).

(b) De Aure Tab. VI. n. 3. 3.

(c) Comp. Anat. ibid. not. (d).

gitos adjunguntur; qua bifariam discretis pars supera, quae saepe multo tenuior est, infra supremas, ac tenuiores glossopharyngei fibras omnis distribuitur; ex quo quidem fasciculo fibrae aliae sursum, aliae in transversum latae, illae in angulum, hae in priorem pharyngis partem disjiciuntur: pars vero altera, inferior videlicet, ac major sic fibras spargit, ut ex iis aliquot in superam partem immittat, nonnullas etiam sub hyopharyngeo in posticam, interiorumque pharyngis faciem deducat. Hic porro monendum est non uno, simpliciue fibrarum ordine, seu strato pharyngis crassitudinem compingi, sed duplici plurimum, atque triplici etiam, quemadmodum hoc in loco se habet, in quo praeter memoratas fibras, alterum praeterea stratum hyopharyngei, tertiumque tyropharyngei pharyngi circumfunditur; quae non scalpelli ope, aut multa sedulitate, sed pene trahente manu dispescuntur. Haec vero pars, quae recta fere deorsum fertur, dirempta, non in pharyngem terminatur, sed in ossis hyoïdis, ac tyroïdis cartilaginis viciniam delapsam in utramque hanc partem inferi post Fallopium (a) a viris in arte principibus existimatum est, quarum nos quidem fibrarum posticam partem in posteriorem tyroïdis oram, seu latus inferi plane videri non negamus; partem vero alteram, priorem scilicet, nec in os hyoïde, ut animadvertit Santorinus (b), nec in superam tyroïdis cartilaginis oram infigi, vel diligentissime scrutando advertere huc usque potuimus. Comperimus autem & Viris etiam praeclaris. Comiti Josepho Camuti Augustorum Parmensium Principum Archiatro meritissimo, & Chymiae Professori praestantissimo, & F. Guillelmo Le-Vacher, eorundem Principum, & hujusce Universitatis Chirurgo primario experientissimo, eruditissimoque, aliisque pluribus utrinque fasciculum teretem, satis crassum, ad extremum in tendinem conversum inter ligamenta lateralia ad apicem usque epiglottidis disiectum, explicatumque abire luculentissime ostendimus. De hisce fasciculis, quos solummodo ex Waltheri auctoritate recensuit ill. Hallerus (c), ita reliquit Santorinus (d), *visa*

(a) Opera Omnia, Venetiis 1584. Observationes Anatomicae pag. 238.

(b) Ibid. §. VII.

(c) Ibid. lib. XVIII. Sect. III. §. x.


(d) Ibid. §. VII. p. 126.



mihi praeterea est ex hac eadem descendente stylopharyngei portione, ea quae magis interior est, scilicet epiglottidi propior, sic ad ea ligamenta, quae ei a lateribus sunt accedere, ut ad illum locum perspicue terminari videretur. Quod sic attento, sic dubitanti oculo inquisivimus, ut sensibus fidem abrogare quasi videretur, atque ab harum fibrarum extremis adeo confici videbantur tenuissima lateralia ligamenta, ut in posterum non ligamenta, sed tendines, aut si mavis etiam tendinosa ligamenta essent appellanda. In alio continenter subito vidimus eodem die, in quo multo tenuior stylopharyngeus erat, fibras eas, quae ad latus epiglottidis descendebant, non ab stylopharyngeo decessisse, sed ab eo lacerto, quem opinabatur Fallopius (a) ad hyoïdis os conferri, qui lacertus non ab eo musculo, sed inter illius musculi fibras a pharynge decedit. Neque id multum interest, dum suo natura quomodolibet fungatur munere. Hosce tamen musculi stylopharyngei fasciculos ad attollendam epiglottidem maxime aptatos, licet alias pluries inquisierimus, nunquam adeo luculenter videre nobis datum fuit. Quae diversitas in causa fortasse esse potest, cur alii hujusce musculi fibras in os hyoïde, alii nequaquam abire observaverint. At quomodocumque se habeant, cum in pharyngem, tum in laryngem adire certissime deprehenditur. » Quamobrem non tantummodo pharyngi musculus hic prospicit, verum etiam laryngi plurimum famulari non modo nobis constitit, sed & spectatissimo Morgagno (b), qui de Fallopio id receptum, utpote restituendum proposuit (c). » Hisce musculis, ut obiter id moneamus, illud potissimum attollendi laryngem inter deglutendum officium a praestantissimo Viro Caldanio (d) concinne, atque perite descriptum debetur, ut larynge sursum una cum pharynge sublata, atque hac magis latera versus explicata, facilius alimenta vallum pharyngis subire possint.

F Musculus styloglossus, de quo Tab. VII. lit. E.

G G Musculi glossopharyngei, qui e lateribus interioribus linguae, binis ut plurimum utrinque fibrarum lacertis secundum longitudi-



(a) *Ibid.*

(b) *Adv. Anat. I. n. 8.*

(c) *Santorinus ibid.*

(d) *Institutiones Physiologicae. Patavii an. 1773. Cap. XXIII. n. 381.*



nem ductis proficiſcuntur, & deinde diſjeſti, atque in plures faſciculos explicati, ad poſteriora pharyngis contendunt: horum alii, infra muſculum mylopharyngeum, una cum ſuperioribus ſtylopharyngei fibris incedentes, ad angulum ſurſum conveniunt; alii vero paulo infra, hyopharyngeis adjuñti, atque implexi, ac cum iſdem procedentes, ſuperioribus adnexi, ad mediam pharyngis lineam contendunt. *Harum fibrarum officium non unum eſſe ex diſpari quadantenus earum poſitu intelligitur; quoniam ſummae, ſi lingua pharynge firmior eſt, & arctant, & deprimunt: reliquae vero utpote in anguli pene modum, vertice ſuperiora ſpectante, conformatae, lenius quidem deprimunt, atque arctant; quas praeterea linguae motionibus inutiles eſſe, non opinor, cum eam & adducere, & inflectere poſſe non ſit alienum opinari.* Huic praeterea muſculo, qui a ſiniſtris eſt,


h Tenuis ille fibrarum lacertus debetur, quem tamen videre haſtenus datum eſt nunquam, qui per poſticam pharyngis faciem procedens, in digatriſci tendinem, aut in maxillarem glandulam fuſus, diſjeſtusque inferitur.

H Muſculus ſtylohyoïdeus tereti, longo tendine a poſtica ſumma ejuſdem ſtyloïdis facie exortus, atque circa extremum bifariam diremptus, oblique in priora offis hyoïdis deſcendit.

I Muſculus biventer, ſeu digatriſcus, qui per fiſſuram muſculi ſtylohyoïdei traducitur.

K K Offis hyoïdis cornua.

LL Muſculi hyopharyngei, qui rhomboïdea fere forma eſſe videntur; altero acuto angulo ſuperiora ſpectante, altero in inferiora converſo, cujus quodammodo pars ſub tyropharyngeo latet. Earum fibrae, quae inter cornua hyoïdis ſunt, fere in tranſverſum feruntur; imae prorſus deſcendunt; ſummae omnium lacertofiſſime, atque longiores aſcendunt. Ex huiusce muſculi fibris, aliae in extremum cornu, aliae in ejuſdem longitudinem, nonnullae in corniculum ipſius terminantur. Has fibras primum diſerte propoſuit Valfalva (a), & novum deinde *muſculum confecit, ſibi* tri-



(a) De Aure Cap. II. §. xx. Tab. v. fig. II. lit. M M M M.

buit, appellavitque *Condropharyngeum* *Douglasius* (a), qui certe *Valsalvae*, si cui, tribuendus est. Harum autem fibrarum omnium contractione fit, ut non minus ardeatur *pharynx*, quam adductis utriusque extremis idem etiam corrugetur, atque apta unius musculi dispositione, duplici naturae muneri inserviat.

**MM** Musculi *thyropharyngei*. Cum horum fibras dispicio, in quibus discernendis non multum negotii dari videtur, quasque *Anatomici* omnes novere, duo inter caetera comperio, non sine aliqua animadversione praetereunda. Nam ex ea fibrarum multitudine, quae ab *thyroïdea* cartilagine procedere dicuntur, pars nonnulla ab *sternothyroïdeo* procedit, alia minor ab *cricothyroïdeo*, quoniam ima *thyropharyngei* pars tenuis, ac tendinea in exteriorem faciem memorati *cricopharyngei* terminatur: alia autem superior, ac major multo, conspicua, & lacertosa, quasi altera *thyropharyngei* lamella, reliquis imposta, transverse in interiorem faciem *sternothyroïdei* producitur; quarum si non utramque, hanc certe potiore aut diverso, aut saltem peculiari officio fungi non temere existimo. Praeter has vero memoratas fibras, reliquae *thyropharyngei* multo plures propriae, non omnes in *thyroïdis* latus, sed pars in superiorem oram, pars in priorem etiam ejusdem faciem, in asperam videlicet lineam carneaef desinunt, praeter nonnullas, quae in posticam imi ipsius processus partem inseruntur. Harum omnium fibrarum forma in *pharyngis* dorso acutum angulum refert, cujus vertex in superiora conversus infra summas *hyopharyngei* fibras est: dummodo *thyropharyngei* fibrae in aliam longiorem musculi formam productae ad *cranii* usque basim in acutissimum angulum conversae, ut aliquando observavimus, procedant, atque tunc maxime non modo per hunc musculum valide contrahi *pharyngem*, sed sustolli pariter *thyroïdem* non sine ratione putandum est.

**N** Musculi *cricopharyngei*. Horum fibrae, quae ab imis *cricoidis* lateribus oriuntur, duplicis ordinis sunt:

**ii** Aliae superiores, nempe *thyropharyngeo* contiguae parallele oriuntur, atque procedunt, ut imam *thyropharyngei* partem, quae acutum angulum efficit, compingere videantur;

---


(a) *Myog. Cowp. Spec. Cap. x., ex Santorino pag. 121.*

- kk *Aliae autem sub his acuto principio exordiuntur, ac non modo vario tractu procedunt; sed etiam saepe & pallidiores occurrunt, & lacertulos, fasciculosve varie compositos habent. Triplex autem ex iis tractus ratio facile conspicitur; nam quae superiora petunt, ii, kk prae caeteris maxime ad decussim in anguli speciem conformantur; quae*
- ll *Fibrae horizontales sunt, & curvae in transversum incedunt; has infra*
- m *Nonnullae satis conspicuae ita ad decussim feruntur, ut ulterius productae spiram agere certo appareant. Quarum tamen omnium sic unum constringendi officium est, ut etiam superiores leviter deducere, inferiores attollere posse videantur. De his tamen animadvertendum est, quod fibrae a cricoide productae, & in*
- O *Oesophagum abeuntes, ita sensim ejus longitudinem metiuntur, ut licet primo obliquae, & ad spiram accedentes appareant, tamen progressu pro longitudinalibus haberi possint. In anteriori autem oesophagi facie fere statim a cricoide juxta longitudinem fere parallelo ordine disponuntur.*
- nn *Segmentorum cartilagineorum tracheae cornua.*
- PP *Thyroideae glandulae lobi.*
- o *Musculus tubae novus, five circumflexus palati, de quo Tab. VII. lit. II.*
- p *Musculus salpingostaphylinus, quem luculentius fig. II. lit. EE, & Tab. VII. lit. LL repraesentant.*
- QQ *Maxillaris glandula, in quam per saepe pro lacertos cadaveribus conspicuus fibrarum fascis ab sternohyoideo provectus, disjunctis in membranofum tendinem fibris infigitur.*
- R *Inferioris maxillae angulus posterior.*
- S *Musculus pterygoideus internus.*
- T *Musculus masseter, quem fusius exhibet Tab. I. lit. KK.*
- \*\*\* *Tendineis fibrarum fasciculis intextus.*
- U *Parotis glandula, de qua Tab. I. lit. WW.*



## FIGURA II.

Dissecta a summo ad imum pharynge posterior praesertim palatini veli, linguae, ac laryngis pars in conspectum venit.



AAA Pharyngis postica pars secundum longitudinem discissa, & utrinque ad latera revoluta,

\*\*\*\* &c. Frequentissimis glandulis confersa.

aa Musculi pterygopharyngei, &

bb Musculi mylopharyngei, quorum in dextero latere exterior facies, interior in laevo conspicitur.

B Septum ad posteriora cavum narium dividens in bina foramina, quae dicuntur

CC Nares internae.

DD Tubarum postica pars cartilaginea tegente membrana spoliata, in quarum sinistram

c Specillum conjicitur.

EE Musculi salpingostaphylini, de quibus Tab. VII. lit. LL.

F Teres columellae corpus, sive Uvula, in quam bini musculosi azygi luculentissimi lacerti sese demittunt.

AEque Anatomiae studiosis nominum, & rerum, innovandarum cupiditas, quam veterum abolendarum sollicitudo nocet. Aliqui novitatis desiderio incitati antiqua dividunt, iis plura nomina imponunt, alia quae sibi vidisse videntur, inutiliter ut plurimum addunt, sicque studentibus confusionem pariunt. Alii contra dum provinciam nimis coarctare nostram, ac brevitati consulere volunt, quaedam interdum vetera, fideli observationum testimonio confirmata, perinde ac futilia, ex Anatomes studio, non sine maxima tironum confusione, perperam excludunt, evertuntque. Uvulae musculum, azygon Praeceptorum meo Morgagno (a) dictum, a viris in anatome principibus Santorino (b), Winslowo (c),



(a) Adv. Anat. I. n. 8.

(b) Ibid. §. XVI.

(c) Traité de la tête n. 502.

Albino (a), Hallero (b), aliisque pluribus demonstratum, & ab eodem Praeceptore (c) ut inventum, ita postmodum penitus confirmatum, eversum, atque explosum velle videtur ill. Vir, dum ait, *On ne découvre dans la luvette, qui est spongieuse, aucune fibre charnue. Les muscles qu'on lui attribue, se répandent sur la cloison; de sorte que les noms barbares qu'on leur a donné, ne sauroient leur convenir.* Non idcirco illiusmodi Viris, hunc Anatomicum celeberrimum, atque Medicum experientissimum accensendum facile dicam, qui asserat in Praefatione nullam fuisse partem, quam ipsemet in corpore humano haud perscrutari voluerit, & bina cadaverum centena in observationibus conficiendis disseccuisse profiteatur. Quod ni aperte dixisset, haererem vehementer, an antequam sua proferret, non in azygon musculus modo, verum etiam in caeteros pharyngis musculos diligenter inquisierit unquam. Interim ut alias, atque alias azygon luculentissime confirmatum mittam, liceat mihi tantummodo proferre, quae speciatim, dum publicam Anatomen traderem, manifeste observanda obvenerunt. Die 20. Februarii anno 1774. cum de pharynge exercitatio esset, in posteriori palati facie adeo elegans, adeo distinctus hic musculus conspiciendus occurrit, ut qui aderant multi, inque iis praeter exercitatissimos Praefectores publicos Ghidettum, & Zallium, Cortesius Aulæ Medicus spectatissimus, Cravosius Physices, Carminatus Logices, Pagninus Eloquentiae, hujusce Universitatis Professores omnes praestantissimi, atque Varolius alias merito laudatus, aliique Doctores, omnes vix hominem existere posse crederent, qui azygon denegaret. Erat autem ita constitutus, ut tametsi simplicis unius musculi teretem quamdam speciem primo intuitu praeberet, ut alias revera observare datum est, geminus tamen illico appareret, & ab intima ossei palati crepidine ad posticam septi narium radicem, paulo a lateribus, tenui tendine, derivari videretur. Paululum diducta, oppidoque tenuia initia erant: mox quasi gemini cylindruli cingebantur al-

k 2



(a) Historia Musculorum Hominis. Leidae an. 1734. lib. III. Cap. LXII.

(b) Ibid. lib. XVIII. Sect. III. §. XVI.

(c) Adv. Anat. II. animad. XIV., & Epist. Anat. X. n. 20. & alibi.


ba, media dirimente cellulari membrana discreti, pleniores fiebant, ac per posticam palati mollis, seu veli palatini faciem super ejusdem arciformes fibras paralleli, superne communi membrana velati, infra musculosum palatum iterum tenuati descendebant, ac frequentibus glandulis circumsepti, teres illud, ac pendens corpusculum efformabant, quod uvulae nomine prae caeteris appellari usuvenit. Hos quemadmodum descripsimus, geminos Dionisius, Santorinus, Winslowus, ipseque demum ill. Praeceptor, alique plures comperere Anatomici, qui adeo uvulam adibant, ut ne vel minima haesitatio occurreret, an supra palatum molle ejus fibrae expanderentur. Neque insigni suo hic musculus caret officio. *Uvulam, quae vocis plectrum a Priscis nonnullis Anatomicis vocari solet, nonnulli inuilem pene particulam esse arbitrantur. Verum hi haud satis attendisse videntur, uvulam, ut aliorum musculorum, ita potissimum azygi auxilio, pro sonorum diversitate, & contrahi valide, & relaxari facile; quod evidentissime, vel in nobis ipsis experiundo speculi ope intueri, vel in amicis varios fundentibus sonos conspiciere licet. Nec intelligi profecto potest, aërem e laryngis claustris celeriter erumpentem, proximeque objectam uvulam pulsantem, minime flecti, mutarique posse, quin, quod remotior lingua, palatum, dentes, labra praestent, adjunctum adeo, imminensque corpus conferat. Eandem praeterea poculentorum deglutationi fuisse comparatam, ex ipsius, atque epiglottidis positu, & vicinia, caeterarumque circumstarum partium conformatione consequi videtur. Siquidem cum proxime uvula epiglottidi incumbat, ac linguae radicibus, quidquid alii contendunt, fere canalis instar, sub eadem uvula conformatae plane innitatur, depelli poculenta non possunt, quin in uvulam incurrant, ab eaque dirimantur; adeoque ad dexteram, sinistramque dejecta, dorsoque epiglottidis declinato, quod ab iis flecti non facile posse existimo, linguae etiam radicibus, medioque ipsius epiglottidis ligamento maxime concurrentibus, per inclinata ipsius epiglottidis latera deflectent, per quae facile in imum pharyngem delabantur.*

G Musculus pharyngostaphylinus in plures fibrarum lacertos diremptus, quorum

HH Inferior ex origine, incessu, atque termino thyropharyngopalatinus nominandus videtur; quippe qui ex ima posticorum thyroi-




- dis laterum parte surrectus per pharyngis latera procedit, ac in extremam palati mobilis oram curvatus in eodem distribuitur. Huius opera, pro extremorum dispari quandoque firmitate, modo palatinum velum deprimi, modo thyroïdem attolli, atque adeo pharyngem ipsam & provehi, & revelli pro alterutrius partis aut mobilitate, aut renisu existimo. Alter autem, ac potior fibrarum fascis hypero, seu palatopharyngeus Santorini, sic dirimitur, ut
- dd » Tenuior earum fasciculus, per posticam mobilis palati faciem  
» ad uvulae basim, seu ad narium dissepimentum utrinque concur-  
» rens adeo proxime accedit, ut tendineo extremo in illud revera  
» inferatur ».
- ee » Alter autem fascis aliquanto latior in priore penduli palati par-  
» te, videlicet sub eo musculo, qui salpingostaphylinus vocitatur,  
» sic profertur, ut latera tenens recta ad osseam palati oram con-  
» tendere *luculentissime* videatur: qua tenuatis fibris, & in tendi-  
» neam *naturam* mutatis, eum nonnullis etiam transversim musculi  
» tubae proprii dicti tendini immisceri comperimus (a) »; quorum  
fasciculorum officium esse, ut leniter pharyngem explicare, at-  
que praecipue attollere possint, evidentissime cernitur.
- ff Musculus salpingopharyngeus, caeteris modo descriptis fibrarum fasciculis haud immerito accensendus. » eleganti figura donatus,  
» tenui oritur tendineo disjecto *modo, modo acuto principio* oblique  
» ab ima crepidine cartilaginea tubae Eustachianae, inde mox in  
» carneum mutatus, ad decussim cum salpingostaphylyno, cui le-  
» viter jungitur, recta demittitur; ac sub pharyngis membrana per  
» interiora ejusdem latera in ima » prolatus, atque cum pharyngo-  
staphylyno commixtus, implicitusque definit. » Duplici quadante-  
» nus officio fungi hic musculus posse videtur: tum ut intentus ad  
» attollendum pharyngem operam praestet; qua ut adducendo car-  
» tilaginosum tubae latus ad exterius alterum membranosum, eum  
» queat arctare meatum. At vel quo tempore, vel quo beneficio?  
» Nisi forte tubae viam intercipi aliquando opus est; vel tracta,  
» aut laceffita tuba, ut quod lenti humoris intus habet, tum pro



(a) Santorinus *ibid.* §. XIII.

» deglutitionis commodo, tum pro auditus facilitate emittat (a) ». Et hosce musculos, quos tamquam ex propriis Santorinus descripsit adversus Heisterum (b), qui potissimum illos Douglassio tribuit, hisce verbis vindicavit. *Num meae, atque Douglassii descriptiones congruunt? num una utriusque sedes, utriusque origo? num unus denique, idemque mihi, atque Douglassio musculus est? Quos si Anatome, si descriptiones conferantur, dispares, atque adeo duos esse apertissime intelligetur. Quamquam etenim uterque a tuba Eustachii procedere dicatur, non continuo tamen ab eodem tubae loco, atque ex eadem pharyngis facie esse, intelligendi sunt. Nam quem Douglassius (c) proposuit, non modo ex extrema Eustachianae tubae ossea crepidine, atque adeo intima deducit, sed interiore etiam ipsius pharyngis facie locatum ipse comperi; quando noster interior est, ac proxime sub interius velante membrana locatus. Quod autem rei caput est, unde ab illo noster hic dignosci plane poterat, a postica crepidine tubae Eustachianae ad decussim cum salpingostaphylino, ac sub pharyngis membrana per interiora ejusdem latera in una descendens nonne fuerat diserte descriptus? quem certe cum interiore, ac ab extrema ossea Eustachianae tubae parte profecto, qualem Douglassius descripsit, haud convenire quis non videt? quinimmo, nisi plurimum ego fallor, quod antea minus adverteram, mecum is fortasse sentiet hunc ipsum salpingopharyngeum Eustachium etiam quadantenus cognovisse, qui diligenter fibrarum fasciculum Tab. XLII. fig. VI. lit. L sede, forma, positu, atque etiam origine cum modo descripto conferat.*

- II    Lingua conspicuis glandulis ad basim instructa.  
 g g    Tonillae, seu. amygdalae.  
 K    Epiglottis sursum protracta, cujus interior facies, &  
 h h    Lateralia ligamenta conspiciuntur.  
 L    Glottis, quam constituunt quatuor ligamenta,  
 i i    Bina superiora, ac  
 k k    Inferiora totidem,



(a) Santorinus *ibid.* §. IV.

(b) *Ibid.* n. 325. not. (c).

(c) Myolog. Comp. Spec. c. xv.





Fig. II.




Fig. I.



Fig. I.





Fig. II.








- l l     Elliptica ventriculorum laryngis orificia intercipientia .
- m m     Glandulae arytaenoïdeae Morgagni .
- n n     Arytaenoïdaearum capitula .
- M M     Foveae ab thyroïdis cartilaginis interna facie , & arytaenoï-  
daearum lateribus interceptae , ex hoc laryngis positu emergentes .
- o o     Corpuscula glanduliformia .
- N     Extrema anterior pharyngis pars , sursum cum larynge evecta ,  
& in rugas contracta .
- O     Musculus stylopharyngeus . Anne hac figura duplicem hunc mu-  
sculum Santorinus exhibet ?
- P     Musculus styloglossus .
- Q     Musculus stylohyoïdeus .





## TABULA VII.

Repraesentat linguam e sua sede depositam cum velo palatino ex anteriore ejus parte, omnique reliquo palato, ac dentibus, una cum maxilla inferiori paulo citra ipsius angulum ex utroque latere serra dissecta.



- A **L**inguae dorsum.
- a Ipsius linguae apex.
- b Ejusdem media linea.
- c Linguae radix, seu basis, in qua
- d d Papillae, omnium maximae, conicae inversae, in anguli speciem dispositae, in quarum anteriori parte aliae ejusdem generis observantur.
- e Glandula sublingualis, cujus
- f Acies est, qua dumtaxat oscula patent.
- g Summa, ac gibba epiglottidis pars, cui fere imminet
- B Columella, seu Uvula. Duplicem uvulam esse, alteram alteri accumbentem, absque ullo incommodo, ulloque vocis defectu, nunc in acceptissimo, doctissimoque Amico perspicio.
- h h Bini utrinque arcus uvulae adstantes, quibus
- i i Glandulae tonsillae comprehenduntur.
- k Oscula tonsillarum, quae ab lateribus basim linguae spectant.
- C C Maxillae inferioris latera, serra transversim ad postremos genuinos dentes excissa.
- D D Anguli maxillae ejusdem.
- E Musculus styloglossus, qui & biceps merito dici potest: duplici oritur principio, crassiori, majorique infra dimidium styloïdis, ex anteriori parte, carnosio fere omni principio; latiusculo alio, sed tenui, ac tendinoso a postica maxillae acie, paulo supra ejusdem angulum, atque ductis inter hanc, atque styloïdem processum, quasi tendinosus, seu ligamentosus transversis fibris, e quibus



aliquando hic musculus tantummodo enascitur, ut egregie etiam animadvertit Albinus (a) ad latus basis linguae deducitur.

FF Musculi pterygoidei interni, qui interius maxillae angulo inferuntur.


GG Musculi mylopharyngei ab extremis gingivis inferioris maxillae orti. *Utrique pone intimos genuinos, seu sapientiae dentes, ex ipsa videlicet maxilla, ac ab ejusdem acie, unde extremus mylohyoideus procedit, tenues tendinei exoriuntur, eorumque fibrae quandoque non implexae modo, sed extremo, adjunctoque temporalis musculi tendini, vix sine ulla dirimente nota, continuae repertae sunt; mox inde inclinatae oppido latefcunt, ac pone tonsillas inflexae, ac circumflexae oblique in posteriora procedunt, tum paulum provectae supra conspicuos glossopharyngei fascies, una cum pterygopharyngei fibris, in summum pharyngem feruntur, modo iisdem implexae, una procedunt, usque dum medium affecutae pharyngem, sub quadam quasi tendinis specie, in mediam illam posticam lineam desinunt, de qua Tab. VI. fig. I. lit. ff. » Hujusce non modo munus est pharyngem » in priora trahere, & utramque faciem quodammodo adducere, ut » & paululum inferiorem partem, cui adhaeret, attollere; verum » etiam tonsillas glandulas, quas complectitur, comprimere, & de » trudendis cibis expressum inde humorem immittere, quo seu magis solvantur, seu prolabantur facilius (b) ».*

H Pars membranae oris, quae partim lateribus linguae, partim glandulae sublinguali respondet. Hac in membrana

\*\*\* Glandularum vestigia occurrunt, quae in opposita ejus parte luculenter conspiciuntur: praeterea pone hanc, paululum posteriora versus, inter musculum pterygoideum, & mylopharyngeum lingualis nervus ex ramo tertio nervi quinti paris linguam versus descendere observatur.

mm Corniculi processuum pterygoïdum, e quibus praesertim

nn Musculi pterygopharyngei carneotendineis tenuibus fibris exoriuntur, quae paulum demissae, ac caeteris copulatae, & cir-



(a) Hist. Musc. lib. III. Cap. XLV.

(b) Santorinus *ibid.* Cap. VII. §. V.

cumfusae circa latera in posteriora convertuntur, quo productae iterum assurgentes, ut Tab. VI. fig. I. lit. e e, & in verticem compositae, caeterisque fibris implexae, in summam, posticamque pharyngis partem abeunt, ac in adversum latus feruntur. Harum fibrarum officium una cum reliquis est, non modo pharyngem attollere, sed pharyngis summam posteriorem partem nasi foraminibus in priora adductam quam proxime iisdem applicare, ut ex simultanea adversarum partium in posteriora contractione, musculi potissimum salpingostaphylini opera, ita inter se urgeantur, ut validissime aditus omnis illac intercludatur.

II Musculi tubarum novi, sive juxta Albinum circumflexi palati.

*Horum musculorum (a) utrumque extremum pene immobile est; alterum nempe ad tubam, alterum ad palatum. Quod a tuba est, ejusque externo lateri attensum, latum, tenue, carneoque tendineum, oblique devexum, partim ab interno latere illius foraminis, per quod pars plurima nervorum quintae conjugationis e cranii basi emergit, partim a superna omni acie cartilaginosa tubae lateris, quae in anteriorem pterygoïdis processum aliformem continuatur, partimque ab interiori facie internae alae pterygoïdei processus, quam inter, & internum pterygoïdeum musculus in priora latum, in tenuem quidem, non teretem tendinem conversum, per pterygoïdis corniculum quasi per trochleam traducitur. Ibi loci tenues concurrentes fibrae trigonam eidem dant figuram: mox iterum expansae, partim supra velum palatinum utrinque feruntur, mutuo implicandae; partim vero, & uberiores quidem in osseam palati crepidine validissime inseruntur. Quod autem ad horum musculorum actionem pertinet, quemadmodum tubam succuti, contentumque aërem agitari, ac nonnullam etiam muci vim exprimi posse facile credo, ita & mobili palato alterum extremum quammaxime inservire existimo, quod vel leviter depri-mendo, vel maxime tendendo, explicandoque praestari omnibus notum est. Atque huic sententiae accessisse Eustachius ipse (b) videtur, qui non modo per pterygoïdis corniculum non teretem, sed latiusculum tendinem traduci indicavit, verum extremam etiam ipsius par-*

l 2

(a) Santorinus ibid. Cap. II. §. XI. pag. 47.


(b) Tab. XLI. fig. XIII. Θ, & Tab. XLII. fig. IV. VI. D E.



tem mobili palato adjudicavit. Hunc ipsum musculum accuratissimus Douglassius (a) geminum esse, ac in duos propterea partiri posse, atque adeo debere modestissime censuit, quorum alter major a palato ad tubam pertineat; minor alter, quem ab apice osseae partis tubae deducit, in pterygoïdis corniculum longe tenuissimus terminatur. Id sane ipse etiam alias adverteram, sed primo ejusdem potius musculi particula videbatur, quae in illud officulum desineret: verum re accuratius disquisita, praeclare comperi illud ligamentum esse nulla prorsus carnosae natura donatum, quod ab eo ipso osse, unde sphenopalatini, seu circumflexi palati summa origo est, descendit, ac valide pro sua tenuitate in memorati corniculi apicem inseritur. Hoc autem non sine consilio eo perductum facile noverit, qui ex eo complures lacertulos procedere pterygopharyngei scilicet, ac buccinatoris intelliget; ne videlicet inter horum contractionem flecti, aut disrumpi tenue illud officulum sineret.

KK Musculi pharyngostaphylini, seu palatopharyngei ab inferiore pharyngis parte, atque ab imis thyroïdis cartilaginis lateribus, ut primum animadvertit Santorinus (b), exorti, ubi pone tonsillas, aut circa ea loca pervenere, in duplicem ad anteriora utrinque abire musculum, aut saltem se in binos dirimere fasciculos, quorum alter anterior est, posterior alter, luculentissime in idoneis cadaveribus observavimus, & aliis observandum praebuimus. Horum anteriores supra musculos salpingostaphylinos, iisque implexi infra palatum osseum ex uno in aliud latere in arcum flexi convenientes unum ibi, continuatumque musculum constituere videntur.

II Posteriores vero iterum discreti, alii (Tab. VI. fig. II lit. H H, d d, e e, f f, descripti) mollis palati posteriorem arcum efficiunt, alii sub salpingostaphylino excurrentes obliquo incessu, versus osseam palati oram contendunt. Alii denique, & quidem majores pone musculos salpingostaphylinos excurrentes, in osseum palatum, atque in Eustachianae tubae imam cartilagineam crepidinem abeunt. Hi musculi, ut palatum molle deprimunt, ita & pharyngem, ac laryngem, ubi potissimum fasciculi posteriores agant, attollunt.



(a) Myog. Cap. XVII.

(b) Ibid. . Cap. VII. §. XII.



LL Musculi salpingostaphylini, seu salpingopalatini. Quemadmodum hosce musculos alias proposuerat Santorinus (a), & postea Albinus descripserat (b), nunc delineatos, nempe » pene ab ima » ad summam penduli palati partem fusos » exhibet.

Licet ab omnibus fere Anatomicis hujusce musculi origo ab extremo osse petroso, qua id tuba Eustachiana perforatum est, ut habet Albinus, & ante ipsum Valsalvae (c), aliisque placuit, deducatur, quod certe inficiari minime volumus, tamen aliter animadvertente Santorino, repetitis observationibus nobis vidisse visum: nempe is musculus per posticam tubae partem, qua cartilaginea ipsius, ac membranosa latera committuntur, quasi per aciem descendit, & quamquam ab alterutra harum partium oriri videatur, tamen omnis, aut saltem praecipua pars tenui, acuto, tendineoque principio ab aspera ossis sphenoidis parte, ut primum Fallopius (d) animadvertit, qua cartilagineus tubae paries exorditur, mihi procedere visus; tum datis, applicatisque tubae fibris, omnis in palatinum velum distribuitur. In pleniores aliquando, discretosque lacertos dividitur: ex his etiam aliquem in osseam palati oram immittit, quod maxime in lacertosus cadaveribus cerni solet; at longe tamen plurima ipsius pars in memoratam mobilis palati partem funditur, occurrentibus, atque implexis invicem utriusque lateris fibris, quarum imae tametsi in azygon recta descendere videantur; repente tamen in arcum flexae cum sociis alterius lateris continuantur. Huic fortasse Cowperus (e) non inconsulto sphenostaphylini nomen dedisse videtur, quasi a sphenoidis tenui processu, non ab ossis petrosi extremis partibus oriatur. Ejus tamen cum tenuius aequo corpus, tum angustiores aliquanto fibrarum fines designavit, quas in omnem, aut certe in imam usque palatini veli partem prolatare semper vidisse mihi, ut earum videlicet ope, seu contractione, ita mobilis ea palati pars sustollatur, quo quasi remoto aggere cibi facile in pharyngem devolvantur, eademque postico ejusdem pharyngis lateri appli-

(a) Ibid. §. xv.

(b) Ibid. Cap. lx.

(c) De Aure Cap. II. n. xix.

(d) Ibid. Observ. Anat. pag. 238.

(e) Myot. ref. an. 1724. Tab. xxviii. fig. II.

cata, germano valvulae officio fungatur: ne scilicet quidquam sive ab ore, sive a pharynge, sive etiam a larynge susceptum inter devorandum attollatur, ac in postica nasi foramina induci non sine incommodo queat. Horum potissimum muscutorum officium a nupero praeclarissimo viro musculis pharyngostaphylyno, glossostaphylyno, & tubae novo adscriptum observavi; at hi musculi, & potissimum musculus tubae novus palatum molle a naribus abduciendo, ac cum aliis deprimendo, explicandoque, non posticarum narium orificia defendere, sed maximum pharyngis orificium, quod patet in os, occludere, aut saltem valenter contrahere, omnibus horum muscutorum sedem probe noscentibus notum est.

ooo Musculi exiles glossostaphylyni, aut glossopalatini, sive ut Albino ab eorum officio nuncupare placuit, musculi constrictores isthmi faucium, quorum imae fibrae arcum omnino conficiunt:

\*\* Summae vero cum transversis ad decussim ductae, & in fasciculos discretas versus palati ossa protenduntur. *Hosce musculos, quos praestantissimus Valsalva in Anatomen invexit, licet tenues fibrarum fasciculi sint, non tenuem tamen operam linguae, palatoque communem praestant. Ii siquidem cum ab imis oriantur linguae lateribus, fibris in ipsius longitudinem ad apicem fere productis, ac per tenue arciforme vinculum, quo lingua ab intimis, editisque partibus palatino velo copulatur, per ejusdem veli amplitudinem flexis in arcum, discretisque fibris diffundantur; facile intelligitur ab iis una cum sociis non modo mobile palatum deprimi, sed quammaxime in priora trahi, tum ipsius latera intimis linguae lateribus ita admoveri, ut partes eae sese accurate invicem contingentes, nec in fauces quidquam influere, nec inde effluere quidquam patiantur. Atque ex hoc potissimum intelligitur per nares tantummodo inspirare, & exspirare hominem posse, diductis labiis, oris itinere penitus otiante; nec humoris etiam pleno, tametsi resupinato, ore, quidquam ipsius in fauces illabi. Ab hoc etiam aliqua ex parte linguam sustolli, & palati fornici applicari nullus pene dubito; quo per omne palati spatium modo intercludatur, modo arctetur spiritui erumpenti iter. Harum porro fibrarum omnium, quae in mobile palatum funduntur, nullas ad uvulam demitti, nullas in palatum osseum inferi, sed omnes caeteris implexas, earumque ratione*



*curvatas in adversum latus procedere, non modica sedulitate, iteratisque disquisitionibus in peridoneis cadaveribus scrutando plenissime observavi. Praeter illas autem, quas horum muscutorum commemoravimus utilitates, ubi ii levius tenduntur, partes has ita apte admovent, ut tenuis tantum rimula intercedat, quam in acutis vocibus usvenire compertum est; licet enim palatini veli musculos deglutitionis gratia datos fuisse manifestum sit, non levem tamen formandis pariter vocibus operam conferre, haud temere existimo; quam plerosque etiam pharyngis musculos, caeterosque uvulae, ac palatino velo tributos praestare arbitror. Nam ubi quis aut sedulo circumfusas laryngis partes advertat, aut crebros, variosque earundem motus attendat, qui non difficulter per speculum in os inspectando, diversosque sonos fundendo deprehendi possunt, plane intelliget adjunctas has laryngi partes, non devorandis tantummodo cibus, sed cum mutandis, flectendisque sonis, tum formandis, modulandisque pressis, distinctisque vocibus aptissime organa comparata fuisse: quae tamen non Physices tantum, sed Musices gnaris hominibus perspecta magis esse non dubito. Quis enim usque adeo imperitus est, ut a diversa, qua fides compinguntur natura, magnitudine, ac forma, nesciat sonorum, ac vocum genera per multa, canorum videlicet, fuscum, leve, asperum, grave, acutum, flexibile, durum contineri? Quae tamen multo praestabilia in uvula, mobilique palato naturam esse molitam, plane constat; ipsamque amplius praestitisse, quod ne conari quidem ars unquam est causa. Siquidem concavam palati capacitatem, qua potissimum amplificatur sonus adjecta intima musculosa appendice modo contrahit, modo producit, ipsiusque pariter formam apte mutat, aut attollendo, explicandoque, aut comprimendo, vel diducendo: cujus gratia tot diversos, planeque distinctos musculos, hisce partibus natura dicavit, quos nemo, nisi imperite admodum, confundere, aut penitus evertere studeat. Ac ne id quidem tantummodo praestat, sed e glottide praeterea erumpentem aërem, ac ab epiglottide temperatum modo cogit, modo dirimit, modo dispellit; quandoque plurimum, minimum quandoque recipit, atque flectit, ut praeter eas, quae ipsius laryngis partes sunt, haec plurimum conferat. Verumtamen tantum partibus hisce non tribuo, ut inceptae ab larynge voces, plane ab illis perfici putem, cum iisdem absolvendis linguam praeterea,*



*buccas, dentes, atque labia conspirare neminem lateat. Quarum tamen partium mirandum, ac singulare Divini Sapientissimi Conditoris artificium, mutuam, consonamque dispositionem non modo oratione complecti, sed ne mente quidem informare posse vel solertissimum Anatomicum existimo.*


p Illa musculi buccinatoris pars, quae a pterygoïdis corniculo exoritur.

IIKKLLhhll o o o \* \* Palatum mobile, seu velum palatinum.

MMNO Palatum stabile, cujus posteriori parte membranacea deducta,

MM Palati ossa in conspectum veniunt.

Palati stabilis naturam omnem praeter tenuissimas arcte profecto intextas fibras ejusdem membranam componentes ex duplici glandularum genere compingi solertissime animadvertit Santorinus (a). *Harum enim aliae, quae in intimo palato sunt conspicua forma donatae, sub osculorum specie tales nobis dantur conspiciendae, ut majores vix tenuem setam accipiant. Et hae quidem multo majori numero ad palatum mobile, pendulumque locatae videntur. Id autem non modo reliquo palato continuum est, sed intimis ipsius ossibus validissime innectitur, ac internis pterygoïdis processus lateribus firmissime illigatur. Hujus major latitudo tres latos digitos raro superat, minor duos non aequat. Porro interior omnis ipsius natura, unde multifariis motibus cietur, ut ex dictis facile liquet, musculoſa est, quam superne laxior, mollior, ac tenuior membrana integit a nasi antris, & oris cavitate deducta, cui non modica, ut innuimus, glandularum copia substernitur. Aliae praeterea glandulae, quas & nos tum in homine, tum in brutis animantibus, saepissime etiam inermi oculo observavimus, multo equidem, longeque minores sunt, ut singula majorum foraminula vel quintuplo his majora sint. Hae confertissimae sunt, neque cerni nudo oculo queunt; optico autem vitro sic dignoscuntur, ut & globosa earum forma, & pellucida, quasi ex limpido humore constans, natura commode dignoscatur, ut tenuissimis aquae, aut aëris potius aquae velo circumfuso bullulis similimae, appareant. Harum pene infinitus est numerus, & longe,*



(a) Ibid. §. XVI. pag. 136.

lateque in omnem palati regionem ad columellam usque diffunduntur. Gingivarum porro eadem omnino, ac palati natura est; siquidem cum eodem fibrarum genere arctissime colligato, tum ex tenuissimis glandulis numero, perexiguitate, ac natura iisdem compingi, luculentissime cernimus. Hic tamen sic ordinatae sunt, ut gingivarum limbus dentibus proximior ex hisce levissime locatis constet, remotior autem paulo asperior appareat, cum quasi in rugarum, seu papillarum modum, eadem glandulae exstare, atque attolli videantur, e quibus non difficulter scorbutarum ulcerum pertinaciam, odorisque foeditatem derivari intelligitur; humore scilicet inquinato, in hisce potissimum gingivarum glandulis restitante, easque praeterea inficiente, atque erodente.

N Linea, quam primum ill. Praeceptor Morgagnus descripsit (a), quaeque secundum palati longitudinem ferri solet ad uvulam usque, quemadmodum potissimum in foetibus observatur; quippe in iis oblonga, exilis, atque adeo alba, a reliquis muscularibus fibris distincta conspicitur.

O Rugae pone dentes incisores transversae, arcuatae.

q q &c. Dentes molares.

r r Dentes canini.

s s s s Dentes incisores.




m















# TABULA VIII.


## FIGURA I.

Mamma communibus integumentis denudata, cujus areola, papillaque sursum evecta, & excretorii lactiferi ductus, & conglomerata ejusdem glandula in conspectum veniunt.

- A A A **M**ammae glandula conglomerata, cujus superficies haud levis, sed inaequalis est, foveis, cavitatibus, atque prominentiis distincta.
- B B B Mammae basis non in circulum ducta, ut passim perhibetur, sed irregulari figura donata.
- a a a &c. Foveae quaedam, & cavernulae, quae in mammae externa facie hic, & illic passim excavatae occurrunt, quibus pinguedinis glebae continentur.
- b b b &c. Propagines vasorum lactiferorum, quae primum in sinus conveniunt, ut videre est Tab. II. Cuboli fig. II., & Tabula nostra I, e quibus
- c c Excretorii lactiferi ductus emergunt.
- d d d &c. Excretorii alii lactiferi ductus, qui e diversis mammae partibus procedentes ad papillam tendunt.
- e Num aliqua ductuum lactiferorum radix, quae per glandulae superficiem excurrit?
- C C Areola sursum evecta, ut excretorii lactiferi ductus luculentius appareant.
- D Papilla, in cujus apice
- f Foveola est, &
- \*\*\* Ostiola ductuum excretiorum.

## FIGURA II.

Areolam , papillamque peculiariter exhibet .



- A A Cutis , ex anteriori mammae facie ablata , in qua  
 B B Areola observatur . Circa hujusce centrum  
 C Papilla affurgit , cujus  
 a Apex est , & fovea , ubi .  
 b Ostiolum excretorii lactiferi ductus conspicitur .  
 c c Rugae , quae in areola , per saepe observantur , quaeque hic  
 collabenti papillae deberi videntur . Hujusce tabulae explica-  
 tioni , quae cl. Cubolus de mammis animadverterat , ac typis com-  
 mittenda in unum congefferat , quemadmodum in praefatione fusius  
 commemoravimus , ea nunc addere operae pretium duximus .

» Rete illud molle , & spongiosum ex fibrillis albis primigeniis contextum , quod olim membranam adiposam , nunc mutato nomine cellulofam vocant , totum mammae corpus circum circa involvit , & ambit , ita tamen , ut membranam illi propriam , & distinctam non efficiat , quemadmodum a Boëhmero , aliisque scriptum est , & delineatum . Idem enim a cute productum , sibi-que continuatum multa copia intro in mammas insinuat sese , earum-que partes universas , & singulas suis propaginibus investit , alteram ab altera discernit , quin immo eas quotquot sunt tam apte inter se colligat , ut jure dici possit totius mammae stabilitatem , simulque flexibilitatem in rete hoc prorsus esse positam . Ad eundem ferme modum in pomis aureis , citreis , ac punicis membrana exterior , quae statim sub cortice est , poma haec non modo inibi circum circa investit , verum etiam ita suis quasi laminulis per totam eorumdem substantiam interferit sese , ut eorum pulpa tota , quanta est , in plurimos , ordinatosque loculos eleganter dividatur . Cellulae autem hae , quibus id rete constat , humore aqueo , oleoso , & pinguedine replentur ; quae quidem pinguedo , ut in ambitu corporis subter cutem , ita circa mammas sic satis congeritur ; minime vero tanta copia est in lactantibus , ut pro-



portione plurima dici possit, atque ab ipsa princeps volumen mammarum efficiatur. Neque illud probare ullo modo possum, ex ipsamet pinguedine increfcente, potissima sub pubertatis tempora easdem mammas sumere incrementa, aut contra a pinguedinis absorptione praecipuum mammarum in morbis, & in senio fieri decrementum. Haec enim ex alia omnino manant causa, quemadmodum tibi ex infra dicendis manifesto patebit. Nunc de pinguedine mammae inceptum sermonem persequamur. Circa mammas igitur vel grandes modica exterius circumfunditur flava pinguedo, quae quidem non ita se prorsus habet, ut in reliquo subter cutem panniculo, ubi sese contingentes adiposae massulae continuatam quasi membranam constituunt; in extremo etenim mammarum ambitu hic, illic passim dispersae cernuntur, & interruptae pinguedinis glebae, inaequali inter se magnitudine, & crassitie, itaut detracta cute, mammae corpus velut adiposis maculis notatum, tigrinae pellis instar, appareat. Statim autem sub areola, & papilla nihil inest pinguedinis; aut longe minimum, plurimum vero circa marginem totius mammae, quo uno in loco sibi quasi continuari animadverti. Praeterea non extrinsecus solum fusa circa mammas pinguedo est, ea qua diximus ratione, verum etiam intra ipsum mammarum corpus hic illic sine ordine molliter immitti, & inferi plures pinguedinis sacculos clavorum fere, seu potius turundarum instar conspexi, quorum magnitudo dissimilis admodum est, simulque forma, & ductus, ut alii recta, alii transverse, alii flexuose procedant; nonnulli porro ad exiguam altitudinem sese demergant, quidam vero penitus subeuntes ad intimos usque recessus pervadant; quin etiam non pauci spectantur lobuli adiposi longe minimi hic illic per intimam corporis mammae substantiam disseminati, quod sane in nulla alia hujusce generis glandula observatur. Illud porro de pinguedine hac scias velim in mammarum basi nonnisi lobulos aliquot, & quidem minutos invenisse me, reliquum vero totum succingi memorato rete celluloso: quod quidem rete minime ex longis, laxisque filis inibi constat, sed brevibus potius, & firmis; per id namque mammarum basis subjectis musculis adhaerescit; ita autem firmiter adhaerescit, ut ad partem unam ab altera integre

diffuendam diligens quaedam, & suspensa manus requiratur. Quod autem pertinet ad ductus, e circumposita pinguedine ad mammae centrum pertinentes, quos ill., & magni nominis Vir sese manifeste reperisse prodidit, in illud quam diligentissime, omnique artificio a me saepius inquisitum est; idque ex immortalis Praeceptoris monito, qui ut noverunt omnes, ea admittere consuevit nunquam, quae in natura suis ipsemet oculis perspicue non viderit, quique de hisce ductibus jam subdubitabat. Et fane prudentiam suam singularem, & admodum perspicacem in hoc etiam plane cognovi, & admiratus sum; magna quippe cl. illius Viri auctoritas fatis fortasse apud me vel in re hac ponderis habuisset, ut in ejus verbis acquiescerem; verum cum in hujusmodi ductus, de quibus loquimur, inquirerem, ad mammae pinguedinem pertinere omnino nullos clare animadverti ».

» Mammarum basis multo longius, & latius se pandit, quam adhuc usque scriptum est, & delineatum, neque in orbem ducta linea definitur, sed prorsus abnormi, ut fere ad ellipticam accedat. Superius valde sursum protenditur, parte hac ad latus nonnihil inclinata; paulo plus vero patescit ad exteriorem partem, qua ad alas usque pertingit, unde nimirum lactis affluentiam in mammas derivari se ajunt praesentire lactantes; ex eo nempe, ut ego judico, quod indidem praecipue mammarum arteriae ab axillaribus ductae multo plus sanguinis ad mammas, caeteris paribus, quam aliae deferunt, unde pars haec valde extensa mammarum, cum citius humoribus impleatur, lac quoque citius, copiosiusque secernit. Minus quam caeterae producta inferior mammae pars est, simulque interior, quae duae ambitu fere orbiculato circumscribuntur. Praeterea basis haec pectorali musculo maximam partem apposita, & adhaerens, simae illius faciei congruenter aptatur, & quod consequitur, est circa medium superficie tenus leviter excavata. Dico autem maximam partem, propterea quia adnotavi non ita exiguam basis hujus portionem, extra memoratum musculum pectoralem, ad exteriorem partem inferius produci, atque ibi subjectae portioni musculi ferrati antiqui majoris insidere, & adnecti. Jamvero animadvertas velim non omnes lactantium bases mammarum linea ad limbum simplici terminari,



quemadmodum ea se habet, quam paulo ante descripsimus, & in Tab. I. delineatum dedimus. Mamma enim haec ad mulierem pertinebat primiparam, quatuor & viginti annos natam: idcirco in exequendo munere secernendi lactis semel, & ad breve tempus suam operam posuerat, nunquam vero emittendi; a partu enim statim dira febre mulier correpta, post dies aliquot excessit e vita. Idipsum in binis aliis ejusmodi mammis constanter observavi. Ubi vero iterum, iterumque, & saepius praegnantibus fiunt mulieres, & pariunt, fugendasque filiis porrigunt mammas, magis vero si mammosae sint, & multo tempore alienos pueros lactando sibi victum quaeritant, ob ipsum mammarum pondus, ob laxitatem substantiae, quae inducitur a perpetua redundantia sanguinis, & lactis, quin etiam ob lactatum ipsum mammarum limbus inordinatus evadit, & in quasdam quasi angulosas lacinias facessit, idque in hujusmodi mammis nunquam non animadverti ».

» Pinguedinem vero mammis extrinsecus appositam si diligenter detraxeris, earum margo non circumquaque ejusdem crassitudinis est; superius enim, & exterius nonnihil tenuior comperitur; inferius autem, & interius multo crassior; idque magis, vel minus pro ratione ponderis, & magnitudinis mammarum, & pro ratione muliebrium thoracium usus, quibus crescendo se accomodant, prohibeturque, ne valde propendeant, & quod consequitur, ne a gravitate superior, & exterior pars deorsum protracta extenuetur. Quemadmodum autem ab imis radicibus circum circa inaequaliter porrectis ad summum alicujus colliculi verticem per inclinatas quasi planities pervenitur; ita ex toto memorato basis limbo sensim, & pedetentim attollitur mamma, donec in quemdam quasi clivulum pro corporis habitu in aliis majorem, in aliis minorem sese conformet, cujus e summo existit, & prominet papilla; quam tamen papillam non ad medium, sive centrum totius mammae, sed nonnihil inferiorem, & interiorem partem versus positam esse animadverto ».

» Ambitus vero clivuli, sive corporis mammarum minime levis est, & aequabilis, quemadmodum ab Anatomicis scriptum video, & delineatum; remota enim pinguedine exterius apposita plures hic illic appendiculae dependent, ab una parte liberae, & so-



lutae lingularum, seu cristularum instar, forma, & magnitudine variae, substantia vero uniusmodi, ejusdemque naturae. Aliae namque longiores sunt, aliae breviores, nonnullae tenuiores, quaedam crassiores quoquoeversum conversae, itaut aliae suo apice areolam, papillamve respiciant, nonnullae transverse exporrigantur, plures vero secundum longitudinem limbum versus tendant ».

» Ad haec, attendas, velim, foveas quasdam, & cavernulas in mammae externa facie hic illic passim excavatas, alias quidem leviter, alias alte, alias altissime depressas, alias porro transversas, rectas alias, nonnullas flexuosas, ut neque numerus, neque altitudo, neque forma apta quadam descriptione persequi facile possit. Varia enim, & diversa ratione se habent in variis, diversisque mammis, quin immo in mammis ipsis unius mulieris dispari modo effectas esse, & dispositas adnotavi. Foveis hisce, & cavernulis pinguedinis glebae memoratae continentur, quemadmodum & spatio inter appendiculas medio ita ut una cum circumfuso rete celluloso, & superinducta cute eam mammae, quam praeseferunt, levitatem, aequabilitatemque consequantur. Mammarum quidem cutis multo, quam reliqui corporis, tenuior est, & delicatior, hinc venae sub ipsa repentes caeruleo suo colore per ipsam translucent. Atque illud pariter ab hac tenuitate consequitur, ut expansioni mammarum cedens facile, & obsequens, ubi semel vel maxime distenta fuerit, reliquo deinceps tempore vix, aut ne vix quidem restitui in pristinum possit, & flaccidae mammae turpiter propendeant. Si mammarum lactantium corpus memoratum examini subjiciatur, salivalibus glandulis natura propemodum simile, itemque lacrymali, Thymo, Pancreati, prostaat, caeterisque, si quae sunt aliae hujusmodi, vel primo obtutu animadvertitur. Ex innumeris etenim perinde ac indicatae glandulae, glandulosis corpusculis, sive acinis totum constare cernitur; e quibus etsi crassiores alii, alii minutiores apparent, singulos tamen, quotquot sunt, si anatomica quadam diligentia exquiratur, parem quasi magnitudinem habereprehenditur. Qui enim majores prima inspectione videntur, eos, si recte attendas, pluribus inter sese per tenuia fila colligatis acinis fieri manifesto comperias. Adeo vero exigui sunt omnes, & minutuli, ut semi-

num vel milii, vel papaveris acervi similitudinem quamdam, & speciem gerant; forma vero illis est fere subrotunda, five potius ad ellipticam quam proxime accedens. Quamvis autem acini, de quibus loquimur, tantuli sint, quantuli expositum est, singuli tamen inter sese a singulis distincti naturaliter sunt, & prorsus sejugati, in nutricibus praesertim, ut universi non solum assequantur accurate inspiciendo, sed minutiore quadam anatomica diligentia, & patientia singuli quoque, prope dixerim, percenseri possint numerando. Ubi enim mammae occurrunt bene constitutae earum potissimum nutricum, quibus ex lactatu nimio emacruerit corpus, glandulosi acini ita sese in conspectum dant, ut ubivis facile discernantur five intuendo, five contrectando, five etiam adverso lumine conspiciendo ».

» Sicut autem primum, quod in puerperis secernitur lac, coloratum dictum, subflavi coloris est, deinde fit album, tum a diuturno lactatu dilutum magis, & decolor evadit, in aegrotantibus vero nutricibus, ut compertum mihi est, lac diutius restitans intra mammas, flavescit denuo, & spissescit: ita glandulorum horum acinorum color vario contenti lactis colori omnino respondet; si aliquid tamen semper addas subrubri immixtum, quod nunquam non inest modo magis, modo minus, pro ratione perreptantium arteriarum, venarumque, & pro ratione inclusi sanguinis ad lac, quod acinis continetur. Plerumque tamen albescentes sunt, albissimi vero, ubi lacte admodum turgent, quo tempore sunt etiam valde molles, ut valde mirer celeb. Virum eos lividi coloris esse prodidisse ».

» Si vero hujusmodi acinorum quilibet, intentis oculis conspiciatur vel suo ipsorum lacte, vel cera rubra, vel alio quovis humore impletus, commodius autem, si microscopii auxilio id fiat, non ex minutioribus aliis acinulis constare, qui sint uniusmodi, ejusdemque, ac is, qui inspicitur, formae, sed ex pluribus quasi miculis circum circa, radiorum instar, dispositis, aut potius quam minimis oblongis vesiculis singuli effingi, & conformari videntur. Quae quidem vesiculae cavae esse sedulo observanti mihi visum est; idque ex eo etiam verisimile videtur, propterea quia quo magis lacte, aliaque materia distenduntur, eo magis in conspe-



Etum se praebent, tuncque acie inflicta lac effluit; contra eo minus apparent, quo minus humoribus turgent; se penitus autem furripiunt, tamquam ductus lymphaticolactei, ubi fere vacuae sunt, & inanes. Atque exinde fortasse factum est, ut Anatomici aliqui depletos mammarum acinos pro celluloso rete falso accipientes, alios, qui acinos viderint, & tetigerint, tamquam errore captos immeritissimo refellerint. Praeterea non est reticendum, ubi lactantem mammam aqua per dies aliquot macerasset, deinde portionem ejus per lactiferos ductus inflavisset, eam ipsam portionem vidisse me totam in telam fere cellulosam explicatam, & evolutam ita, ut nulla ibi acinorum species amplius cerneretur. Nolim tamen credas totum lactantis mammae corpus ejusdem esse, quam diximus, naturae, & substantiae, eam quippe mammarum partem, quae mediam ipsarum prope sedem obtinet, ac praetensae areolae, papillaeque intus respondet, omnino dissimilem ab reliquo esse, & diversae structurae animadverti. Circumpositae enim mammae partes ex minutis illis albo-subrubris, quae descripsimus, corpusculis omnes conflantur, nihil vero tale circa medium, vel, ut ajunt, in centro prorsus esse conspicitur. Siquidem pars haec quamvis primo aspectu fibroso quodam albo, vel, ut dicitur, nervoso contextu facta videatur, si aliquantisper tamen in aqua maceretur, laxeturque, tum studiose, patienterque intricatus ille fibrarum labyrinthus digitis diffuatur potius, quam cultri acie disseccetur, longe facilius autem, si prius aut flatus, aut humor, aut cera ipsa colore aliquo tincta per excretoria papillae oscula diligenter injiciatur, glandulosam naturam id non habere nullo negotio pernosceretur; quin etiam intimiora quaeque se prodent. Album quippe, & fibrosum illud omne compluribus lactiferis ductibus, multo rete celluloso, inter se colligatis tantummodo coalescere, ad eum quem infra dicturus sum modum, per iteratas observationes manifeste compertum habeo. Sed antequam id aperiā, age, ut ordo meus postulat, de memoratorum ductuum origine, forma, atque uno verbo de iis omnibus, quae ad illos pertinent, diligenter tradamus».

» De singulis acinis singulae proficiscuntur quasi radiculae, quae ubi vix aliquantulum inceserint, altera cum altera inter se con-



veniunt. Hinc ulterius pergentes iterum, iterumque cum aliis proximis ad eundem modum in unum congregiuntur, in pauciores, majoresque sensim, ac pedetentim confluentes, donec innumerabilis ductuum multitudo in plures lactiferos truncos redigatur. Truncorum horum quidam deinde inter sese convenientes alios majores truncos efficiunt, quidam vero absque alia cum aliis coitione procedunt; omnes demum tamquam in series aliquot distribuuntur, quae in suum singulae sinum quasi quemdam ex ordine confluent. Tot autem memoratae ductuum radiculae ex omni parte statim ab sua origine intro se recondunt in mammae corpus, atque ita pergentes, radiorum instar, mammae centrum versus contendunt, quo se in memoratos truncos insertum iri dicebamus. Trunci enim hi mediam potissimum obtinent mammae partem, atque ibi in eas, quas diximus, series divisi, confluent in sinus; quorum nempe sinuum locus, & sedes est ad anteriora mammae, pone areolam, & papillam. Maxima vero lactiferorum ductuum, seu radicularum ratio est ad suos truncos, truncorum autem ad sinus. Quin etiam illud placet adnotare me nullum aliud in toto humano corpore vasorum genus cognoscere, cui tanta sit ab sua ex acinis origine capacitas, & prope dixerim amplitudo, quanta in hisce radiculis existit. Ut quod de glandulosis acinis dictum est, idem etiam de memoratorum ductuum initiis dici possit; omnia nempe ita se habere, ut nudis oculis perspicue conspici possint. Sicut autem illud de ductibus hisce generaliter verum est, ut venarum instar a minoribus pedetentim, & gradatim ad summam amplitudinem perveniant: ita non est reticendum occurrere hic illic eorum aliquot, quin etiam plures, qui per minimos hosce gradus adeo non procedunt, ut eorum alter, aut ambo multo latiores sint, ductu illo, in quem conveniunt. Praeterea non rectis lineis incedunt, sed nonnihil flexuosis, & ad angulos fere curvilineos inter se coeunt. Itavero coeunt, ut in loco spatium quoddam quasi triangulum efficiant. Truncorum autem alii majores sunt, alii minores, prout radicularum plus minus in se recipiunt. Eorum vero series singulae, quas memoravimus, ex quaternis lactiferis truncis ad denos, & duodenos usque componuntur. Quae quidem ratio in sinibus quoque lactiferis, in quos sese inferunt ha-

benda est. Eo enim amplior quivis sinus existit, quo ea, quam in se recipit, truncorum series major est. E sinibus autem, qui ampliores apparent, duas, tresve lineas usque latitudinis habere observavi; caeteros vero minores reperi, & quosdam inter illos, nonnullorum ex truncis capacitatem vix, ac ne vix quidem excedentes. Caeterum sinus hi admodum breves sunt, ut ex latitudine, quam diximus, paucio spatio papillam versus in apicem admodum coni sese coarctent. Ita vero siti sunt, ut quae papillam spectant, suis apicibus, pauca interjecta cellulosa tela, in angustum simul omnes concurrant; ab altero autem latere aliquanto spatio inter se distent, suam singuli mammae partem respicientes, unde truncos excipiunt. Non omnibus porro sinibus obtigit forma haec fere conica, quam modo indicavi; aliquando namque animadversum mihi est, ex his unum, aut alterum binas quasdam hinc, & hinc sustinere caecas appendices cavum, quod comprehendunt, fere duplo amplificantes, quae ibi nempe locabantur, ubi sinus a latitudine se angustatum iri dicebamus ».

» Quae truncorum, & sinuum, eadem caeterorum ductuum fabrica, & compositio est; constant aequae omnia ex membrana simplici, molli, laxissima, tenui, & pellucida ad eundem fere modum, atque lymphatica, & vasa lactea. Anastomoses tamen nullas quacumque adhibita diligentia ne in minimis quidem cernere nunquam potui, neque valvulas, adeo ut lac, vel liquidum quodlibet in illos immissum nullo negotio ultro, citroque meare, & remeare potuerit ».

» Ex his, quae haecenus de lactiferis ductibus exposita sunt, intelligi satis potest, quantum ab re ipsa, & a veritate distent ipforum ductuum Tabulae, & descriptiones a Nuchio, a Verheyenio, a Boëhmero, ab aliisque Anatomicis prolatae. Anastomoses enim admiserunt, & delinearunt, quas vidi nunquam. Sinus, quo trunci conveniunt, omnino praeterierunt, quodque mirum est, ductus hosce per exteriora mammae ad papillam excurrere posuerunt, cum aliter, ut expositum est, quin etiam contraria omnino ratione procedant; ut per id, quod de ductibus hisce Auctores memorati prodiderunt, eorum neque origo, neque forma, neque incessus, neque situs ratio, neque natura ipsa cogno-



scatur. Quod si quis lactiferorum ductuum radículas exterius per ambitum mammae repentes se vidisse contendat, minime ego illi inficias iverim, earum aliquot inibi apparere aliquando, sed admodum raras, & quidem ex iis potissimum, quas diximus, glandulosas appendiculis derivatas statim subter cutem positas, immo cum ipsa, nulla intermedia pinguedine connexis. Sed radiculæ hae sunt valde tenues, & brevi confecto itinere se immixtum eunt in mammae corpus, eodem, ac caeterae, contendentes. In latissima vero mammarum basi crebrae huiusmodi exiguae propagines conspiciuntur, cum sponte suo turgentes lacte, tum praesertim ubi recte peracta injectio est, verum ad eam in primis basis partem, quae prope abest ab ambitu».

» Quod igitur mammae est circa medium, nihil aliud est nisi truncorum, quotquot sunt, & sinuum confluxus, & coagmentatio; ut nunc pro certo, & explorato asserere posse videar, glandularum quantum est, ad exteriorem mammae partem circum circa positum esse; earum vero prorsus nihil, illud, quod vocant centrum, obtinere. Ergo non glandulosi acini, non glandula in centro mammae est, sed soli ductuum trunci, & sinus multa cellulosa tela obvoluti, & inter se colligati: quae quidem cellulosa a distantis lacte truncis, & sinibus nonnihil compressa, & progressu temporis fere indurata tantam Prosectoribus operam, & difficultatem attulit, eam, de qua loquimur, mammae sedem extricandi, & cognoscendi. Atque hinc profecto factum est, ut huiusmodi vasorum, & cellulosae telae congeries pro unica mammae glandula, nescio quo laminoso involucro, undique tecta acciperetur. Quod ut minime de aliis, ita vel maxime de ill. quodam Viro mihi mirum est, quippe qui plurimas lactantes mammas disseccuit, & artificiis, quotquot sunt, Anatomicis usus est, per quae ipsa diligenter instituta structura haec omnis, quam proposui, se mihi patefecit».

» Sed ut eo, unde digressi sumus, revertamur anatomicam ductuum historiam persequentes, scire licet a singulis apicibus singulorum sinuum singulos produci canaliculos, quos excretorios nominare ab officio consuevimus. Producentur autem e sinibus ductus hi non sensim, gradatimque velut apices coni, quemad-




modum perperam in Tabulis Boëhmeri expressum est, sed subito ex pleno vase angusti exoriuntur. Ita vero exorti secundum mediam papillae longitudinem se porrigunt, atque ab indicato loco pertinent ad apicem papillae, quo totidem osculis inhiant. Ita vero jacent alius prope alium, ut pauca interjecta cellulosa in unum omnes quasi fascem colligantur. Sunt autem singuli ceu tot conii praelongi, & exiles sic, ut ab origine memorata sese paulatim extenuent magis atque magis, donec ad extremum subtilissimi terminentur. Inter eos tamen unum, & alterum saepe animadverti a descripta forma declinare; ab ortu scilicet angustum, tum in itinere nonnihil dilatatum, ad finem vero, quemadmodum caeteri, denuo constrictum; alii porro paulo aliis latiores sunt, angustiores alii, prout scilicet major, vel minor est sinus, unde proficiscuntur. Omnibus autem eadem fere obtigit longitudo, quae unius fere digiti latitudini respondet; definiri tamen vix potest, ut quae ab ipsius papillae longitudine pendet. Cum autem varia se habeat ratione variis temporibus papilla, varias idcirco necessario patiuntur vices molles hi ductus intra ipsam conclusi. Ubi enim collapsa manet, collapsi sunt quoque ductus hi, atque in varios, exiguosque flexus, sive rugas conformati. Idque sapientissime factum videtur, ut nempe lac inde caeteroquin effluxurum intra sua receptacula simplici hoc artificio contineretur; neque enim illis inesse valvulam ullam, quae id prohibeat, sive aliud quidquam pluribus observationibus comperi. Ubi vero extensa, & erecta papilla est, extenduntur pariter ductus hi papillae obsequentes, tumque per viam fere patulam, aëris externi resistentia aut repulsa mammarum pressu, aut sucu ablata, lac exprimi nullo negotio potest. Sed ne hoc quidem tempore omnino rectos fieri ex eo mihi dubium est, quod cum per recisas sinuum bases pluries ipsos cera impleverim, horum ductuum apices nonnihil incurvi semper mihi apparuerunt. Quod si quando accidat, ut e mammis lac sponte profluat, id a nimia lactis abundantia intra ductus urgente, vel a papillae, vel excretoriorum ductuum infirmitate, vel ab utroque provenire fit verisimile. Horum autem excretoriorum ductuum numerus unus & idem prorsus est, atque sinuum, quem varium, & incertum esse reperi in variis,

diversisq[ue] mammi[s], quinimmo id etiam binis observationibus animadversum mihi est, vasa haec scilicet excretoria lactis, & respondentes sinus unius mammae in eodem cadavere alio, ac in altera mamma, numero existisse. Natura varietatibus gaudet ».

» Sive igitur de sinibus, sive de excretoriis ductibus loquamur, ut ad summum quatuor & viginti, sic ad minimum quindecim in singulis mammi[s] diligentissime numerando percensui. Quemadmodum autem excretorios ductus tot veluti tenuissimorum conorum speciem gerere paulo ante posuimus, & in unum quasi fasciculum collectos excurrere secundum papillae longitudinem fere mediam, ita illud consequitur, quod revera est, ut omnes simul sumpti a latiori basi in apicem multo angustiores terminentur. Terminantur itaque, ut dicebamus, in summo, ac fere medio papillae apice, quo osculis minutissimis aperiuntur, de quibus agemus infra ».

» Quod autem pertinet ad horum ductuum excretoriorum inter se communionem, quam cl. Nuchius, alique posuerunt, & delinearunt, eam nec vidi unquam, nec vidisse sum visus, etsi, ut ex iis, quae protuli, conjicere tibi fas est, non parum in persequenda haec & operae, & sedulitatis adhibuerim. Siquidem sive lac ipsum quod sinibus continebatur ex his in respondentes ductus pressione impellerem, iterumque e ductibus in sinus, sive liquores, & ceram ipsam per utramque viam intromitterem, semper ad eum modum rem se habere animadverti, ut nempe lac unius sinus, nonnisi in unicum ductum sibi continuatum permearet, per injectiones vero plus uno eorum nunquam repleretur. Praeterea sinus etiam aliquot cultri acie secundum longitudinem dissecando persecutus sum, itemque suos excretorios ductus, atque hac pariter via nullas inter hosce anastomoses haberi mihi plane exploratum fuit. Quod etiam cl. Halleri (a) observationibus respondet; ita enim ait: *nunquam vidi ductum cum ductu ulla anastomosi coire, quales plerique Scriptores habent, neque ductum aliquem per alium repleti; & multo minus circulum reperi, in quem omnes du-*



(a) Elem. Physiol. lib. xxviii. Sed. i. §. v.



*ctus lactiferi conjungerentur, quem circulum venosum esse persuadeor, cum vera circularis vena areolam ambeat.* Ego vero, qui saepe venam hanc diligenter inspexi, quemadmodum eam semper prope areolam sub cute adesse fateor, ita dissimulare non possum me circularem invenisse nunquam. Caeterum utrum haec ipsa vena, de qua loquimur, an quid aliud clar. Nuchio, aliisque, qui eum sequuti sunt, ita imposuerit, ut eam pro circulo communicationis acceperint, & delineaverint non ita facile dixerim. Vena enim haec statim sub areolae cute sita est, excretorii autem ductus multo alius locantur; Nuchius vero, qui primus eorum ductuum communicationem posuit, eam per injectiones se reperisse fassus est. Undecumque tamen exortus error sit, non modo excretorii ductus nulla inter se anastomosi junguntur, verum etiam, ut ex iis, quae adhuc usque protulimus, sponte patet, sinus quivis, & ea, quam in se recipit truncorum *series* una cum suis radiculis, sibi appensis glandulosis acinis, ita a caeteris distinguuntur, ut totum, quantum est, mammae corpus in tot veluti provincias prorsus distinctas, sive conglomeratas glandulas naturaliter dividatur, quot nimirum sinus, vel excretorii ductus existunt. Cera enim diverso pigmento colorata, rubro nempe in unum ex ductibus excretoriis immissa, in alterum viride, & sic porro, rem ita esse evidentissime comperi. Namque peractis hisce alteram conglomeratam glandulam, ab altera incredibili patientia prorsus integram cultri acie separavi, simulque cognovi eas variam inter se magnitudinem habere, alias nempe crassiores, & majores esse, alias tenuiores, & minores, quasdam porro magis, quasdam minus ab areola ad mammae limbum productas, prout scilicet plus, minus limbus ipse distat ab areola. Glandulae autem singulae conglomeratae, de quibus loquimur, abnormem quamdam formam praeseferunt plures hic illic exstantes appendiculas habentes. Qua vero areolam spectant, multo pleniores sunt, ab altera vero parte, ad limbum scilicet, paulatim magis, magisque extenuantur. Interius autem quam plurimi ductus lactiferi, eo quo supra diximus modo sese offerunt sensim inter se confluentes, donec omnes in plures abeant truncos ad mammae centrum contendentes. Exterius autem nulli ductus conspi-



ciuntur, nisi memoratarum appendicularum aliqua aut declinetur, aut ex acinis ita paucis constet, ut sui ductus ex utroque latere compareant. Hoc autem ordine in mamma glandulae memoratae dispositae sunt, ut alia prope aliam circum circa suam sedem habeat, unaquaeque vero cum sibi proximis mutuis appendicularum complexibus, intercedente celluloso rete, conjugatur: atque ita simul omnes molliter aptatae, & adhaerentes unicum mammae corpus efformant ».

» Atque ut ea, quae de structura mammae usque adhuc a nobis exposita sunt, quadantenus colligamus, age comparatione quadam ex re dispari, quae in mentem venit, idipsum exequamur. Si nempe in vinea uvae racemos quindecim, aut plures variae magnitudinis legas ex iis, quibus acini sunt minutiores. Deinde racemorum pediculos in unum omnes fasciculum vincias, sic ut racemi circum circa, ordine quodam, dispositi habeantur; tum pendentes uvae in plano quovis ea ratione collocentur, ut pediculorum fasciculus summam totius cumuli, eamque fere mediam obtineat partem, inaequales autem racemorum extremitates basim ipsam conficiant. Racemos autem sese contingentes ita constituas, ut racemuli unius racemi, a racemulis alterius cujusque sibi proximi mutuis implicationibus excipiantur. Nunc hisce, quae dico, si animo concipias plurimas undique araneorum telas interjectas esse, & circumfusas, quinimmo interstitia pariter quotquot sunt pinguedine ipsa farcita, jam vides speciem quasi quamdam propositae structurae mammarum tibi praesto esse. Glandulosis enim acinis acini uvarum, ductibus lactiferis pediculi, conglomeratis glandulis racemi, appendiculis autem racemuli quodammodo respondent ».

» Praeter memoratas glandulas, five racemos sunt valde attendendi racemuli aliquot alii multo minores, qui statim subter cutem areolae proximam jacent, a caeteris memoratis omnino distincti, & segregati, qui tamen quamvis proportionem perexigui sint, est & inter eos nonnulla magnitudinis differentia; alias vero plures sunt, alias pauciores, varioque in variis mammis ordine collocantur. Ut plurimum vero circum circa inibi dispositi alter ab altero, aliquanto distant intervallo; modo autem uno in

loco singuli, modo bini, modo terni, aut quaterni etiam simul confociati reperiuntur, atque per cellulofam toties memoratam, qui sibi proximi sunt, inter sese, omnes vero cum mammarum corpore conjunguntur. De horum structura satis est tibi dicam eam perinde esse, ac in racemis caeteris, quos supra descripsimus; habent suos acinos, habentque suos ductus ad eundem prorsus modum effictos, ut hic pariter a pluribus radiculis in exiguos truncos conveniant, in sinum deinde quasi quemdam prope cutem confluentes. Exinde vero brevissimus, angustissimisque ductus excretorius derivatur, qui non ad papillam, ut caeteri superiores, sed transacta ibi cute in areola minimo exterius patet foraminulo, idque ad eum profecto usum, quem protinus de areola dicentes explicabimus. Nonnulla enim & in ista mammarum parte existunt, quae sive nuperrimi Anatomici minus animadvertierint, sive ab aliis proposita in dubium revocarint, & tamquam falsa refellerint, quemadmodum nobis sedulo observantibus occurrerunt, ingenue tibi significanda censeo. Areolae substantia talis est, ut ex quodam quasi spongioso corpore facta videatur; adest certe multiplex albarum fibrarum genus varie inter se connexarum, ut raritatibus plurimis, exiguisque contineantur, sic tamen ut a communi totius corporis cellulosa satis distinguantur. Obducitur autem hujusmodi substantia, cute longe tenuissima, illi plane consimili, quae pertinet ad glandem penis: quemadmodum autem dissimili ratione areola pluries die se habet, ut modo collapsa jaceat, & in crebras, minutasque rugas omni parte contracta, modo turgens, & extensa se praebeat, idque a stimulo quovis facto sive lactatus, sive contrectationis, sive praesertim a nimio intra mammas congesto lacte, quod urget, & impellit: ita scire licet ea, de quibus mox dicam, ad areolae cutem pertinentia, turgentibus potissimum lacte mammis, levique adhibito incitamento in mulieribus, esse ab Anatomicis perquirenda. Quod cum aliqui Anatomici minus attenderint, nihil mirum est alia super his, & inter se repugnantia ab aliis esse tradita. Ergo exterius in areola tubercula quaedam apparent pro vario areolae statu modo magis, modo minus prominula, quorum non mediocris inter sese in singulis mammis dissimilitudo est. Non loquor autem



de sebaceis glandulis, quas supervacaneum censeo memorare, ut quae jam postquam ab celeb. Praeceptore Morgagno propositae fuerunt, a nullo, quod sciam, nostrorum temporum Anatomico non agnoscuntur; sunt hae nimirum minutissimorum seminum instar, areolis totis, inspersae, ut earum aliquot in summa etiam singulorum tuberculorum parte, de quibus dicendum est, nunquam non consitae inspiciantur. Hisce igitur missis, quae usum habent jam satis cognitum, sebacea scilicet materia exinde prostante contra aëris, aliarumque externarum rerum injurias delicatam areolam obliniendi, & servandi, ad memorata tubercula devenio, quae ab iis non magnitudine tantum, sed colore etiam, & forma, & usu, & natura ipsa differunt. Tubercula autem haec spectantur hic illic per areolam passim dispersa, aliquanto, ut plurimum, inter se spatio distantia. Interdum enim circum circa areolam prope limbum in coronae speciem disposita se mihi obtulerunt; saepius vero subinde absque ordine disseminata; ad papillae autem basim inferius, si quod tuberculum inerat, inest autem frequenter, illud plerumque ex maximis esse animadverti. Addere etiam licet extra areolae fines, in proxima tamen cute tuberculorum unum, & alterum mihi esse non raro animadvertum. Jamvero colorem eundem ferunt tubercula omnia, ac ipsa areola, nisi forte aliquanto dilutiorem, praesertim in summa eorum, ac media parte. Sicuti autem non omnibus tuberculis eadem obtrigit magnitudo, ut alia aliis paulo majora extent, & in variis mammis dispari quoque forma, & modo habeantur; ita eorum numerus inconstans propemodum, & incertus est, ut alias quina, interdum sena, frequenter octona, raro autem dena, aut plura in singulis areolis percensuerim ».

» Quod autem in iis maxime attendendum est, illud nimirum est, eorum alia singulis, alia binis, quaedam ternis, nonnulla quaternis etiam foraminibus patere, quae quidem foramina sive hiatus ad eos ductus excretorios pertinent, quos ex racemulis novissime descriptis ad areolam contendere dicebamus. Caeterum ductus, & foramina, de quibus loquimur, ea nimirum sunt, quae descripsit, & delineavit celeberrimus Praeceptor, unde lacteum serum, purumque lac ipse omnium primus, deinde Winslowus,



aliique pressu erumpere non in cadaveribus modo, sed in nutricibus ipsis optime valentibus manifesto observarunt. Verumtamen cum id non satis adhuc explore cognitum habeatur, sunt enim ex nuperrimis, qui prorsus negent, in illud omni studio, ac diligentia inquirere aggressi sumus, ut quid in eo veri, falsique sit, si fieri posset, constitueremus. In cadaveribus itaque lactantium, & puerperarum, quae dissecai, animadverti, ex areolae tuberculis fere singulis, digitorum pressione, modo lactis, quod raro, modo feri guttas aliquot nullo negotio exstillasse. Cum autem in re de facto controversa ingenui cujusdam, peritique Viri auctoritatem, & testimonium adhibere operae pretium existimaverim, accersitus ad me venit ill. Simon Stratico in celeb. Patavina Academia Pub. Math. & Nauticae Prof. praestantissimus. Is igitur, cum mihi essent in promptu binae mammae illo mane ex cadavere decerptae, memorata areolae tubercula, quae inibi in coronae modum dispersa cernebantur, suis ipse digitis aliud post aliud comprimens, serum quasi lacteum e singulis erumpens manifestissime conspexit. Post plures autem in cadaveribus habitas observationes, veritatis hujus confirmandae studio, & cupiditate permotus, quotquot potui mulieres puerperas, & lactantes sive pretio, sive gratuito observatum adivi, atque in omnibus, fuerunt autem plus denis (neque enim tam facile videndas praebent mammas) ea propemodum ipsa animadvertere mihi contigit. Ubi scilicet areolae tubercula pressassem horis aliquot a prandio, cum scilicet lac mammis congestum ab infantibus hauriri consuevit, albissimum, purumque lac facile inde profluens, quinimmo profiliens, nunquam non vidi; exhaustis vero mammis lactis loco, vel serum simplex, vel quasi lacteum exprimebatur, & quidem multo minori copia. Cum autem vel haec, quae in nutricibus animadverti oculato teste, & gravi, firma apud omnes, & rata facere vulerim, idibus Octobris rogavi celeb., & exper. Virum Jacobum de Scovolo Publicum in hoc Patavino Gymnasio Medicinae Practicae Professore, ut horis tribus a meridie mecum una esset apud lactantem mulierem Catherinam, quae mihi abluendis pannis inserviebat, quaeque prope aberat a Mocenigorum domo, in qua moror. Cum igitur ad eam venisset, lac in sinistra mamma

e tuberculis septem, digitorum pressu, emanasse, non sine admiratione quadam, ita exploratum habuit, ut cum primum, quo dilucidius intueretur, conspiciillum adhibuerit, hujusmodi adjumento, inquit, minime opus est, nam adeo patet res, ut satis clare oculis videam. Ex tuberculis vero alterius mammae, quam vagienti puero paulo ante sugendam dederat, non nisi feri guttulas aliquot exprimere potuimus. Hisce positis sequitur, ut, unde lac istud sit, tibi aperiamus, quod ubi fecerimus, racemulorum usum, quem paulo ante nos exposituros esse polliciti sumus, simul etiam cognoveris. Racemuli siquidem glandulosi, de quibus sermo est, fontes nimirum sunt, e quibus lac, sive serum istud derivatur. Ex eorum acinis etenim in ductus permeat, ex his autem in finus, ubi colligitur, exinde per excretorios tuberculorum ductus suo tempore proditurum; ad eundem scilicet modum, quo supra de racemis ad papillam spectantibus dictum est ».

» Jam porro copia lactis, quae e tuberculis singulis exprimitur, modo major, modo minor est, prout numerus racemulorum, & magnitudo est ad singula pertinentium. Cum enim in mammis lacte plenis id sedulo animadvertissem, tubercula quaedam binas, aut ternas, nonnulla quaternas, aut ad summum quinas puri lactis plenas guttas emittebant, quod sane lac, sive serum ut saepius exstillare, sic non raro, ut ante diximus, longe proflire vidi. Vidi etiam non semel ex aliquo eorum tuberculorum exire lac fere coagulatum. Exsuctis vero ab infante mammis, raro plus binis, aut ternis guttulis elicere ex tuberculo uno, aut altero dabatur, quae quidem guttulae, ut plurimum feri simplicis erant; a reliquis autem tuberculis aut minimum, aut ne minimum quidem exprimebatur. Quibus constitutis, intelligis, sane immortalis Praeceptoris de ductibus horum tuberculorum excretoriis, & de sero, sive lacte inde profluente observationes, a Winslowo, aliisque repetitas non modo veras esse, verum nostris laboribus mirifice confirmari. Tantum igitur abest serum, sive lac, de quo loquimur, aut nullum, aut naturae alienum esse, quemadmodum contra tantorum Virorum observationes a celeb. illust. Viro nuperrimae assertum est, ut aliorum fluidorum instar, per suas peculiare glandulas secundum naturam secernatur. At enim



fortasse quaeres, cui bono lac istud. Hoc illud est, quod mihi quoque explicatum velim. Si quid occurrit, quod probabili quadam conjectura dici a me posse videatur, id forte est, ut suctionis operi nonnihil opituletur. Animadverti quippe, paulo postquam ad sugendas mammas se applicuerit infans, cum scilicet papilla, & areola suavi quadam agitatione ab ipsius infantis ore incitantur, lac tunc temporis suapte vi, & natura ex areolae tuberculis exstillare. Lac siquidem hausturus infans a natura edoctus molliusculis labris, & ore ita papillam comprehendit, ut inter ipsam, & os vacuum, quod vocant, efficiat. Tunc enim ab circumfuso aëre compressa ubique mamma lac per excretorios ductus jam rectos, & ab aëre minime impeditos in infantis os plenis rivulis effluit. Quo igitur id fiat, infantis extrema labra papillae basi, sive areolae adhaerescant, opus esse videtur, quemadmodum in Boyleana machina vas vitreum per madefactam pellem subjectae tabulae toto margine adhaerescit. Per memoratum itaque lac, inibi e suis fontibus opportune scaturiens, tantum esse a natura, & provisum conjicio, ne suo scilicet interposito, ingressum prementi aëri permittatur, sicque areola, labrisque recens nati aspersis, quam facillime suctus exequatur ».

Quantum ad commune bonum utilitatis per haec de mammis tradita attulerit Cubolus, aequis rerum aestimatoribus judicandum relinquo. Quod autem nobis in mammis potissimum lactantis cujusdam foeminae observandum contigit, id breviter addendum existimamus, non displicituri, ut arbitror, si vetera confirmemus, nova novis observationibus magis magisque illustremus. Ejus igitur lactantis mammae adeo lacte turgidae erant, ut dum eas vix paululum apprehenderem, lac magna copia profiliret. Nondum aetatis tricesimum secundum annum attigerat, neque a partu alterum mensem compleverat, ideoque ejus mammae ad observationes instituendas erant quam aptissimae.

Hae mammae mediocris magnitudinis, atque inter se aequae junctae, optimeque constitutae erant, cum nihil exstaret, quo intima, aut extima illarum forma depravaretur. Areolae sublividae, ut rugis, quae interdum adesse solent, carebant, ita tuber-



## TABULAE VIII.

III

culis sine lege in ejusdem superficie, dispositis & quidem pluribus scatebant. Areola autem non prorsus in medio mammae constituta, sed potius aliquantulum ad interiorē partē inclinata videbatur; quemadmodum & papilla, haud plane ab areolae centro eminebat, cum ejusdem superior pars, inferiore aliquanto major observaretur.

Circumundique mammae basim, cute vix dissecta, pinguedo circumfusa se prodebat, quae ut ibi magna copia exstabat, ita ulteriore accessu areolam versus decrefcebat sensim, ut ibi vix quidquam ejusdem, sub papilla autem prorsus nihil appareret. Haec itaque pinguedo licet super mammae glandulam strata, eam tamquam sua in sede molliter, apteque contineret, ut cum facile extendi, tum difficulter comprimi posset; tamen haud totam prorsus mammae glandulam operiebat, cum nonnullas ex ejusdem laciniiis, inter confertissimas membranae adiposae cellulas transeuntes, ipsi cuti haerere manifeste conspiceretur.

Ut hae laciniae e pinguedine emergere, ita ipsamet pinguedo, turundae ad instar, ipsius glandulae foveolas, caveasque inire observabatur. Foveae magis erant, minusque latae, ac profundae, cum tota superficies glandulae haud levis, & aequalis esset, sed qua tantillum cava, qua leviter prominens adeo occurreret, ut Santorini Tabulae VIII. fig. I. per quam facile responderet. Hae autem mammae glandulae inaequalitates per interjectam pinguedinem adeo tolluntur, ut extrinsecus levigatum, & ex omni parte aequale corpus appareat.

Inaequalitas, quae in mammae glandulae superficie occurrit, in basis etiam ambitu aperte observabatur. Neque enim illam fere circuli peripheriam referebat, quam ex recentioribus nonnulli typis commiserunt; sed irregularis prorsus, & inaequalis erat, quemadmodum cl. Cubolus Tab. I. post Santorinianas a me hic evulgata delineandam egregie curavit. Porro haec tota mammae basis, quae leviter excavata videbatur, majori quidem ex parte musculo pectorali majore, at etiam musculo serrato antico majore per interpositam cellularem, in qua paucae, tenues, depressaeque pinguedinis glebae observabantur, adhaerebat.

Totum glandulae mammae corpus, quod equidem cum glandula prostatica conferre non ausim, quemadmodum pancreas, pa-

rotis, & aliae hujusce generis glandulae, ex acinis constabat, omnibus per cellularem telam simul nexis, colligatisque. Horum figuram, quae primo intuitu irregularis admodum videbatur, si attentius perspicias, ad lenticularem nonnihil accedere facile credas; quos tamen ex vesiculis radiatim dispositis constare, ut Cubolo visum est, haud ita facile dixerim, cum id ex hac mamma nullo modo deprehendere potuerim.

Totam mammae glandulam in lobos, seu provincias Cubolus egregie sejunxit, divisitque, earumque unam bis Tab. II. fig. I. & V. diversa ratione insculptam exhibuit; quam tamen divisionem, ut ipsemet etiam Auctor animadvertit, ne quis putet ita manifestam esse, ut sub oculos, aut sub cultrum periti prosectoris cadere possit, is sciat, velim, tantum injecta per lactiferos ductus versicolore cera percipi posse. Tunc enim distinctae provinciae apparent, quarum magnitudo major, vel minor est, si lactiferorum ductuum per lobos, seu provincias excurrentium major, vel minor numerus fuerit, ut videre est in Tabula nostra prima, ubi ratione vasorum provincia C major quam B observatur.

Ab acinis, ut totam mammae glandulam, ita singulas provincias componentibus ductus lactiferi emergunt, quorum initium nos quoque in hisce mammis adeo manifestum observavimus, ut id cum aliorum excretorii cujuscunque organi canaliculorum initio comparari vix possit. Haec ductuum radices, quas videre est Cuboli Tabula II. figura IV. una cum aliis sensim confluentes molem augent; pergentesque semper mammae centrum versus, pluribus truncis copulantur, qui trunci erga alium majorem in finem sese explicantem, ad eam partem, quae areolae respondet, constitutum, abeuntes, in eundem sese demittunt, ex quo denique ductus excretorius papillam subiturus emergit.

De ductibus autem e mammae adipe proficiscentibus, & in papillam abeuntibus, quemadmodum a Cubolo, ita etiam a nobis observatum est. Quotiescumque enim diligentissime e glandula membranam adiposam penitus deduxerim, ac deinde per ductuum lactiferorum oscula in papilla hiantia mercurium, sive ceram injecerim, nihil unquam, licet ductus omnes pertentaverim,



e mammae glandula profilire intuitus sum, ubi vel maxime profiliebat, si vel levissima glandulae incisio instituebatur. Quibus in observationibus si ductuum lactiferorum continuationem inter membranam adiposam, & mammae glandulam cernere haud nobis contigit; vidimus quidem, & exercitatis etiam alumnis ostendimus nonnullas aliquando horum ductuum radices in mammae glandulae basi, atque superficie excurrere, quae licet membranam adiposam, qua glandula circumfunditur, contingerent, tamen non ex hac, sed ex glandulae acinis proficisci adeo luculenter affecuti sumus, ut vereamur quammaxime, ne quae vascula tamquam ex mammae adipe profecta, & in papillam tendentia proponuntur, ab iis quae ex mammae cellulis, ductibusque lactiferis in conglobatas subaxillares glandulas, sive in lymphaticos axillares plexus, & subclaviam venam tendunt, diversa esse possint.

Quoniam autem lactiferi trunci ab universis provinciis profecti, in unum locum conveniunt, ibique in respondentes sinus abeunt, qui cellulari tela inter se colligantur; ideo ibi certe non ita facile acini deteguntur; qui caeteroquin, infra potissimum sinus, basim versus iisdem haerentes ea plane ratione, qua canales per totum glandulae mammae corpus acinis impliciti reperiuntur, adeo occurrunt, ut anceps haeream, an e mammae centro sint penitus rejiciendi.

Lactiferorum canalium structura ab aliorum vasorum structura longe differt. Ii regulariter conici non sunt, sed alternis sinuosi modo contractiores, latiores modo, ut patet ex Tabula nostra I. juxta figuram mammae, per injectionem versicoloris cerae exploratae, delineata. Hi sinuli irregulares sunt, & per canalium longitudinem, nulla certa, ac constanti lege donati; ideoque si latitudinem quodammodo excipias, nequaquam cum sinibus supra memoratis comparandi sunt: ii enim non modo majores, sed semper ad eundem locum constanter reperiuntur, in eosque tamquam in lacum, aut cisternulam quamdam unius provinciae trunci omnes conveniunt. Hos tamen sinus non semper eadem figura donatos esse, intuenti facile palam fiet, si sinus praesertim Tabulae nostrae I., cum sinu Tabulae II. Cuboli fig. II. comparaverit;



quemadmodum neque excretorii ductus, eadem semper forma occurrunt; cum in hisce ad naturam delineatis mammarum figuris, nulla prorsus inter se ratione conveniant. Cujus tamen diversitatis causa, hic adnotatum volo, me non modo in truncos, & sinus per eorum basim ceram injecisse, quemadmodum Cubolus instituerat, sed per papillam, quod maxime attendendum est; verum etiam me id tantummodo praestitisse, postquam ipsos ea ratione, quam postea dicam, mercurio purissimo injecto pertentaverim, eosque depleverim: quod cum in eorum figuram aliquid forte varietatis inferre potuerit, id minime praetereundum duxi.

Mammae totam glandulam acinis invicem adhaerentibus constare adnotavimus, itaque simul complicatis, ut unius provinciae acini ab alterius acinis secerni aut difficillime, aut nullo modo possint. Per hanc indiscretam adhaesionem inter alterius, & alterius provinciae vasa, si unquam alibi, hic certe anastomosis facilis fit. Hanc prorsus negavit Cubolus, quam postea experimentis meridiana luce clarioribus cel. Mekelius (a) asseruit. Hinc ego omnes industriae nervos intendi, ut assequerer, uter eorum ad veritatem magis accederet.

Per excretorium itaque ductum ad apicem metallici tubi serico vinculo colligatum injecto quam diligentissime, & juxta Mekelii sententiam mercurio purissimo, ejus ductus provinciam mirifice dilatari animadverti: verum quantumcumque mercurium premerem, quem majori copia immittere nitebar, ut ab una in aliam provinciam transitus ejus mihi innotesceret, nunquam aut mercurii quidquam amplius insinuare, aut inter distinctas provincias communicationem ullam detegere licuit. Tum sublato tubo excretorium ductum per diligentem vinculo obstrinxi, inversaque mamma per varios positus, levesque compressiones, exagitationesque investigavi, num eam possem communicationem reperire. Frustrata opera est, conatusque irriti fuerunt omnes, neque per aliud papillae foramen, quam per quod injectus fuerat, unquam mercurius exiit.

---


(a) Joannis Friderici Mekel Nova Experimenta, & Observationes de finibus venarum, ac vaforum lymphaticorum &c. Berolini an. 1772. sect. II. §. IV.

Mekelii nihilo tamen fecius auctoritas apud me tanti est, ut mihi ipsi, sensibusque meis minus fiderem, & Viros exceptione majores testes adhibendos putarem. Flaminius Torrigiani Prim. Prof. Physiol., meusque in Anatomica hujus Universitatis Cathedra Decessor, doctrina, fideque notissimus experimentum a me institutum sedulo exploravit, nullamque & ipse mecum Anastomosim observare potuit. Experimentum subinde adstantibus doctis, probisque Viris, in primis cel. Michaële Cortesio, & cl. Cravosio, quos alias laudavimus, renovavi; at quamquam toties experimenta, quot prope erant excretorii papillae ductus iteraverim, quam clare, distincteque vidit Mekelius communicationem, nobis videre nunquam datum fuit.

Haec, quae modo retulimus, tentamina & mammis thoraci adhaerentibus, & inde ab ipso, una cum subpositis tamen musculis, discissis, avulsisque instituimus, ne in ipsa glandula vel levissima laesio fieret. Frustra omnia tentata sunt: neque inter diversae provinciae ductus lactiferos, neque inter ductus, & venas, detecta a Mekelio (a), nobis patuit communicatio.

Demum quanta fieri diligentia potuit, per papillam omni excusso mercurio, idem per ceram experiri aggressi sumus. In alios itaque excretoriorum ductuum per papillam viridem ceram, caeruleam in alios, in alios rubram &c. injecimus. In iis quidem injectionibus multum temporis, atque operae impendimus, semper tamen aërem verberavimus; neque enim aut inter vasa sanguifera, aut inter duplicis distinctae provinciae canaliculos lactiferos ullam, vel mercurii, vel cerae ope, anastomosim deprehendere potuimus: atque ad id unum haec altera injectio profuit, ut eam, quemadmodum optabatur, adamussim ad naturam Tab. nostra I. delineatam exhibere possemus.

Haec vero experimenta, licet non modo non facilem, satisque patulam, sed nullam cum venis, atque lactiferis ductibus anastomosim ostendant, tamen ex hisce omnimodam inter eas partes a Mekelio propositam communicationem nos inficiari velle nemo ar-



(a) *Ibid. sect. II. §. IV.*

bitretur; tanti enim Mekelium facimus, ut ad ejus observationes evertendas haud satis valere existimemus experimenta, quae non in puerperae, aut parturientis mammis ipso in partu emortuae, ut ipsemet Mekelius instituit, habita sunt, sed tantummodo in mulieris mammis, licet lacte turgidissimis, quae altero post partum mense e vita decessit. Quod discrimen licet apud nonnullos parvi, aut nullius momenti videri possit, tamen apud Auctorem tanti est, ut illud inter praecipuas rationes reposuerit, cur ipsi uni *experimentum successerit, quod aliis natura negaverat* (a).

Fortasse a nobis quaerat quis, quot in hisce mammis excretorii canales in papillam confluerent. Vere, & ingenue dicam, cum variis observationibus nihil constantis deprehenderim, sed saepe varia, quod alii quoque Anatomici animadverterunt, in hoc haud multum me detinui, ut id religiosius adnotarem, cum potissimum ad alia, & quidem majora tunc animum intendere debuerim. Hic tamen raptim dicam, me observasse extremam papillae partem non fuisse in hisce mammis, ut saepe vidimus alias, parvae foveae instar, in quam multi excretorii ductus influunt, excavatam, sed planam, aut potius convexam, papilla fere in conum obtusum desinente.

Denique haud omittendum nos ante omnia animum ad ea tubercula convertisse, quae frequenter in areola observantur, e quibus aliquando, quemadmodum immortalis Praeceptor litteris mandavit, confirmavitque inter alios Cubolus, lac exilire cernitur. Verum licet in hisce areolis, & plura, & satis magna essent tubercula, ut superius retulimus, quantumcumque conatus sim, nihil ex iis aut lactis, aut lactei, aut lymphae exprimere unquam potui. Quod dictum volo, non ut denegandum putem, quod in hisce mammis non viderim; perperam enim unum pluribus in contrarium habitis experimentum opponitur, sed ne quidfileam ex iis, quae alicujus momenti hac in observatione nuperime animadvertenda occurrere.

---

(a) *Ibid.* §. VII.





Fig: I




Fig: II




Fig: I





Fig: II







# TABULA IX.

## FIGURA I.

*Exhibet sinistrum cordis ventriculum, ac arteriae magnae truncum in longitudinem dissectum.*




A A *Arteriae magnae, seu Aortae truncus dissectus, atque explicatus, ejusque magnus*

\* *Flexus, sive curvatura.*

a a *Ostia duarum arteriarum coronariarum, quae arterias non in transversum productas, sed deorsum inclinatas esse significant, ut in eas non e corde assurgens, sed revertens sanguis ingredi videatur. Ita etiam alias Santorinus (a). » Coronariarum arteriarum orificia non » modo sub hisce valvulis nonnunquam conduntur; verum etiam » cum supra earum crepidinem prominent, ita earum arteriarum » positus est, ut vel vix quidquam ex erumpente sanguine pervade- » re eas possit, vel quammaxime aortae diductio aut ejusdem in- » gressum, vel certe progressum impediat ».*

Ad hanc potissimum rem ea peculiariter pertinent, quae, ut alias, ita etiam anno 1773., dum cordis publicam in Theatro Anatomen traderem, observare datum fuit. Dum unum inter alia, quae aderant, hominis corda inciderem, sigmoïdeas valvulas non modo penitus cartilagineas, sed adeo deorsum arteriae basim versus inclinatas, & inflexas offendi, ut coronariarum arteriarum orificia operire nullo modo possent. Harum autem orificia osseis lamellis, annulorum instar, compositis compingi, ac internam arteriae magnae ascendens superficiem iisdem penitus obductam observavi, aliisque publice idem observandum praebui. Et licet hujusmodi observationes passim apud Auctores reperiantur, haud ta-



(a) *Ibid. Cap. VIII. §. VI.*

men ita obviae illorum occurrunt, quibus aut in parte, aut penitus valvulas defuisse adnotare datum fuit. Vir ingenuus, probusque Marcus Aurelius Cavedagni Aulæ Medicus, & Professor in hac Universitate Medicinæ emeritus praeclarissimus, quamdam Virginem, custodis Nosocomii filiam, quae variis conflictata malis die 21. mense Decembre 1747. occubuerat, dissecuit. Inter caetera, quae hoc in cadavere ipse animadvertit, unam ex cordis valvulis semilunaribus, quae a dextris erat, consumptam penitus, alteram huic proximam aliqua ex parte exesam pluribus adstantibus observavit. Hujusce cordis descriptionem, ac delineationem, quam tunc ex naturali partium constitutione sumendam curavit, dono mihi obtulit, in eaque cum non modo descriptas valvulas, sed inter alia coronariarum etiam arteriarum orificia praebeat, ea supra valvularum marginem esse manifesto deprehenditur. Quibus observationibus licet praeter naturam se habentibus, si illas, quas pluries secundum naturam habuimus, in quibus arteriarum coronariarum orificia extra sinus, supra valvularum limbum, aut e limbi regione occurrebant, & quaedam alia addamus, haud ita facile praecl. Santorini sententiam nos esse confirmaturos quisque percipiet.

bbb *Valvulae sigmoïdeae sunt ab arteriae parietibus abductae, & suo pondere depressae, quo magis eorumdem sinuum pars aperiat.*

\*\*\* *Tenuēs carunculae ad vērīcem anguli curvilinei inferioris positaē, quae glandularum naturam aemulantur; ac modo ex his carunculis, saepius ex angulo, cui suboriuntur, quidam quasi villi prodeunt, quos valvulis in limpida innatantibus facilius cernere est. Hae carunculae Arantii corpuscula sunt, quae jam obsoleta primus omnium immortalis Praeceptor restituit (a). Quos autem villos hic Santorinus addit, nos quoque in homine, & in brutis animantibus offendimus, eosque exiles, tenuissimas cellularis telae fimbrias esse, quemadmodum fufius de auriculis, observavimus.*

ccc *Tres sunt trium valvularum sinus, sive recessus, quo valvulae, erumpente e corde sanguine, sese recipere queant, quin earum crassitudo quidpiam ex arteriae amplitudine eripiat.*

---

(a) Adv. Anat. I. n. 19. Tab. III. litt. a a a.



- B *Initium arteriae pulmonaris, cui ex inferiore parte*  
 d *Anguli sigmoïdum valvularum innectuntur.*  
 C *Auriculae cordis sinistrae apex, cristae forma compositae, cujus*  
*in extremis oris quasi breves*

\*\*\*\* *Pili sunt, unde partem humoris in pericardio contenti destillare non temere putamus.*

Dum in hisce pilis perscrutandis, ita ex eorum exilitate a Santorino nuncupatis, diligenter & nos operam impenderemus, eos minutissimos cellulares ferme villos esse, atque ab adipe, qui in auricularum limbo conspicitur, productos apertissime intuiti sumus. Hi pili non modo in adultis hominibus, & in foetibus, sed & in brutis animantibus observantur, e quibus, nisi admodum fallor, haud humor, qui in pericardio secundum naturam perpetuo observatur, secernitur; sed sapientissimus Conditor una cum adipe ita eos constituit, ut auricularum apices obducendo, illinien-  
doque in alternis earum motibus a nimio, ac rudi affricu adversus oppositos parietes munirentur, defenderenturque.

Hic tamen praeterire nullo modo possum, fuisse Santorini sententiam, ut ex hisce auricularum pilis, sive adiposis laciniis, quemadmodum ex omento, aliisque intestinorum appendiculis, aliarumque cavitatum hujuscemodi productionibus, e quibus *extremi villuli propendent non aequae longi, aut conspicui, qui extremas appendicum lacinias ornant*, veluti ex peculiari quodam glandularum genere, lenis, pinguisque humor secerneretur, qui si secundum naturam esset, non modo proximis partibus prospiceret, sed penitioribus etiam, circum undique subeundo, atque trajiciendo, opportune serviret: contra vero si nimis redundaret, Ascitis procrearetur. Quibus constitutis animadvertit ipse, *quod potissimum in thorace cujusdam vetulae ocysissime, vehementissimoque morbo interemptae, multoque adipe obsito, non modo praeclara forma pericardii appendiculae erant, sed ex ipsarum conspicuis, longis, discretisque villulis, seu laciniis, levi pressu, viscidulum humorem quasi in fila amicis, medico, chirurgoque spectantibus ducebat, ut quod probabili tantum conjectura ponere antea visus fuerat, vera quidem, & luculenta observatione tum comprobaverit.* Hinc eruitur facile, qua ratione alteram hujusce Tabulae figuram delineandam cura-

verit Auct̃or; quemadmodum luculentius etiam constiterit de fig. II. Tab. XIII., ac de altera pariter Tab. XIV., nec non de globosis illis particulis, quas Tab. XI. lit. rr indigitabimus, ubi quae ipse reliquit, afferremus. *Haec, inquit, fidenter propono, quod ea me frequens Anatome docuit; nam in hujusmodi morbis partes has, quas eisdem fuisse famulatas arbitror, aut penitus corruptas, aut vitiatas, aut certe consimili humore omnino affluentes comperi; velut ex primis saepissime omentum, ex alteris reliquas lacinias, seu appendices, plurimumque eas, quae in ima pelvi inter coli, & extremi fines locatae sunt; ex quibus magnopere tumentibus, vel levissimo pressu, manare contentum humorem comperiebam: quod non semel, sed saepius nostris commonstrasse recordor non in abdomine tantum, sed etiam in thorace, atque intra pericardium, cujus non adeo infrequens ipsius capacitatis hydrops contingit: ac prae caeteris observasse memini in viro, cui multus in abdomine humor erat, nullus in pectore, supra modum in pericardio, intestinorum lacinias, seu appendices utriusque ordinis, ac potissimum coli duras, tumentesque ex hujusmodi humore fuisse, ad pericardium, & diaphragma, laxas, extenuatasque, cor vero non pinguedine, sed eo humore vesiculis vehementer refertis circumfusum: uti praeclare adverti circa pulmonis arteriam grandem lymphae ductum discurrentem, ut una hac pene observatione complura ex iis, quae adduxi, confirmaverim; quamquam consimiles congerere mihi foret expeditissimum. Aliam tamen, quoniam ita res obtulit, praeterire non est consilium: stulti nimirum hominis 36. annos nati vehementissima inflammatione ocysissime sublatis, in cujus abdominis cavo multus humor erat subtenuis, cruori similis. Alia pleraque intestina, sed maxime caecum, atque colon, horumque appendices atrae itidem erant, totisque oris tumentes, ac rorantes sanguine, atque eae vel levissime pressae similem reliquo affuso humori dabantur, quod maxime in rem nostram facit; immo enim ex eadem observatione non leve huic sententiae pondus accessurum existimo.*

*Si ea porro investigandae veritatis ergo sedulo attendantur, quae saepissime in hydropicorum dissectionibus animadverti consuecunt, quorum non nuperi modo, sed vetustissimi etiam Auctores meminerunt; jecinoris videlicet scirrhum, ut maximam, ita frequentissimam*



*hydropis causam semper habitam fuisse, non adeo, nisi quid me fessellit, ab hac sententia abhorrebunt: nam cum in duro jecinore impeditum influentis sanguinis iter nemo non noverit; noscat idem necesse est eundem etiam sanguinem in extremis portarum radicibus impeditum; unius enim, perpetuique humoris itineris, alteram impeditam, expeditam alteram partem esse repugnat: quamobrem cum lente ab extremis portarum surculis in venae cavae radices traducatur, lente itidem eundem ab arteriarum tenuitatibus ad ipsius etiam portarum radices trajici concipiendum sit. Si itaque sanguis, qui per Celiacam arteriam, seu ejusdem ramum gastro epiploicum nuncupatum, ac per utramque mesentericam procedit, ubi ad harumce arteriarum extrema, quae cum ad ventriculum, & omentum, tum ad intestina, eorumque utriusque ordinis appendices pertinent, aut subsistit, aut tardius fertur, ob impeditum nempe ulterius iter, unde eundem sanguinem per jecur tarde discurrere diximus, illud consequi necesse est, ut propulso a corde, atque arteriis sanguine, tardeque per venas, quae praesertim portarum sunt, procedente, extremarum iis venis respondentium arteriarum latera diducantur; indeque per patefacta minutissima earundem laterum foramina tenuior sanguinis pars, quae aquae similis est, trajecta aut in adiposos folliculos secedat, aut disjecta, si nusquam colligi potest, dissipetur, aut si uberius effluit, roret; quemadmodum in vineta ex cane jugulari vena large lacrymas procedere animadvertitur. Idipsum hydropicorum, seu caeterorum consimili morbi genere laborantium hominum imis partibus, ac praesertim cruribus confirmantibus, quae ubi aut diu propendeant, aut arctiori quopiam vinculo constringantur, quamobrem segnior sanguinis assensus per venas fiat, protinus crura, aut ima quaeque, constrictaque pars ex effuso ab extremis arteriarum tenuitatibus, collectoque humore pro morbi vi, utriculi modo, aut temporis spatio, in album, mollem, digitisque cedentem humorem attollitur, quem humore ex adiposi panniculi exiguis cellulis collecto contineri supra posuimus.*

*Non negaverim tamen ab caeteris etiam reliquorum viscerum partibus, atque involucris rem aliquam hujusce humoris trajici, atque adeo effundi non posse; quamquam etenim, & multo fortasse facilius ejusmodi liquor ab extremis arteriarum tenuitatibus cum in villulos,*



tum in adiposarum laciniarum folliculos, vesiculasve a sanguine secedat, & ab iisdem effluat cum propter earum membranularum summam tenuitatem, tum propter impediti itineris rationem, de quibus proxime differui; nihilo tamen minus cum in hujusmodi morbis sanguis, si non ob impeditum portarum iter, saltem ob multam ipsius crassitudinem expedite procedere nequeat, non alienum est opinari, utique eum lente progredi, ut non difficulter inter itineris moras aliquid ab eodem abscedat, quod in locorum capacitatem per aperta membranularum foramina non devolvatur. Siquis porro praeter haec, quae modo raptim attigimus, hydropicorum nonnullas curationes perpendat, ultro fatebitur, eos nec jecinoris, alteriusve vehementi visceris vitio laborasse, nec lymphaticorum ulceribus, aut lacerationibus fuisse tentatos; nam ejusmodi morborum nullam esse medicinam, quisque facile aut suo, aut aliorum usu edoctus intelligit, unde non modo sedes, aut natura morbi cognoscitur, sed apta etiam curandi ratio, siquis medicinae locus est, eruitur.

**DDDD** Cordis caro, sive musculus in longitudinem a basi ad verticem dissectus, in quo duplex, ac dispar fibrarum ordo, & dispositio se prodit.

**E** Cordis apex, dexteri nempe ventriculi.

**FFF** Frequentes, implicatique sinistri ventriculi lacertuli, qui quamdam inordinati, sed valentissimi retis speciem referunt, qui in fundo ventriculi frequentissimi sunt, quod tenuissima ibi cordis crassitudo, seu natura est.

**G** Facies ipsius interior, sed sublimior, levissima fere cutis, quod ibi plenior cordis natura, tum quod illic erumpenti sanguini impedimenta non erant apponenda.

**ee** Binae valvulae, mitrales dictae, quas inter,

**f** Cavum, seu laxa rima designatur, per quam singulae discernuntur, quaque sanguis ab auricula sinistra in sinistrum cordis hujusce ventriculum depellitur.


**gg &c.** Tendines sunt funiculorum nomine traducti, quorum pars in singularum valvularum oras, pars in extimam faciem firmiter inseruntur.

**HHHH** Columnae, pleniores scilicet carnei lacerti, seu quasi totidem discreti musculi sunt, e quibus memorati modo funiculi excitantur in valvulas abituri.

- h h h Globuli albi glandularum imaginem referentes, qui perraro, nisi in certis circa haec loca male habentibus cadaveribus inveniri solent, in quibus partium omnium magnitudo vehementer aucta est.
- i i Brevissimi, tenuissimi que villuli infra globulos interiori mitralium valvularum faciei inhaerentes, quorum item conspicuus quidem, sed oppido raro conspectus fuit.

FIGURA II.

*Adiposam laciniam refert, quae pericardio extrinsecus utrinque ab lateribus innectitur.*



- a a a *Pars laciniae, quae pericardio adhaeret, reliqua omnis soluta adipem dat, in qua non modo*
- b b b b *Complures globosae, discretae particulae conspiciuntur, verum*
- c c c c c *Acutae plurimae, quae in totius solutae orae ambitu veluti inter caeteras magis conspicuae sunt. Quarum extremis partibus tenues villos innexos, productosque memini non ita raro animadvertisse.*










Fig. I



Fig. II











# TABULA X.

## FIGURA I.

*Exhibet diaphragmatis faciem inferiorem.*



- A A *Major diaphragmatis latitudo, atque adeo forma ejus quadantenus elliptica, cujus natura omnis in ambitu carnosae est,*
- B *In centro tendinosa, cujus figura trigoni speciem retuso vertice repraesentat. Figura hujusce tendinis, atque etiam totius diaphragmatis, quam pluries huic respondentem adnotavimus, inaequalem etiam aliquando ostendimus, licet ab hac Santorini Tabula haud multum recedere videretur; quae diversitas cum satis a praec. Viris Senaco, Albino, Hallero descripta fuerit, plane omittendam consulto duximus.*
- C *Pars prior media diaphragmatis brevior, atque tenuior, quae xyphoïdi cartilagini inseritur, cui a lateribus inanes loci sunt, in quibus perpetua non est caro diaphragmatis, sed cellularis tantum inter peritoneum, & pluram plus minus adipe farta.*
- D *Pars dextera diaphragmatis est, cum suis in sedibus inhaeret.*
- E *Pars ejusdem sinistra.*
- a a a a *Rugae, ex quibus pars dextera magis cava videtur, ideoque sinistra medietate longior ob convexam, tumentemque jecinoris formam.*
- b b b & c. *Breves diaphragmatis processus sunt, quibus in reliqua superiore ejus ora costis inseritur.*
- c *Fibrarum tractus, qui ab uno in aliud latus, nempe a dextero in sinistrum com meat.*
- d d *Fibrae, quae ab imo ad summum protenduntur.*
- e e *Fibrae aliae, quae ab latere dextero in dexterum inferiorem processum flectuntur. Caeterae vero, ne singulae indicentur, quoad tractum, implexumque facile per se apparent.*
- F *Foramen intra tendinem, per quod transit vena cava ascendens, seu inferior.*

- G *Foramen ab decussatis lacertis formatum, per quod gula, seu oesophagus in ventriculum descendit.*
- f *Foramen, seu rimula, per quam*
- \* *Nervus sinister intercostalis in imum ventrem delabatur.*
- g *Rima dextera, per quam*
- \* *Dexter intercostalis deducitur.*
- H *Plexus, seu Ganglion nervi intercostalis.*
- I *Foramen, non autem pons, per quod arteria Aorta e pectoris cavo in inferiora defertur.*
- K *Processus diaphragmatis inferior dexter, cujus pleraeque fibrae a sinistro latere veniunt.*
- L *Processus alter sinister, cujus item fibrae complures cum modo comprehensis ad decussim ductae ab adverso latere procedunt.*
- M *Tendinis forma, & implexus, quem gemini memorati processus efficiunt, quo superioribus lumborum vertebrae valentissime diaphragma illigatur. Hunc fibrarum implexum aliquando ex fibris penitus carneis constantem animadvertimus; quae fibrae ab internis processuum lateribus circa corpus vertebrae primae descendentes, seque ante corporis vertebrae secundae faciem amplexantes, implicantesque primum carnea, deinde deorsum in tendinem fusae illam expansionem efficiunt, quae perfecte foramen pro aortae transitu complet. Hoc tamen foramen haud in omnibus nobis videre datum est, sed alias tantummodo dimidiatum foramen, pontis instar, per quod arteria magna ad inferiora descendit.*
- h *Tendo processus dexteri, sive appendix tendinea sinistra crassior, sed brevior, quam ad extremum vertebrae lumborum tertiae protractam observavimus.*
- i *Tendo processus sinistri dextero tenuior, sed longior, cum interdum usque ad lumborum vertebrae quartae extremitatem percurrat.*
- k *Spatium inane, quod saepissime in hac diaphragmatis ora occurrit ob diversum fibrarum tractum.*
- l *Fibrae tendinae, quae vario tractu alias suppositas colligant, ac amplectuntur.*
- m *Vena, quae cavam inferiorem per diaphragma trajectam adit.*
- n *Ramus vasis ejusdem, qui per substantiam tendineam excurrit.*
- o *Vena pariter, quae cavam inferiorem subit.*



Huic Tabulae haec Santorini (a) quammaxime conveniunt.

» Ellipticam aliquantulum, circulari fere quorundam veterum omif-  
 » fa, diaphragmatis figuram recentiores recte quidem exhibuere,  
 » at si eam paulo oblongiorem, atque exposita est, spectaviffem,  
 » minus a vero alienam credidiffem profecto. Prior autem ejusdem  
 » pars, quae imo fterno alligatur, & multo minus producta, &  
 » aliquanto tenuior, ut cum Anatome congrueret, erat delineanda.  
 » Priores siquidem ejusdem fibrae, quae carnae plane, & conspi-  
 » cuae sunt, exiliores quadantenus in viris, quam in mulieribus ap-  
 » parent, quum in his potissimum praeter respirationem, & com-  
 » munem caeterorum utrique munerum usum, & necessitatem ad id  
 » insuper eae comparatae fuisse videantur, ut validiore nisu, in  
 » partu agere valeant. Ex his igitur fibris, quae priores sunt, me-  
 » diae praesertim caeteris breviores existunt, quippe quae non imo  
 » cartilaginis xyphoidis, sed ejusdem summo diductis velut lacertu-  
 » lis, & quodammodo lunatis inseruntur; hac itaque de causa non  
 » producta, & convexa earumdem conformatio, sed contracta ma-  
 » xime, & cava haberi eo loco debet. Tendineum vero diaphrag-  
 » matis centrum unius perpetuo figurae observare consuevimus, il-  
 » ludque obtusum angulum retuso vertice repraesentans, cujus late-  
 » ra, quae posteriora versus convertuntur, eodem vertice sunt ali-  
 » quanto graciliora. Haec enim vix tres latos digitos aequant, ille  
 » quatuor saepe superat; quae quidem figura, sive latitudo minus  
 » ab aliquibus adverti comperimus, quod tum facillimum est, tum  
 » necessarium . . . . Bina vero majora foramina, per quorum alte-  
 » rum vena cava, alterum oesophagus transmittitur: recte quidem  
 » hoc inter carneas fibras, illud vero intra tendineas collocatur;  
 » quod ad eorum vero positum, figuram, & magnitudinem non  
 » plane cum iis consentio, tum quia cavae foramen, quod in Ve-  
 » rheyenio reprehendendum non est, altius esse debet sic, ut ima  
 » ejus pars vel superior, vel certe aequalis supremae alterius sit,  
 » atque adeo magis ad superiorem oram, quam ad inferiorem dia-  
 » phragmatis accedere. Deinde utriusque sane foraminis figura elli-



(a) *Ibid.* Cap. VIII. §. VII. & seq.

» ptica esse debet, sic vero ut illud cavae transversim positum,  
 » oesophagi autem utrinque magis acutum, atque hac ratione mi-  
 » nus cum elliptica figura congruens, secundum longitudinem lo-  
 » catum sit. Neque autem illius figurae modus, & positus aut scal-  
 » pello, aut diducente manu efficitur, sed si vel nimium pars non  
 » distrahatur, vel ex ea non excidatur quidpiam, ita eas facile  
 » compositas quisque comperiet. Praeterea istud referri debet, tum  
 » duplici corrivanti eo loci ex inferioribus venae cavae ramo, tum  
 » firmiori fibrarum positui, de quibus mox verba fient; longius au-  
 » tem, & acutum utrinque oesophagi foramen decussatis fibrarum  
 » lacertis tribuendum esse evidentissime demonstratur; quod etsi fini-  
 » strum dicatur, utpote in sinisteriore parte situm, nos non ita com-  
 » perimus, quoniam illud fere ad perpendiculum imminet diductis  
 » diaphragmatis cruribus, sub quae aorta descendit».

» . . . . . Digastricum diaphragma musculus dici posse, aut de-  
 » bere lubens Stenonio assentior; in duplicem autem dirimi inferio-  
 » rem, & superiorem cum praelaudato Bartholino, minus mihi pro-  
 » bandum est, cujus si vel muneris, vel connexionis ratio specte-  
 » tur, vel unus dumtaxat, vel minimum triplex musculus illud ha-  
 » bendum est; cujus si vel tendineae, vel carneaefibrae paulo di-  
 » ligentius ad examen revocentur, hac fere ratione, plurimumque  
 » incedere deprehendentur. Quae mediae priores ejusdem sunt, ut  
 » supra retulimus, caeteris multo breviores, ac summe tenues obli-  
 » que decussatis tendinibus, e medii tendinis vertice procedunt . . . .  
 » Priores siquidem carneaefibrae, quum xyphoïdi cartilagini adhae-  
 » reant, quae quidem in bene constitutis proximis costarum cartila-  
 » ginibus interior est, consequi necessario apparet, breviores eas  
 » esse futuras iis, quae ad latera sunt, atque adeo neque conve-  
 » xam, neque rectam, sed cavam earum imaginem futuram. Quae  
 » vero utrinque ad priorum latera carneaefibrae affident, inclinato  
 » maxime ad interiora incessu, ut ad horizontalem positum proxime  
 » accedant, in tendineam mutatae substantiam per summum ejusdem  
 » tendinis verticem arcus more incurvatae, in adversum superum  
 » latus feruntur, quo colligere pronum est, quantum a veritate ab-  
 » normes eae sint, quae eo potissimum in loco sic locantur, ut  
 » quasi radii ab ambitu ducti in diaphragmatis centrum contendunt.




» Hae igitur ab proximarum costarum cartilaginea crepidine ortae  
 » in adversam, proximiolemque perducuntur. His autem exterius  
 » accumbentes in centrum magis inclinatae, non ea tamen ratione,  
 » qua delineari consuefcunt, fed ad imum tantummodo verticis pro-  
 » perant, quarum nonnullae in oppositum, mediumque costarum la-  
 » tus migrant, tendinea tamen interjecta substantia; nonnullae ve-  
 » ro mox infra verticem sub tendinis forma mutatae quidem refle-  
 » ctuntur, ac valido tendineo fasciculo cavae foramini circumducto  
 » in idem, fed inferius paulo latus revertuntur. At quia singularum  
 » incesfum prosequi longum est, quaedam summatim perstringam,  
 » ut mirae hujusce musculi dispositionis ratio quadantenus percipia-  
 » tur. Lacertorum igitur, seu appendicum, quae utrinque dispari  
 » quidem longitudine ab lumborum vertebrae proficiscuntur, fibrae  
 » aliquot, ubi in tendinem abiere, in idem costarum latus carnea  
 » rursus connectuntur, aliae vero recta fere sursum versum, aliae  
 » in oppositum conversae latus, tum carneis, qua tendineis fibris  
 » decussantur, quod duplici potissimum de causa contingere puto,  
 » tum ne tenuis alioqui musculus intentus valide in lacertulos didu-  
 » ceretur, idcirco non decussantur eae fibrae modo; verum etiam  
 » intexuntur, tum ut comprehensae partes per eam decussationem  
 » validius premantur, quod maxime in imo oesophago usuvenit, qui  
 » non ea ratione, ac intercostales nervi ad inferiora perducitur;  
 » fed inter sese divaricantes lacertos in imum delabatur; quod etsi  
 » recte adverterat Bartholinus, praetermisere tamen, qui postmo-  
 » dum hujusce musculi tabulas edidere ».

» . . . . . Non omnis diaphragmatis ambitus, cum transverso  
 » abdominis musculo, neque universa transversi ora cum diaphragma-  
 » te continuatur. Utraque enim tum transversi, tum diaphragmatis  
 » prior pars non xyphoïdi tantum propinqua, fed & lateralis, qua  
 » inseritur, sic ad decussim fertur, ut angulum rectum fere efficiant.  
 » Praeterea si accurate diaphragma non qua inseritur, fed qua sen-  
 » sim adhaerescit, diducatur, dentatae velut transversi crepidines  
 » inter diaphragmatis lacertos subeuntes intra thoracis cavum perdu-  
 » ctæ, insertæque detegentur. Ubi autem priora illius latera ab  
 » sternum, atque adeo xyphoïde discedunt, & notharum costarum  
 » oras tenent, hujus transverso musculo occurfus rectior fit, ut ad



» obtusorem angulum accedat , quo potissimum loci nonnullae trans-  
 » versi fibrae cum nullis diaphragmatis continuantur , quum ex his  
 » vicissim aliquae producantur , aliquae in adjunctas costarum oras  
 » omnino infigantur : atque hoc fere pacto ad extremum usque ,  
 » vertebrae nempe affigitur , qua interjectus tendo velut unionis  
 » medium luculentius conspicitur » .


## FIGURA II. &amp; III.



Quid hisce figuris Santorinus exhibere voluerit , non facile assequi posse fatemur . Num renes succenturiatos ?

## FIGURA IV.

Una cum diaphragmatis appendicibus , & foramine arteriam magnam excipiente vasa lactea , quae chyli cisterna appellantur , perhibet .



A Foramen , fig. I. lit. I , jam descriptum .

a a a a Vasa lactea , quae chyli cisterna appellantur , lacte ; aut aëre forte distenta , ut praeter magnitudinem ex eorum irregulari diametro intimarum valvularum vestigia occurrant . De hisce omnibus , quemadmodum & de ductu thoracico , fusius ex ipso Santorino Tab. XIII. fig. III.

b Quid voluerit Auctor , probabili conjectura non assequor . Caetera autem hac in figura vix adumbrata iis respondent , quae fig. I. lit. K , L , M , h , i adnotata habuimus .







Fig. I




Fig. II




Fig. III




Fig. IV






Fig. I




Fig. II



Fig. III





Fig. IV





## TABULA XI.

Inverso, elevatoque hepate, ut sima ejus facies appareat,  
vesiculam fellis, naturalem ventriculi, & pancreatis  
sedem repraesentat.



A B **H**epatis sima facies, cujus A pars sinistra, B dextera.

C Ligamentum, per quod sinistra hepatis pars ad septum transversum, sive diaphragma alligatur.

\* Clavus, quo ligamentum figitur, ut distentum remaneat.

*Sinistrum hoc ligamentum, non quemadmodum aut tabulae, aut descriptiones exhibere videntur, extremam tantum jecinoris partem diaphragmati necit, sed a sinistriore, extremaque tenuitate exortum, per gibberam ipsius lobi faciem in dexteriora procedens, latum pollicem a postica ora diffitum, in viciniam venae cavae ab hepate emergentis, ad angulum fere rectum cum latiori altero, priorumque ligamento terminatur: quo ne loco dimoveatur, nimiumque ventriculo incumbat hepar, hoc alteroque firmiter diaphragmati suspensum, cavisse natura videtur.*

D Fissura jecoris, per quam in foetu vena umbilicalis excurrit, unde umbilicalis fissurae nomen illi factum est.

a a Venae umbilicalis, aequae ac sinus venae portarum extremitas, qua ambo simul coeunt, secundum longitudinem discissa, ut

b Osculum ellipticum, per quod sanguis e modo memoratis venis ad jecur abit, in conspectum veniat. Cur hic loci Santorinus prope hoc ellipticum ostium ea venarum oscula facile exhibenda plane omiserit, aut ferme plane, cum vix unius vestigium, & quidem incertum occurrat, quae in adultis, ac multo plura in foetibus jecur subire observantur, quaeque diserte in Eustachio (a) commentando, immortalis Praeceptor (b) recensuit; nisi



(a) Tab. x. fig. II lit. C C.

(b) Epist. Anat. I. n. 75.



eo in cadavere, ad quod haec delineatio instituta est, quod raro, defecerint, haud satis rationem assequi posse fatemur.

- E Teres ligamentum ex umbilicali vena.  
 c Fissura minor, eam jecinoris partem distinguens, quae  
 F Lobulus Spigelii nuncupatur. Hunc quemadmodum figura exhibet, ita & Morgagnus (a) solitus fuit invenire, ut a dextris in isthmum plerumque desineret (nonnunquam enim ne vestigium quidem isthmi fuit, ut etiam hic apparet, & nos non raro observavimus)... A sinistris vero invenire consuevit in angulum fere desinentem, qui triangularis pyramidis verticem interdum refert; alias magis compressus est; solet autem ab reliquo hepatis corpore liber, & solutus antrosum versus exstare.  
 d Fissura rimae instar aliquando satis profunda, cujus orae, ubi diducantur, extremi pollicis fere capax est, quales in facie sima haud procul a cysti semel atque iterum conspexit Morgagnus (b), & nos etiam publice Auditoribus nostris non semel ostendimus.  
 e e Excavatio jecinoris, sive locus unde sensim jecur excavatur, ut  
 G Vesicula fellis praelonga, fere ad instar ipsius cervicis in flexus conformata, ac replicata excipiat.  
 ff Ductus cysticus tortuoso incessu donatus.  
 gg Ductus hepatici, qui in  
 h Canalem hepaticum abeuntes, in  
 i Choledocum deinde, sive communem confluunt.

De hisce omnibus ita suis in schedis de more sapienter Santorinus. *De impedita fellae cystis cervice, de qua jamdiu diserte quidem veteres nonnulli, sed sobrie, & quasi jejune, quemadmodum de rebus hisce levioribus fieri consueverat; eos quippe antiquarum magis, quam novarum rerum studia movebant, fusius postea Ruy-schius (c) a Mauritio Reverhostio monitus, ac denique cl. Heisterus (d), qui spartam hanc verbis, atque iconibus illustrare curavit, ea adjicere lubet, per quae qualis ejus partis natura sit, penitus*

---

(a) Ibid. n. 19.

(b) Ibid. n. 35.

(c) Thesaur. Anat. x.

(d) Compend. Anat. not. 18. Tab. III. fig. 9. 9. 9.

aperiatur. Hujus itaque vesiculae cervix, atque meatus modo laxior, & brevior; modo angustior, & longior est; quem ubi praelongum, & valde angustum observavi, minime etiam flexuosum deprehendi; vel si quis flexus erat brevis is, & levissimus; ubi vero laxiorem, breviorumque sum nactus paulo magis tortuosum adverti, ut evidentissime naturae consilium constaret, quo sive cervicis angustia, sive obliquitate illud iter impedire niteretur. Num autem haec valvularum machinatio, quave forma valvulae sint, num in spirae modum, an quemadmodum in jejunio intestino, ut perhiberi videtur? nullae unquam mihi ejusmodi compertae sunt, ne ea quidem ratione, qua in colo sunt: quoniam quae in coli longitudine locantur, & triplices sunt, & dissolvi facile possunt, quod nequaquam cervici contingit. Felleae itaque cervicis structura, & fabricatio alia mihi ex iteratis observationibus non est, quam universae ejusdem longitudinis modo rarior, modo crebrior, modo ex adverso, aliquando etiam spirae pene in modum replicatio, qua tamen nexis inter se, conjugatisque subinde cervicis utrinque parietibus, aliter atque in colo contingit: nam nec figuram mutare ullo modo, nec nexum queunt. Nec simile quicquam inter hanc, & jejunum intestinum intercedit; hujus enim intimae dumtaxat membranae, aut etiam vasculosae tantum; cervicis autem memoratae tunicarum replicatio fit, quae si suspensa manu resolvantur, diductis scilicet parietibus, producitur cervix, atque expeditur; quod nullo fere negotio in laxo, spirituque distento felleae cystis meatu percipitur; in quo primus ejusdem ad vesiculam flexus major pariter, & laxior, quem peculiari sinus nomine, dum adest, semper autem adesse non comperi, denotare aliquibus placuit, reliquorum omnium naturam luculentissime demonstrant. Quin etiam dum haec conscribo non semel, iterumque, sed saepe praelongas vesiculas offendi, quae quemadmodum ipsa cervix, ab imo fundo conformatae, ac replicatae erant; ut una tantum modo cervicis species, seu tortuosum, replicatumque iter potius, quam cystis videretur, ut haec Tabula quadantenus indicat.

Neque hanc cystici meatus replicationem eo est consilio machinata natura, quo in certam alterutram partem pronior bilis itum, reditumque magis impediatur, quod vel ejusmodi conformatio, vel inspirati aëris expeditus, aequè in utramque partem motus maxime



*declarat. Sed ut bilis ab hepate & lente subeat, lenteque inde vel plurimum pressa elabatur, quando hujusce sensim defluentis, non universim profusae necessitas, atque utilitas ulla sit. Neque sane hujusce humoris tanta vis elabitur, atque ad intestina permanet, quanta sive hepatici, sive communis meatus amplitudo est, ut insignis Geometra Alphonsus Borellus opinabatur, qui tantam esse bilis vim colligebat, quam praeter animantis incommodum in orbem ferri necesse esset. Nam si parem humorum copiam, multa viarum laxitas postularet, quantam singulis diebus oporteret urinam profundi? atque adeo multo maximam ab iis, qui e vesicae morbo laborarent, quoniam ipsis longe laxissimi sunt ureteres; attamen vix quicquam urinae depellunt, quae quinimmo, quod parcissime defluit, iisdem longe omnium amplissimi sunt ureteres: quod sane Vir alioquin solertissimus non adverterat. Tria enim in primis circa bilis iter erant animadvertenda: viarum scilicet, seu meatuum, qui ab hepate, & cysti ad intestinum perferuntur, obliquitas: intestini duodeni, caeterarumque partium pondus, & pressus: ac demum extremi emissarii, seu osculi angustia, & artificium. Quod autem ad primum pertinet, ecquis praeter memoratum nuper cystici meatus flexuosum maxime ductum, choledoci, seu communis itineris obliquitatem etiam non percipiat, ubi advertat a dexteriore, superioreque regione in inferiorem, ac sinistriorem ei esse procedendum? iterumque in extremi pancreatici ductus viciniam perductum reflecti, ac contra dexterio rem partem retorqueri? quoniam utrique jecinoris nempe, & pancreatis meatus sinistrum duodeni parietem ad angulum valde acutum pervadunt; qua videlicet duodenum mesaraei principio copulatur. Quo porro in itinere cum duodeno intestino, pancreati, atque adeo caeteris impositis partibus subjiciatur, quin ab incumbente horum pondere non leviter premi potest: cui & hoc praeterea adjici oportet, communem hunc hepatis ductum ante nonnulla, extrema pancreatis parte circumfundi, quam proximum intestinum subeat, quo in loco compactiore materia circumductus, aut aegre laxatur, aut quod verosimilius est, aliquantulum contrahitur. Imo adverti saepe, ac quandoque Alumnis etiam ostendi ab nimio eo durioris extremi pancreatis pressu insanabilem icterum ortum fuisse, quem sine Anatomica disciplina partium, sedem, positumque explicante, Medicina minime no-*




sceret. *Extremi praeterea adeo emissarii osculum non modo corrivantium ductuum hepatis nempe, & pancreatis latitudine majus non est; sed saepe ne aequale quidem singulis, ut propterea non ex cujusdam itineris partis amplitudine, sed ex universalum viarum laxitate, obliquitate pressu, extremique osculi angustia fluentis bilis vis fuisset dimetienda. Quae non idcirco posuimus, ut immortalis Auctoris nomen per haec levia quidem, nec ipsi bono, quandoque dormitanti Homero gravia, deferatur; sed ut quale, quamque impeditum sit bilis iter intelligatur aliquando.*

*Tametsi quaedam praeterea adnotanda censeo, quorum alia perpetua sunt, & ad extremum memorati emissarii osculum pertinent; alia quam saepissime occurrunt, & ad communem bilis meatum spectant. Quamquam ex duorum canalium, hepatici scilicet, & cystici confluxu tertium communem, in quem ii corrivantur, non singulis modo parem, sed ambobus majorem esse cum ex usu, tum ex ratione colligi plurimum consuescat; nihilo tamen minus perpetuam hanc naturae legem non esse ex crebris, iteratisque nostris super jecinoris ductuum amplitudinem observationibus intelligo. Nam cum communis, quem vocant, bilis meatus cystico, & hepatico in hunc confluentibus major ea lege debeat, crebro quidem, plurimumque non modo majorem non comperi, sed quod maxime mirum est, ne uni quidem hepatico parem; quod cum pluries observaverim, rem hanc diligentius persecutus, eos denique ductus aëre inspirato exsiccatos accuratius metitus nostris saepe ostendi, & multo saepius ipse adverti, ut post maximum observationum numerum longe plurimos ex his meatibus offenderim, in integris omnino cadaveribus, qui ab hepatico ductu latitudine evidentissime vincerentur. Hunc ipsum praeterea communem bilis meatum, quo propius ad duodenum accedit eo magis contrahi, ut ad duodeni viciniam praeclariissime infundibuli formam referat (a).*

---

(a) Duo hi canales, hepaticus scilicet, atque cysticus, in unum latiore, communemque choledocum ductum convenire passim praeclaris. Viri tradidere, & nunc quoque tradunt. Nos vesiculas una cum ductibus cystico, hepatico, atque communi aëre distentas, exsiccatasque asservamus, easque singulis annis inter docendum Auditoribus nostris ostendimus, in quibus praeter cervicis, & cystici meatus serpentinum incessum canalem communem non

*At quando cystici meatus, communisque formam, & incessum satis lustravimus; de ejusdem etiam natura quidpiam, quantum licet, disquirere opus est. Membranosum hunc canalem esse referunt Anatomici, ejusdemque pene naturae, atque ipsam cystim, de quorum tamen praecipuo discrimine non vehementer laborant. Ut autem de interioribus ejusdem, cysti nempe, & ductibus, inducto rete consentiunt, ita etiam accuratiores aliud in cysti, aliud in ductibus esse praedicant: in cysti angustioribus formatum areis; laxioribus, ac rarioribus in cervice, & meatibus. At id praeterea animadverto non satis hoc reticuli vocabulum interiorem cystis faciem explicare; siquidem neque ea, neque una semper ejus facies est. Nam ubi vitium aliquod non intercedat ex tenuissimis exstantibus, altisque replicatis membranulis res ea, quae reticulum appellatur, compingi videtur, earumque membranularum non unus semper ordo, & dispositio est: nam eae interdum fere parallelae procedunt, quandoque in areas conformatae, colligataeque disponuntur. At sive hoc, sive alio incedant modo, inter has aliae consitae apparent memoratis paulo humiliores, quae vel paralellas crebro, varioque intersecant, vel inter majores areas minores, minimasque formant, ut ordo uterque cavernulosam potius, quam retiformem cystis faciem exhibeant: quae cum difficillime delineari queat, minus miror, si ex iconibus vix ulla, ac ne vix quidem ad illius speciem accedat. Haec tamen, quae diligenti quidem, sed facili, & obvia Anatome lustrata proposuimus speciem sane, interioremque faciem, minime autem cystidis ipsius naturam aperiunt. Res conficienda est, idoneis vesiculis occurrentibus, quales in Ictericis saepe comperiuntur, aut ingentibus, aut pluribus lapillis distentis. Tunc quod tenue, & membranosum alias videbatur, in conspicuos, discretosque lacertulos convertitur, totumque vesiculae corpus perbelle tenue, cavum, sed conspicuum musculum re-*



modo duobus superioribus ductibus, hepatico scilicet, atque cystico, sed ipsi uno hepatico angustiore esse, ac potissimum extremum versus observare admodum pronum est. Cujus rei si aliqua investigetur ratio, id fortasse duabus potissimum de causis factum fuisse videbitur, nempe ut hepatica bilis ex communis ductus angustis repulsa cysticum ductum ingrederetur, eundem alioquin haud tam facile subitura; deinde ne ex amplo canali, quasi pleno gurgite, bilis hepatico-cystica intestinum duodenum majori, quam par est, copia adiret, sed sensim, atque opportune illaberetur.



praesentat ; non secus ac in urinaria vesica , cum eadem in tenuioribus , integrisque subjectis membranosa potius , quam lacertosa videatur . Fellea ergo cystis , ubi idonea incidant cadavera , non modo inflata , ac adverso lumine perspecta , sed dissecta , ac diligenter contriectata ex diversis , maximeque conspicuis lacertulis , seu funiculis compingitur . Eorum duplex ordo est ; alter longe plurimis , creberrimisque in transversum ductis conspicitur , qui media interjecta spatiosa , instar totidem transversarum areolarum relinquunt , quorum majora , longioraque in distentis grandioribus vesiculis tritici granum facile caperent . Hae quae prope fundum laxiora sunt , quaeque pleniora fraeniculi formant , cervicem propius angustiora , & frequentiora conspiciuntur , a multo tenuioribus lacertulis facta . Alter autem fibrarum ordo , intimusque ex obliquis funiculis est , qui rari oppido , ac inter se ad decussim ducti , transversos identidem colligant . Ductuum item , seu meatuum structura similis est , ac pene ordinata , ex colligatis nempe fasciculis constans . Quae cum saepe , ac diligentius inspicerem , aliam rem hucusque visam fuisse , aliam reapse esse caepi suspicari . Ubi autem complures cystes deinceps contulissem , comperissemque aliam in integris , aliam in vitiosis interiori faciem apparere ; in illis videlicet plurimum exstantem , cavernulosam , crebrisque foraminibus , aliisque intra alia , alteque insculptis distinctam ; contra vero in his quasi ex totidem validis lacertulis intextam , quemadmodum fere in urinariis vesicis animadvertitur : continuo suspicatus sum , num par utriusque natura esset , quando in utrisque , ex eodem vitio laborantibus , eadem plane forma inducitur . Nam uti vesicae urinariae ex incluso calculo contractiores fiunt , ac lacertosissimae , ut valentissimum cavum musculum praeclare referant ; ita cystes etiam ex contentis lapidibus & contrahi plurimum , & ex discretis , sed conspicuis lacertulorum funiculis compositas animadverti , ut non dissimilem ambarum naturam esse , etsi aliam alia tenuiorem pro singularum officii discrimine , non temere fuerim suspicatus . Haec ubi sedulo conquisita , atque collata advertissem , tum cystis , ac jecinoris , atque adeo ex his conflatum communem ductum paulo studiosius contemplatus comperi eam , quam haecenus vidiisse visi sumus , retis speciem , non speciem tantum retis esse , sed revera lacertosum corpus accurate intuentibus exhiberi ; in quo duplex fibrarum



ordo manifestissime in idoneis cadaveribus apparet: alter videlicet, isque intimus ex transversis, seu leniter obliquis fibrarum fasciculis constans, qui potius, quippe humiles, & lati sunt, in zonarum, quam in fasciculorum modum compositi sunt, ne videlicet tot, tantisque exstantibus aut bilis iter nimium impediretur, aut in ipso itinere, inter tot aggerum impedimenta, pars aliqua subsisteret. Alter vero ex rectis, ac validioribus compingitur, quae itidem quasi totidem secundum longitudinem productae habenulae sunt, non modo sulcis utraeque distinctae, sed oblongis, acutisque areolis identidem discretae, quo & natura facile, & ex hac usus etiam, & officium percipi queat, ut transversis videlicet lacerti arctando, recti contrahendo dati sint. Quae tamen si cui paulo acutiora, aut difficiliora, ne aliena dicam, videantur, ut ne ciendo, agitandove ejusmodi humori aut non par cystis compago, aut non apta canalium dispositio censeatur, per me, dissentiat, licet: id unum siquidem affero, quod accurate, iteratoque consulta me Anatome docuit; ac si quidpiam operi consentiens ex ea consequi puto, propterea puto, quod nunquam inane fuisse in perpetuo opere Conditoris consilium sana ratione commoneor. Id adeo nihilominus, ne inconsulto ea dixisse videar, adjicere lubet, me scilicet in iis, quos ex praecordiorum labore, ac suffocatione subito, aut brevissime mors occupavit, cystim inanem constanter reperisse; quam non adeo spiritus difficultatem, quam vehementem singularum partium concussionem, nervorumque distensionem exhaustisse autumo.

H Venae portarum finus, cujus

\* Inflexio venae splenicæ incessum e liene, & pancreate prodeuntis, eundemque finum subeuntis exhibet.

k k Conglobatae glandulae, quas non raro observavimus, quaeque portarum lateribus adjacent, quarum dexterio hepatico ductui adeo incumbit, ut earum vitium non sine maximae noxae discrimine incidat.

II Ventriculus, fere ut in abdomine se habet, ita constitutus, ut non modo dextero ejus ostio sinistrum aliquanto superius situm exhibeat, sed

K Laevam etiam ejusdem globosam partem reliquo omni ventriculo, eodemque sinistro ostio sublimiorem esse ostendat.

L Locus, cui interius ostium respondet, quod Cardias dicitur, per quod alimenta ab oesophago in ventriculum descendunt.

M OEsophagus, sive stomachus, circa quem

II Fibrae carneaе observantur, quae Santorini (a) descriptioni plane convenire videntur, cum eae » ad spirae incessum circumfusae in oesophagi inferiora sensim, paulatimque demittantur ». Quam sententiam, ut novis observationibus iterum confirmaret, haec addidit. *Imas oesophagi fibras sic evidenter procedere comperi, ut mutuo inter se inclinatae, eam omnino formam referrent, quam multo magis spirae, quam orbi congruere quisque intelliget, quae ut, quales prorsus essent, in ventriculi Tabula pluries instaurata accurate describerentur, satis fuit solerti pictori eas ostendisse. Ubi autem haec exaraveram, ac de pharyngis fibrarum tractu sedulo disquirerem, idipsum infra summam oesophagi partem adverti, in quem secundum longitudinem incisum, interiori, exteriorique membrana spoliatum, perspicendo luculenter comperi, non modo fibras aliquas subire, alias emergere, sed ita inter se inclinari; ut facile arctissime spirae formam ostenderent.* Quas in fibras cum saepe data opera inquisierim, minime tunc de brutorum oesophagis sollicitus, quorum Anatome non paucos egregie decepit, eosque facile perpulit, ut non sine hujusce disciplinae detrimento ibidem comperta in nostram Anatomen inveherent, cum in iis, inter caetera, fibrae oesophagi spirae profecto in modum, atque inter sese ad decussim ductae, evidentissime dispiciantur, sed in humanis dumtaxat oesophagis vestigans, eas usque adhuc mihi observare adeo contigit, ut neque Santorini sententiam novis observationibus locupletare, neque a praeclarissimis Viris Verheyenio, Morgagno, Winslowo, Hallero, aliisque recedere possim: verum & quamquam possem, & luculenta, & perspicua sint, quae Santorinus habet de fibris oesophagi in spiram actis, tamen haereo, vereorque quammaxime ne hujusce figurae fibris prorsus conveniant: nam licet in spirae modum inflexae sint, tamen haud oesophago continuatae, sed adeo ipsi circumfusae videntur, ut

(a) Ibid. Cap. VII. §. XVIII.

Santorinum, hac figura, potius oesophagum, e diaphragmate prodeuntem, ejusdemque fibris interceptum exhibere voluisse, quam ipsas oesophagi fibras, opinari non extra rationem possit.

N Pars ventriculi dextera, ascendens, reliquo ventriculo strictior, cujus interius ostium, quod pylorum nuncupant, ex ventriculo in

O Intestinum duodenum ducit; quo discisso, atque explicato

mm Rugae ejusdem, sive valvulae conniventes observantur.

n Osculum commune ductui choledoco, & pancreatico.

o Osculum superioris ductus pancreatici.

PP Pancreas sua in sede constitutum, atque ita sectum, ut & plures

ppp &c. Ramusculi in ductum pancreaticum abeuntes, & ipse

qqq Ductus pancreaticus in conspectum veniant. Haec tamen omnia in Tabulis insequentibus luculentius exhibentur.

Q Lien.


R Intestini jejuni pars suprema resecta.

S Mesenterii portio.


rr Globosae parvi ventriculi omenti conspicuae particulae.




















## TABULA XII.

*Intestini duodeni, in qua praecipue significantur jecinoris,  
cystis fellae, ac pancreatis ductuum exitus, locus,  
forma, & numerus, ac rugarum principium,  
ac dispositio.*

A *P*ars ima ventriculi ab reliquo excisa, & in longitudinem una cum pyloro, ac duodeno dissecta, & explicata; in qua

\*\*\* &c. Glandulae luculenter conspiciuntur. Hasce glandulas licet Santorinus (a) tradiderit in ventriculo humano haud conspicuas fuisse, » cum vix quidquam tum ipsi occurreret, quo de iis praefertim alicui dubitanti fieret satis »; aliter tamen postea ipsi de iisdem constituisse, quemadmodum & nobis nuperrime in mulieris cadavere fere repentina morte confectae, cum ex hac Tabula, tum etiam ex suis ibidem adnotatis aperte colligitur. Eas, inquit, sic interdum vidisse memini, ut non solum figuram inordinatam animadvertere, & disparem magnitudinem, & compressam potuerim, verum etiam earum ostiola comperire datum sit luculentissime; idque in homine ejusdem visceris morbo consumpto, cum saepe usuvenire soleat in hujusmodi subjectis res alioquin exiguas multo magis aspectabiles apparere. Et alibi: harum glandularum sedem cum in idoneis cadaveribus, ex subita praefertim morte delectis, cum inermi, tum armato oculo perquirerem, licet in omni ventriculi capacitate, faciliorem tamen earum conspectum in pylori antro esse observavi; quae glandulae etsi aliquando ad jugum etiam valde conspicuae sint, saepe tamen ad superius ostium prominulae, & asperae videntur, ut admoto digito quadantenus discerni queant. Ad pylori vero antrum, quam alibi, frequentiores sunt, ac minores etiam, si oculo credas; in reliquo vicissim ventriculo forma inordinatae, mi-

(a) Ibid. Cap. IX. §. VI.

nusque exstantes apparent. Si tendatur tamen ea, qua conduntur, tunica, ac leniter explicetur, forma, ac magnitudo fit reliquis similis, quippe rugosa membrana, unde majores videbantur, explicata, aequales magnitudine, sed rariores repraesentat. In his igitur, quas vel subito, vel brevissime mortuorum cadavera subjiciunt, in quibus prae caeteris glandulae ipsae luculentius cernuntur, medium, ac manifestum foraminulum in pylori praesertim vicinia apertissime in pluribus spectavi, & ostendi; in reliquis autem non ita facile, neque ita clare conspicere datum est.

**B B** Pars eminens inter ventriculum, & duodenum sita, quae osculum inferius ventriculi efficit, pylori valvula dicta, caeteris cum supra, tum infra positis partibus plenior, atque firmior, sed ipsis tamen angustior.

**a a a a** Rugae sunt infra pylorum, quae quanto amplius pyloro duodenum sit, significant.

**C** Reliqua infra posita pars duodeni fere levis omnis, nulla ruga, seu connivente valvula exasperata, nisi infra exitum humorum, qui a pancreate, & jecinore illuc intro confluunt. » Summam hujus partem, ita habet Santorinus (a), quae frequentissimis clarissimi Bruneri glandulis stipata est, nullis, seu rugis, seu conniventibus » valvulis, quas ita ratione officii fortasse Kerkringio nominare placuit, ornatam esse palam est, ne potissimum profluentium ascensus fieret difficilior, quum mox infra id loci maxime exstantes, » & confertissimae reperiantur. Eo tamen loco subtilius eam partem » scrutanti quaedam mihi oblata sunt, ab reliqua intestinorum cavitate longe diversa, quae nec villosam, nec rugosam superficiem » praeseferunt. Id igitur elegantissimum rete fuit, cujus inaequales » omnino, & dissimiles areae erant, quod non ex lacertulis oblique ductis, sed ex membranulis, eisque exstantibus compingi videbatur. Hae sigmoïdum valvularum in modum, dispari quidem » magnitudine, quum hae armato tantummodo oculo probe dignoscantur, compositae erant; quarum intra cavitates ad superiora » converfas creberrima conspiciebantur foraminula, quibus subjectum



(a) Ibid. §. VIII.



- » glandularum corpus obducebatur. Cuinam mira haec dispositio mu-  
 » neri inserviat, five ut confectis in ventriculo cibis primo e pyloro  
 » ascendentibus quid immiscendum asservetur, five ne nimium prae-  
 » ter alimenti deducendi commodum parietes intestini quadantenus  
 » arefcerent, inde derivato humore protinus delabente, five potio-  
 » ri alteri, abditaque utilitati, constituere non ausim ».
- D Pars ductus hepatici discissa, & explicata, in qua est  
 b Osculum unius ex furculis, qui a jecinore in hunc ductum corrivantur.  
 E Vesicae felleae pars est extrema cervici proxima, maxime flexuo-  
 sa, quae post flexum longe maximum in  
 c c Tenuem ductum crebris, sed brevibus anfractibus geminatum pro-  
 ducitur. Ductus hic  
 d Angusto ostio in porum hepaticum terminatur; atque tum porus is  
 F Ductus choledocus, seu communis, ex cystico videlicet, & hepa-  
 tico conflatus dicitur, cujus confluxus simul ut plurimum cum ductu  
 pancreatico uno, communique osculo in duodenum est.  
 G G Pancreas, quoad per Tabulae angustiam licuit, exhibitum, cujus  
 accuratior structura, forma, & sedes in sequenti Tabula demonstratur.  
 e e Ductus pancreaticus,  
 \*\*\* &c. Ejusque rami.  
 f Caruncula forma fere conica, in cujus extremo vertice tenue oscu-  
 lum superioris ductus pancreatici aperitur, per quod alias setam,  
 stylum alias non difficulter immisimus.  
 H Major caruncula, in cujus medio  
 g Conspicuum oblongum osculum est, quod singularis exitus est du-  
 ctus communis a jecinore, & cysti fellea venientis, ac majoris du-  
 ctus etiam pancreatici. Haec autem caruncula latum pollicem fere  
 longa in sinistiore duodeni parte sita, secundum longitudinem loca-  
 ta, levissime in arcum flexa, levem duodeni curvaturam sequens,  
 plurima sui parte prominens, media inter intestini membranas proce-  
 dens, tereti protuberantia, calamo scriptorio fere aequali, suis in  
 sedibus speciem quamdam cylindri leniter curvati refert: cujus imae  
 quasi ex obliquo incisae, tenuataeque parti  
 I Eminens fraenulum continuatur, lati pollicis fere longitudinis,  
 quod sensim tenuatur, intimaeque intestini tunicae aequatur. Sum-  
 ma autem hujus carunculae pars

K *Ruga, seu valvula tegitur, quae nunquam mihi adeo descendisse visa est, ut osculum illius penitus occluderetur. Haec porro ruga aut prima est, aut certe ex primis, quae in duodeno infra pylorum occurrunt. De hac valvula ita ill. Praeceptor Morgagnus (a): osculo, hujusce scilicet majoris carunculae, ac toti cylindri protuberantiae, cum alias, tum nuper in sex continenter sectis cadaveribus superinductam valvulam, eamque longe conspicuam vidi, ut mirer, qui hanc omittant, & magis, qui hanc negent inveniri: mirareturque magis, si adhuc viveret (atque utinam viveret), cum nuperimi, & quidem omni laude dignissimi Viri non modo omittant, verum etiam hanc valvulam prorsus negent: non aliis certe rationibus suffulti, nisi quod ipsi in hanc incurrerint nunquam. Nos vero adversantes nullis, nullisque pro studio partium annuentes ingenue fatemur, quotiescumque, ut in caeteris, ita & in hac potissimum intestini duodeni parte versati sumus, observasse hanc valvulam sive ad eundem modum se habere, ut figura exhibet, sive adeo contractam esse, ut non modo osculum, sed ne vix quidem aliquam carunculae partem tegeret; quandoque adeo productam, ut non solum totam cylindri superiorem existentem partem, sed ipsum penitus osculum operiret, ut plurimum ei officio, quod jure ipsi Praeceptor tribuit, inservire existimemus, nempe ut quae in ventriculo sunt confecta, dum ad hunc locum delabuntur, ipsa in valvulam incurrendo, hanc deorsum versus extendant, sibi que aditum in carunculae orificium praepediant.*

LL *Caeterae inferiores rugae, seu valvulae Kerkringii conniventes dictae, quarum plures, majoresque aut ad fraenuli latera, aut infra ipsius finem excurrunt.*

*De his ita Santorinus (b). » Extremum autem eorum canalium, » qui ex gemino viscere profecti, hepate scilicet, & pancreate, » uno dumtaxat hiatu in duodenum intestinum delatos exonerant humores, sive paulum exstare, sive tenui quodam circulo circumfae- » piri jamdiu diligentiores cognovere Anatomici, cui validum, con- » spicuumque, ultra pollicem saepe longius alligari seu fraenulum,*

---

(a) Epist. Anat. 1. n. 31.

(b) Ibid.



» seu ligamentum de nullo, si recte memini, Professore intellexi.  
 » Id qua intestinum mesenterio vincitur, ubi videlicet memorati ca-  
 » nales in ejusdem cavum hiant, secundum intestini longitudinem  
 » protenditur, atque per interceptarum eo loci conniventium val-  
 » vularum spatia, ex quo maxime dignoscitur, sensim tenuatum in-  
 » feriora versus producitur ». De hoc Santorini fraenulo, seu liga-  
 mento a nobis etiam, ut pluries seorsum, ita & inter docendum  
 observato, licet ab aliis pluribus inter recentissimos praetermissum  
 sit, postquam illud descripserit, ita habet Praeceptor Morga-  
 gnus (a): *nemo adhuc, quod meminerim, id descripsit, praeter Vi-*  
*rum praeclarissimum, amicissimumque Johannem Dominicum Santori-*  
*num apud Venetos Protomedicum, & in praesentia Anatomes Pro-*  
*fessorem, qui fraenulum, seu ligamentum hujus orificii nuncupavit.*  
 De cujus tamen fraenuli usu, licet Praeceptor a Santorino aliqua-  
 tenus dissentiat, haud tamen ac si illud non esset, aut esset inuti-  
 le, nequaquam omittendum censuit. *Hujus autem fraenuli, addit*  
*Santorinus, modum, & magnitudinem licet pro corporum varietate*  
*variare saepe compererim, illud tamen desiderari vel in centenis ob-*  
*servationibus vix unquam memini. Memini quidem teretem illius for-*  
*mam, priusquam ad exitum perduceretur, aliquando bifariam divi-*  
*di, diductamque etiam trifariam comperisse recordor, quae tunc con-*  
*tigisse adverti, cum scilicet sive ab lateribus cum trifariam, sive*  
*ab imis cum bifariam, in rugarum, seu conniventium valvularum*  
*principia hujus exitus terminabatur. Istud autem fraenulum eo etiam*  
*fuisse constitutum veri simile est, ne videlicet osculum illud omne op-*  
*positum intestini parietem prorsus respiciat, contra quam ex Bian-*  
*chi tabulis in sua Historia hepatica opinatum fuisse apparet. Atque*  
*illud praeterea non inutiliter, nec praeter consilium constitutum pu-*  
*to, ne nimirum rotundum, nimiumque patens osculum esset, ne eo*  
*remeantes intestinorum succi se facile reciperent: per hoc enim fraenu-*  
*lum osculum deorsum versus deductum, atque ita coërcitum oblongum,*  
*& ex ima parte vehementer acutum fit, quo subire primum nitentes*  
*humores praeccludat, atque repellat. Verum haec ipsa osculi forma*


t



(a) Epist. Anat. I. n. 31.



*ad augendam etiam ipsius angustiam, cum reliquis plurimum tribuit. Quamquam una ipsius protuberantiae, atque osculi sedes, in sinistro-re videlicet gibbo duodeni latere constituta, per se vehementer impedit, ne eo ex facili humores intestinorum vel retropulsi se corriperent: quippe ex fluentium aquarum motu satis liquet, in convexis canalium flexibus segniorem multo, quam in adverso latere aquarum vim, ac velocitatem experiri. Istud ergo osculum non modo ex mutata figura amplitudine imminutum intelligo; sed ita per se astrictum, corrugatumque, ut nedum ambobus, sed vix singulis confluentibus meatibus, atque ex his angustiori etiam pancreatico nempe, aliquando latitudine respondeat, cui adjecta quaedam extremorum parietum crassitudo iter amplius angustat. Illud etiam quandoque in integris, ac lacertosissimis subjectis usque adeo angustum inveni, ut vix plenior setam acciperet: quamquam interior capacitas quasi in vesiculam conformata longe prae eo osculo amplissima esset; in quam eodem osculo laxiores multo singuli jecinoris, ac pancreatis ductus seorsum corrivabantur. Ut ex hoc conjicere liceat, naturam partem hanc sic constituisse, ut cum maxime ne irrumperent, exteriores arceret, ita, ne affatim quidem profluerent, interiores humores cohiberet pariter, ac temperaret. Alterum autem exiguum quidem, ac tenue, sed non levis sane usus, ab nemine praecisum, aut certe quod sciam, commentariis animadversum, atque propositum, minutae quaedam valvulae sunt (a), quae ad extremum emissarii iter locatae ejus osculo praeficiuntur. Has mihi perpetuo comperire datum est, ubi praeserim summa illius emissarii angustia inspiciendi facultatem omnem non adimebat; quasi multiplex illud artificium, quod*



(a) Valvulas, quas hic diserte Santorinus describit, alibi etiam in observationibus Anat. pag. 168. ab ipso adnotatas fuisse, video. Has licet accurata indagine pluries inquisierim, cum communis emissarii *pelvisformem dilatationem*, quam ductus choledochi appellant, semper invenerim, eamque modo majorem, modo minorem, ac prope contractum osculum haud penitus levem, sed nonnihil in parvas, minutasque rugas veluti exasperatam offenderim, valvulas tamen manifesto haecenus haud observare contigit: quas equidem haudquaquam improbamus; sed cadaverum fortasse inopia factum existimamus, cum in eas vasti cadaveris partes raro inciderimus, quas ipsemet Santorinus data opera ex magna cadaverum copia suis nutibus frequenter parata, atque anatomicis exercitationibus operam dantibus admodum necessaria perite, scienterque deligebat.

ad hunc locum natura fuerat machinata, protuberantia videlicet, flexus, crassitudo, fraenulum, foraminis forma, & angustia constituto sibi consilio non satis fuissent, valvulas etiam tenues quidem, sed huic officio accommodatas fabricata est. Harum tum facilior conspectus est, cum vasti cadaveris pars, quae amplior esse solet, deligitur, eaque diligenter purgata, illae autem coniecto spiritu, aut immisso specillo, aut etiam limpida aqua agitatae tentantur, eademque, secundum longitudinem incisa sedulo caruncula, praeclare in conspectum nobis dantur. Ex his una modo major, modo duae aequales pene sunt, quae ab lateribus inter se copulatae, non ita facile aditum praestant, ut vel aëre inspirato, vel specillo immisso attollantur, iterque impedian. Earum forma in aliis sigmoidea, in aliis cono in longitudinem dissecto, fereque similis venarum valvulis, quarum latitudo lineam aliquando aequat, aliquando superat; quae quamquam sic ordinatae sunt, ut in commune, atque adeo utrique meatui praeficiantur, attamen pancreatis magis proximiori, ac inferiori osculo cavere videntur. Praeter has tamen majores valvulas, quas etsi forma, ordine, numero, incertas aliquando invenio, positu tamen constantissimas deprehendo, minores aliae, minimaeque inter acutum, extremumque ejus osculi meatum sitae sunt, & quasi re-tis instar compositae majoribus praeposuntur, earumque muneri subserviunt; ut ne quid videlicet illuc intro ab intestinorum cavo, inter crebros, vehementesque illarum partium, variorumque humorum ultro, citroque discurrentium pressus, & agitationes se recipiant. Ne quis forte tamen ad haec regerat; quasi aut nullae hujusmodi valvulae forent, pro quibus luculentissimum est sensuum testimonium, aut non eo, quod retulimus, fungerentur officio, alte in illud osculum, nec difficulter specillum, aut spiritum adigi posse. Alia siquidem aut immissi specilli ratio, aut inspirati aëris vis ab humoribus subire nōtentibus est, quae cum primam diductam, explicatam, praeparatamque partem ingrediantur, non aegre, aut tenuissimarum membranularum vim vincere, aut earum renisum, occursumve declinare queunt, cum humores vicissim irrumpere conantes, circum eam simul carunculam prementes sibi ipsis aditum praeccludant; ac siquid forte eo se corripit, sic adrepat, ut nec aptum valvularum positum declinare, nec vel tantularum membranularum vim frangere pro suo modo possit.

*Quod mihi cum saepe, tum maxime hodie haec ipsa conscribenti in lymphae ductibus constitit, in quos adversus valvulas inspiratus aër non difficillime superata earum vi ultra processu, quod caeterum contentae lymphae convenire probabile non est. Quinimmo novissimis etiam observationibus amplissimum communis hujusce emissarii ostiolum oblatum est, cui non modo conspicuae, latissimaeque valvulae praeficiebantur, omnem cum humorum, aërisve, tum specilli etiam vim repellentes, sed inter eas medius etiam embolus conjiciebatur, quo quammaximis praesidiis amplioribus osculis, atque adeo humorum regressui obnoxiiis naturam cavisse dicendum.*









Tab. XII








# TABULA XIII.

## FIGURA I.

*Exhibet pancreatis naturalem magnitudinem, formam, habitum, & obliquum positum, quemadmodum fere suis in sedibus constituitur, atque in longitudinem ita secti, ac ducti, ut omnis ductus ejus, exitusque in conspectum veniat, itemque portiunculam intestini duodeni pancreati adnexam, ac in longitudinem dissectam, & revolutam.*



- AA *P*ancreatis longitudo omnis, atque latitudo.
- BB. *P*ancreatis pars tenuior, angustiorque, cervix a me nuncupata, subter quam pars plurima arteriarum, venarum, nervorum, ac lymphæ ductuum ad mesenterium pertinentium fertur, eaque Tab. n.<sup>o</sup> indicatur.
- CC *P*ars altera ipsius pancreatis dexterior in latitudinem ducta, quæ in gibbum composita, intestino duodeno adnectitur, cujus tanta transversæ accessionis amplitudo nulla hæcenus in Tabula descripta fuit.
- aa *Extremæ radiculæ sunt.*
- bbb *Ductus, qui per medium pancreas flexuoso tractu ab uno ad alterum extremum ad intestinum usque duodenum oblique defertur.*
- ccc &c. *Complures utrinque ramusculi, qui in medium hunc ductum confluunt.*
- d *Longior, & plenior utrinque alter ductus, qui in ductum medium pariter corrivatur:*
- e *Superior nempe, &*
- f *Inferior: ex gemino, inferiore scilicet, & superiore ductus unus transversus pene conflatur, cujus*
- g *Principium in ima transversa pancreatis accessione est.*
- h *Terminus autem, exitusque, qui in intestinum duodenum per carunculam Tab. XII. lit. f descriptam secretum humorem invehit.*
- iii &c. *Propagines majusculæ ramorum, quæ ab lateribus in utrumque hunc transversum ductum concurrunt, quæ ab transversa pancreatis accessione radículas trahunt.*

Quamquam Graafius, (a) qui accuratius caeteris Spartam hanc excoluisse videtur, duplicis pancreatis ductus indicium praeberit, & post ipsum Winslowus (b), aliique, ac in iis potissimum Summus Hallerus (c) propriis quibusdam characteribus hunc ductum ornaverint; nihilo tamen fecius Santorinus hac Tabula, dum cum pancreatico ductu alterum transversum exhibet, nisi inventionem, elegantiam certe, atque sedulitatem decessoribus palmam praeripuisse videtur. Dum enim Graafius, ut caeteros brevitatis gratia praeteream, duplicem pancreatis ductum (quorum alterum interdum ut a majori prorsus sejunctum, ita & penitus defuisse observavi) scriptis indicat, in Tabula tamen I., quam ipse exhibet, ne indicium quidem alterius hujusce ductus aut delineatione, aut verbis ostendit: immo cum postremum furculum ductus pancreatici, qui huic Santorini transverso ductui respondet, ac reliquos pancreatis furculos lit. B designaverit, illum non pro peculiari ductu, sed cum reliquis furculis communem habuisse, apertissime evincitur. *Hic vero pancreatis alter ductus, cum in transversum pene positus sit, ejusque tenuis origo ab imis latioris transversae accessionis partibus procedat, complurium ramusculorum confluxu auctus, ad eum ductum, qui secundum longitudinem est, sese confert, atque in illum influit: protinus autem ex adverso ipsius latere eadem prope latitudine emergit, ac in superiora sese proripiens, in itinere furculorum accessione auctus, post levem curvaturam, latis circiter duobus digitis supra longioris ductus ingressum, duodenum intestinum subit. Id hujus ductus iter, ac incessus est: de quo tamen non ita intelligo quasi humor ab imo delatus in transversum per eum, qui secundum longitudinem defluit, in superiorem partem contendere debeat; sed ita accipi volo, quasi unus transversus ductus esset, tamen si (quod rationi maxime congruit) humor ab inferiore delatus in longitudinem, qui vero per longiorem delabatur, partim recta, partim in transversum per hunc minorem ductum procedat. Forma autem, colore, tenuitate, humore alteri prorsus similis: brevior*

---

(a) Regneri de Graaf. Opera omnia. Lugduni an. 1678. De Succo pancreatico Cap. 1.

(b) Traité du bas-ventre n. 324.

(c) Elem. Phys. Lib. xxii. §. vi.



### TABULAE XIII.

151

tamen est, & angustior; etsi aliquando amplissimum ipsius exitum viderim. Ut ductum hunc constantissime comperi, ita frequentissime in longiorem influentem, aut, si lubet, effluentem dicere adverti, ut alterutro inflato, sicuti etiam habet Graafius, uterque statim attollatur.


k Ductus choledocus, seu communis, qui circumfusus pancreatis natura sui loci defecta, quo ille in conspectum veniat cum extremo majoris ductus pancreatis corrivatur, quocum pariter per majorem, inferioremque carunculam Tab. XII. lit. H in duodenum terminatur.

DD Portio intestini duodeni, quod propter pancreatis oram secundum longitudinem incisum, atque inversum,

mm Valvulas, seu rugas, &

\*\*\* &c. Glandulas profert.


### FIGURA II.



An una est ex adiposis laciniis, sive appendiculis, quae cum ad tenuia intestina, tum maxime ad crassa pertinent? Num *prae-grandis illa intestini colon extincti hydropici lacinia*, quam in Santorini Tabulis exaratam, Sguarius in Praefatione ad Lancisii Opera varia commemoravit? Caeterum hanc figuram eorum potissimum gratia delineatam fuisse, quae Tab. IX. lit. C, \*, ex ipso Santorino attulimus, conjicere pronum est.

### FIGURA III.

Repraesentat intestini fortasse duodeni, summique jejuni partes, hisque adnexum mesaraeum, ut potissimum vasa chyliifera, illac reptantia in conspectum prodeant.



AAA Intestini fortasse duodeni, ac jejuni portio, ejusque  
a a a &c. Plicae, seu rugae. Hanc intestinorum portionem ita denominamus, eo quia ipsemet Santorinus, ut paulo infra videre est,

praeclarius nunquam, quam in imo duodeno, summoque jejunio hominis tabe confecti confertissimos chylicos ductus, aequae ac reliqua, quae in hac Tabula occurrunt, se vidisse descripsit.

bbb &c. Angustissimae radicae faciem omnem intestini, frequentissimis coitionibus undique perreptantibus, e quibus

ccc &c. Chylifera vasa procedunt, quae

ddd &c. Venis, arteriisque adjuncta, ad proximas

BBBB Mesaraei

eee &c. Glandulas aspirant.

fff &c. Venarum, arteriarumque per mesenterium excurrentium arcus.

Haec figura iis potissimum respondet, quae Santorinus (a) de chylicis vasis protulit, quaeque posterioribus observationibus confirmando ita luculentius exornavit. *De chylicis vasis duo obiter considero; unum ad originem, alterum ad iter pertinens. Ubi primum adverti, quod prioribus observationibus edidi, non semper ex tenuissimis radiculis ab omni intestini ambitu haec vasa prodire, sed aliquando ex subrotundis corpusculis membranarum tenuitate, contentique humoris natura chylicis omnino similibus: haud raro postea rem eandem comperi, ac nostris etiam Alumnis monstravi aliquando. Mollia haec alba, tenuia, incertae magnitudinis subrotunda corpuscula per summam intestini tunicam apparent, quorum magnitudinem, neque infra panici granum, neque supra parvam lentilam inveni. Haec in omni intestini ambitu sita, & in omnium tenuium intestinorum longitudinem, unde chylica evadunt, disiecta adverti, e quorum singulis singula chylica vasa procedunt, ut lacusculorum, seu cisternularum officio fungi viderentur. Eo enim aut in plenioribus corporibus, aut in maxima hujusce humoris vi, vel diductis, corrivantibus, tenuissimis radiculis forte excitatis, vel consilio quodam, his loculis constructis, complura intestinorum oscula exceptum humorem primum derivare probabile est; ne videlicet aut in celeriori intestinorum agitatione, aut in majori hujusce humoris copia, ac tarditate, ex nimia sive radicularum angustia, sive obliquitate, & pressu, impedito ulteriori itinere chylicorum oscula de-*



(a) Ibid. Cap. ix. §. x.

*lapsus chylus praeterfluat. Nam cum haec non ita raro in integris alioquin corporibus, ac praesertim subita morte sublatis occurrant; paulo fortasse frequentius fuissent, opinor, animadversa, si idonea hujusmodi cadavera aut crebrius inciderentur, aut explorarentur accuratius.*

*Ubi vero sive ab hisce quasi cisternulis, aut lacusculis, sive ab angustissimis radiculis faciem omnem tenuium intestinorum frequentissimis coitionibus undique perreptantibus chylifera vascula procedunt, bina, utrinque scilicet singulis mesaraei venis, arteriisque adjuncta, ad proximas, minutas ejusdem mesaraei glandulas aspirant. Horum tamen chyliferorum non par ubique, in singulis nempe intestinis, frequentia est. Nam ab suprema duodeni parte nulla mihi unquam decessisse comperta sunt: mox quidem hanc infra longe frequentissima, deinceps in omni jejuni longitudine minus crebra, tum inter ilei initia conspici rariora consuescunt, ut ad illius exitum vix ulla comperisse meminerim. Undecumque ea tamen singula abscedant in nonnullas propagines, quinque etiam aliquando, prius dirempta comperi, quam fusas in mesaraei latitudine glandulas subirent, quod sicut minus animadversum memini, ita non sine peculiari consilio factum existimo. Haec ergo in earum glandularum vicinam producta, ac in surculos discreta glandulas pervadunt, totidemque ex iis radiculis emergunt, quot eas ramusculi subiere. Cum autem ea sit conglobatarum glandularum natura, ut praecipua earum pars ex secernentibus vasculis, pars ex muscularibus fibris compingatur, haud opinari vereor subeuntem per chylifera vascula humorem, ab altero intra eas multo tenuiore secreto dilui, atque extenuari, eundemque praeterea a totidem quasi potentiis atteri, ac promoveri. Varius autem harum glandularum habitus est: hae quippe in integris, & junioribus magnae, subalbidae, molliusculae, in senioribus exiguae, subatrae, ac duriusculae, in vitiosis autem durae, contractaeque.... Neque in una mesaraei amplitudine, longoque chyli itinere locatae hujusmodi conglobatae glandulae sunt; ex his nempe majores multo, atque confertiores, tanta earum necessitas, aut certe utilitas est, cum extremo pene pancreate implexae, ad sinistriorem duodeni partem sitae sunt, unde fraequentiora advertimus, ac pleniora chylifera vascula procedere, ut harumve scilicet magnitudo, ac frequentia earum, quae in*



mesaraeo disiectae sunt, numerum, positumque compensarent. Ex quibus omnibus consequi rationabile est non uno, potissimoque consilio chylifera vascula mesaraei glandulas trajicere, sed ut ex earum humore extenuatus chylus promptior motu sit, & expeditior; ac deinde ut ab earum pressu, atque contractione validius propellatur, atque procedat.

Quamquam autem saepesaepius in ea cadavera inciderim, in quibus memoratorum vasculorum evidens quammaxime conspectus erat, praeclarius tamen nunquam ea mihi oblata sunt, atque in homine tabe confecto, in quo hujusmodi chylicos ductus tumentes, frequentissimosque cum nostris Alumnis spectavimus. Hi in imo duodeno, summoque jejuno confertissimi eo ordine dispositi in hujusmodi pellucido mesenterio, cui nihil adipis erat, eaque elegantia distributi cernebantur, ut omnium spectantium oculis jucundissimum esset tam multarum, atque diversarum partium naturam, habitum, ordinem, sedem, magnitudinem, incessum singillatim, summaque perspicuitate dispicere. Nam non modo facile arteriarum, venarumque, nervorum, atque chylicorum diversitas perspicue apparebat; sed praeclarissime singulorum etiam implexus, corrivatio, dirempius, ingressus, exitusque, iter denique totum, ac distributio patebat. At praeter caetera chylifera suo colore prodeuntia internoscebantur, quorum tenuis origo, prima confluentium unio, in intima glandularum introitus, per arteriarum, venarumque arcus reptatus, crebri valvularum nodi, majorumque furculorum corrivatio eminebant, ut perbelle ab longo eorum intestinorum ductu omnia tandem in pauciores caudices, reliquis mesaraei glandulis trajectis, corrivari comperirentur. Ex hisce non unam tantum quandoque glandulam vidi compluribus interius irrigatam, ac undique penetratam chylicis vasculis tumentem, albam, mollem, ac propemodum lacte manantem, ut si quis alius merito mesenterium lactes appellaverit, multo potiore jure hujusmodi glandulas sit impostherum lactium nomine nuncupaturus.

Ab illis ergo glandulis, quae ad radices mesaraei sitae sunt, duo praecipue vasorum chylicorum furculi diverso ad unum locum procedebant, alter a sinistiore parte, alter a dexteriore. Hic incredibili chylicorum ramusculorum numero coacto pene ex centro mesenterii natus, sursumque provectus, sub grandi ea mesocoli vena in

pancreaticam, seu potius splenicam influente; inter geminos duodeni flexus, atque adeo sub ipso pancreate in eam oblongam glandulam permeabat, quae proxime supra sinistram venam emulgentem locata est, quo item alter ex inferioribus sinistri lateris partibus multo infra eandem a plurimis, confertisque mesaraei glandulis emersus, emulgentem scandens pertinebat; atque inde pariter cum tenuibus propaginibus sub emulgentibus provectis in proximam cisternam, cui sinistrae emulgentis latus incumbebat, corrivabantur. Tum etiam animadvertentem paulo infra emulgentia vasa chyli ferum vas ascendere, quod num a mesocolo, ut videbatur, procederet, frustra inquisivi; postea vero cum ad thoracicum ductum disquisitiones contulissem, ab thoracis cavo longiuscule procedens alterum, conspicuumque transversum vas chyli ferum comperi, quod in ductum corrivatum desinebat. Ex quo facile mihi intelligere videtur a maximo pulmonum vitio sic sanguinis impeditum iter fuisse, ut in vena etiam subclavia intercepto, multo magis in thoracico ductu cohiberetur, ac propterea diductis fortasse nimium alicujus lymphatici ductus valvulis, chylus non difficulter potuerit cum mesocolon versus descendere, tum in thoracis cavum per transversum alterum derivari: unde forsitan aliquibus oblata fuerit quaedam existimandi ratio, aut ab crassis etiam intestinis chyli fera vascula procedere, aut eadem cum ad mammas, tum ad thymum ab thoracico ductu divertere.

De cisterna porro Pecquetiana, deque thoracico, quorum a praeclarissimis Viris multum actum est, ac diligenter, paucula quaedam duntaxat, breviterque considerabo ad illius maxime principium, exitumque pertinentia. Quod chyli ergo receptaculum, seu cisterna a detectore Pecqueto fuit nuncupata, omnium fere ductuum lymphaticorum, qui infra diaphragma sunt, atque adeo chyli ferorum terminus, & corrivatio est, propterea ejusdem naturae, non ejusdem tamen tenuitatis. Forma vero varia saepe esse solet, nam modo elliptica, conica modo, modo bifida, ac trifida nobis occurrit, quemadmodum publice singulorum formam inflatam, exsiccataque in Theatro monstrari curavimus: longitudo itidem varia; major autem tres latos digitos aequat; velut etiam crassitudo, ut quam calamus scriptorium in vasto nautae cadavere tantum superare meminimus, nec unquam ad eam Cowperi magnitudinem pervenisse reperimus. Ipsius



*sedes vero partim sub sinistra emulgente vena, partim plerumque inter secundae, & tertiae lumborum vertebrae fines sub magna arteria sita mihi comperiri consuevit. Positus denique obliquus saepe est, in dexteriolem partem inclinatus, atque tunc ab extrema nimirum, tenuataque cisterna ductus is provehitur thoracicus nominatus. Aliquando tamen comperi, idque praesertim in hydropico, cisternam hanc adeo inclinatam, ut omnis pene ab dextero diaphragmatis processu tegeretur; in altero autem defecto aetate viro nullam cisternae speciem, singulis vel diligentissime partibus explicatis, atque ab tenuibus caudicibus provectum thoracicum ductum per decem digitorum latitudinem in dexteriore latere, extra aortae fines, inter vertebrae, & azygam venam locatum animadverti. Vidisse etiam recordor supra summum receptaculi verticem in thoracicum ductum tres corrivantes lymphae ductus ex dexteris vicinis lumborum conglobatis glandulis profectos, quorum singuli singulis iis majoris erant capacitatis, qui ab sinistris evecli in receptaculum confluxerunt; quamobrem proxime dicendum censui, receptaculum terminum, & corrivationem esse omnium fere ductuum lymphaticorum, qui infra diaphragma sunt, quoniam aliquando eorum pars receptaculum praetervecta proxime in thoracicum ductum terminatur. Postremis etiam crebro iteratis disquisitionibus, haud raro mihi observasse contigit nullam cisternae, aut ejusmodi amplioris vasis formam occurrisse, sed proxime ex coeuntibus caudicibus, quasi ex totidem radicibus, thoracicum ductum surrexisse, ut propterea eam cisternae, aut receptaculi formam, & capacitatem continenter reperiri ex animadversionibus non videam. Quin immo nuperrime cisternam comperi, quae cum modice ampla esset, multo ampliores seu chylicos, seu lymphaticos ductus corrivantes accipiebat, quorum tamen multo tenuior membranarum natura erat, quam cisternae caeterum angustioris. Ductus autem saepius inter crura azygae venae pro vario corporis habitu pinguedine circumfusus, leniter flexuosus per corpus vertebrae thoracis, has inter, & aortam provehitur, ac ex utraque parte transversis lymphae rivulis ductus, in sinistriorem declinans, mox supra cordis basim, atque adeo aortae flexum ex ipsius finibus emergit, tum ejusdem lateri adjunctus, deinde oesophago applicitus hunc inter, & subclaviae arteriae principium, atque adeo hanc inter, & sinistram carotidem, quarum for-*



*tasse arteriarum micatione urgetur, ad subclaviam itidem venam paulum in priora inclinatus, curvatusque sese adjungit. Saepe tamen varium ipsius iter est; nam modo semel, modo etiam iterum diremptum adspexi, ac in anu ad aliquot digitorum, decem circiter, bifidum inveni, prorsus autem duplicem comperi nunquam; saepiusque simplicem mihi, quam discretum occurrisse recordor; medium item extremis partibus tenuiorem adnotavi, quae inde videlicet pene in transversum aortae subjicitur, quemadmodum fere in ureteribus solet animadverti.*

*Caeterum de adfuitis, aut receptaculo, aut etiam extremo ductui glandulis cum reliquos fere omnes Anatomicos, tum de alia velut a se comperta praecipue differentem Cowperum video; at de ipsis longe pluribus secundum ductus longitudinem locatis neminem differuisse recordor. Hae, ubi integrum corpus est, aut exiguae sunt, aut multo adipe involutae, aut qua ipsius diremptus est, ut facile Anatomicorum oculos praeterierint; ubi vero peculiari vitio fuerit glandularum genus affectum, non modo conspicuae fiunt, sed ut comperi, durae, altae, tumentes, ac strumosae, vitio, forma, & natura iis similes, quae in ejusmodi subjectis solent in mesenterio animadverti. Has ego locatas ita sum intuitus secundum plurimam ductus thoracici longitudinem, ut & transversorum lymphae ductuum iter, & ipsius thoracici laxitatem non difficulter impedirent. Unde colligere fas est, ex hoc fortasse vitii genere aliquando pectoris morbos, aliquando etiam ipsius thoracici ductus revehendae ex imis partibus lymphae, atque adeo nutritioni noxam posse inferri. Cujus tamen nullae certae notae sunt; attamen vel ex humorum ingenio, vel ex alterutrius partis vitio, aut ex glandularum jugularium, aut mesenterii, si harum intelligi tamen possent, tumoribus, atque pariter laxiori alvo, de iis etiam non temere suspicari saltem quidpiam potest.*









Fig. I

Fig. II

Fig. III






Fig. I



Fig. II



Fig. III








# TABULA XIV.

## FIGURA I.

*Figurat ultimam intestini ilei partem, caecum cum appendicula, & primam coli partem.*



- A *I*ntestinum ileum abscissum, in quo  
 a *Reliquiae mesaraei sunt intestino innexi.*  
 b b b & c. *Tenues eminentiae adiposae sunt, in habitioribus cadaveribus conspicuae, quae appendicum pinguedinosarum officio fungi videntur.*  
 B *Pars ilei crassis proxima, quae ut Santorino, ita & nunc mihi, ut etiam alias, ex duobus intestinis aëre inflatis, & exsiccatis, globosa propemodum videtur: haec tamen globositas haud ad eundem semper modum se habet; modo enim longior est, ut transversos quatuor digitos aequet; modo ab intestinis caeco, & colo per digitum distita, modo iis proxima, interdum solito latior, contractior aliquando adeo est, ut nulla propemodum sit; itaque neque sedem, neque figuram, neque magnitudinem eandem semper obtinet. Caeterum hujusce globositatis ratio in eo potissimum juxta Santorinum consistere videtur, sive quod faeces in caeco moratae reliquas, quae ex extremo ileo consequuntur, diutius detineant, sive quod tardius ob valvulae Bavhini conformationem eadem ex extremo ileo nitentes partem hanc paulum explicent.*  
 C *Ipsius ilei pars extrema compressa, & inter geminationem intestinorum caeci, & coli conjuncta.*  
 D *Principium coli, quod supra caecum assurgens, sub simam jecinis partem procedendo se recondit.*  
 EE *Pars summa intestini caeci, quod deorsum versus angustatum colonum fere repraesentat, cujus*  
 FF *Vertex in*  
 GG *Processum, seu appendiculam vermiformem continuatur.*


Hujusce vermiformis appendicis delineationi, quae ill. Praeceptor Morgagnus attulit, quammaxime respondent (a): *in nullo nempe eorum cadaverum, aut certe in nullo sex eorum, quae novissime secuit, appendiculam aut a fundo caeci, aut a caeco pendulam se vidisse; sed contra superioribus ita connexam partibus, ut dum in sede sua esset, nihil subire ipsam nisi ascendendo, nihil ex ipsa egredi nisi descendendo posset.* Quam quidem appendicem licet vario locatam modo in transversum positam, modo in pelvim dejectam, interdum in spirae modum eleganter dispositam, quemadmodum etiam ipsemet Santorinus (b) animadvertit, *saepius tamen eo positu, quem haec Santorini Tabula ostendit, observavimus; fundo nimirum in sublime evecto, unde proclivis in laxiorem caeci partem contentorum ex ea delapsus videretur.*

HH &c. Cellulae utrinque similes coli, & caeci, quas tria ligamenta, quae coli dicuntur, formant, quas inter cellulas

ccc &c. Rimae, seu rugae sunt, quae ex interiore intestini facie quasdam quasi valvulas referunt, in secunda hujusce Tabulae figura demonstrandas.

II Unum ex tribus coli ligamentis, quod productum, tenuatumque caeci appendiculam vermiformem cum caeteris componit.

K Novum nostrum ligamentum, quod non brevem extremi ilei partem caeco, atque vermiformi appendiculae colligat. Hoc novum Santorini ligamentum, quod ut in recentibus, ita & nunc in arenibus intestinis observo, ex peritonaei duplicatura fit, ad eundem prorsus modum ac intestinorum laciniae, five omenta componuntur. Majori interdum, interdum minori adipis copia fartum est, ac modo contractum, ut vix ex ileo caecum adeat; modo productum adeo vidimus, ut non solum ex ileo in caecum, & appendiculam vermiformem, sed ex ipsa appendice in ipsum colum protraheretur. Caeterum latum, membranosum, longioris trianguli speciem referens, & a reliquis partibus ita secretum est, ut accurate contrectantis prosectoris oculos, & manus moneat. Extrema hujus crepido persaepe quodam adipe crassior fit, eaque crepido mo-




(a) Adv. Anat. III. Animad. XIV.

(b) Ibid. Cap. IX. §. IX. p. 169.

do levis, modo laciniosa se mihi obtulit. Hujusce autem ilei, atque caeci communis ligamenti ope fit, ut partes eae & colligatae remaneant, & in officio, cui comparatae sunt, contineantur, atque cum ob interjectum commune vinculum alterum intestinum alterius motui obsequitur, angustum semper ilei ostium sit. Nam cum hoc deorsum mittitur, flexum auget, atque exitum arctat; cum modo attollitur, ac pene in transversum porrigitur, caecum sursum trahit, ex quo latior, altiorve ruga fit, seu replicatio, ideoque major extremi ilei pressus, seu longior evadit.

FIGURA II.

Explicat eorundem supra explicatas intestinorum partes contrario situ locatas ilei, caeci, & coli, aëre inflatas, exciccatasque, & contra ilei exitum in longitudinem deductas, ut facies interior ipsarum, atque adeo id, quod valvula Bavhini dicitur, in apertum proferatur.



- A *Extremum intestinum ileum.*
- B *Pars ipsius globosa.*
- C *Ejusdem pars compressa, quae inter rugas caeci, & coli inseritur.*
- D *Pars nostri ilei ligamenti ex obliquo conspecta.*
- E *Pars extrema caeci, quae principium est appendiculae vermiformis pone intestinum evectae, & abditae.*
- F *Caeci cavea.*
- G *Coli cavea.*
- HH *Duplicaturae membranarum caeci, quae intrinsecus eminentes valvularum nomen, & formam gerunt, ejusdemque generis sunt*
- III *Duplicaturae, quae in coli capacitate indicantur.*
- K *Duplicatura caeteris omnibus longior, atque eminentior est, quae ex geminatis caeci, & coli membranis, seu parietibus conficitur, qua condita Bavhini valvula dicitur.*
- L *Exitus intestini ilei inter tunicas.*
- a *Intestini coli, &*




b *Intestini caeci, e quibus valvula conficitur, cujus accurata forma altera parte acuta, altera rotunda saepissime huic respondet.*

*Haec valvula ita se habet. Intestinis caeco, & colo aëre distentis, exsiccatisque contra maximam hanc rugam, & intestinum ileum defectis, perspicue prae caeteris decrefcentis lunae in modum formata, ac in transversum posita ruga, seu coëuntis coli, atque caeci replicatio observatur, quae reliquarum more composita, ipsis tamen longior, atque latior, ut, quae latissima est, latum pollicem aequet, medium complectitur ostium, quod quandoque angustius, saepius quale haec figura repraesentat: nimirum oblongum in transversum positum, qua abdominis priora spectat, subrotundum; qua dorsum, seu posteriora acutum; cujus major, seu subrotunda latitudo vix duas lineas superat. Cum itaque potissimum memoratae valvulae artificium sit, quod inter plenioris intestini replicatos parietes, quasi inter duas copulatas regulas extremum ileon oblique subeat, atque comprimatur, ecquis porro non videt, cum ex hujus partis structura, tum ex ipsius officii ratione nihil praeter positam fabricationem requiri, unde aut apte valvula conformata sit, aut apposite ad suum munus accommodata? Nulla enim ilei pars ultra caeci, colique replicatos parietes eminet, nec quidquam ipsius caeci, colique ultra extremum ileon prominet, nihil praeter hos eosdem parietes vincit, ac demum nulla praeterea vis arctat, aut resolvit, unde ex ileo transitus pateat, contra vero regressus praecludatur. Ex compressis autem, educatisque extremis ilei parietibus, quorum alter superior est, alter inferior; alterum altero brevior, aut longior constanter esse non comperi, contra atque ex *Histor. Reg. Scient. Academ.* (a) asseri adverto. Sed modo, saepiusque utrumque aequalem, modo alterum brevior, quandoque etiam eundem inferiorem antea brevior esse, posterius longior, contrario autem modo superiorem se habentem inveni, quae in exsiccatis partibus adverti clarissime possunt. Quibus fusius fortasse, non extra tamen propositam animadversionem, ad rem hanc explanandam enucleatis, nemo non intelliget deductas ex ileo in caecum ciborum reliquias, se vel vehementis-*

*sime contrahente, nequaquam posse in ileon reverti; sed sursum in colon propelli, siquidem arctatis cujusque ordinis, contractisque caeci, atque coli fibris, replicatos horum intestinorum parietes magis adduci, atque adeo extremum ileon comprimi necesse est. Quapropter quanto vehementius colon arctatur, & caecum, tanto etiam validius ilei parietes apprimuntur, ne quid illuc intro se recipiat.*

MM *Extremae partes valvulae sunt, quae apertissime ex duplicatura, seu replicatione caeci, & coli conflari videntur.*

### FIGURA III.



An huic figurae haec Santorini verba, quae suis in schedis adnotata invenio, respondent? Qua mesenterium, mesaraeon nimirum, & mesocolon, intestinis committitur, modo ipsum strigosum non sit, haud leve, quemadmodum reliqua pars est, sed distinctis, discretisque productionibus non modo nonnullam intestini partem, ejusque latitudinem complectitur, sed ita ab reliqua mesenterii, atque adeo intestinorum superficie exstat, ut totidem discretis articulis crenatum appareat, ut saepe elegantem trigoni prismatis formam pene referat, cujus acuta, ac oblonga acies aliquando prae pondere reclinata, tametsi eminens, caeteris adjuncta, atque imposita non satis dispici potest, tracto tamen, productoque intestino protinus in oculos incurrit. Harum mesenterii productionum in superiori tenuium intestinorum parte minor frequentia est, infra autem major, earumque adeo majori frequentiae par longitudo adjungitur; rursumque ad extremum pene ileon eadem extenuantur, brevioresque, ac rariores fiunt: eodemque fere ordine in crassis procedunt, ut vix earum ulla in caeco, frequentes in colo, frequentissimae, ac plenissimae in extremo recto locatae sint, quae majorem ipsius ambitum complexantur.











Fig. I

Fig. III

Fig. II






Fig. I





Fig. III



Fig. II







## TABULA XV.

### FIGURA I.

Vesicam aëre distentam, & nonnihil in latus conversam exhibet, ut praeter variam ejusdem fibrarum directionem vesicula seminalis, vas semen deferens, vas urinarium alterius lateris, & praesertim prostata, ejusque ligamentum in conspectum veniant.



AA **V**esica urinae. Ad hujusce fibrarum incesum, atque divisionem assequendam praeter ea, quae ipsemet Santorinus evulgaverat, observationem (a), quam idem ex posterioribus adnotavit, hic praestat referre. Anno 1727. in lacertosa vesica is erat fibrarum incesus. Primum triplex evidenter ordo & nobis, & nostris sese conspiciendum dedit, extimae quidem validae, mediae tenues, intimae validissimae. Fibrae enim intimae fere in transversum ductae rete quodammodo inter se compingebant, quarum ut incertus ordo, ita & incertus terminus, ac principium erat. Priores autem extimarum ab osse pubis pronatae, ubi ad decussim feruntur, & ligamenti partem, quod prostatae dicitur, efficiunt, tum recta sursum evectae, pars in fundum, qui verticis in modum est, atque ultra in urachum, seu urachi ligamenta terminantur. In hoc namque subiecto urachus in duos potissimum lacertos diductus erat, praeter minores e lateribus alios, quos quidem ab hisce fibris confectos videbamus. Fibrae aliae a lateribus juxta verticem ad latera inclinatae; aliae circum verticem ductae per adversum latus descendebant: aliae denique magis a lateribus cum vesicae basis multo sit fundo latior, infra dimidiam vesicam deflecebant, & in arcum ductae in posteriora, una cum sociis, in posticam ejusdem lateris partem terminabantur.



(a) Ibid. Cap. x. §. xx. pag. 202.

B Urachus.

C Priores extimarum fibrae, quarum

a a Bina strata conspiciuntur, quorum alterum alteri subjicitur. Ex his nonnullae in urachum contendere videntur: caeterae siquidem vesicam superfcandunt.

b Fibrarum fasciculus, qui a prioribus decedens seorsim fertur; uno tamen cum ipsis incessu, licet discretus, ferme gaudet.

c c c Alii, atque alii lacertuli, qui infra dimidiam vesicam deflectentes, in arcum ducti in posteriora contendunt. Et hi exterioribus fibris accensendi.

DDD Fibrae intimae rete quodammodo inter se compingentes.

EE Fibrae inter extimas, intimasque in stratum compositae. Eae forte sunt, quae *a lateribus ortae circum verticem ductae per ad-versum latus descendunt.*

F Vas urinarium finistrum defectum, quod non in anteriori vesicae parte, sed circa posteriora inferi maxime constat, quodque quanto

d Lumine hiet, ostenditur.

G Vesicula seminalis lateris ejusdem, pone quam conspicitur

H Deferentis vasis flexuosa origo, in quo quantum sit ejus


e Orificium, seu cavitas indicatur.

IKK Num glandulae prostatae dictae moles? praegrandis certe, atque abnormis, nec cum iis ullo modo comparanda, quae observari plerumque solent. Num illa fortasse, *quam ipsemet Santorinus (a) in homine Jo: Baptista Brigonzi, cui intra vesicam ingens lapis erat, deprehendit, quae quidem caeteris multo amplior erat?*

KK An hic capsulae pars reperitur laxè prostatam obducens, in quam

\* \* Extimae vesicae fibrae sese demittant?

Antequam, quae supersunt, explanare pro viribus nitamur, locus esto verbis Santorini de prostatae ligamento, quae licet certam, distinctamque implexissimi hujus loci explicationem non contineant, lumen tamen aliquod exhibent; juvantque etiam, ut quilibet videat nos Santorinianae mentis, quae ex ejus verbis nosci debet, Interpretes necessitate quadam a veritate abductos, siquid



(a) *Ibid.* §. XXI. pag. 203.



minus verum, minusque certum a nobis exponi contigerit. Si quae nonnisi dubitanter proponentur, Santorini auctoritas aliquatenus suffulciat, jure eo contenti erimus, quo melius obtinere non valeamus. Ita igitur habet (a): » ex interiori pubis facie, » qua ea ossa committuntur, latum circiter pollicem supra imam » eorumdem partem, geminae utrinque altera, ligamentosae produ- » ctiones emergunt; quae interdum diductae, interdum latae in » priorem prostatae faciem, ac in proximum ani levatoris tendinem » inferuntur: unde utrinque provectae ad obtusum angulum iu sum- » ma ejusdem prostatae facie, ac vesicae vicinia concurrentes fir- » missime cohaerent ».

ff Tenues fibrae, quae juxta priorem prostatae faciem e vesica deducuntur,

L » Ligamentum (b) prostatae novum, quo tum prior prostatae pars, » tum levatorum musculorum priora latera adducta inferiori pubis » ossis faciei valide colligatur»: quod factum censuit Santorinus, ne recto scilicet intestino alligata prostata in vehementiori excernendarum faecum nisu suis e sedibus divellatur. Ligamentum hoc cum novis observationibus iterum confirmaret Santorinus, (c) addit. *Haec autem prostatae ligamenta (aliquando enim disiecta appa- ruerunt, & non gemina tantum, sed bina utrinque erant) & majori diligentia, & commodo esse comperimus ex duobus fibrarum generi- bus conflata, scilicet ex summis, extimisque vesicae fibris in longi- tudinem ductis, atque ab eadem vesica sejunctis, quae tandem pro- ducto quasi distincto ligamento in memoratum locum inferuntur: hae praeterea fibrae, ubi a vesicae fundo, seu vertice ex priori facie ad ima deducuntur, luculentissime feruntur in decussim, atque seu obtusi anguli, seu arcus in modum conformatae in adversum latus feruntur. Aliae autem fibrae sunt ex iis, quae pertinent ad elevatorem ani, quae cum imae sint, non prostatae, sed urethrae principio adjungi videntur; quae tametsi in posteriora, atque ima elevatoris ani feran- tur, tamen sic eum locum urethrae quasi inter duas regulas consti-*



(a) Ibid. §. XVII.

(b) Santorinus in explicatione Tab. II. fig. II. lit. NN.

(c) Ibid. §. XVII. pag. 198.

*utrum arctare posse videntur, ut nonnullo sphincteris munere fungi posse credendum sit.*

Hoc prostatae ligamentum una cum prioribus, extimisque vesicae fibris perpendens, adeo hasce eidem superiori parte continuas esse observavi, meisque Alumnis ostendi, ut neutiquam mirarer, si quis hoc ligamentum magna ex parte harum fibrarum aponeurosim arcte inferiori ossis pubis faciei adhaerentem appellitaret.

MM Hujusce ligamenti productiones inferiores, quae imis etiam levatoris ani fibris miscentur.

N An productionum superiorum altera prostatae capsulae adjuncta? Sinistra enim detracta videtur, amota scilicet capsula prostatam operiente, cujus tamen

g Vestigium, aut si mavis, sectio est.

hh Hae dicendae ne sunt ligamenti productiones parvae, quae in capsulam disperguntur? An potius illae tamquam fimbriae, quarum ope ligamentum ossi pubis nectitur? In tenebris versor, undique scopulos, syrtesque metuens.

OO Fibrae arcuatae, urethrae, ut videtur, isthmum supergressae. An illae, quae ab uno pubis crure in alterum, oppositumque crus conjiciuntur? fig. III. lit. F.

ii Intimiores aliae, quae urethram amplectuntur.

l Haec fibrarum interruptio cuinam rei debeatur, non video.

P Urethra, quam

mm Funiculus perstringit, ne aër, quo vesica turgēt, incommode egrediatur. Hic tamen non extremam operi Scalptor manum imposuit; an & pluribus aliis, unde tot difficultates emergunt?

o Num ligamenti portio reflexa? Difficilis admodum de hisce omnibus conjectura.

FIGURA II.

Varietatem incessus fibrarum vesicae aëre distentae mirum  
in modum demonstrat, tum si solam spectari,  
cum si priori comparari lubeat.



Non hic desudandum videtur, ut tam variae directionis, situs-  
que fibras in certos tamquam ordines redigamus, ne eorum in  
primis notam offendamus, qui nihil definiri certo posse conten-  
dunt, nullumque ordinem a natura ea in re servari. Jam satis  
ii tempus, & operam perdidere, qui nimis curiose vesicae fibras,  
nimis scilicet exacta descriptione, ac divisione persequi conati  
sunt. Non extimas in vesica fibras reperias, quae aliquando cae-  
teris substratae intimiores non fiant; non intimas, quae nullis su-  
perimpositis, alicubi in ipsa superficie non conspiciantur. Hinc  
quoque est, quod nec ullum peculiaribus fasciculis assignari mu-  
nus tuto possit, nec alicui parti actio ulla tribui, cum caeterae  
in actionem consentiant. In universum dici posse crediderim ex-  
teriores fibras in lacertos magis conspicuos, strataque magis re-  
gularia compingi, quae a summo ad imum vesicam metiuntur.  
Interiores vero reticulatam magis naturam affectare, & ut qua-  
cumque directione, ita magis transversim positae haberi. Inde ve-  
sicae fundum ad cervicem trahi, dum interea undequaque coar-  
ctatur. In interiore vesica fibras vidisse memini, quae in arcum  
compositae ita utrumque ureterum orificium comprehendebant,  
ut contrahi non possent, quin detracto ureterum hiatu, urete-  
rum ipsorum lumina appressa clauderentur.


- A Vesicae pars cervici proxima, ex qua nonnullae fibrarum series  
emergunt, in vesicae fundum commigraturae, cujuscumque sunt  
a a Bina fibrarum strata, his fig. I. lit. a a respondentia.  
b b Aliaque caeteros fibrarum fasciculos subeuntia.  
B B Vesicae fundus, circum quem  
c c c Fibrae funduntur, singulis e partibus advectae.  
C Urachus, qui in vesicae summo constitutus,



- d Fibras excipit e priori potissimum parte profectas,  
 D Vas urinarium dexterum singulis hinc inde  
 e e Validioribus fasciculis interceptum. Hisce additur  
 fff Fascis alter validissimus intimior, qui cum priores secet, fit,  
 ut vas urinarium undequaque iisdem comprehendatur.  
 E Globosa vesicae eminentia, aut ejusdem dilatatio, cujusmodi in  
 homine, & in brutis animantibus interdum observatur.  
 F Hic fibrarum vesicae implexus, & textus ratio mirifice reprae-  
 sentatur.

## FIGURA III.

Serra a summi pubis lateribus ad ischii usque tubera demissa,  
 adversam pubis faciem, & quae pone eam sunt,  
 labyrinthum, prostatam, imam vesicam  
 repraesentat.



- A » Interior facies ossium pubis, qua committuntur  
 BB » Superiora pubis crura, seu cornua » serra excisa.  
 CC Tubera ossis ischii pariter defecta.  
 DD Obturatores musculi interni, qui ab  
 a a a a Ora demittuntur magni foraminis, quod utroque pubis crure,  
 & ischii processu anteriore comprehenditur.  
 EE Fibrae tendineo-carnosae imis levatoribus accensendae. Has  
 praeterea inferioribus ligamenti prostaticae productionibus continuas  
 cenfeo, & forte easdem, ac fig. I. litt. MM descripsimus, ma-  
 xime si fibrae ibi OO cum  
 F Fibris comparentur. Quotiescumque una cum caeteris hanc po-  
 tissimum cum cadaveribus figuram conferrem, haec habui animad-  
 vertenda. Primum dum caute ex infima ossis pubis interna facie  
 vesicam retraherem prostaticae ligamenta adeo aperte mihi occur-  
 rere, ut licet ex tenui, acutoque principio originem ducerent,  
 tamen sensim aucta inter descendendum veluti in bina utrinque  
 sejungebantur, quorum interius, & superius prostaticae lateribus;  
 exterius vero, & inferius musculis ani levatoribus adjiciebantur.

Infra haec, hisce discissis, atque ad latera reclinatis, supra prostatam glandulam intuentium oculis vasa, *sinus* appellata, & plura, & mirifice invicem complexa, in Santorini *labyrinthum* composita, ab ill. Praeceptore (a) recensita objiciebantur, quae ut superius, ita ad latera, ac potissimum infra prostatam glandulam luculentissime cernebantur. Horum descriptioni, ut a Santorino luculenter habitae (b), nihil nisi ea, quae ipsemet adnotavit, addam: *Vidimus*, inquit ipse, *in labyrinthum influentem magnam penis venam, cujus ostio geminae valvulae ita erant inter se colligatae medio tereti nervoso fasciculo, ut ne nimium diduci possit, quasi consilium esset, ne id osculum, quo sanguis referebatur, omnino apertum esset . . . . . Praeterea ex sinibus ad prostatam, & vesiculas positae nonnulli sunt postica in parte prostatae siti eam inter, & seminis vesiculas in transversum locati, ad imam scilicet vesicularum partem, ut maxime eo positu & prostatam, & vesiculas, vasorumque deferentium cellulosa partem suo pressu adjuvent . . . . . Qui autem sinuum notitiam luculentiores capere optat, curet quam diligenter venarum emissaria, quae ad iliacas feruntur, filo constringere, injectoque in labyrinthum multo spiritu utrinque occludat, dum eae partes penitus arentes quam luculentissime, atque jucundissime sinuum, in quibus aliquando calculos, seu lapillos inveni, miram in cellulas conformationem demonstrabunt. Praeter hosce Santorini sinus cum alias, tum etiam in praesentia mihi haec conscribenti fibrae tenues in latam veluti membranam fusae occurrunt, quae huic delineationi plurimum respondentes, ex interna processuum pubis, & ischii facie supra urethrae isthmum in transversum excurrentes, in oppositum pubis latus contendunt, eo valenter insertae. His aliae subsunt in orbem ductae, totumque urethrae isthmum adeo comprehendentes, ut hasce figura hujus Tabulae IV. lit. C Santorinum exhibere voluisse, conjectura assequi posse existimemus.*

b b b Vasa resecta, quae sub pubis arcu transeuntia genitalibus partibus inserviunt. Haec illa sunt quae in labyrinthum, seu in torcular confluentia variorum ordinum sinus circa prostatam deinceps efficiunt.

(a) Epist. ad me data pag. xvi.

(b) Ibid. §. XIV. XV. XVI. pag. 194.



GG Glandula prostatica, ab osse pubis una cum incumbente vesica emota, ut clarior quarundam partium conspectus exhiberetur.

H Prostaticae apex, quem isthmus urethrae subsequitur.

I Fibrarum fascis imae prostaticae, & isthmo subensus, musculo fortasse urethrae novo Santorini projectori accensendus.

LL Vesicae pars ima, in qua triplex, quo pertunditur, osculum observatur.

c » Vesicae urinae (a) osculum, cui

d » Prominulum corpus praefigitur, quod in affectis vesicis sic prominet aliquando, ut urinae iter prorsus intercludat.

ee » Hiatus ureterum in vesicam, atque eorum corporum origo (b), » quae sensim inclinata in d producuntur ».



(a) Santorinus in explicatione Tab. II. fig. II. lit. I K.

(b) De hisce corporibus Morgagni verba haec sunt, Advers. Anat. I. n. 9.: *Ubi ureteres arctato orificio in vesica finiuntur, productis ulterius ex se fibris, unum utrinque crassiusculum, teres, & compactum corpus excitant, quod solet posterius intra vesicae collum protuberare. Carnea haec duo corpora aliquantum progressa, concurrunt, raro linea recta, nempe inter utrumque ureterem, raro etiam ad modum curvae lineae, verum oblique deorsum lata, ad angulum inclinatur, quo ex angulo in maribus saepius vidi nescio quam lineam deorsum promissam, illique urethrae prominentiae, quam gallinaceum caput vocant, continuatam.* Jacobi autem Berengarii Carpenfis (in Mundin. Comment. XVII. p. CCCII. b. Bononiae 1521.) verba, quae nuperrime praestantiss. Vir adversus hanc Morgagni observationem in medium attulit, ita se habent. *Vesica est etiam spissior (dixerat enim superius vesicam grossiorem esse in fundo) in loco, in quo ingrediuntur pori uritides, qui pori perforant primo panniculum ortum a siphac (arabicum nomen, quod juxta Auctorem Comment. potissimum v. p. xcv. b. peritoneum significat), & incedunt oblique inter eum, & inferiorem per aliquam distantiam, deinde perforant interiorem: & sic transit urina inter panniculum, & panniculum, nec in isto loco vesica habet duas tunicas absque panniculo exteriori communi praedicto, ut putant aliqui, est bene verum, quod Natura fecit panniculum exteriori praedictum circumdantem vesicam grossiorem, seu spissiore in loco, in quo ingrediuntur pori uritides, quam alibi: ut ibidem vesica esset fortior propter ingressum pororum, qui debilitarent eam in perforando, nisi esset praedictus panniculus in isto loco ingrossatus.* Hisce itaque verbis neminem in dubium revocare posse existimo Berengarium haud de panniculo interiore, vesicae proprio, ut paulo ante fecerat, cum de vesicae fundo sermonem haberet, sed loqui de panniculo exteriori, quod verbum acutissimus Censor omisit, a siphac orto, hoc est a peritoneo, quod exterius totam vesicae posteriorem partem, usque ad eum locum, quo ureteres vesicam subeunt, investit. Morgagni autem observatio, non de hoc vesicae exteriori panniculo, non de interiore agit, sed eo potissimum nititur, ut primus omnium ureterum fibras describat, quae ulterius productae unum utrinque crassiusculum teres, & compactum corpus excitant, quod solet posterius, intra vesicae collum protuberare, quodque non in exteriori, sed in



Haec altera hujusce d, e e *trigoni*, ac potissimum d prominuli corporis, seu *Uvulae* (a), quae anterior *trigoni* portio est, delineatio, quam iterum Santorinus incisam, eamque veteri longe contractiorem voluit, satis luculenter ex cujuscumque animo, eam, si qua forte sit, dubitationem evellere potest, num scilicet delineatori, aut Santorino eandem debeamus, cum praestantissimus Lieutaudius ita expresse habeat (b): *le trigone est si apparent, qu'il est bien représenté dans les planches de Santorini, qui n'en dit pas un mot dans l'article relatif à cette figure, de sorte qu'on ne fait point si cet Auteur l'a aperçu, ou si nous le devons au dessinateur, qui a rendu fidelement ce qu'on lui a mis sous les yeux. La luette est aussi bien marquée dans la même planche; mais on en cherche encore inutilement la description dans le corps de l'ouvrage.* Quae licet ab immortali Praeceptore (c) ipsis Santorini verbis rite, sapienterque castigata fuerint, tamen & hic eadem praestat referre, ut si cui hac in re inventi gloria debeatur, lateat neminem ipsi uni Santorino jure, meritoque deberi. Ita enim habet (d):

» quamquam aliquando ad cervicis vesicae osculum posterius quid-

» piam, de quo mox in magnam satis molem prominere vidimus,

» id vel perraro compertum est, vel ex iis dumtaxat subjectis,

» quorum vesica laboraret, usque adeo exstare observavimus, ut

» ea res haud mereatur, quae ceu perpetua, & constans, quaeque

» vitiosa, & infrequens est, vel Tironum, vel minus exercitato-

» rum damno exhibeatur ». Denique postremis Capitis verbis: » Illud

» vero quod ad cervicis vesicae osculum ita aliquando prominet,

» ut urinae iter intercludere aliquantum valeat, quidpiam glandu-

» losum est sub tenui, intimaque vesicae membrana conditum, sic

---

vesicae facie interiore tantummodo enatum conspicitur, ubi ureteres arttato orificio in vesica finiuntur. Quid igitur hoc in loco de scriptis Berengarii Morgagno excidit? quid inter Berengarium, atque Morgagnum hisce verbis commune? AEqui, honestique rerum aestimatores videant ipsi, judicentque.

(a) Lieutaudius Mém. de l'Académie des Sciences de 1753. pag. 11., & alibi.

(b) Ibid. pag. 13. not. (a).

(c) De Sedibus, & Causis Morborum per Anatomen indagatis. Venetiis an. 1764. Epist. Anat. Med. 66. n. 12. & seq.

(d) Ibid. §. xx. xxii.

» ut conspicuis interdum, aggregatisque glandulis formatum vide-  
 » rim, cujus latam circum aream a minoribus licet exstantibus ta-  
 » men occupatam memini in fene, intra cujus vesicam sex supra  
 » triginta ex albo flavescentes calculi continebantur, quorum ali-  
 » quot Avellana vix minores ab sacculis ex ejusdem vesicae validif-  
 » simis, diremptisque lacertis constructis concludebantur». E qui-  
 bus quid de *trigono*, atque *Uvula* senserit Santorinus, satis mani-  
 feste elucescit. Mihi autem & publice singulis annis inter docen-  
 dum, & seorsum sedulo inquirenti, nisi semel lacertofo in homi-  
 ne sexagenario, cui nullum vesicae vitium erat, atque iterum  
 alio in homine, qui nondum suae aetatis annum quinquagesimum  
 attigerat, trigonum hoc corpus, atque potissimum *Uvula* occur-  
 rit, quae haud ex glandulis, sed ex septem albicantibus, distin-  
 ctisque fibrillarum fasciculis secundum longitudinem ductis, in sub-  
 rotundum corpus conflata, atque protensa descendens, gallinagi-  
 nis caput (a) apertissime adibat.

---


(a) Invitus iterum in arenam descendo Praeceptoris mei partes suscepturus. Jam enim anno 1769. mihi in cel. Patavina Universitate Anatomen tradenti ineundum publice certamen fuit, & quidem pluribus praeclar. Professoribus me humanissime inter caeteros audientibus, adversus nescio quem Medicinae Tironem callide in Virum immortalem Morgagnum tunc temporis docentem adhuc, illa Avicennae verba inter Medicinae, & Chirurgiae Alumnos disseminantem, quae a praestantissimo Viro postremis hisce temporibus evulgata video. Ingratus enim vero in tantum Praeceptorem sim, quod vitium horreo pejus bidentali, aut ignavus videar, si occurrentem mihi jam nunc hasce Santorini Tabulas in publicum emittenti, eam in rem loquendi occasionem effugiam. Avicennae itaque verba haec sunt, *lib. III. Fen. xx. Tract. 1. Cap. 1.*: *In virga sunt meatus tres, scilicet meatus urinae, & meatus spermatis, & meatus alguadi.* Carpus autem in *Comment. xviii. ad Mundinum pag. cccviii.* ita explicat *alguadi*, ut sit humiditas illa, quae in capite virgae praevenit in *Viris*, & *Adultis* in *tactu Mulieris ante coitum*. Quibus verbis aequum illi laudato Viro visum fuit suspicari capitis gallinaginis sinum, quem primum invenisse Morgagnum *Adver. Anat. IV. Animad. III.* principes etiam Viri tradidere, *Avicennam indicare voluisse*, ideoque a praestantissimo Morgagno non jam inventum, sed tantum cum laude restitutum fuisse.

Fateor ingenue aut horum verborum sensum me prorsus non intelligere, aut si sequar verba, prout sonant, me nulla omnino ratione colligere posse quomodo ex tribus illis meatibus, quos Avicenna commemorat, opinandi argumentum deducatur, quo ipsemet sinum capitis gallinaginis indicare potuerit. Nam licet *Alguadi* verbum, illud significet, quod Carpus explicat, non inde sequitur Avicennam sinum hunc agnovisse, immo si ejusdem Avicennae verba attendantur, *loc. cit. cap. 30.*: *De multitudine exuberationis spermatis, & humoris, qui praecedat coitum &c.*, contrarium quodammodo erui posse videtur. Ita enim habet: *causa in hoc, aut est in spermate, aut in vasis spermaticis, aut in renibus, aut in lacertis conservantibus*



## FIGURA IV.

Quid hac figura exhibere voluerit Santorinus, probabili conjectura me haud assequi posse fateor. Irrepsit tamen animo suspicio, an peculiariter vesicae urinariae sphincterem?



- A Vesicae urinae pars inferior, & interior.  
 BB Prostata glandula e posteriori parte inspecta, cui fortasse ejusdem capsulae portio infernitur.  
 a Specillum meatum indicans.



ipsum, aut in principiis. Non igitur in capitis gallinaginis sinu? si sperma, spermatica vasa, renes, lacertos, principia commemorat, si sinum agnovisset, tamquam humiditatis illius fontem, quae coitum praecedit, quid causae erat, cur non illum commemorasset? At non modo Avicenna, sed neque ipsemet Carpus hoc in loco Avicennae Commentator hunc sinum agnovisse apertissimis verbis demonstrat: ait enim *loc. cit. p. cccvii. b. Meatus (Alguadi) occultatur visui, & intellectui meo, & ego non credo, quod talis meatus sit in natura, quia alguadi exit sive sit in pueris, sive in adultis per eandem viam, per quam exit verum sperma, hoc est per vasa seminaria, quae perforant canale vesicae in duobus locis, scilicet a dextris, & a sinistris: & isto modo sunt tres meatus in virga, & non aliter*: quibus dicendis ipsemet Avicenna ansam fortasse praebuit illis verbis, quae *loc. cit.* habentur, quaeque nimis hic afferre longum esset. Praeterea quatenus observationes sint, atque auctoritates, quae e Morgagnano sinu humorem effluere demonstrant, eas nos prorsus ignorare fateri haud erubescimus. Nam non modo nobis nihil hujuscemodi observare unquam datum fuit, verum ne Morgagno quidem, qui hunc sinum descripsit, ejusque usum, ut *obscurum, incertumque* penitus omisit. Morgagnum secutus eruditissimus Hallerus *Elem. Physiol. lib. xxvii. §. xxvi.* neque ex propriis, neque ex aliorum observationibus attulit quidquam, quod ad hunc humorem, sive ad hujusce sinus usum quodammodo pertineret. Caeteros autem Anatomicos, & quidem illos, quorum tamen exemplaria teneo, cum consuluissem, nihil mihi hujuscemodi exhibuere, ut proinde qua ratione ab hoc ipso sinu humiditas, quae coitum praecedit, deducatur, haud videam. Ad sinum vero *plerumque muscoso humore refertum*, quod attinet, ut eum non rejicimus, ita neque confirmare audemus, cum repetitae nobis observationes nihil fere hujuscemodi suppeditaverint: immo Morgagnus, qui *loc. cit.* de hoc ipso scripserat: *parietibus est lubricis, & mollibus hosque humidos servant exiguae glandulae*, ne verbum quidem habet de muscoso humore, quem tot in dissectionibus, quas ipse commemorat, si invenisset, summam ejus effugisse diligentiam, atque sedulitatem incredibile propemodum videtur, cum maxime de hujusce sinus usu magnopere laboraret. Verum licet hunc muscosum humorem invenirem, tunc id praecipue attenderem, num scilicet ductus feminales, ut quandoque contigit, intra sinum sese aperirent, quod si contingeret, haererem quammaxime, num scilicet in coitu feminis ultimam, crassamque



C An urethrae isthmus, cui fibrae orbis in modum circumducuntur? An quid simile exhibet difficillimum captu, ut vesicae sphincter in conspectum veniat?

De vesicae enim sphinctere cum » non protinus Santorinus (a) » vel adesse, vel abesse pronuntiaverit », haec ex posterioribus observationibus reliquit. Quae nupera observatione animadverti circa vesicae sphincterem, atque illum praeterea musculum, quem itidem pseudo-sphincterem Terraneus vocat, aliquantum diverse occurrit, atque alias observavimus; siquidem vesicae proprium sphincterem negare non auferim, quem potissimum intra prostatam conditum reperi. Hunc si quis comperire velit, primum prostatae posticam partem ab seminis vesiculis diremptam secernat, tum priorem, in qua is conditur, diligenter pertractet. Ab hujus itaque parte, ea, qua par est, sedulitate, non scalpelli ope, sed manu leviter trahente cervicem vesicae dirimat, atque sejungat; quo peracto, cervice scilicet exempta, fibrae in longitudinem locatae extrahuntur, ac protinus in conspectum veniunt fibrae in orbem latae; quarum si fasciculum interiorem eximat, subjecti alii lacerti in orbem itidem dispositi prodeunt, atque sic deinceps dum ad prostatae naturam veniat. In lacertoso praeterea cadavere nihil comperimus in prostata, quod sphincter dici mereretur, praeter circulum quemdam fibrarum dimidio digito latum

---

e vesiculis projectam partem, aut in partium contrectatione eo conjectam fuisse, ut inde pro mucoso humore hujusce sinus proprio acciperetur. Denique cum Arabes, apud quos Anato- mes ne hilum quidem profecit, religione prohiberentur, ne humana cadavera diffecarent, haud in homine sinum hunc, sed fortasse meatum *Alguadi* in brutorum animantium prostata glandula Avicennam, religiosissimum hominem cognovisse rationi magis consentaneum videntur, cum ex iis nonnulla & humorem ante coitum large fundant, & prostatae glandulae poros humorem in capite virgae profundentes & plures, & satis conspicuos habeant. Neque certe alia ratione a magno Viro, atque Anatomes restitutore Vesalio de Humani Corporis fabrica lib. v. Cap. XIII. Meatus *alguadi* explicatur. Ait enim: Arabes quoque admiror, qui tres in pene enumerarunt meatus: unum quidem urinae dicatum, secundum femini, tertium autem illi viscido humori, quem e glanduloso corpore cervici vesicae circumnato parari arbitramur, qui- que humectum penem subinde reddit viro impensus concubitum appetente. Quibus ita se habentibus, nemo fortasse in dubium revocabit, neque Morgagni rem salvam non esse, neque eum fuisse, qui alienis plumis ornari voluerit, cum praeter ejus inventa longe hisce majora, obsoleta bene multa cum alibi, tum potissimum Adversariorum primo inventoribus suis ingenue, eruditeque restituerit.

(a) Ibid. §. XXI. pag. 203.





Fig. I

Fig. II

Fig. III

Fig. IV





Fig. I





Fig. II



Fig. III



Fig. IV





*summae crepidini prostatae circumductum, qui & continuatione, & natura vesicae fibrarum pars erat, caetera autem multo maxima prostatae pars hujusmodi vacabat musculo; adeoque nonnisi summum osculum cervicis vesicae claudit. Ima autem prostata, quae quasi conus extenuatur, alterum sane diversum musculum habet, quem tamen in aliis cadaveribus subobscurè vidimus; luculentissime in lacerato Aethiope sumus conspecti. Is carnosus, ac rubicundus est, non apice minimi latior, qui perfecti orbis in modum imae prostatae arte adhaerens circumducitur, & ima, angustioreque parte initium urethrae cingit. Supra hujus superiorem oram ea vascula subeunt, quae nos labyrinthum appellamus. Hanc alteram cum priori observationem conferenti primum est intelligere nihil hactenus de proprio vesicae sphinctere produci posse, quod satis tutum, firmumque sit. Quod autem nobis & saepe, & diligenter inquirentibus occurrit, ut nullum vesicae sphincterem, ita & nihil ad vesicae cervicem, five ad urethrae initium praeter ea, quae a nobis superius relata sunt, hucusque observare datum est nunquam. Eam autem vesicae partem una cum pluribus aliis Anatomicis cervicis nomine appello, quae contrahitur urethrae meatum factura.*








# TABULA XVI.

## FIGURA I.

Penem, & partes musculares, quae in ima, & exteriori pelvis facie conspiciuntur ab ossibus pubis, & ischiorum, ad os coccygis, & sacrum pertinentes ostendit.



A » **G**lans penis praeputio nudata ».

a Urethrae hiatus rimulam referens.

bb » Exigua oscula a Santorino detecta circa penis cervicem, e quibus, quod sub praeputio aggeri solet, excerni putamus ». De hisce exiguis osculis, quae nunc etiam in tribus diu aqua maceratis colibus haecenus haud mihi observare contigit, ita post ea, quae ipsemet Santorinus (a) evulgavit, reliquit. *In cole potissimum senis, qui ob diutinam macerationem alterius rei gratia institutam nonnulla corruptione quasi computruerat, sic ea foraminula conspiciere commodum fuit, ut illa imprimis, quae ad fraenum erant, multo patentiora ob partium raritatem ab explicato aëre cernerentur, e quibus semel, iterumque extenuatum valde humorem exprimere conspicuo satis osculo facile fuit. Nam utrinque ad fraenulum, ubi caetera ostiola non satis conspicua sunt, bina saepe evidentissima apparent.*

*Sub hoc fere loco, ubi horum foraminulorum sedes est in Bajulo ob vehementem pulmonis inflammationem strangulato sub tenui cute, tantum lymphaticum & cernimus, & demonstravimus septem ex nostris, ut per cutem & mole, & pelluciditate conspici potuerit. Quod incisa porro velante cute evidentissime deprehendimus forma, & humore, quod fere in orbem circum glandis cervicem ferebatur, ut multo facilius percipi queat ab hoc potissimum lymphatico vase, &*

7 2



(a) Ibid. Cap. x. §. XII. pag. 190. & Tab. III. fig. v. lit. A, B &c.

*ob magnitudinem, & ob cutis inductae tenuitatem id virus muliebre hauriri posse, unde tuborum lumina in inguinibus proficiscantur. Cui si adjiciatur nonnullum praeterea humorem ex foemina deciduum ibi adhaerentem diutius, reducto extra concubitum praeputium, detineri, multo facilius foret, ut, si haec via est, celticum virus communicaretur.*

B » Penis praeputium revolutum ».

C Penis corpus omnibus hic teguminibus obductum.

D Urethra.

E » Urethrae bulbus, cui acceleratores interni musculi sunt circumducti ». Hi fibras obtinent universim fere rectas, quae ad urethrae latera tamquam per

cc Cornua protenduntur. Antequam tamen hanc nimis implexam musculorum descriptionem persequar, ineditas de hisce Santorini (a) observationes referre praestat. *Musculos urethrae acceleratores duos esse cum a veteribus, tum a recentioribus Anatomicis intellexi: eos autem duplices vel describi, vel tabulis exhiberi ab nemine cognovi; nisi ab una reperio repetita cadaverum dissectione, atque collatione. Harum enim fibrarum duplex ordo in singulis est: exteriores namque quasi in transversum ductae a postica in priorem partem oblique feruntur; interiores vero non modo multo longiores, sed in longitudinem etiam urethrae oblique eae quidem ducuntur, ut has breviorum urethram, seu urethrae bulbum, illas vero contractionem efficere posse non difficulter intelligatur. Hae vero non semper ita inter se evidentissime differunt, ut aliquando & idoneis subjectis non sit opus. At contra eas vidisse memini non modo vario incessu procedentes, verum etiam facile ab caeteris exterioribus dividuas. Haec acceleratorum nova Santorini descriptio praestat ne ad ejusdem mentem de hoc*

F Novo musculo assequendam? Eae ne sunt fibrae exteriores quasi in transversum ductae e sua sede remotae, ac supra musculum I revolutae, quae a postica in priorem partem oblique feruntur? Obliquas hasce, ac exteriores veluti transversas horum musculorum

---

(a) Ibid. §. VII. pag. 182.



fibras utrinque ab nervosis penis corporibus, atque e lateribus triangularis Litrii emerfas in

d Mediam illam tendineam lineam contendentes, nemo ex Prosectoribus non novit: at rectas interiores, totamque bulbi inferiorem cooperientes partem, quemadmodum ex figura colligitur, num ex Prosectoribus viderit quisquam, haecenus ignoro. Quod autem mihi saepe hanc Tabulam cum cadaveribus consulenti videre contigit, sic habe: sedulo obliquis acceleratorum abductis fibris, atque ad latera revolutis, rectas fibras ad mediae tendineae lineae latera in binos veluti utrinque teretes fasciculos complexas, atque secundum longitudinem protensas, observavi quidem, aut saltem videre mihi visum est; at in distinctum rectarum fibrarum stratum compositas, quod cum hisce Santorini comparari posset, licet summa cum diligentia inquirerem, haecenus mihi observare datum est nunquam.

G G Ischii tubera

e Cruribus ossium pubis firmiter adnexa, & forte magis diducta, quam homini convenient.

H H » Bini muscoli penis erectores in interiore ischii tuberis facie nati ».

I An Santorini (a) » musculus ejaculator, seu elevator novus in » ter bulbum, & urethram coniectus, qui ejusdem urethrae imae canalis parti inseritur, tum urethrae elevandae, quam in priora quodantenus adducendae datus? » huic tamen neque veteris Tabulae delineatio, neque ejusdem descriptio quidquam aut parum convenit. Hunc musculum semel, atque iterum, aut similem vidisse, aut videre mihi visum fuisse adnotavi; cujus initium cum supra erectores musculos nonnihil ad interiora emergeret, in posteriora bulbi satis manifeste adire videbatur. Caeterum quam aggredimur, implexam nimis hujus loci fibrarum directionem decernere, easque juxta Santorini delineationes dilucide persequi, suisque regionibus singulas figillatim tribuere, ob discriminis cadaverum rationem, ob fibrarum implexum, atque pallorem, ac nostrarum virium potissimum defectum, arduum, difficillimumque opus esse ingenue, ultroque fatemur.

---

(a) *Ibid.* §. VIII., & *Tab.* III. fig. v. lit. H H.

K » Musculus alter urethrae lateralis », si nullus, » seu fascis fibrarum  
 » muscularium ab ima crurum pubis parte prodiens, ac secundum  
 » latera acceleratorum supra transversales in posticam ani partem  
 » ductus (a) ».

LL Transversales muscoli ab erectorum, ut videtur, fibris ut plurimum abscedentes. Ortos plerumque vidi tenuissimo initio, quo vix aut ab ossibus ischiorum, aut erectioribus penis penderent: crassiusculi deinde, & quo magis progrediebantur, eo pleniores, latioresque. Horum finis, quemadmodum & Santorinus animadvertit (b), ambiguus est; licet quandoque compertum fuerit in alterum latus recta pergere, quandoque per latus oppositum sphincteri apponi, alias etiam ita cum caeteris fibris ad locum, qui est bulbum urethrae inter, & priora ani, convenientibus implecti, ut dirimi nulla ratione possent. Hi muscoli utrinque gemini praesertim in bene constitutis cadaveribus plerumque occurrunt, quorum initia, incessus, & fines, licet omnes in transversum incedant, tamen non semper ad eundem modum se habere observavimus. Interdum enim distincto oriuntur principio, quorum alter ab erectioribus penis, alter nonnihil infra ab ischiorum ossibus emergebat, qui insimul transversim incedendo alter in posteriora bulbi, alter in sphincterem ani sese demittebant. Vidimus alias unico principio exortos, ac inter procedendum in duos, interdum etiam in tres se derimere fasciculos, quorum finis pariter inter sphincterem, & bulbum erat. An hujusmodi aliquid, hac figura, fortasse exhibet Santorinus? transversalibus certe adjiciendus videtur.

f Lacertus, qui, ut idem cum transversali initium praesefert, ita transversalium quoque finem habere quadantenus conspicitur. An tamen Santorini (c) elevatori novo, seu adductori prostatae respondet? Facile etiam in transversalium plexum reciperem

g Fasciculum, quem caeteroquin pro projectore urethrae novo Santorini (d), si ullum, haberi posse censeo.

---

(a) Santorinus *ibid.* lit. F.

(b) *Ibid.* §. VI.

(c) *Ibid.* §. v. Tab. III. fig. v. lit. V.

(d) *Ibid.* §. IV. loc. cit. lit. X.

- MM Fibrae in plurimos fasciculos discretæ, quæ sub transversis musculis communi fere cum
- h Levatorum imis fibris principio, ab extremo infero pubis crure decedentes sphincteri ani adjiciuntur. Caeterum hae fibrae omnes unum fere musculum compingunt, cujus pars superior interiori parti sphincteris prope anum adjicitur, pars vero altera cum caeteris sphincteris fibris in coccygem promittitur.
- N » Anus fibris utrinque rectis comprehensus ».
- OO Ani sphincter externus, » cujus fibrae in acutum productæ in » imam, posticamque acceleratorum partem insertæ ab Litrio pro
- P » Triangulari musculo sunt habitæ (a) ». Eaedem etiam » in
- Q » Penis membranam insertæ » conspiciuntur.
- i Specillum, cujus ope triangularis Litrii elevatus demonstratur.
- R Os coccygis, a quo imae levatorum fibrae, &
- ll Exteriores & » imae posticae fibrae sphincteris, quæ recta » anum amplectentes in priora ducuntur (b) ».
- m An interiores externi sphincteris fibrae posterius in arcum circa anum ductæ caeteris exterioribus copulatae? An orbicularis internus sphincter, qui in ima intestini recti ora perpetuus occurrat? hujus fortasse dissecta
- nn Vestigia sunt.
- SS Pars maxima ani levatoris musculi, cujus non modica portio sub MM delitescit.
- T Posterior ischiorum acutus processus, qui paululum excavatus, ac cartilagine obductus, trochleae ad instar est, tendini interveniens musculi obturatoris interni.
- V Tendo musculi obturatoris interni in duos veluti diremptus.
- W Ligamentum ab ischii tubere profectum, & in os coccygis, & sacrum terminatum, unde valenter haec duo ossa invicem colligantur. Hoc ligamentum, ubi maxime ad os coccygis, & sacrum accedit, ita cum altero lit. Z, ac cum musculo triangulari nexum est, ut unum omnino videatur: at prope tuber manifeste

(a) Santorinus *ibid.* lit. Q, S.

(b) *Ibid.* lit. P.



discretum apparet, atque ibi inter haec duo ligamenta, vasa ab iliatis procedentia, & ante internam faciem obturatoris interni infra transversales musculos excurrentia ad organa procreationi dicata traducuntur.


- o Spina processus acuti ossis ischii, e qua  
 X Musculus triangularis coccygis proficiscitur, qui tum in coccygem, tum in  
 Y Os sacrum terminatur.  
 p Ejusdem musculi triangularis ex opposita parte exigua portio.  
 Z Ligamentum alterum ab eadem ischii spina pronatum musculo triangulari quammaxime adhaesum, implexumque, ossique sacro firmissime nexum.

## FIGURA II.

Testem e suis involucris eductum refert.



- A Testis venter.  
 a a a Vasa pone tunicam albugineam perreptantia.  
 B • Caput superius epididymidis, infra quod  
 b Appendicula adest. Haec fere perpetuo observatur, non ejusdem tamen constanter figurae, ac molis, nec eodem semper praecise loco constituta: ut plurimum hac minor, major interdum, vasisque rubris referta, quandoque puncti ad instar est: alias e globulo superiore epididymidis pendet, alias inter globulum, ac testis corpus, plerumque tamen, ac fere semper, ut in figura, a testis corpore prope globulum superiorem enascitur. Huic corpusculum quod ill. Praeceptor saepe observavit, respondere plane videtur. *Ex albuginea*, inquit ipse (a), *qua prope globulum epididymidis superiorem, testiculum convestiebat, corpusculum subrotundum exstabat albugineae concolor*. Quod tamen corpusculum cum multa esset, aut non pauca intra vaginalem tunicam aquae copia, cum conspexisset, illud, inquit (b), *reliquiae magnae hydatidis esse po-*



(a) De Sed. & Caus. Morb. Epist. XL. n. 22., & XLIII. n. 22. 27. & alibi.

(b) Ibid. Epist. XLIII. n. 23. &c.

*luit, & quae diu aquam dedisset.* Nos vero appendiculam hanc satis conspicuam in adultis, exiliorem multo in foetibus constanter observavimus, eamque non modo cum multa esset intra tunicam vaginalem aqua, sed cum nihil hujusmodi praeter naturam esset, & testes eorundemque tunicae se bene haberent, nullumque aut praeteriti, aut praesentis alicujus morbi vestigium praesferrent: immo non modo eam solito multo minorem fuisse animadvertimus, cum admodum tunica vaginalis aqua praeter naturam distenta esset, atque maximam absque ullo aquae vestigio, sed bis haud nutantem, sed firmam, & callosam penitus, atque semel in toto teste, atque epididymide nullam, cum tunicae vaginalis cavum, aqua penitus repletum esset. Caeterum haec appendicula longe ab iis glandiformibus corpusculis differt, quae Praeceptor (a) descripsit, quaeque a praeclariss. Viro, non modo recensita, sed figuris etiam exhibita video; quae licet Praeceptor ab albuginea deduxerit, & revera a tunica albugineam obducente proficiscantur, tamen haud redarguendus videtur, tamquam si eorum sedem ignorasset, cum & ipsi albugineam ex duabus tunicis constare innotesceret; sed tantum ea ex albuginea deduxit, quia binae hae tunicae uno albugineae nomine appellitantur.

C Inferior epididymidis pars testi ope tunicae vaginalis arcte revineta, quae eam supergressa in testis exteriorem membranam continuatur.

D Tunicae vaginalis pars.

Hujusce tunicae originem perscrutantes Anatomici, mirum quantum inter se non modo superiore tempore, sed hoc quoque nostro disceptando decertaverint. Alii enim, & quidem in arte Principes Viri eam a cellulari peritoneae tunica deduxerunt, alii eam tamquam sui generis membranam proposuerunt, alii denique unam, eandemque tunicam esse cum peritoneo scripserunt, confirmaruntque. Inter tot varias, repugnantisque sententias, cur superioribus annis & privatim, & publice vaginalem tunicam *de celluloso textu exterius peritoneo circumjecto oriri* defenderem, praeter nonnullas observationes nostras, maximi momenti erant immor-

a a

talís Praeceptoris documenta (a), tum summi Halleri auctóritas (b), ut alios praeteream, cum ex propriis observationibus nondum ea mihi comparaverim, quibus propositam sententiam immutarem. Quae nonnulli praestantes Viri, & inter eos praeclarissimus Hunterus (c) summus Anatomicus Anglus, protulerant, haud ignorabam, quod tamen eruditissimo Hallero (d) acceptum refero: verum cum horum observationibus ipsemet Hallerus permotus non fuerit, ut a sua de vaginali tunica sententia recederet; cumque alii praeclarissimi Viri, nunc etiam post Hunteri observata, ipsisque cognita, idem ferme proponant, ab ullo aequo rerum aestimatore non mihi vitio datum iri arbitror, quod ego in cuius manus celeb. potissimum Angli opera nondum pervenerant, in suscepta sententia permanserim. Nihilominus opinionis meae minime equidem tenax, & veritatis unice amans omnem lapidem movi, ut quid hac in re sequendum esset, plane viderem. Viros per litteras in Facultate Anatomica eminentiores consului; at inde nihil praeter id, quod antea ego quoque docueram, accepi. Interea quotiescumque occasio, & ea quidem saepius conquisita sese obtulit, observationibus institi, utpote tutiori prae auctoritatibus viae, quae inter Anatomicorum ambiguitates, haesitationesque ad veritatem ducit. Quae mihi per hosce annos observare contigit, ingenue nemini addictus proferam, ea potissimum secutus, quae ab anno usque 1773. attuli, cum hanc, de qua loquimur, tunicam ostenderem, ejusque originem explicarem.

Non unam esse, eandemque testium sedem in foetu, ac in corpore nati hominis, aut paulo adultioris, ita per propria, & cl. Virorum observata tuetur Hallerus (e), ut neminem existere putem, cui ulla dubitatio superesse possit. In foetu enim, qui a conceptu recens est, testes in abdominis cavitate haerent, ibique sacco pe-



(a) *Ibid.* n. 8. & alibi.

(b) *Elem. Physiol. Lib. xxvii. §. vi.*

(c) *Recherches sur les Hernies de naissance par le Docteur Hunter, traduit de l'Anglois dans les Mémoires de Chirurgie par George Arnaud. Paris 1768. Hac Gallica editione utor, cum Anglicana caream.*

(d) *Ibid.* §. ii. & seqq.

(e) *Ibid.*



ritonaei comprehensi, non secus ac ventriculus, intestina, aliaque ventris viscera ab eodem verissime comprehenduntur. Eamdem quandoque sedem, cum jam foetus enixui proximior est, aut, licet raro, in lucem editus, testes obtinere observavimus, qui deinde sensim delabentes, & per rimam, quam annulum appellant, a tendineis muscoli obliqui exterioris dehiscentibus fibris definitam, quae ad inguina occurrit, trajicientes, in naturalem sibi a primordiis comparatam scroti sedem descendunt. Hinc iter quod legunt testes, a summa sede ad imam, a lumbis ad scrotum est. Quanam autem ratione, quibusque gradibus, aut quonam praecise tempore id contingat; quanam de causa moveri incipiant, & quanam iter suum conficiant; aut difficilia admodum exploratu sunt, aut nonnisi centenis observationibus definienda.

Anno 1772. inspectante cl. alias laudato Viro Varolio novimestrem foetum diffecimus, eo praesertim consilio, ut sedula de teste, aliisque ad eundem pertinentibus disquisitio institueretur. Aperto itaque abdomine testes non modo in scroti cavum delapsos comperimus, verum ad inguina, utroque in latere, penitus illud ostium occlusum inspeximus, per quod testes e cavo abdominis in scrotum descendunt. Quod cum & alias antea observaverim, inde factum, ut non modo superius expositam sententiam non immutarem, sed eam magis magisque defenderem; magis magisque cernens, & meridiana luce clarius, observationes ineunti quam caute, quam prudenter incedendum sit, easque saepe & saepius in mirabili, eodemque simplicissimo naturae opere perscrutando diversimode repetendas, antequam firmi quid statuatur, confirmeturque.

Non multo interea interjecto tempore alium fere novimestrem foetum perlustravimus. Ab abdomine pariter in scrotum ex utroque latere testes descenderant, atque laevum ad inguina orificium penitus occlusum vidimus; dexterum vero haud penitus caecum, sed adeo constrictum, ut testis regressum in abdomen denegaret. Aërem itaque ex cavo abdominis per illud exiguum orificium testem versus inflavimus, inspecturi, utrum tunica vaginalis intumesceret. Intumuit statim, intumuitque iterum, quotiescumque per illud orificium aërem in vaginalem infudimus. Rei novitate capti,

scrotum difsecuimus, atque cremasterem, & cellularem adeo removimus, ut vaginalis tunica conspicua fieret: tunc iterum eam inflavimus, iterumque manifesto vidimus eam statim intumescere. Hinc cum ea de re nulla amplius dubitandi superesset ratio, eam peritonaei partem discidimus, abstulimusque, quae abdominali annulo immediate respondet, eandemque una cum tunica vaginali ipsi continua in spiritu vini affervavimus, anxie deinde occasionem expectantes, qua novis observationibus haec confirmaremus. Interea sequenti anno, dum in Theatro de partibus virilibus generationi dicatis sermonem haberem publice, hanc tunicam ostendi, eamque eadem ratione inflavi; ac ingenue, quae observaveram, Audientibus bene multis, & inter eos Medicinae Doctoribus, & nonnullis etiam hujusce Universitatis clariss. Professoribus adamussim descripsi, alias caeteroquin observationes me esse facturum promittens, quibus si haec comprobarem, vetera penitus, penitusque exploderem.

Sequentibus ejusdem anni mensibus en mihi aliae observationes, quae vaginalem tunicam non unam, eandemque esse cum peritonaeo, nullum dubitandi locum reliquerunt. Abdomine semestris foetus reſerato, ac intestinis levi, suspensaſque manu ſublatis, illico in conſpectum venit teſtis dexter lumbis appoſitus, immediate ſub rene, a quo paucas lineas diſſidebat. Baſi innitebatur craſſiſcula, fere cylindrica, inferne tamen arctiori, cujus fundus exacte ei loco imminebat, qui abdominali annulo reſpondet. Ut autem hujusce baſis ſummo teſtis inſidebat non modo, ſed firmiſſime inferiori ſui parte eidem neſtebatur; ita reliqua ejusdem pars fere ſoluta, ſi nempe dempſeris partem, qua vaſa excipiebat, obſervabatur, ut nonnihil inde de ſede dimoveri poſſet.

Ad poſteriora teſtis, & nonnihil ad interiora epididymis ejusdem erat, cujus initium multo altius teſtis corpore ſeſe conſpicendum obtulit; immo & epididymis multo major erat proportionem, quam in adulto. Eo factum eſt, ut epididymis, quae in adulto tota ſui parte teſti aut adhaeret, aut arcte appoſita reperiatur, in foetu liberior, & teſtis magis comes, quam eidem attenſa appareat. Alterum autem epididymidis extremum infra teſtem producebatur.



Testem interea, & epididymidem spermatica vasa pone peritoneum adire observabamus, quae per tenuissimam peritonei praetensam membranam pellucebant. Ea ex arteria aorta, & cava inferiori proficiscebantur, quae oblique descendendo in unum deinde teretem, exilemque fasciculum compingebantur, propeque testem flexu facto sese explicantia, & pone eundem decurrentia, per peritonei duplicaturam, mediam, imamque testis partem adibant; non secus ac, quemadmodum apertis verbis etiam descripsit Hunterus (a), inter duplicem peritonei lamellam vasa per mesenterium ad intestina properare conspiciuntur. Vas autem semen deferens eandem peritonei duplicaturam, subiens per anteriorem, & superiorem basis partem, pone peritoneum, infra testem excurrerebat, donec sensim visui se subducens, inferiorem versus, atque posteriorem epididymidis partem contendere videbatur.

Basim autem, quae exterius non secus, ac testis, peritoneo obducebatur, interius spectantes cellulofam naturam praeseferre observavimus, & muco referta manifesto apparuit. Ab ima autem basi fibrae proficiscebantur, quae per annulum traductae, & in fasciculum collectae, suo apice in imam scroti interiorem partem sese demittere videbantur, illud quod ill. Hunterus (b) descripsit, *ligamentum*, sive *gubernaculum testis* aemulantes. Fibras praeterea, quae per interiorem ejusdem basis partem excurrerant, tunc observare datum fuit; verum cum posterioribus observationibus de iis nobis luculentius constiterit, earum idcirco descriptionem suo loco proponemus.

Haec in dextero latere: in laevo nihil in abdomine occurrit praeter vasa spermatica ex aorta sui que lateris emulgente, & vas deferens pone peritoneum gradientia, donec ad inguina convenirent. Erat autem ibi patens ostium, ex eoque vagina incipie-



(a) Les vaisseaux spermaticques sont situés derriere le péritoine, & vont se rendre dans le bord postérieur du testicule, en rampent entre les deux lames du péritoine de la même maniere que les vaisseaux passent pour aller aux intestins entre la duplicature du péritoine, qui forme le mésentere & le mésocolon. *Ibid.* p. 14. 15.

(b) *Ibid.* pag. 18.



bat ad scrotum vergens: hinc preffo digitis scroto in cavum abdominis exilit testis, ex eoque iterum, idem iter legens, in scrotum demissus est, idque iterum, iterumque repetitum fuit. Ut membranae testem in scroto obvolventes ejusdem imo lateri adhaerebant, ita mucosa substantia potissimum ad inferiora testis membranis apposita reperiabatur.

In maturo foetu nullus in abdomine testis aderat, patula tamen adhuc observabatur via, qua secesserant. Pressione successiva adactus alter testium e scroto pariter in abdomen resilliebat, rursusque in pristinum locum demissus iterum in abdomen propelli potuit: alter renuebat omnino, nempe quod arctius vaginae orificium in abdomen reditum eidem denegabat. Una cum teste basis ejusdem etiam e scroto in abdomen redibat, at multo minus crassa, minusque muco distenta observabatur.

In maturo pariter foetu, laborioso partu enixo, qui luce, atque vitalibus auris frui non potuit, in eundem testium situm offendimus, quem in semestri observavimus. Testis enim dexter in summis ilibus constitutus basi superius descriptae fere simili, nisi forte laxiori innitebatur, ejusque venter anteriora, & nonnihil exteriora spectabat, dum epididymis posteriora, & interiora tenebat.

Infra testem pone peritoneum descenderant vasa, tumque iterum assurgentia per laxam peritonei duplicaturam testem adibant ex inferioribus ad superiora pergendo. Simili fere ratione vas deferens ex ima epididyme enatum primum transversim, deinde deorsum ferebatur sinuoso, ac serpentino incessu. Quibus ita se habentibus cum basis digitis leniter versus abdominis foramen impelleretur, ejusdem portio facile extra abdomen protrusa est; validiorique pressione, totam basim cum teste excludere datum fuit. Inde enatum in imo peritoneo ostium persimile illi, quod in laeva parte conspiciebatur.

Ut quonam testis, & basis e peritonei cavo sub ea pressione disparentes reciperentur, compertum fieret, sublatis ad inguina communibus integumentis perspicue constitit foramen inguinale transisse: iisdemque rursus abdomini restitutis, visa est basis non ad peritoneum desinere, sed ulterius producta, disjectis demum fibris, partim in os pubis, partim in cellulosa, quae ad inguina

erat, immitti. Cum autem hac in basi quaedam, ut superius diximus, peculiaria considerata occurrant, nunc quo ordine a nobis observata sunt, recenseamus, oportet.

Et quidem primum concipiatur velim basim ad instar perae cujusdam inversae factam esse ex peritoneo, quod cum circa abdominalis annuli oram, & utrinque ad basis, & epididymidis latera ascendat, sursum ad operiendam ad anteriora potissimum, atque ad latera basim, testemque scandit: itaque ad posteriora per ejusdem peritonei duplicaturam, cellulari intercedente, laxe basis ad ilia revincitur, & testis in hujusce basis summitate occurrens, eadem peritonei tunica obducitur, ipsique continuata. Hanc igitur peritonei tunicam, quam etiam Hunterus (a) descripsit, totum testem obducere observavimus, si eam tamen demamus partem, qua vasa spermatica testem subeunt. Ut autem explicata quodammodo membrana basim, & testem ad ilia revinciens conspiceretur, prehensio extremis digitis teste, eoque aliquantulum elevato, triplex corpus ad testem ferri observatum est: primo nempe vasa summum duplicaturae limbum perreptantia, secundo vas deferens imam testis partem versus pergens, tertio corpus, quod e regione annuli abdominalis basim subiens imum testem attingebat, ad interiora magis nonnihil deferenti vasi, & epididymidi implexum. Licet vero hujusmodi corpus aberrantibus, & explicatis fibris initio ab osse pubis, & adjectis partibus deducatur; ita tamen progressu collectis fibris sensim in depressum cylindrulum compingitur, ut sub ea specie in abdomen ingressum ad testem propagetur. Detracto praeterea quoad fieri potuit diligentissime a basi peritoneo, ut nudum hoc corpus conspici posset, fibris in inferiori parte secundum longitudinem dispositis, in superiori decussatis, atque intertextis implexum satis manifesto apparuit; neque ejusdem perpetuo crassitie. Ex contracto enim & exili, latius, & crassius fiebat ad aliquam a teste distantiam: contrahebatur denuo, ubi testi applicabatur.

Intimiora autem perscrutantes frustra specillum fibroso ei corpori indere conatus sum, neque cavitatem ullam deprehendere

---

(a) *Ibid.* p. 13.

potui, in qua mukum, quem alias observaveram, latere debuisse mecum ipse cogitabam. Verum nulla praecise mucosa substantia oculis obvenit, sed tantummodo vascula quaedam sanguifera, & plures fibrae, quarum aliae a musculo obliquo interiore, & ab osse pubis proficiscebantur, aliae ab inguinis regione, & ab ejusdem cellulari discedere, aut in eam sese explicare manifesto observabantur. In hisce examinandis cautissimi exploravimus, num aliquae ad scrotum vergerent, verum ne fibrilla quidem, aut lineola ex abdomine in scrotum producebatur. Contractum enim ab hac dextera parte scrotum, & muco laxae cellulari commixto plenum repertum est.

De sinistro teste satis dixero, si ea omnia in scroto me reperisse monuero, quae traditis usque modo de dextero fere adamussum respondeant. Patens & hic erat ad inguina ostium, intra quod reflexum peritoneum, & in scrotum usque protrusum, vaginam conficiebat, qua testis comprehendebatur. Vagina a summo ad imum aperta, in conspectum venit testis eo positu, quo in adultis observari solet. Vasa spermatica pone posteriorem vaginae faciem decurrentia, & ad angulum acutissimum cum deferente coeuntia testem, ubi solent, adibant. At vas semen deferens multo magis descendens infra testem epididymidi reflexae occurrebat, interiusque perreptabat, quam caetera vasa, quae in fasciculum collecta, seorsum, non longe tamen a deferente excurrerant.

Ima testis pars in ima vagina defigebatur, ea ipsa ratione, qua ad basim esset, si adhuc in abdominis cavo degeret. Immo teste versus abdomen ducto, tunicae testem antea obvolventes basis ipsius speciem mirum in modum praeseferebant.

Tunicas testi circumjectas, si minus prima vice, in foetu scilicet recens secto, saltem post aliquam macerationem, facillimum fuit sejungere; eam nempe interiorem, quae manifesto a producto peritoneo erat, ab exteriori, quae potissimum a musculo obliquo interno, & in parte etiam ab osse pubis derivabatur, quaeque cum descriptarum fibrarum origine quammaxime conveniebat, inter utramque tunicam laxa cellulosa erat, potissimum in summa earum parte, qua facilius disjungi potuere. Insignior denique cellulosa exteriori tunicae circumjiciebatur.



Novissime adstantibus, summa cum diligentia, nonnullis ex meis exercitatis Alumnis quadrimestrem foetum dissecai. Testes in cavo abdominis erant, sed adeo infra renes, ut inter utrosque auricularis fere digiti apex intercederet. Horum bases, quae exiles admodum erant, cum singulae vix testis crassitudinem aequarent, descendendo sese inflectebant, contrahebantque, donec ex utroque latere ad abdominalis anuli regionem pervenirent; ex quo fibrae in fasciculum collectae proficiscebantur, quae suo apice in interiorem, & superiorem ossis pubis partem sese demittebant, ut luculenter figura II. Tabulae nostrae secundae, ad cadaver delineata perhibet. Hae fibrae apicibus suis adeo inter se conveniebant, ut una cum basibus, testibusque simul sumptae supra penem inversum semicirculum circumscriberent. Ex fasciculo autem fibrarum sinistri lateris, e latere externo, fibrilla alba satis firma oblique deorsum propagabatur, quae licet scrotum versus tenderet, quod parvum admodum erat, & solo muco repletum, tamen antequam illud subiret, magis magisque extenuata evanescebat. Caeterum testes per laxam peritonaei duplicaturam adeo in cavo abdominis haerebant, ut facillimo negotio sedem immutare possent. Hinc testium ventres, qui primum, diligentissime sublati intestinis, ad anteriora, & nonnihil etiam interiora in conspectum occurrere, in eorundem testium partium disquisitione in diversum facile abire observavimus. Vasa autem semen deferentia, quae infra testes per anteriorem, summamque basis partem excurrebant, serpentino, mirificoque incessu in transversum, versus posteriorem vesicae partem contendere, quemadmodum & spermatica vasa, sinuosis flexibus contra testes descendere luculentissime intuiti sumus. Num vero basis cava esset, inspecturi, tubi ope pone peritoneum ad abdominalis anuli regionem basim versus aërem inflavimus; at nullum eo loci cum basi commercium esse plane percepimus. Experimentum idem ex interiori peritonaei parte iterum confecimus, num peritoneum fibras, quae basim subeunt, descendendo obduceret, perspecturi: at licet maxima habita diligentia, ad basis extremitatem aërem inferiora versus, neque levi conatu inflaremus, nullimode peritoneum descendere, si vix linea parisiensis ex laterali, & anteriori parte dematur, ut

diligentissime etiam adnotavit Hunterus (a), sed, ut alias sursum inflecti ad obducendam basis extremitatem observavimus. Denique testem una cum basi anulum versus deiecimus, ut eum extra abdominis cavum detruderemus; at incassum omnia, forte quia nimis adhuc contracta basi, & anulo, transitus testi denegabatur.

Juxta ea, de quibus observando constitit, ex abdominis cavitare in scrotum deducendus est testis. Cumque basis, qua testis nititur, satis conspicua, atque adeo minime negligenda, sub ipso testis descensu evanescat, quid eidem eveniat, potissimum attendendum est. Id autem licet videam quam arduum mihi sit apta descriptione exhibere, non tamen admodum difficile intellectu idem futurum illi puto, qui ad superius exposita attente, diligenterque animum adverterit.

Basis testem suffulciens in imo minime resistentem sedem nanciscitur. Deficit ad ea loca peritoneum, ut supra attigimus, & tendineae musculi obliqui exterioris fibrae sponte dehiscunt, ut & fibroso corpori basim subeunti, & ipsi deinde, & basi, testisque descensuro transitus facile permittatur. Hinc acta quacumque de causa deorsum basis, qua data porta exit; hac tamen ratione, ut qua deprimitur, invertatur basis, & vagina proinde efformari incipiat, quam testiculus ipse basim insequens jamjam subiturus est. Tum vaginae ostium ingreditur testis, in ea sese demergit, tendit ad scrotum, in quo sibi deinceps commorandum, & tota basis extroversa in vaginam sensim abit.

Hinc quae in basi considerabantur, inversa penitus ratione consideranda sunt in vagina. Exterior nempe basis tunica modo constituit interiorem vaginae: fibrosum corpus modo dicta tunica antea obductum, eidem jam circumponitur: mucus denique intimam basim tenens, nunc exterius vaginae omnino circumjicitur. Ita etiam summae basis pars, imam jam vaginam efficit; cujus ostium, seu initium e basis fundo constituitur. Hanc basim, dum testes adhuc in abdominis cavitare degunt perpetuo reperiri cum ex nostris, tum praecipue ex praestantissimi Hunteri observationibus quammaxime eruitur, cum ipsemet basim hanc, quam nos pro-



(a) *Ibid. Tab. 1. lit. T T.*



posuimus, aliqua licet diversitate, aliaque ratione *ligamenti*, seu *gubernaculi testis*, ut superius dictum, disertis verbis descripserit (a). At optandum sane foret, ut plures, immo plurimae congeri observationes possent, atque conferri, unde praecipua, si assequi possit, intelligeretur causa, qua testes in scrotum descensuri a lumbis removeantur, gradusque deprehenderentur, per quos transeunt testes, dum integrum iter a lumbis ad scrotum absolvunt. Verum licet admodum conquisitae, nobis raras nimis exhibentur hujusmodi observationum instituendarum occasiones.

Caeterum si habitis foetuum sectionibus fidere, habitaeque conjecturae inservire voluerimus, consultissime omnia comparata fuisse intelligemus. Miranda sane erunt quammaxime naturae consilium, sedulitas, atque industria, quae cum interesset testem a primordiis in abdomine absolvi, deinceps vero eodem excludi, ea omnia vel in ipso abdomine posuit, quae aut faciliiori sternendo itineri, aut confecto itinere commodiori incolatui parando necessaria forent.

Basi inversa totam *μεταμόρφωσιν* explicuimus. Ita neque peritonaeum dirumpi dicendum est, quod absonum censerem, neque nimis distrahi oportet, sicuti contingeret, si a teste urgeri debuisset. Ita musculorum abdominis fibrae neque disjici, ut locus transeunti testis fiat, neque abstrahi, aut impelli necesse est, ut cremasteris muscoli ortus intelligatur. Ita demum ex cellulosa peritoneo circumposita nihil in scrotum trudendum est, ut ex eadem multiplices testem obvolventes membranae conficiantur. Vasa denique, cum non recta, brevissimaque via, sed flexuoso incessu (b) pergantia testem abdominis indigenam adeant, nihil fere quam sese extendi patiuntur, dum testes ab abdomine in scrotum descendunt: atque ex peritoneo, id fortassis praecise in efformanda vagina impenditur, quod tegendae prius basi inserviebat.

Fibrarum praeterea illarum, quae basim subeunt, naturam perscrutantes quammaxime cum musculo cremastere (c) convenire,

b b 2

(a) *Ibid.* p. 18. 19. &c. *Tab. I. lit. TT*, & *Tab. nostra II. fig. I. lit. I.*, & *fig. II. ii.*

(b) Hunterus etiam *ibid.* p. 14. *Tab. I. lit. QQ, SS*, & *Tab. nostra II. fig. I. lit. tu*, *fig. II. ee.*

(c) Je suis fort disposé à croire qu'il est (*ligamentum scilicet*) en partie composé du muscle cremaster tourné en dedans, & montant pour joindre la partie inférieure du testicule. Hunterus p. 19.



immo earum plures origine, incessu, & fortassis etiam natura easdem esse satis dilucide observavimus. Disiectae nonnihil ab initio cremasteris fibrae a musculo potissimum obliquo interno, & a transverso profectae ad funiculum accedunt, circum quem secundum longitudinem dispositae, usque ad testem abeunt. Ibi vero tenuem quidem, sed satis stipatam tendineae fere indolis membranam, in qua nullum perpetuum fibrarum ordinem reperias, constituunt, quae tunicae vaginali adhaeret. Quod autem maxime attendendum, id est cremasterem a reliqua vaginali facillimo negotio separandum, difficillime neque nisi validiori distrahente vi ab ea parte sejungi, qua testem immediate attingit; ibi enim imo testi, & inferiori epididymidi, & initio vasis deferentis mediis tenacissimis fibris adhaeret. Num hisce musculi cremasteris fibris tribuenda actio illa, qua testis primum e sua abdominis sede removetur? An e testis corpusculo sensim augescente, & supra easdem fibras gravitante, earundem fibrarum contractio repetenda est, qua testis una cum basi deorsum detruditur? An & ratio cur saepe in foetibus testes ad inguina reperiuntur? Parum admodum observando progressi sumus, ut quid certi in obscurissima adhuc re proponere audeamus.

Reliquae autem, quae supersunt fibrae, a musculis fortassis cremasteris fibris distinguendae, quaeque una cum illis corpus illud cylindricum constituunt, de quo jam antea dictum est, num cellulares essent, an vero tendineae, an potius & ipsae musculares, & cremasteri musculo accensendae, ex earum exilitate, nos haud assequi potuisse ingenue, ultroque fatemur. Verum si minus earum naturam, incessum vero observare dilucide nobis datum fuit. Has enim cum una cum modo descriptis illae eadem sint, quas superius Hunteri *ligamentum* aemulantes descripsimus, rarissime in fasciculum collectas in imam scroti partem adire vidisse visi sumus, sed frequenter ad inguina in cellularem sese explicare, alias in os pubis sese demittere, quandoque inter inferiores musculi obliqui exterioris tendineas fibras implicari adeo intuiti sumus, ut haererem admodum, num eas, cum a musculi cremasteris fibris diversimode persaepe proficiscentibus non multum declinare censeam, peculiari nomine designare deberem. Praeterea hasce fibras

primum in longitudinem aggestas, deinde implexas, & cum fibris musculi cremasteris immixtas vidimus, quae ante priorem spermaticorum vasorum faciem decurrentes, per vaginam testis distribuebantur, donec vasi deferenti, extremo epididymidi, atque adeo testis adhaererent? Num & eae testis exituro viam apte, appositeque sternendo ejus descensum regunt, moderanturque? Certe ex abdomine testis non cedit nisi corpore illo praeunte.

Hujusce fibrosi corporis, five totius basis intima muco ut plurimum replentur, ut novissima etiam observatione videre datum fuit. Hic, dum basis extrovertitur, exterior fit. Ut de ejus natura compertum haberemus eo per medium discisso, vascula exilia admodum vix enata ejusdem substantiam ex parte in cellularem, ac fere gossypiaceum textum versam subeuntia, manifesto observavimus. Hanc cellularem ab hoc muco productam fuisse is facile intelliget, qui quam parum cellulosa a muco distet, attenderit.

Si de hujusce muci usu inquiramus, ni plurimum fallor, tribus potissimum de causis a natura comparatus fuisse videtur. Primum fortasse ut testis abdominis indigena erecto foetu, inferiore sui parte in eo corpore pulvinaris instar satis mollis nitatur, deinde ut ad faciliorem basis inversionem inserviat, ipsique quodammodo testis via praetereunti lubricet; denique ut ea aliqua ex parte cellularis tela enascatur, quae in scroto circa musculum cremasterem conspicitur, ut testes magis magisque non modo molliter ferventur, sed ne ex variis motibus male, & quidem facile afficiantur.

Haec vero omnia cum & rationi consentanea sint, & simplicissimae agentis naturae methodo congruere videantur, & quod magis refert ex habitis observationibus fluant, non longe ab inquisitae rei veritate abesse crediderim, cognoscens tamen quanto plura desiderentur, ut certi quid tuto statui, ac exacte definiri possit: Video multos, eosque conspicuos ramulos e spermaticis per vaginalem, & cremasterem distribui. An innumera etiam vascula serpentum more per cellulosam cremasteri circumjectam repentia a spermaticis derivantur? Si ita; cum teste in abdomine degente nil spermaticis vasis irriguum esse potuerit, quam testis



ipse, & basis, sequitur in eadem basi vaginalem, cremasterem, & cellulofam etiam praeextitisse. Neque enim si nudus, ac solus, ut placuit quibusdam, testis ex abdomine elapsus foret una cum propriis dumtaxat vasis, eadem vasa tam copiose accitis sibi descendendo membranis eum impertiisse credibile est. Quid plura? Si secta vagina denudatur testis, & vaginalis eidem commissa invertitur, ut quae testem cum circumpositis membranis operiebat, nunc & cremasterem, & mucum quodam modo complectatur, & in basin abeat? Idem & in postremo foetu confirmatum est.

Vidimus testes peritoneaei cavo contentos, vidimus ad inguina, vidimus inclusos scroto, apertam vidimus vaginam, qua ex abdomine in scrotum ducti fuerant. Clauditur vaginae ostium: clausum vidimus, dum testes adhuc pone peritoneum ad inguina immorarentur, viderunt alii. Clausum exhibent adulti homines, neque aqua, neque flatus ex cavea peritoneaei in scrotum adigi possunt. Superest quandoque cicatricula, quandoque fovea, alias nullum vestigium. Rarissimo exemplo in adultis patulum ostium servatur; repertumque est nobis bis, inspectantibus nonnullis ex meis Auditoribus, an. 1773. in sexagenario ex utroque latere absque ullo aut herniae, aut alicujus morbi vestigio, calami scriptorii magnitudine; tum pariter sequenti anno, adstante inter alios clariss. Viro Cravosio in quadragenario homine, ut non exile specillum admitteret.

Hoc patulum vaginae ostium, licet e ventris cavo ad testem non viderit Morgagnus, tamen vaginae caveam adeo dilatatam observavit, ut non modo *tres supra testiculum digitos pollices ascenderet* (a), *sed ad summum usque os pubis produceretur*. Quae obser-



(a) Epist. Anat. XLIII. n. 22. 25. Hanc tunicae vaginalis caveam praeter naturam esse, accuratae observationes nos docuerunt. Duodecim continenter vaginales tunicas aëre arte distentas, ut earum altitudinem exacte metiremur, exploravimus. Ex iis unam, quae multum aquarum copia distendebatur, non modo tres supra testem digitos pollices ascendere, sed eandem etiam superare observavimus; reliquae vero multo infra occludebantur, ut diligentissime captis dimensionibus, vix eas supra testes, quorum longitudo una cum ipsis adnexa epididymide haud viginti Parisiensium linearum dimensione minor est, pollicis unius cum dimidio altitudinem ascendere viderimus: imo harum septem, quae secundum naturam se bene habebant, totam caveam a summo ad imum accurate metiendo, nec novem & viginti Parisien-



vationes nisi plane cum nostris, saltem maxima ex parte convenire videntur. Sive enim superiores tunicae vaginalis parietes coa-  
luerint nunquam, ut latam illam cavitationem relinquerent, sive a  
distendente aquarum copia superiores vaginalis parietes ab invi-  
cem, solutis nec tentibus fibris, se jungerentur, quod ita longe fa-  
cilis est explicare, quam excogitatum septum, aut vaginalem  
tunicam disruptam censere, id certum est *eam vidisse cavitationem  
nullis interruptam cellulis, fibrisque . . . . . minus latam quo ma-  
gis sursum iret*, quod plane & vaginae ipsi, & iis respondet,  
quae nos superius de basi adnotavimus, nempe arctiorem esse,  
quo magis descenderet. Caeterum tunicam vaginalem à ventris  
cavitate ad testiculum perviam jam observavit Meryus (a), &  
ante Meryum Boscus (b), qui in puero non modo semel, sed id  
*saepe se vidisse, & ostendisse* affirmavit, deinde in homine quadra-  
genario Georgius Arnaud (c), alique plures, quorum nomina  
cum summa eruditione Hallerus (d) recenset, ne in longum ni-  
mis protrahatur descriptio, ea omittere consultum ducimus.

Quae cum ita sint, mirabitur fortasse nemo, si quis non modo  
in pueris, verum etiam in adultis, atque senibus hernias con-  
genitas interdum reperiri contenderit. Nihil enim proclivius est,  
dum aliqua de causa vaginae orificium haudquaquam conferbue-  
rit, quam ut intestina per patulum illud orificium ex abdominis  
cavitate elabantur, in tunicam vaginalem descendant, ipsumque  
testem, nulla intermissa tunica, immediate contingant. Quae ta-  
men res cum raro accidat, cumque summam Professorum dili-  
gentiam saepissime eluserit, nihil inde mirum, si praestantiores in  
Anatome Viri veteribus iis, qui tunicam vaginalem a peritoneo  
factam, eamque in pueris se vidisse, atque ostendisse ab initio

---

ses lineas eam transcendere inspectavimus; quam longitudinem tres digitos pollices non supe-  
rare omnibus notum est. Hujusmodi itaque supra testes tunicae vaginalis extensionem, *fere  
secundum naturam esse* aut nemo fortasse dixerit, aut saltem non inconsiderate, sed scienter,  
& apposite scripsisse Morgagnum, cum eandem extra naturalem modum esse tradiderit.

(a) Mém. de l'Acad. Roy. des Scien. an. 1701. obs. 2. 3.

(b) In Sepulchreto Sect. XXIX. obs. 5.

(c) In animadversione undecima laudati Hunteriani Operis *ibid.* p. 79.

(d) *Ibid.* §. II. not. (1) (m) p. 416.

usque ad finem dilatatam affirmarunt, nequaquam crediderint, eosque hallucinatos fuisse judicaverint; cum hi in eos dissecando tantummodo inciderint, quibus orificium, ejusque vaginae cervix juxta naturae leges ab initio penitus occalluerit. Vix enim e cavitate abdominis elapso testiculo, tenues vaginae parietes ad superiora apponuntur, atque confervent.

His ita se habentibus, quid de albuginea, atque vaginali testis tunicis sentiendum sit, nemo non videt. Indubium est basim membrana operiri peritoneaeo continua, eidemque peritoneaeo, continuam esse exteriorem tunicam, quae testem obducit. At teste in scrotum delato non alia ratione membranas illas se habere putandum est. Quae prius basim exterius vestiebat, vaginam interius obducere supra dictum est. Sed quacumque ratione vagina produci dicatur, eam a producta peritoneaei lamella oriri negarit nemo, qui per apertum ad inguina ostium peritoneaeum demitti viderit, multoque evidentius, aperta a summo ad imum vagina, idem observaverit, quemadmodum Tabula nostra II. ad naturam delineata perhibet. Sed neque tunica exuitur testis, quam abdominis incola a peritoneaeo acceperat, neque novam sortitur, ubi vagina inclusus in scroto degit. Superest itaque, ut & testis a peritoneaeo operiri omni jure debeat.

Qui testem in abdominis cavitate viderit, eum a peritoneaeo amiciri negarit nemo; at qui tunicam testis albugineam cum ipso peritoneaeo comparaverit, id fortasse in dubium revocabit, non aliis caeteroquin rationibus usus, quam peritoneaeum ex una tantum tenui, firmaque membrana constare, cum testis tunica albuginea ab aliis in triplicem, in duplicem ab aliis aperte dividatur. Haec dicentibus haud facile refragabor, cum & ego non modo post diutinam macerationem, verum etiam vix dissecto teste, ejus substantiam a duabus membranis operiri dilucide, atque perspicue viderim. At licet haec vera sint, non ideo sequitur testem a peritoneaeo nequaquam amiciri. Testis enim habet utique tunicam propriam, quae nervea, sive albuginea appellatur; at haec, quemadmodum superius indicavimus, a tenui, exilique membrana vaginali continua obducitur, ut nihil inde mirum sit, si tunicae albugineae divisionem plures praecl., ac praestantiss. Viri Moli-



nettus (a), Morgagnus (b), Teichmeyerus (c), aliique proposuerint; licet proprie haud ipsa albuginea dividatur, sed ab altera a peritoneo prorsus deducta, ipsi imposita, adhaerenteque per cellularem tunica tantummodo cooperiatur. De hac ipsa tunicae albugineae superinducta membrana etiam ill. Hallerus (d), & presse, aequae ac distincte cel. Petrus Tabarranus (e) in Senensi Academia Anatomies Professor vera docuit, dum scilicet eam unam, eandemque cum vaginali tunicam esse tradidit.

Vaginalis autem tunica *in tres omnino laminas* nequaquam dividua est, qualis inter Anatomicorum nonnullos traduci solet. Una est, atque simplex membrana, tum si patula adhuc vagina a simplici peritoneo derivetur, tum si superius clausa testem tantummodo comprehendat. Cellulosam telam e cellulari peritonei potissimum productam, quae spermatica vasa in fasciculum cogit, eaque satis apte circumsaepiens vaginae cujusdam quasi speciem exhibet, vaginalem funiculi appellare consueverunt. Ubi autem haec funiculi vaginalis tunica ad eum locum pervenit, quo spermatica vasa per peritonei duplicaturam testem subeunt, haud deficit, neque in septum stipata evanescit, sed ulterius producta, partim vasa testem subeuntia sectatur, & protegit partim vero sese explicando in vaginalis tunicae testis cellularem abit. Idem de cellulari vaginula vas semen deferens obducente, quemadmodum & de subtiliori illa vasa spermatica figillatim comitante dicendum. Haec funiculi vaginalis tunica prope testem ex peritonei duplicatura contrahitur, ac deinde conlaxatur, ut sese inter musculum cremasterem, & propriam testis vaginalem, per cellularem explicet.

Aëre per funiculi vaginalem immisso, licet ad epididymidis sedem persaepe subsistat, tamen digitis vaginalem funiculi testem versus urgendo, non modo totam eam partem, quae circa epidi-

c c

(a) Differt. Anat. Pathol. &c. Patavii 1669. lib. VI. Cap. IX. p. 315. 316.

(b) Adver. Anat. IV. n. 1., & Ep. Anat. Med. XLIII. n. 32.

(c) Vindic. quorundam invent. apud Hallerum Vol. IV. p. 396.

(d) Ibid. §. VI.

(e) Lettere del sig. Dott. Pietro Tabarrani. in Siena an. 1768. Lett. I. p. 18. e seg. Tav. VIII. IX. fig. III.



dymidem est, sed eo ulterius pergente, illam etiam inflari observavimus, quae testem obducit, quae scilicet inter musculum cremasterem, & propriam testis vaginalem intercedit: immo in uno hujuscemodi experimento aërem per cellularem vasorum adeo ulterius se conjicere observavimus, ut peritonaei tunica, quae albugineae superextensa est, magna ex parte intumesceret. Idem factum quotiescumque, levi inflictio vulnuscule, in infimam cremasteris partem aërem inflavimus; tunc non modo quae circa vaginalem testis propriam sunt, sed cito funiculi vaginalis ipsa elevabatur. Contra vero testis vaginalis propria non modo hisce experimentis nunquam intumuit, sed depresso contra testem urgebatur; quod manifeste probat, & vaginalem funiculi per cellularem vaginalis testis sese explicare, & nullam propemodum inter vaginalem funiculi, & propriam testis communicationem esse.

Hanc funiculi vaginalis tunicae per cellularem vaginalis testis extensionem jam observavit Petitus (a), eandemque postea ill. Tabarranus (b) luculentius exornavit. Vasa autem, quae hac vaginali comprehenduntur, sive testis in cavo abdominis, sive in scroto degat, perpetuo pone peritonaei tunicam excurrunt, ut nulla ratione dicendum fuerit in *congenitis herniis intestina cum vasis spermaticis nudis misceri*, cum id, nisi rupta peritonaei, aut quod idem est, tunicae vaginalis membrana, contingere nullo modo possit.

Ex hisce itaque nulla prorsus ratione funiculo, atque testi communem primam illam dixerim (c). Ita etiam animadvertente cl. Arnaud, apud Hunterum (d) apertissime reperio. *Vagina commu-*

(a) Anatomie Chirurgicale. par M.<sup>r</sup> J. Palfin entièrement refonduë par A. Petit, à Paris 1753. Tom. II. Part. V. Cap. XX.

(b) *Ibid.* p. 24.

(c) Si quis hanc tunicam communem appellare voluerit, quia ut funiculum involvit, ita & per superficiem tunicae vaginalis perreptat, haud renuam; dummodo tamen vaginali tunicae, & funiculo; non vero testi, & funiculo communis dicatur, cum vaginalis funiculi nihil prorsus cum teste commune habeat.


(d) Pag. 31. not. (b), & passim alibi. Le Docteur Hunter, ni M.<sup>r</sup> son Frere n'admettent point de tunique vaginale commune au cordon, & au testicul. Ils n'en connoissent point d'autre que la tunique vaginale propre du testicul &c., dont je ne répète ici la véritable existence que pour écarter la confusion dans les idées des Lecteurs préoccupés des préjugés anciens, qui subsistent encore dans les meilleurs Auteurs modernes.







Fig. I

Fig. II









*nis*, ita juxta praecl. Lobstienii sententiam habet Hallerus (a), *funiculo*, ac *testi* paratur aëre inter eam, & *vasa* impulso: ita totus *funiculus* inflatur, & aër *sedem* elevat, quae est pone *epididymidem*, & in ejus ambitu . . . . sed *vaginam testis* non facit secedere: si fortius aërem urseris, rumpitur *vagina communis*, priusquam *vaginalem testis* elevet indicio manifestissimo perperam *vaginalem funiculi* propriam, & *vasorum*, *testi* communem esse factam; eamdem rem observavit etiam Alexander Monrous, & ulterius confirmavit Tabarranus (b). *Funiculi vaginali tunica inflata*, *vaginalis testis* nequaquam elevatur; neque intumescit unquam *vaginalis funiculi*, licet *vaginalis testis* quammaxime infletur.

At caeteris omiſſis, talem ne *vaginalis funiculi* cum *vaginali tunica* testem continente nexus rationem habet, ut simul cum ea considerata uno *vaginalis* nomine comprehendi possit? Duae mihi *vaginae* forent; altera *testis*, *funiculi* altera: sed alia prorsus ratione concipiendae. Illa membrana est caveam intercapiens, suo ditatam vapore, suoque viscere insignem, & peculiari omnino nomine donanda, cum *peritoneo*, *pleurae*, *pericardio*, *meningibus* comparari omni jure possit, ac debeat. Alteram vero *vaginam* dicerem *funiculi*, ut *vaginas* vocant *cellulares thecas*, quibus *vasa*, ubi plurima aggesta ea sunt, involvuntur.

Verum ut hanc nimis fortasse protractam, quam huic loco conveniret, *vaginalis tunicae* descriptionem absolvam, petenti, quotnam testibus *tunicas* tribuam, reponam facile, ubi *intima testis* propria *albuginea dicta*, & altera huic *superextensa membrana vaginali testis continuata*, demantur, triplicem mihi esse *testium tunicam*, primam nempe *cremasterem*, alteram *vaginalem testis propriam*, tertiam *cellularem*, inter utramque interjectam, cum eae, ex dictis antea, facile deducantur, neque desint observata, ut magis magisque confirmentur.



(a) *Addend. Lib. xxvii. p. 420.*


(b) *Ibid. pag. 24. not. (a), & pag. 27.*





## TABULA XVII.

» Ostendit Virginis . . . . naturalia suis in sedibus haerentia ,  
 » ipsorum musculos , eos quoque , qui ano dati sunt ,  
 » sphincterem scilicet , & levatores » .



A » **M**ons Veneris » .

BB » Diducta pudendi muliebris labia » .

a » Clitoridis summa pars , quae glans dicitur , cui supereminet  
 » ejusdem velut

bb » Praeputium in multas rugas compositum » .

CC » Nymphae , utrinque altera , *diductae* , quarum summa pars in acu-  
 » tum angulum conformata in clitoridem terminatur » .

c Orificium » urethrae inter Nymphas , atque adeo infra clitori-  
 » dem , cui glandosum irregulare prominulum corpus (a) » , & mu-  
 costi sinus circumponuntur .

dd » Hiatus lacunarum Graafii , quarum plures , ac patentiores ad  
 » urethrae osculum disjecti Santorino occurrere (b) » .

e Interior pudendi facies inter urethrae , & vaginae orificia , ubi  
 appendiculae , & prostaticae Bartholini oscula , & sinus , & glan-  
 dulae conspiciuntur .

D Vaginae aditus .

ff » Hymen , seu claustrum virginale » .

E Fraenum , seu duplicatura cutis , in quam ad angulum labia  
 terminantur .

F Os pubis , quod infero crure versus

GG Ischii tubera producitur .

HH Clitoridis muscoli erectores .

g Musculus Santorini novus » muliebris urethrae depressor , qui ab  
 » uno ad aliud latus continuatus producitur » .




(a) Santorinus *ibid.* Tab. II. fig. 1. Cap. XI. §. V.

(b) *Ibid.* §. VII.

II Vaginae sphincter, seu Cunni constriCTOR. Hujus musculi initium tenuissimis, ac diffusis fibris, a membranosa quadam lata substantia tegumentum ad instar, quae pone transversales musculos occurrit, propemodum proficisci observavimus. Id ipsemet etiam Santorinus hac nova Tabula exhibere videtur, cum hujusce musculi fibrae haud circa medium transversalis musculi quasi ab eo pronatae discedere observentur, sed ab eadem

h h h Substantia, quae a transversalibus musculis prorsus sejuncta conspicitur. Hic musculus, quem nunquam Santorinus ab ani sphinctere deduxit, inter incedendum plexui reticulari infernitur, & » exteriorem, seu superiorem sphincteris partem constituit; quae vero » fibrae Cunni osculo propinquiore sunt, ab eodem imo vaginae » latere membraneae, seu tendineae emergunt, ac eidem attensae » una cum fociis vix ultra duorum digitorum spatium occupantes » ad clitoridis crura contendunt; neque, ut plurimi opinantur, sub » illis sese recondunt, & inferuntur, sed in tendinem abeuntes partim » subjiciuntur, partim ubi ea curvantur, iisdem inferuntur, eaque » superascendunt: ut eo facilius, & quo vaginam amplexantur, sphincteris » munus obeant, & quo clitoridem deducunt, suo magis magisque » munere fungi possint ». Quibus haec etiam subdit Santorinus (a). *Praeter id muneris, quod sphincteri vulgo tribuitur, illud etiam adjiciendum videtur, ut subiecto cavernoso corpori comprimendo datum videatur; sub hoc siquidem musculo naturalium mulierum ostio circumducitur corpus id retiforme ex mira vasorum implicatione enatum, quod ob crebros, conspicuosque sinus cavernosum appellatur; quod ex arteriis quidem nonnullis constat, at maxime ex venis nova ratione dispositis, ut hoc quoque sinus appellare conveniat. Hae iterum & amplae sunt, & crebro diremptu diductae, & frequentibus coitionibus iterum copulatae, ut non ad producendum sanguinem, revehendumque, sed ad continendum potissimum iis in locis sic accommodatae videantur. Praeterea interior earum facies similis omnino est iis sinibus, quos supra in virorum organis memoravimus. Si quis autem sedulo, quod nobis jucunde contigit, videre optat,*



(a) Ibid. §. III. pag. 207.



curet, ut in aliquem ex his sinibus disiectum spiritum conjiciat, protinus percipiet universos sinus turgere, ac impositum pariter musculum elevari, ut ex hoc uno periculo evidentissime cognoscatur datos eos sinus fuisse, ut nonnulla sanguinis circa ea loca cunctatione vasa diducerentur, ac ab iis diductis, cum prae musculi pressu partes eae exterius tendi nequeant, ad interiora urgeantur; quod vel commodum ad arctum colis amplexum, vel ad secretionem internam promovendam in circumfritis glandulis: quandoquidem compertum in canis jugularis vincitura, lacrimarum, & salivae plurimum tum temporis secerni. Hos tamen sinus haudquaquam sub hoc sphinctere vaginae musculo conclusos tantum, ac terminatos ex Anatome comperrimus; horum siquidem plurimas propagines miros in flexus productas, & ad superam partem, ad clitoridem nempe, & ad exteriores, interioresque, labia scilicet, & nymphas non sine incredibili artificio disiectas vidimus, quarum ope facile intelligere est, qua ratione partes eae sub veneris stimulo turgeant.

i Locus est, ubi clitoridis corpus deorsum reflectitur, cuius fortasse gratia, atque etiam vaginae sphincteris, tota pudendorum moles dextrorsum ducta, & inclinata est.

LL » Transversales musculi novi prope musculorum clitoridis principium nati ».

Quam hi musculi distent ab iis, quos olim Santorinus descripsit, intuenti facile occurret. Tunc enim unum musculum » transversum ductum, teretem, & juxta sphincteris fibras recto intestino » arctissime junctum, nil penitus ibi mutatum, in adversum latus, » eadem prorsus ratione se habentem, insertum » & scriptis, & figura exhibuit (a). Nunc vero tamquam binos, singulos in singulis lateribus, teretes quidem initio, sed procedendo, antequam sphincterem ani externum subeant, admodum immutatos, explicatosque adeo perhibet, ut horum fibrarum pars pone sphincterem descendat, pars in transversum excurrat, reliqua denique inter superiores ani sphincteris externi fibras sese demittat.

ll » Bini validissimi sphincteris lacerti, qui utrinque ab ischio enanti in imum ani applicantur ».



(a) Ibid. §. II. Tab. II. fig. 1. lit. g g.


- M M Sphincter externus ani, cujus is  
 m Exitus antcrius est, ut decussatis fibrarum fasciculis in cutem,  
 & membranam adiposam, quae pone fraenulum est, terminetur.  
 n Ejusdem tenue initium a cute extremum coccygis os tegente.  
 N Cutis particula.  
 O Anus.  
 o o Sphincter ani interior, orbicularis, extremam intestini recti  
 oram ambiens.  
 P P Musculi levatores ani.  
 Q Obturator internus.  
 p p An ligamentorum os sacrum cum ischio neclentium reliquiae?  
 q Adiposae membranae portio, aut si mavis, adipis illius vesti-  
 gium, qui magna copia inter membranaceam illam substantiam,  
 e qua vaginae sphincter enascitur, & musculos ani levatores, tam-  
 quam in cavea quadam, constitutus occurrit.































## TABULA CUBOLI I.

*Ad ejusdem scripta, quae explicationi Tabulae VIII. Santorini  
pag. 92. & seqq. addidimus, pertinens,*

Mulieris primiparae quatuor & viginti annos natae irregularem mammae dexteræ basim ostendit, in qua plures vasorum lacteorum radices ex acinis prodeuntes, atque ex minoribus in majores sensim convenientes, mammaeque substantiam subeuntes conspiciuntur.




- A **P**ars mammae superior est, quae valde sursum protenditur.
- B Altera, quae paulo plus patefcit ad exteriorem partem, qua ad alas usque pertingit.
- C Inferior pars, quae minus, quam caeterae, producta est, simulque
- D Interior; quae duo ambitu fere orbiculato circumscribuntur.
- a a a &c. Acini, qui ex pluribus quasi miculis, circum circa radiorum instar dispositis, aut potius quam minimis oblongis vesiculis singuli effingi, & conformari videntur.
- b b b &c. Radiculae singulae, quae ex singulis acinis proficiscuntur, quae ubi vix aliquantulum incesferint, altera cum altera inter se conveniunt, & brevi confecto itinere, intro se immiffum eunt in mammae corpus, eodem ac caeterae, contendentes.
- c c c &c. Aliae radices sunt, quae cum modo exhibitis plane conveniant, earum descriptionem omittendam esse censuimus.
























## TABULA CUBOLI II.

### FIGURA I.

*Eodem ac Tabula I. una cum reliquis hujusce Tabulae figuris spectans,*


Provinciam a caeteris mammae secretam, atque ex interiori facie exhibitam demonstrat, ut vasorum origines, eorumque directio dilucide in conspectum veniant.



a a a &c. **D**uctus lactiferi, qui non rectis lineis incedunt, sed nonnihil flexuosis, & ad angulos fere curvilineos inter se coeunt.  
b b b &c. Trunci ductuum lactiferorum, quorum alii majores sunt, minores alii.

### FIGURA II.

Vasa lactea in sinum conicum corrivantia ostendit, ex quo tenuis, exilisque excretorius ductus emergit.



a a a &c. **T**runci vasorum lactiferorum, qui in  
b Sinum conveniunt, e quo  
c Ductus excretorius emergit, apice nonnihil incurvo.

## FIGURA III.


Inversam areolae, papillaeque partem repraesentat, ut vasa lactea excretoria secundum finitorem discissa, papillam subeuntia, conspiciantur.



- a a     Areola ex interiori parte inspecta.  
 b b     Papillae interior circumferentia, in qua  
 c c c &c. Oscula ductuum excretoriorum, juxta finitorem dissectorum observantur.

## FIGURA IV.


Duas vasorum lacteorum radices ex acinibus, a reliqua glandulari substantia secretis, radiato principio emergentes exhibet, ut luculentius earum initium, atque directio occurrat.



- a a a &c. Acini radiorum instar circum circa dispositi, e quibus radiculae proficiscuntur, quae in  
 b b     Trunculos abeunt.

## FIGURA V.


Eandem provinciam figurae I., sed inversa, exteriorique facie inspiciendam ostendit, ut ejusdem laciniae, foveae, irregularitates in propatulo sint.




- a a a &c. Appendiculae, quae a mammarum superficie hic illic liberae, & solutae dependent.  
 b b b &c. Foveae hic illic passim excavatae, quemadmodum etiam in Santorini Tab. VIII. luculenter apparent.
















## TABULA GIRARDI I.

*Ad ea, quae pag. 110. & seqq. exhibuimus, pertinens,*

Sectionem mammae circa medium, ac secundum vasorum lactiferorum directionem ostendit, ut ejusdem secretae provinciae, ac eorundem vasorum finus, forma, directio, atque sedes conspiciantur.



- A **P**apilla, cui magna areolae portio adhaeret.
- a a a Vasa lactea, quemadmodum secundum naturam se habebant, levissima cerae injectione tentata.
- B Vas lactiferum injecta cera caerulea repletum, in cujus incessu non modo nonnullas ejusdem radices, & truncos ad angulos curvilineos inter se convenire, sed alternatim sinuosos esse observatur, donec in
- b Sinum majorem perpetuum, singulis communem conveniant, cujus ductus excretorius statim infra areolam excurrit, papillam subiturus.
- C Vas alterius provinciae cera rubra repletum, cujus radices, & trunci eadem ferme ratione se habere conspiciuntur, donec & ipsi in
- c Sinum communem abeant, cujus excretorius ductus vix e sinu emersus, dissectus est.
- D Vas tertiae provinciae lactiferum injecta viridi cera repletum, cujus incessus haud luculenter apparet, cum majori ex parte adhuc intra glandulae substantiam demersum sit, ne radices vasis provinciae C, illud nudando, depravarentur.
- d Sinus vasis ejusdem, in quem ex opposita parte truncus ex ejusdem provincia sese demittit, quemadmodum & in sinu provinciae C observatur.








## TABULA GIRARDI II.

### FIGURA I.

*Ad ea, quae pag. 185. & seqq. conscripsimus, pertinet,*

Dissecto sex circiter mensium foetu praeter inversi jecinoris magnitudinem, & sedem, ventriculi constitutionem, renum succenturiatorum amplitudinem, pluraque alia, potissimum testium sedes, eorumque vasa, & tunica vaginalis peritoneaeo continua perbelle conspiciuntur.



- A** **T**horax, cujus inferior pars circum undique resecta, & ablata est, ut jecur ad superiora converti, ejusdemque sima facies apte conspici possit; hinc
- a** Os sterni, &
- b b b & c.** Costae, &
- c** Diaphragmatis plica apparent.
- BBB** Molles abdominis parietes resecti, peritoneaeo obducti, atque ad latera revoluti.
- CC** Jecur, in foetibus praegrande, quod non modo dexterum, sed & sinistrum hypocondrium tenet.
- d** Umbilicalis vena cognominem
- e** Fissuram subiens.
- f** Isthmus jecinoris, cui sulcus subest, per quem vena umbilicalis in venae portarum sinum excurrit, ut in Tabula Santorini XI. videre est.
- g** Lobulus Spigelio dictus.
- h** Vesicula fellis, quae in foetibus ad ovalem figuram quamma-xime accedit.
- i** Cysticus ejusdem ductus.
- k** Jecoris scissura ad latera sinus, vesiculae excipiendae facti.

- D Ventriculus.
- l Intestini duodeni curvatura.
- m Jejuni summa pars.
- n Mesaraei portio.
- o Pancreas ex jecinoris inversione eo loci deorsum detrusum.
- p Lien praegrandis, & in isto foetu fere in binos diremptus.
- EE Renes.
- qq Glandulae renales, aut renes succenturiati, quorum dexter una cum rene e sua sede remotus, atque ad interiora nonnihil revolutus, naturalem suam magnitudinem ostendit.
- F Truncus cavae inferioris.
- G Aorta, sive arteria magna.
- rr Vasa emulgentia.
- s Vena quae ex emulgente sinistra in glandulam renalem tendit.
- t Vena spermatica dextera, &
- u Ejusdem lateris arteria spermatica, quae in fasciculum junctae tortuoso incessu descendunt.
- v Arteria spermatica sinistra.
- x Vena spermatica sinistra, quae in emulgentem sui lateris abit.
- y Duplicatura peritoneae, qua spermatica vasa testem subeunt.
- H Testis dexter paulo infra renes intra cavitatem abdominis comprehensus, ejusque
- z Epididymis fere soluta, ac nutans.
- α Vas semen deferens serpentino incessu incedens.
- I Basis mucosa peritoneae obducta, quae testis subjicitur, ac in eundem continuatur.
- K Testis sinister e cavo abdominis ad inguina delapsus, jamjam scrotum subiturus.
- β Epididymis.
- γ Vas semen deferens.
- δδ Integumenta secundum longitudinem discissa, atque ad latera revoluta.
- εε Peritoneum ad anuli, sive fessurae abdominalis regionem ad anteriora recta linea defectum, ut
- ζζ Tunica vaginalis pariter discissa, e peritoneae producta, eademque continuata luculenter in conspectum prodeat.





Fig. I.




Fig. II.




Fig. I.





Fig. II.







- L Intestinum rectum meconio repletum .  
 η η Ureteres .  
 M Vesica urinaria deorsum inflexa , ac revoluta .  
 θ Urachus .  
 ∫ ∫ Vasa iliaca .  
 ι ι Umbilicales arteriae in iliacas arterias abeuntes .  
 κ Nodus , anfractusve , qui in dextera hujusce foetus umbilicali arteria occurrebat .  
 N Pars umbilicalis funiculi in spiram convoluti , in quo vasorum nodi conspiciuntur .

## FIGURA II.

*Eodem spectans ,*

Foetus quatuor circiter mēnsium testes peritoneo , ut caetera , obductos adhuc in abdominis cavo haerentes exhibet , quorum bases apice suo in os pubis sese demittere apertissime observantur .



- a a **R**enes .  
 b b Ureteres .  
 c Vesica urinaria sursum una cum  
 d d Arteriis umbilicalibus revoluta .  
 e e Vasa spermatica sinuosis flexibus incedentia .  
 ff Testes , eorundemque  
 g g Epididymides .  
 h h Vasa semen deferentia serpentino incessu procedentia .  
 i i Testium bases , quarum  
 k k Apices infra  
 l l Peritoneum in  
 m Os pubis sese demittere , atque explicare conspiciuntur .

FINIS .



## M O N I T A.

**T**abulae singulae tam umbratae, quam lineares, ad instar Eustachii Tabularum, quas Albinus vulgavit, post cujusque explicationem collocabuntur. Ut autem Cuboli, & Girardi Tabulae a Santorinianis distinguantur, primae illae litteram C, posteriores lit. G praeseferent.

Pauca quaedam sphalmata, quae in hanc editionem irrepsērunt, Lectorum solertia corrigentur, humanitate condonabuntur.



NOI PRESIDENTE, E RIFORMATORI  
DE' REGJ STUDI.

Avendo riconosciuto, che nel presente Libro, intitolato *Jo: Dominici Santorini Anatomici Summi Septemdecim Tabulae, quas nunc primum edit, atque explicat, iisque alias addit de Structura mammarum, et de Tunica testis vaginali Michael Girardi in Regia Parmensi Universitate Anatomes Professor Primarius etc.*, nulla vi sia, che ripugni ai Dogmi della Religione, ed alla Pietà della Morale Cristiana, e nulla che si opponga ai Diritti de' Sovrani, si permette di poterlo pubblicare, presentandone quindi un esemplare al Ministro, e Segretario di Stato, ed un altro alla Real Biblioteca.

Parma 23. Maggio 1775.

PRESIDENTE, E MAGISTRATO  
DE' RIFORMATORI.

A. Mazza Segretario.







